


Hilosophie

---





M.

C.

P.

S.



M. TVLLII CICERONIS  
OFFICIORVM LIB. III.

CATO MAIOR, *uel* DE SENE-  
CTVTE: LAELIVS, *uel* DE A-  
MICITIA.

PARADOXA STOICORVM VI.  
SOMNIVM SCIPIONIS, EX  
LIB. VI. DE REPVBLICA.

*Quæ qui leget, facile, quantum in ijs emendandis  
studium sit adhibitum, intelliget.*

*Additæ sunt in extremo opere variae lectiones è  
libris manu scriptis, & ex ingenio.*

35



PARISIIS.

Ex officina Roberti Stephani typographi Regij.

M. D. XLIII.



M. TVLLII CICERONIS OF-  
FICIORVM AD MARCVM  
FELIVM LIBER I.



QVAM te Marce fili an-  
num iam audientem Cratippum, la-  
que Athenis, abundare oportet præ-  
ceptis, institutisque philosophiæ, pro-  
pter summam & doctoris auctorida-  
tem, & urbis, quorum alter te scientia augere potest,  
altera exemplis: tamen, ut ipse ad meâ utilitatem sem-  
per cum Græcis Latina coniunxi, neque id in philoso-  
phia solum, sed etiâ in dicendi exercitatione feci, idem  
tibi censeo faciendum, ut par sis in utriusque oratio-  
nis facultate | quam quidē ad rem nos (ut videmur) ma-  
gnum attulimus adiumentū hominibus nostris: ut non  
modo Græcarū literarum rudes, sed etiam docti ali-  
quantum se arbitrentur adeptos & ad dicendum, &  
ad iudicandū. Quamobrem disces tu quidem à prin-  
cipe huius ætatis philosophorum, & disces, quā diu  
uoles: (tam diu autem uelle debebis, quoad te, quātum  
proficias, non pœnitebit) sed tamen nostra legens non  
multum à Peripateticis dissidentia, (quoniam utrique  
& Socratici, & Platonici esse uolumus) de rebus ipsis  
utere tuo iudicio. nihil enim impedio: orationē autem  
Latinam profecto legendis nostris efficies pleniorē.  
Nec uero hoc arroganter dictum existimari uelim. nā  
philosophandi scientiam concedens multis: quod est o-  
ratoris proprium, apte, distincte, ornateque dicere, quo-  
niam in eo studio ætatem consumpsi, si id mihi assu-

mo, uideo id meo iure quodā modo uendicare. Quāobrem magnopere te hortor mi Cicero, ut non solū orationes meas, sed hos etiā de philosophia libros, qui iam se illis ferē aequarunt, studiose legas. wis enim dicendi maior est in illis, sed hoc quoque colendum est æquabile, & temperatum orationis genus. Et id quidem nemini uideo Græcorū adhuc contigisse, ut idem utroque in genere laboraret, sequereturque & illud forense dicendi, & hoc quietum disputandi genus: nisi forte Demetrius Phalereus in hoc numero haberi potest, disputator subtilis, orator parum uehemens, dulcis tamē, ut Theophrasti discipulum possis agnoscere. Nos autem quantum in utroque profecerimus, aliorum sit iudicium: utrūque certe secuti sumus. Equidem & Platonem existimo, si genus id forense dicendi tractare uoluisset, grauissime, & copiosissime potuisse dicere: & Demosthenem, si illa, quæ a Platone didicerat, tenuisset, & pronunciare uoluisset, ornate, splendidēque facere potuisse. eodēque modo de Aristotele, & Isocrate iudico: quorum uterque suo studio delectatus, contempsit alterum. Sed, cum statuissem aliquid hoc tempore ad te scribere, & multa posthac, ab eo exordiri uolui maxime, quod & ætati tuæ esset aptissimum, & auctoritati meæ grauissimum. nam, cum multa sint in philosophia & grauias, & utilia, accurate, copiosēque a philosophis disputata, latissime patere uidentur ea, quæ de officijs tradita ab illis, & præcepta sunt. nulla enim uitæ pars neque publicis, neque priuatis, neque forensibus, neque domesticis in rebus, neque si tecum agas quid, neque si cum altero contrahas, uacare officio potest: in eoque colendo sita uitæ est honestas omnis, &

in negligendo turpitudine. Atque hæc quidem quæstio communis est omnium philosophorum. quis est enim, qui nullis officiij præceptis tradendis philosophum se audeat dicere? sed sunt nonnullæ disciplinæ, quæ, propositis malorum et bonorum finibus, officium omne peruertunt. nam, qui summum bonum sic instituit, ut nihil habeat cum uirtute coniunctum, idque suis commodis, non honestate metitur: hic si sibi ipse consentiat, et non interdum naturæ bonitate uincatur, fit ut neque amicitiam colere possit, nec iustitiam, nec liberalitatem: fortis uero, dolorem summum malum iudicans: aut temperans, uoluptatem summum bonum statuens, esse certe nullo modo potest. Quæ quæqu岸 ita sunt in promptu, ut res disputatione non egeat: tamen sunt à nobis alio loco disputata. Hæ disciplinæ igitur, si sibi consentaneæ esse uelint, de officio nihil queant dicere: neque ulla officiij præcepta firma, stabilia, coniuncta naturæ tradi possunt, nisi aut ab ijs qui solam, aut ab ijs qui maxime honestatem propter se dicant expetendā. Itaque propria est ea præceptio Stoicorum, et Academicorum, et Peripateticorum: quoniam Aristonis, Pyrrhonis, et Herilli iam pridē explosa sententia est: qui tamen haberent ius suum disputandi de officio, si rerū aliquem delectum reliquissent, ut ad officiij inuentionem aditus esset. Sequemur igitur hoc quidē tempore, et in hac quæstione potissimum Stoicos, non ut interpretes, sed, ut solemus, è fontibus eorum, iudicio, arbitrioque nostro, quantum, quoque modo uidebitur, hauriemus. Placet igitur, quoniam omnis disputatio de officio futura est, ante definire, quid sit officium: quod à Panætio prætermissum esse miror. omnis enim, quæ

à ratione suscipitur de aliqua re institutio, debet à definitione proficisci: ut intelligatur, quid sit id, de quo disputetur. Omnis de officio duplex est questio. unum genus est, quod pertinet ad finem bonorum: alterum, quod positum est in præceptis, quibus in omnes partes usus uitæ confirmari possit. superioris generis huiusmodi exēpla sunt: Omniāne officia perfecta sint: Nunquid officium aliud alio maius sit, & quæ sunt generis eiusdem. quorum autem officiorum præcepta traduntur, ea, quanquam pertinent ad finem bonorum, tamen id minus apparet, quia magis ad institutionem uitæ communis spectare uidetur. de quibus est nobis his libris explicandū. Atque etiam alia diuisio est officiū. nam & mediū quoddam officiū dicitur, & perfectum. Perfectum autem officium, rectum (opinor) uocamus, quod Græci κατόρθωμα: hoc autem, commune, quod ἡ κοινὴ uocant. atq; ea sic definiunt, ut rectum quod sit, id perfectum officiū esse definiant: mediū autem officium id esse dicant, quod cur factum sit, ratio probabilis reddi possit. Triplex igitur est, ut Panætio uidetur, consilij capiendi deliberatio. nam, honestūne factū sit, an turpe, dubitant, id, quod in deliberationem cadit. in quo considerando, sæpe animi in contrarias sententias distrahūtur. Tum autem inquirunt, aut consultant ad uitæ commoditatem, iucunditatemque, ad facultates rerum, atq; copias, ad opes, ad potentiam, quibus & se possint iuuare, & suos, conducit id, necne, de quo deliberant: quæ deliberatio omnis in rationem utilitatis cadit. Tertium dubitandi genus est, cum pugnare uidetur cum honesto id, quod uidetur esse utile. cum enim utilitas ad se rapere, hone-

stas contra reuocare ad se uidetur, sit, ut distrahatur  
 in deliberando animus, afferatque ancipitem curam  
 cogitandi. Hac in diuisione, cum præterire aliquid ma-  
 ximum uitium in diuidēdo sit, duo prætermissa sunt.  
 nec enim solum, utrum honestum, an turpe sit, deli-  
 berari solet: sed etiam duobus propositis honestis, u-  
 trum honestius: itēque duobus propositis utilibus,  
 utram utilius. ita, quam ille triplicem putauit esse ra-  
 tionem, in quinque partes distribui debere reperitur.  
 Primum igitur est de honesto, sed dupliciter: tum pa-  
 ri ratione de utili: post de comparatione eorum dis-  
 ferendum. Principio generi animantium omni est  
 à natura tributum, ut se, uitam, corpusque tueatur, de-  
 clinetque ea, quæ nocitura uideantur: omniaque, quæ  
 sint ad uiuendum necessaria, inquirat, et parat, ut  
 pastum, ut latibula, ut alia eiusdem generis. commune  
 item animantium omnium est coniunctionis appeti-  
 tus procreandi causa, et cura quedam eorum, quæ  
 procreata sunt. Sed inter hominem, et belluā hoc ma-  
 xime interest, quod hæc tantum, quantum sensu mo-  
 uetur, ad id solum, quod adest, quodque præsens est, se  
 accommodat, paululum admodum sentiens præteri-  
 tum, aut futurum: homo autem, qui rationis est parti-  
 ceps, per quam consequentia cernit, principia, et cau-  
 sas rerū uidet, earūque progressus, et quasi ante-  
 cessiones non ignorat, similitudines comparat, rebusque  
 præsentibus adiungit atque annectit futuras: facile to-  
 tius uitæ cursum uidet, ad eamque degendā præparat  
 res necessarias: eademque natura ui rationis hominem  
 conciliat homini et ad orationis, et ad uitæ societa-  
 tem: ingeneratque in primis præcipuum quendā amo-



rem in eos qui procreati sunt: impellitq; ut hominum  
coetus & celebrari inter se, & sibi obedire uelit: ob  
easque causas studeat parare ea, quae suppedient ad  
cultum, & ad uictum, nec sibi soli, sed coniugi, liberis,  
cæterisque, quos charos habeat, tuerique debeat. Quae  
cura exsuscitat etiam animos, & maiores ad rem ge-  
rendam facit. in primisque hominis est propria, ueri  
inquisitio, atque inuestigatio. Itaque, cū sumus necessa-  
rijs negotijs, curisque uacui, tum auemus aliquid uide-  
re, audire, ac discere: cognitionemque rerum aut ocul-  
tarum, aut admirabiliū, ad bene, beatēque uiuendum  
necessariam ducimus. ex quo intelligitur, quod uerum,  
simplex, sincerūque sit, id esse naturae hominis aptis-  
simum. Huic ueri uidendi cupiditati adiuncta est appe-  
titio quaedam principatus, ut nemini parere animus  
bene informatus à natura uelit, nisi praecipienti, & do-  
centi, aut utilitatis causa iuste & legitime imperanti:  
ex quo animi magnitudo existit, humanarūque rerū  
contemptio. Nec uero illa parua uis naturae est, ratio-  
nisque, quod unum hoc animal sentit, quid sit ordo,  
quid sit quod deceat in factis dictisque, qui modus. ita-  
que eorum ipsorum, quae aspectu sentiuntur, nullum  
aliud animal pulchritudinem, uenustatem, conueniē-  
tiam partium sentit. quam similitudinem natura, ra-  
tioque ab oculis ad animum transferens, multo etiam  
magis pulchritudinem, constantiam, ordinem in consi-  
lijs, factisque conseruandum putat: cauētq; nequid in-  
decōre, effœminateue faciat: tum, in omnibus & opi-  
nionibus, & factis nequid libidinoſe aut faciat, aut co-  
gitet. quibus ex rebus conflatur, & efficitur id, quod  
quaerimus, honestum: quod etiā si nobilitatum non sit,



tamen honestum sit: quódque uere dicimus, etiam si à nullo laudetur, laudabile esse natura. Formam quidem ipsam Marce fili, & tanquam faciē honesti uides: quæ si oculis cerneretur, mirabiles amores (ut ait Plato) excitaret sapientiæ. Sed omne, quod honestum est, id quatuor partium oritur ex aliqua. aut enim in perspicientia ueri, solertiaque uersatur: aut in hominum societate tuenda, tribuendóque suum cuique, & rerum contractarum fide: aut in animi excelsi atque inuicti magnitudine, ac robore: aut in omnium quæ fiunt, quæque dicuntur, ordine & modo in quo inest modestia, & temperat̃ia. Quæ quatuor quanquam inter se colligata, atque implicita sunt: tamen ex singulis certa officiorum genera nascuntur: uelut ex ea parte, quæ prima descripta est, in qua sapiētiā, & prudentiam ponimus, inest indagatio atque inuentio ueri: cuiusque uirtutis hoc munus est proprium. ut enim quisque maxime perspicit, quid in re quaque uerissimum sit, quique & acutissime, & ælerrime potest & uidere, & explicare rationem, is prudentissimus & sapientissimus rite haberi solet. quocirca huic, quasi materia, quam tractet, & in qua uersetur, subiecta est ueritas. Reliquis autem tribus uirtutibus necessitates propositæ sunt ad eas res parandas, tuendâsque, quibus actio uitæ continetur: ut societas hominum, coniunctioque seruetur: & animi excellentia, magnitudóque cum in augendis opibus, utilitatibusque & sibi, & suis comparandis, tum multo magis in his ipsis despiciendis eluceat. Ordo autem, & constantia, & moderatio, & ea quæ sunt his similia, uersantur in eo genere, ad quod adhibenda est actio quædā, non solum mētis agitatio.

his enim rebus quæ tractantur in uita, modum quendam adhibentes, & ordinem, & honestatem, & decus conseruabimus. Ex quatuor autem locis in quos honesti naturâ, uimque diuisimus, primus ille qui in ueri cognitione consistit, maxime naturâ attingit humanâ. omnes enim trahimur, & ducimur ad cognitionis, & scientiæ cupiditatem, in qua excellere pulchrum putamus: labi autem, errare, nescire, & decipi, & malum, & turpe ducimus. In hoc genere & naturali & honesto duo uitia uitanda sunt: unum, ne incognita pro cognitis habeamus, hisque temere assentiamus: quod uitium effugere qui uolet, (omnes autem uelle debebunt) adhibebit ad considerandas res & tempus, & diligentiam. alterum est uitium, quòd quidam nimis magnum studium, multamque operam in res obscuras, atque difficiles conferunt, easdemque non necessarias. quibus uitij declinatis, quod in rebus honestis, & cognitione dignis operæ, curæque ponetur, id iure laudabitur: ut in Astrologia C. Sulpitium audiuimus, in Geometria Sex. Pompeium ipsi cognouimus, multos in Dialectica, plures in iure civili. quæ omnes artes in ueri inuestigatione uersantur: cuius studio à rebus agendis abduci, contra officium est. uirtutis enim laus omnis in actione consistit: à qua tamen sæpe fit intermissio, multique dantur ad studia reditus: tum agitatio mentis, quæ nunquam acquiescit, potest nos in studijs cogitationis & sine opera nostra continere. Omnis autem cogitatio motusque animi aut in consilijs capiendis de rebus honestis & pertinentibus ad bene, beatèque uiuendum, aut in studijs scientiæ cognitionisque uersabitur. ac de primo quidem officij fonte diximus. De tribus autem reli-

quis, latissime patet ea ratio, qua societas hominum inter ipsos, & uitæ quasi communitas continetur. cuius partes duæ sunt: iustitia, in qua uirtutis splendor est maximus, ex qua boni uiri nominantur: & huic coniuncta beneficentia, quam eandem uel benignitatem, uel liberalitatem appellare licet. Sed iustitiæ primum munus est, ut ne cui quis noceat, nisi la- cessitus iniuria: deinde, ut communibus pro communi- bus utatur, priuatis autem ut suis. Sunt autem priuata nulla natura: sed aut ueteri occupatione, ut qui quon- dam in uacua uenerunt: aut uictoria, ut qui bello po- titi sunt: aut lege, aut pactione, conditione, sorte. ex quo fit, ut ager Arpinas Arpinatum dicatur, Tusculanus Tusculanorū. Similisque est priuatarum possessionum descriptio. ex quo, quia suum cuiusque fit eorum, quæ natura fuerat communia: quod cuique obtigit, id quis- que teneat. eo si quis sibi plus appetet, uiolabit ius hu- manæ societatis. Sed quoniam (ut præclare scriptum est à Platone) non nobis solum nati sumus, sed ortus no- stri partem patria, partem parentes uendicant, par- tem amici: atque (ut placet Stoicis) quæ in terris gignun- tur, ad usum hominum omnia creari, homines autem hominum causa esse generatos, ut ipsi inter se aliū aliud prodesse possent: in hoc naturam debemus ducem se- qui, & communes utilitates in medium afferre, muta- tione officiorum, dando, accipiendo, tum artibus, tum o- pera, tum facultatibus deuincire hominum inter homi- nes societatem. Fundamentum autē iustitiæ est fides, id est dictorū, conuentorūque constantia, & ueritas. ex quo, quanquam hoc uidebitur fortasse auipiam du- rius, tamen audeamus imitari Stoicos, qui studiose ex-

quirunt unde uerba sint ducta, credamûsq; , quia fiat quod dictum est, appellatam fidē. Sed iniustitiæ duo genera sunt: unum eorum, qui inferunt: alterum eorum, qui ab ijs quibus infertur, si possint, non propulsant iniuriam. nam qui iniuste impetum in quēpiam facit, aut ira, aut aliqua perturbatione incitatus, is quasi manus uolēter uidetur asferre socio: qui autem non defendit, nec obsistit, si potest, iniuriæ, tam est in uitio, quā si parentes, aut amicos, aut patriam deserat. Atque illæ quidem iniuriæ, quæ nocendi causa de industria inferuntur, sæpe à metu proficiuntur, cum is qui alteri nocere cogitat, timet ne nisi id alteri fecerit, ipse aliquo afficiatur incommodo. Maximam autem partem ad iniuriam faciendam aggrediuntur nonnulli, ut adipiscantur ea quæ concupierunt: in quo uitio latissime patet auaritia. Expetuntur autem diuitiæ tum ad usus uitæ necessarios, tum ad perfruendas uoluptates. In quibus autem maior est animus, in his pecuniæ cupiditas spectat ad opes, et ad gratificandi facultatē: ut nuper M. Crassus negabat ullam satis magnam pecuniam esse ei qui in Rep. princeps uellet esse, qui suis fructibus exercitum alere non posset. Delectant etiam magnifici apparatus, uitæque cultus cum elegantia, et copia. quibus rebus effectum est, ut infinita pecuniæ cupiditas esset. Nec uero rei familiaris amplificatio nemini nocens uituperanda est: sed fugienda semper iniuria. Maxime autem adducuntur plerique, ut eos iustitiæ capiat obliuio, cum in imperiorum, honorū, gloriæque cupiditatem inciderint. Quod enim est apud Ennium,

” Nulla sancta societas, nec fides regni est,

id latius patet. nam quicquid eiusmodi est, in quo non possint plures excellere, in eo plerunque fit tanta contentio, ut difficillimum sit sanctam seruare societatem. Declarauit id modo tempestas C. Cæsaris, qui omnia iura diuina & humana peruertit propter eum quem sibi ipse opinionis errore sinxerat, principatum. Est autem in hoc genere molestum, quod in maximis animis, splendidissimisque ingenijs plerunque existunt honoris, imperij, potentiae, gloriae cupiditates: quo magis cauendum est, ne quid in eo genere peccetur. Sed in omni iniustitia permultum interest, utrum perturbatione aliqua animi, quae plerunque brevis est, & ad tempus, an consulto, & cogitata fiat iniuria. leuiores enim sunt ea, quae repentino aliquo motu accidunt, quam ea quae meditata & praeparata inferuntur. Ac de inferenda quidem iniuria satis dictum est. Praetermittendae autem defensionis, deserendique officij plures solent esse causae. nam aut inimicitias, aut laborem, aut sumptus suscipere nolunt: aut etiam negligentia, pigritia, inertia, aut suis studijs, quibusdamue occupationibus sic impediuntur, ut eos, quos tutari debeant, desertos esse patiantur. Itaque uidendum est, ne non satis sit id quod apud Platonem est in philosophos dictum, quod in ueri inuestigatione uersentur, quodque ea quae plerique uehementer expetunt, de quibus inter se digladiari solent, contemnant, & pro nihilo ducant, propterea iustos esse. nam dum alterum iustitiae genus assequuntur, inferenda ne cui noceant iniuria: in alterum incidunt. discendi enim studio impediti, quos tueri debent, deserunt. itaque eos ne ad Rempub. quidem accessuros putat, nisi coactos. æquius autem erat id ho

luntate fieri. nam hoc ipsum ita iustum est, quod recte fit, si est uoluntarium. Sunt etiam qui aut studio rei familiaris tuendæ, aut odio quodam hominum suum se negotium agere dicant, ne facere cuiquam uideantur iniuriam: qui dum altero iniustitiæ genere uacant, in alterum incurrunt. deserunt enim uitæ societatem, quia nihil conferunt in eam studiū, nihil operæ, nihil facultatum. Quoniā igitur duobus generibus iniustitiæ propositis, adiunximus causas utriusque generis, easque res ante constituimus, quibus iustitia continetur: facile, quod cuiusque temporis officium sit, poterimus, nisi nosmet ipsos ualde amabimus, iudicare. est enim difficilis cura rerum alienarum: quanquam Terentianus ille Chremes humani nihil à se alienum putat. sed tamen, quia magis ea percipimus atque sentimus, quæ nobis ipsis aut prospera, aut aduersa eueniunt, quàm illa quæ cæteris, quæ quasi longo intervallo interiecto uidemus: aliter de illis, ac de nobis, iudicamus. Quocirca bene præcipiunt, qui uetant quicquam agere, quod dubites æquum sit an iniquum. æquitas enim lucet ipsa per se: dubitatio autem cogitationem significat iniuriæ. Sed incidunt sæpe tempora, cum ea quæ maxime uidentur digna esse iusto homine, eoque quem uirum bonum dicimus, commutantur, fiuntque contraria: ut, non reddere depositum, etiā ne furioso promissum facere, quæque pertinent ad ueritatem, et ad fidem, ea negare interdum, et non seruare sit iustum. referri enim deat ad ea, quæ proposui in principio, fundamenta iustitiæ: primum ut ne cui noceatur, deinde, ut communi utilitati seruiatur. ea cum tēpore commutatur, commutatur officium, ut non semper sit idem.

potest enim accidere promissum aliquod, & conuen-  
tum, ut id effici sit inutile uel ei cui promissum sit, uel  
ei qui promiserit. nam si (ut in fabulis est) Neptunus,  
quod Theseo promiserat, non fecisset, Theseus filio Hip-  
polyto non esset orbat. ex tribus enim optatis (ut seri-  
bitur) hoc erat tertium quod de Hippolyti interitu i-  
ratus optauit: quo impetrato, in maximos luctus in-  
cidit. Nec promissa igitur seruanda sunt ea, quæ sint  
ijs quibus promiseris, inutilia: nec si plus tibi noceât,  
quàm illi prosint, cui quidem promiseris, contra offi-  
cium est, maius damnum anteponi minori: ut, si con-  
stitueris te cuiquam aduocatum in rem præsentem esse  
uenturum, atque interim grauius ægrotare filius cœ-  
perit, non sit contra officium, non facere quod dixeris:  
magisque ille, cui promissum sit, ab officio discedat, si se  
destitutum queratur. Iam illis promissis non standum  
esse, quis non uidet, quæ coactus quis metu, aut de-  
ceptus dolo promiserit? quæ quidem pleraque iure præ-  
torio liberantur, nonnulla legibus. Existunt etiam  
iniuriæ sæpe calumnia quadam, & nimis callida, &  
malitiosa iuris interpretatione. ex quo illud, Summum  
ius summa iniuria, factum est iam tritum sermone  
proverbium. Quo in genere etiam in Repub. multa  
peccantur: ut ille, qui cum triginta dierum essent cum  
hoste pactæ induciæ, noctu populabatur agros, quod  
dierum essent pactæ, non noctium induciæ. Nec no-  
ster quidem probandus est: si uerum est, Q. Fabium  
Labeonem, seu quem alium (nihil enim præter audi-  
tum habeo) arbitrum Nolanis, & Neapolitanis de fi-  
nibus agri à Senatu datum, cum ad locum uenisset, cum  
utrisque separatim locutum, ne cupide quid agerent,



nec appeterent, atque ut regredi, quàm progredi mal-  
lent. id cum utrique fecissent, aliquantum agri in me-  
dio relictum est. itaque illorum fines, sicut ipsi dixe-  
rant, terminauit: in medio relictum quod erat, popu-  
lo Ro. adiudicauit. decipere hoc quidem, non iudicare  
est. quocirca in omni re fugiēda est talis solertia. Sunt  
autem quedam officia etiam aduersus eos seruanda,  
à quibus iniuriam acceperis. est enim ulciscendi, &  
puniendi modus: atque haud scio an satis sit eum, qui  
laxasset, iniuriæ suæ poenitere, ut ipse ne quid tale  
posthac committat, & cæteri sint ad iniuriam tardio-  
res. Atque in Rep. maxime conseruanda sunt iura bel-  
li. nam cum sint duo genera decertandi, unum per di-  
scertationem, alterum per uim: cumque illud proprium  
sit hominis, hoc belluarum: confugiendum est ad poste-  
rius, si uti non licet superiore. Quare suscipienda qui-  
dem bella sunt ob eam causam, ut sine iniuria in pace  
uiuatur: parsa autem uictoria conseruandi sunt ij, qui  
non crudeles in bello, nec immanes fuerunt: ut maio-  
res nostri Tusculanos, AEquos, Volscos, Sabinos, Herni-  
cos in ciuitatem etiam acceperunt: at Carthaginem &  
Numantiam funditus sustulerunt. nollem Corinthum:  
sed credo illos secutos opportunitatem loci maxime, ne  
posset aliquando ad bellum faciendum locus ipse ad-  
hortari. Mea quidem sententia, paci, quæ nihil habitu-  
ra sit insidiarum, semper est consulendum. in quo si mihi  
obtemperatum esset, si non optimam, at aliquam Remp.  
quæ nunc nulla est, haberemus. & cum ijs quos ui de-  
uiceris, consulendum est: tum ij qui armis positis ad im-  
peratorum fidem confugiunt, quanuis murum aries per-  
cussit, recipiendi sunt. in quo tantopere apud nostros



*iustitia culta est, ut ij qui ciuitates, aut nationes deuictas bello in fidem recepissent, earum patroni essent more maiorū. ac belli quidem æquitas sanctissime fœciali populi R. iure perscripta est. ex quo intelligi potest nullum bellum esse iustum, nisi quod aut rebus repetitis geratur, aut denunciatum ante sit & indictum. Pompilius imperator tenebat provinciam, in cuius exercitu Catonis filius tyro militabat. cum autē Pompilio uideretur unam dimittere legionē, Catonis quoque filium, qui in eadem legione militabat, dimisit. sed cum amore pugnandi in exercitu remansisset, Cato ad Pōpilium scripsit, ut si eum pateretur in exercitu remanere, secundo eum obligaret militiæ sacramento, quia priore amisso, iure pugnare cum hostibus non poterat. adeo summa erat observatio in bello mouendo. Marci quidem Catonis senis est epistola ad Marcum filium, in qua scripsit se audisse eum missum factum esse à Consule, cum in Macedonia bello Persico miles esset. Monet igitur ut caueat, ne prælium ineat: negat enim ius esse, qui miles non sit, pugnare cum hoste. Equidem illud etiam animaduerto, quod qui proprio nomine perduellis esset, is hostis uocaretur, lenitate uerbi tristitiam rei mitigante. hostis enim apud maiores nostros is dicebatur, quem nunc peregrinum dicimus; in-*

” dicant duodecim tabulæ, A V T status dies cum ho-

” ste: itēque, A D V E R S V S hostem æterna aucto-

” ritas. Quid ad hanc mansuetudinem addi potest, cum quicum bella geras, tam molli nomine appellare? quam id nomen durius efficit iam uetustas: à peregrino enim recessit, & proprie in eo qui contra ferret arma, remansit. Cum uero de imperio decertatur, bel-

lòque quæritur gloria, causas omnino subesse tamen oportet easdem, quas dixi paulo ante iustas causas esse bellorum. Sed ea bella quibus imperij gloria proposita est, minus acerbè gerenda sunt. Ut enim cum civiliter contendimus, aliter si est inimicis, aliter si competitor: cum altero certamè honoris & dignitatis est, cum altero capitis, & famæ: sic cum Celtiberis, cum Cimbris bellum ut cum inimicis gerebatur, uter esset, non uter imperaret: cum Latinis, Sabinis, Samnitibus, Pœnis, Pyrrho de imperio dimicabatur. Pœni fœdissimi, crudelis Annibal, reliqui iustiores. Pyrrhi quidem de captiuis reddendis illa præclara sententia est,

- » Nec mi aurum posco, nec mi pretium dederitis:
- » Nec cauponantes bellum, sed belligerantes,
- » Ferro, non auro vitam ærnamus utrique.
- » Vósne uelit, an me regnare hera, quidne ferat sors,
- » Virtute experiamur. & hoc simul accipe dictum.
- » Quorum uirtuti, belli fortuna pepercit,
- » Eorundem me libertati parcere certum est.
- » Dono: ducite: dòque uolentibus cum magnis dijs.

Regalis sanè & digna AEacidarum genero sententia. Atque etiam, siquid singuli, temporibus adducti, hosti promiserint, est in eo ipso fides seruanda. Ut primo Punico bello Regulus captus à Pœnis, cum de captiuis commutandis Romam missus esset, iurassètque se rediturum, primum ut uenit, captiuos reddendos in Senatu non censuit: deinde, cum retineretur à propinquis, & ab amicis, ad supplicium redire maluit, quàm fidem hosti datam fallere. Ac de bellicis quidem officijs satis dictum est. Meminerimus autem & aduersus infimos iustitiam esse seruandam. Est autem infima

conditio & fortuna seruatorum: quibus non male præcipiunt, qui ita iubent uti, ut mercenarijs ad operam exigendam & iusta præbenda. Cum autem duobus modis, id est aut vi, aut fraude fiat iniuria: fraus quasi uulpeculæ, uis leonis uidetur: utrumque alienissimum ab homine est, sed fraus odio digna maiore. Totius autem iniustitiæ nulla capitalior est, quàm eorum qui tum, cum maxime fallunt, id tamen agunt, ut uiri boni esse uideantur. de iustitia satis dictum est. Deinceps (ut erat propositum) de beneficentia, ac liberalitate dicatur. qua quidem nihil est naturæ hominis accommodatius: sed habet multas cautiones: uidendum est enim primum, ne obsit benignitas & ijs ipsis quibus benigne uidebitur fieri, & cæteris: deinde ne maior benignitas sit, quàm facultas: tum ut pro dignitate cuique tribuatur. id enim est iustitiæ fundamentum: ad quam hæc referenda sunt omnia. nam & qui gratificantur cuiquam, quod obsit illi cui prodesse uelle uideantur, non benefici, neque liberales, sed perniciosi assentatores iudicandi sunt: & qui alijs nocent, ut in alios liberales sint, in eadem sunt iniustitia, ut si in suam rem aliena conuertant. Sunt autem multi, & quidem cupidi splendoris, & gloriæ, qui eripiunt ab alijs, quod alij largiantur: hi que arbitrantur se beneficos in suos amicos uisum iri, si locupletent eos quacunque ratione. Id autem tantum abest ab officio, ut nihil magis officio possit esse contrarium. Videndum est igitur, ut ea liberalitate utamur, quæ profit amicis, noceat nemini. Quare L. Syllæ, & C. Cæsaris pecuniarum translatio à iustis dominis ad alienos nō debet liberalis uideri. nihil enim est liberale, quod nō sit idem iustum.

Alter locus erat cautionis, ne benignitas maior esset quam facultates: quod qui benigniores uolunt esse, quam res patitur, primum in eo peccant, quod iniuriosi sunt in proximos. quas enim copias his et suppetitari æquius est, et relinquere, eas transferunt ad alienos. Inest autem in tali liberalitate cupiditas rapiendi plerumque et auferendi per iniuriā, ut ad largiendum suppetant copię. Videre etiam licet plerosque non tam natura liberales, quam quadā gloria ductos, ut benefici uideantur, facere multa, quę ab ostentatione proficisci magis quam a uoluntate uideantur. Talis autem simulatio uanitati est coniunctior, quam aut liberalitati, aut honestati. Tertium est propositum, ut in beneficentia delectus esset dignitatis. in quo et mores eius erunt spectandi, in quem beneficium confertur, et animus erga nos, et communitas, ac societas uitę, et ad nostras utilitates officia ante collata. quę ut concurrāt omnia, optabile est: si minus, plures causas, maiorēsq; ponderis plus habebunt. Quoniam autem uiuitur non cum perfectis hominibus, plenęque sapientibus, sed cum ijs in quibus præclare agitur, si sint simulacra uirtutis: etiam hoc intelligendum puto, neminem omnino esse negligendum, in quo aliqua significatio uirtutis appareat: colendū autem esse ita quenque maxime, ut quisque maxime uirtutibus his lenioribus erit ornatus, modestia, temperantia, ac ipsa, de qua iam multa dicta sunt, iustitia. nam fortis animus, et magnus in homine non perfectio, nec sapiente feruentior plerūque est: illę uero uirtutes bonum uirum uidentur potius attingere. atque hæc in moribus considerentur. De beneuolentiā autē quam quisque habeat

erga nos, primum illud est in officio, ut ei plurimum tribuamus, à quo plurimum diligimur: sed beneuolentiam non adolescentulorum more, ardore quodam amoris, sed stabilitate potius & constantia iudicemus. Sin erunt merita, ut non ineunda, sed referenda sit gratia, maior quædam cura adhibenda est. nullum enim officium referenda gratia magis necessarium est. Quòd si ea quæ acceperis utèda, maiore mēsurā (si modo possis) iubet reddere Hesiodus: quidnam beneficio prouocati facere debemus? an non imitari agros fertiles, qui multo plus afferunt, quàm acceperunt? Etenim si in eos quos speramus nobis profuturos, non dubitamus officia cōferre: quales in eos esse debemus, qui iam profuerunt? Nam cum duo genera liberalitatis sint, unum dandi beneficij, alterum reddendi: demus, necne, in nostra potestate est: nō reddere, uiro bono nō licet, si modo id facere possit sine iniuria. Acceptorum autem beneficiorum sunt delectus habēdi: nec dubium, quin maximo cuique plurimum debeatur. In quo tamen in primis, quo quisque animo, studio, beneuolentia fecerit, ponderandum est. multi enim multa faciunt temeritate quadam, sine iudicio, uel modo in omnes, uel repente quodam, quasi uento, impetu animi incitati. quæ beneficia æque magna non sunt habenda, atque ea quæ iudicio, considerate, constantérque delata sunt. Sed in collocando beneficio, & in referenda gratia, si cætera paria sunt, hoc maxime officij est, ut quisque maxime opis indigeat, ita ei potissimū opitulari. quod contra fit à plerisque: à quo enim plurimum sperāt, etiam si ille his non eget, tamen ei potissimum inserviunt. Optime autem societas hominum, coniunctiōque

seruabitur, si ut quisque erit coniunctissimus, ita in eum benignitatis plurimum conferetur. Sed quæ naturæ principia sint communitalis & societatis humanæ, repetendum altius uidetur. est enim primum quod cernitur in uniuersi generis humani societate. eius autem uinculum est ratio, & oratio, quæ docendo, discendo, communicando, disceptando, iudicando conciliat inter se homines, coniungitque naturali quadam societate. Neque ulla re longius absumus à natura ferarum: in quibus inesse fortitudinem sæpe dicimus, ut in equis, in leonibus iustitiam, æquitatem, bonitatem non dicimus. sunt enim rationis & orationis expertes. Ac latissime quidem patens hominibus inter ipsos omnibus inter omnes societas hæc est. in qua omnium rerum, quas ad communem usum hominum natura genuit, est seruanda communitas, ut quæ descripta sunt legibus & iure civili, hæc ita teneantur, ut sit constitutum: è quibus ipsis cætera sic obseruentur, ut in Græcorum prouerbio est, Amicorum omnia esse communia. Omnia autem communia hominum uidentur ea quæ sunt generis eiusdem, quod ab Ennio positum in una re, transferri per multas potest:

- „ Vt homo, qui erranti comiter monstrat uiam,
- „ Quasi lumen de suo lumine accendat, facit,
- „ Vt nihilominus ipsi luceat, cum illi accenderit.

una enim ex re satis præcipitur, ut, quicquid sine detrimento possit commodari, id tribuatur cuique, uel ignoto. Ex quo sunt illa communia, Non prohibere aquam profluentem: Pati ab igne ignem capere: Siquis uelit consilium fidele deliberanti dare. quæ sunt ijs utilia, qui

accipiunt: danti non molesta. Quare & his utendum est, & semper aliquid ad communem utilitatem afferendum. Sed quoniam copiae parvae singulorum sunt, eorum autem, qui his egeant, infinita est multitudo, vulgaris liberalitas referenda est ad illum Ennii finem: „ Nihilominus ut ipsi luceat: ut facultas sit, qua in nostros simus liberales. Gradus autem plures sunt societatis hominum. ut enim ab illa discedatur infinitate, propior est eiusdem gentis, nationis, linguae, qua maxime homines coniunguntur: interius etiam est, eiusdem esse civitatis. multa sunt enim civibus inter se communia, fori, fora, porticus, viae, leges, iura, iudicia, suffragia, consuetudines praeterca & familiaritates, multaeque cum multis res, rationesque contracte. Artior uero colligatio est, societas propinquorum. ab illa enim immensa societate humani generis, in exiguum, angustumque concluditur. nam cum sit hoc natura commune omnium animalium, ut habeant libidinem procreandi: prima societas in ipso est coniugio, proxima in liberis, deinde una domus, communia omnia. id autem est principium urbis, & quasi seminarium Reip. Sequuntur fratrum coniunctiones, post consobrinorum sobrinorumque: qui cum una domo iam capi non possint, in alias domos, tanquam in colonias, exeunt. Sequuntur connubia & affinitates: ex quibus etiam plures propinqui. quae propagatio & soboles, origo est Rerum. Sanguinis autem coniunctio & benevolentia deuincit charitate homines. magnum est enim eadem habere monimenta maiorum, eisdem uti sacris, sepulcra habere communia. Sed omnium societatum nulla praestantior est, nulla firmitior, quam cum uiri boni, moribus similes, sunt familiaritate con-



iuncti: illud enim honestum, quod sæpe diximus, etiã si in alio cernimus, tamen nos mouet, atque illi in quo id inesse uidetur, amicos facit. Et quanquã omnis uirtus nos ad se allicit, facitque ut eos diligamus, in quibus ipsa inesse uideatur: tamẽ iustitia & liberalitas id maxime efficit. nihil autem est amabilius, nec copulatius, quàm morum similitudo bonorũ. in quibus enim eadem studia sunt eadẽmq; uolũtates, in his fit, ut æque quisque altero delectetur, ac se ipso: efficiturq; id quod Pythagoras uult in amicitia, ut unus fiat ex pluribus. Magna etiam illa cõmunitas est, quæ conficitur ex beneficijs ulro citrõque datis, acceptisq;. quæ mutua & grata dum sunt, inter quos ea sunt, firma deuinciuntur societate. Sed cum omnia ratione animoq; lustraueris, omniũ societatum nulla est gratior, nulla charior, quàm ea quæ cum Rep. est uni cuique nostrum. chari sunt parentes, chari liberi, propinqui, familiares: sed omnes omnium charitates patria una complexa est. pro qua quis bonus dubitet mortem oppetere, si ei sit profuturus? Quo est detestabilior istorum immanitas, qui lacerarũt omni scelere patriã, & in ea funditus delenda occupati & sunt, & fuerunt. Sed si contentio quædam, & comparatio fiat, quibus plurimum tribuendũ sit officij: principes sunt patria, & parentes, quorum beneficijs maxime obligati sumus: proximi liberi, totãq; domus quæ spectat in nos solos, neque aliud ullum potest habere persugium: deinceps bene conuenientes propinqui, quibus communis etiã plerũque fortuna est. Quãobrem necessaria uitæ præsidia debentur ijs maxime, quos ante dixi: uita autem uictũsq; communis, consilia, sermones, cohortationes, consolationes, interdum etiam



obiurgationes in amicis uigent maxime: éstque ea iucundissima amicitia, quam similitudo morum coniungauit. Sed in his omnibus officijs tribuendis, uidendũ erit, quid cuique maxime necesse sit, & quid quisque nobiscum, uel sine nobis aut possit cõsequi, aut non possit. ita non ydem erunt necessitudinum gradus, qui & temporum. sũntque officia, quæ alijs magis, quàm alijs, debeantur: ut, uicinum citius adiueris in frugibus percipiendis, quàm aut fratrem, aut familiarem. at si lis in iudicio sit, propinquũ potius, & amicum, quàm uicinum defenderis. Hæc igitur, & talia circumspicenda sunt in omni officio: & consuetudo, exercitatioque capienda, ut boni ratiocinatores officiorum esse possimus, & addendo, deducendóque uidere, quæ reliqui summa fiat: ex quo, quantum cuique debeatur, intelligas. Sed, ut nec medici, nec imperatores, nec oratores, quauis artis præcepta percæperint, quicquam magna laude dignum sine usu, & exercitatione consequi possunt: sic officiũ conseruandi præcepta traduntur illa quidem, ut faciamus ipsi: sed rei magnitudo usum quoque, exercitationemque desiderat. atque ab ijs rebus, quæ sunt in iure societatis humanæ, quemadmodum ducatur honestum, ex quo ortum est officium, satis ferè diximus. Intelligendum est autem, cum posita sint genera quatuor, è quibus honestas, officiũque manaret, splendidissimum uideri, quod animo magno, elatíoque, humanasque res despiciente factum sit. itaque in probris maxime in promptu est, siquid tale dici potest:

- „ Vos etenim iuuenes animum geritis muliebrem,
- „ Illaque uirgo uiri. & siquid huiusmodi:

tum esse cupiditate vincendi: sic ut quisque animi magnitudine maxime excellit, ita maxime uult princeps omnium esse, uel potius solus esse. difficile autem est, cum præstare omnibus concupieris, seruare æquitatem, quæ est iustitiæ maxime propria. Ex quo fit, ut neque disceptatione uinci se, nec ullo publico, ac legitimo iure patiantur: existuntque in Rep. plerumque largitores, et factiosi, ut opes quammaximas consequantur, et sint ui potius superiores, quam iustitia pares. Sed quo difficilius, hoc præclarius. nullum enim est tempus, quod iustitia uacare debeat. Fortes igitur, et magnanimi sunt habendi, non qui faciunt, sed qui propulsant iniuriam. Vera autem, et sapiens animi magnitudo honestum illud, quod maxime natura sequitur, in factis positum, non in gloria iudicat, principemque se esse mauult, quam uideri. Etenim qui ex errore imperitiæ multitudinis pendet, hic in magnis uiris non est habendus. facillime autem ad res iniustas impellitur, ut quisque est altissimo animo et gloriæ cupido. qui locus est sanè lubricus, quod uix inuenitur, qui laboribus susceptis, periculisque aditis, non quasi mercedem rerum gestarum desideret gloriam. Omnino fortis animus, et magnus duabus rebus maxime cernitur: quarum una in rerum externarum despicietia ponitur, cum persuasum sit nihil hominē, nisi quod honestū, decorumque sit, aut admirari, aut optare, aut expetere oportere, nullique neque homini, neque perturbationi animi, nec fortunæ succubere. altera est res, ut, cum ita sis affectus animo, ut supra dixi, res geras magnas illas quidem, et maxime utiles, sed ut uehementer arduas, plenisque laborum, et periculorum, tum causa ui-

tæ, tum multarum rerum, quæ ad uitam pertinent. harum rerum duarum splendor omnis, & amplitudo est, addo etiam utilitatem in posteriore. causa autem, & ratio efficiens magnos uiros est in priore. in eo enim est illud, quod excellentes animos, & humana contemnentes facit. Id autem ipsum cernitur in duobus, si & solum id, quod honestum sit, bonum iudices, & ab omni animi perturbatione liber sis. nam & ea, quæ eximia plerisque, & præclara uidentur, parua ducere, eoque ratione stabili, firmæque contemnere, fortis animi, magnæque dicendum est: & ea, quæ uidentur acerbæ, quæ multa, & uaria in hominum uita, fortunæque uersantur, ita ferre, ut nihil à statu naturæ discedas, nihil à dignitate sapientis, robusti animi est, magnæque constantiæ. Non est autem consentaneus, qui metu non frangatur, eum frangi cupiditate: nec, qui inuictum se à labore præstiterit, uinci à uoluptate. Quamobrem & hæc uitanda sunt, & pecuniæ fugienda cupiditas. nihil enim est tam angusti animi, tamque parui, quam amare diuitias: nihil honestius, magnificentiusque, quam pecuniam contemnere, si non habeas: si habeas, ad beneficentiam, liberalitatemque conferre. Cauenda est etiam gloriæ cupiditas, ut supra dixi. eripit enim libertatem, pro qua magnanimis uiris omnis debet esse contentio. Nec uero imperia expetenda, ac potius non accipienda interdum, aut deponenda nonnunquam, uacandum autem est omni animi perturbatione, tum cupiditate, & metu, tum etiam ægritudine, & uoluptate animi, & iracundia, ut tranquillitas animi adsit, & securitas, quæ afferat tum constantiam, tum etiam dignitatem. Multi autem & sunt, & fuerunt, qui eam,

quam dico, tranquillitatem expetentes, à negotiis publicis se remouerunt, ad otiumque perfluxerunt. In his et nobilissimi philosophi, longèque principes, et quidam homines seueri, et graues nec populi, nec principum mores ferre potuerunt: uixeruntque nonnulli in agris delectati re sua familiari. his idem propositum fuit, quod et regibus, ut ne qua re egerent, ne cui parent, libertate uterentur, cuius proprium est sic uiuere ut uelis. Quare, cum hoc commune sit potentiae cupidorum cum ijs, quos dixi, otiosis: alteri se adipisci id posse arbitrantur, si opes magnas habeant: alteri, si contenti sint et suo, et paruo. in quo quidem neutrorum omnino contemnenda est sententia: sed et faciliior, et tutior, et minus alijs grauis, aut molesta uita est otiosorum: fructuosior autem hominum generi, et ad claritatem, amplitudinemque aptior eorum, qui se ad Remp. et ad magnas res gerendas accommodauerunt. Quapropter et his forsitan concedendum sit Rempub. non capeissentibus, qui excellenti ingenio, doctrinae sese dediderunt: et ijs qui aut ualeitudinis imbecillitate, aut aliqua grauiore causa impediti, à Rep. recesserunt, cum eius administrandae potestatem alijs, laudemque concederent. Quibus autem talis nulla est causa, si despicere se dicant ea, quae plerique admirentur, imperia, et magistratus, his non modo non laudi, uerum etiam uitio dandum puto. Quorum iudicium in eo, quod gloriam contemnant, et pro nihilo putet, difficile factu est non probare: sed uidentur labores, et molestias tum offensionum, tum repulsarum, quasi quandam ignominiam, timere, et infamiam. Sunt enim qui in rebus contrarijs parum sibi constant: uolupta-

tem seuerissime contemnant, in dolore sint molliores: gloriam negligent, frangantur infamia: atque ea quidem non satis constanter. Sed ijs, qui habent à natura adiumenta rerum gerendarum, abiecta omni cunctatione adipiscendi magistratus sunt, & gerenda Resp. est. nec enim aliter aut regi ciuitas, aut declarari animi magnitudo potest. Capessentibus autē Remp. nihil minus quàm philosophis, haud scio an magis etiam, & magnificentia, & despicientia adhibenda est rerum humanarum, quam sæpe dico, & tranquillitas animi, atque securitas. siquidem nec anxij futuri sunt, & cum gravitate, constantiaque uicturi. Quæ eo faciliora sunt philosophis, quo minus patent multa in eorum uita, quæ fortuna feriat: & quo minus multis rebus egent: & quia, siquid aduersi eueniat, tam grauius cadere non possunt. Quocirca non sine causa maiores motus animorū concitantur: maiorāque efficienda Remp. gerentibus, quàm quietis: quo magis his & magnitudo animi est adhibenda, & uacuitas ab angoribus. Ad rem gerendam autem qui accedit, caueat, ne id modo consideret, quàm illa res honesta sit: sed etiā, ut habeat efficiendi facultatem. in quo ipso considerandum est, ne aut temere desperet propter ignauiam, aut nimis confidat propter cupiditatem. in omnibus autem negotijs prius, quàm aggrediare, adhibenda est præparatio diligens. Sed cum plerique arbitrentur res bellicas maiores esse, quàm urbanas: minuēda est hæc opinio. multi enim bella sæpe quæsiuerūt propter gloriæ cupiditatem: atque in magnis animis, ingenijque id plerūque contingit, eoque magis, si sunt ad rem militarem apti, & cupidi bellorum gerendorum. Vere

autem si uolumus iudicare, multæ res extiterunt urbanae maiores, clarioreſque, quàm bellicæ. Quãuis enim Themistocles iure laudetur, & sit eius nomen, quàm Solonis, illustrius: citeturque Salamis clarissimæ testis uictoriæ, quæ anteponatur consilio Solonis, ei, quo primum constituit Areopagitas: non minus præclarum hoc, quàm illud, iudicandum est. illud enim semel profuit, hoc semper proderit ciuitati: hoc consilio leges Atheniensium, hoc maiorum instituta seruantur. Et Themistocles quidem nihil dixerit, in quo ipse Areopagum adiunxit: at ille adiunxit Themistoclem. est enim bellum gestum consilio Senatus eius, qui à Solone erat constitutus. Licet eadem de Pausania, Lysandroque dicere. quorum rebus gestis quanquam imperium Lacedæmoniorum dilatatum putatur, tamen ne minima quidem ex parte Lycurgi legibus, & disciplinæ conferendi sunt: quinetiã ob has ipsas causas & præ rationes habuerunt exercitus, & fortiores. Mihi quidem neque pueris nobis, M. Scaurus C. Mario, neque cum uersaremur in Rep. Q. Catulus Cn. Pompeio cedere uidebatur. parua enim sunt foris arma, nisi est consilium domi. Nec plus Africanus, singularis & uir & imperator, in excidenda Numantia Reip. profuit, quàm eodem tempore P. Nasica priuatus, cum Ti. Gracchũ interemit. quanquam hæc quidem res non solum ex domestica est ratione. attingit enim & bellicam, quoniam ui, manuque confecta est. sed tamen id ipsum gestum est consilio urbano sine exercitu. Illud autem optimum est, in quo me inuadi solere ab inuidis, & improbis audio:

•• Cedant arma togæ: concedat laurea linguae.

Vt enim alios omittam, nobis Remp. gubernatibus nonne togæ arma cessere? neque enim in Rep. periculum fuit grauius unquam, nec maius otium. ita consilijs, diligentiaque nostra celeriter de manibus audacissimorum ciuium delapsa arma ipsa ceciderunt. Quæ res igitur gesta est unquam in bello tanta? quis triumphus conferendus? licet enim Marce fili apud te gloriari, ad quem et hæreditas huius gloriæ, et factorum imitatio pertinet. Mihi quidē certe uir abundans bellicis laudibus Cn. Pompeius multis audientibus hoc tribuit, ut diceret frustra se tertium triumphum deportaturum fuisse, nisi meo in Rep. beneficio, ubi triumpharet, esset habiturus. Sunt ergo domesticæ fortitudines non inferiores militaribus: in quibus plus etiam, quàm in his, operæ, studijque ponendum est. omnino enim illud honestum, quod ex animo excelso, magnificoque quærimus, animi efficitur, non corporis uiribus. exercendum tamen est corpus, et ita afficiendum, ut obedire consilio, rationique possit in exequendis negotijs, et in labore tolerando. Honestum autem id, quod exquirimus, totum est positum in animi cura, et cogitatione. in quo non minorem utilitatem afferunt, qui togati Reip. præsunt, quàm qui bella gerunt. itaque eorum consilio sæpe aut non suscepta, aut confecta bella sunt, nonnunquam etiam illata, ut M. Catonis consilio bellum tertium Punicum: in quo etiam mortui ualuit auctoritas. Quare expetenda quidem magis est decernendi ratio, quàm decertandi fortitudo: sed cauendum, ne id bellandi magis fuga, quàm utilitatis ratione faciamus. Bellum autem ita suscipiatur, ut nihil aliud, nisi pax quæsitæ uideatur. Fortis uero animi, et con-



stantis est non perturbari in rebus asperis, nec tumultuantem de gradu deijci, ut dicitur: sed præsentis animi uti consilio, nec à ratione discedere. quanquam hoc animi, illud etiam ingenij magni est præcipere cogitatione futura, et aliquando ante constituere, quid accidere possit in utràque partem: et quid agendum sit, cum quid euenerit: nec committere aliquid, ut aliquando dicendum sit, Non putaram. hæc sunt opera magni animi et exælsi, et prudentia consilioque fidei. Temere autem in acie uersari, et manu cum hoste configere, immane quiddam, et belluarum simile est. Sed cum tempus est, necessitasque postulat, decertandum manu est, et mors seruituti turpitudini que anteponenda. De euertendis autem, diripiendis que urbibus ualde illud considerandum est, nequid temere, nequid crudeliter fiat. idque est uiri magnanimi, rebus agitatissimis punire fontes, multitudinem conseruare, in omni fortuna recta, atque honesta retinere. Vt enim sunt, (quemadmodum supra dixi) qui urbanis rebus bellicas anteponunt: sic reperias multos, quibus periculosa, et calida consilia quietis cogitationibus splendidiore, et maiora uideantur. Nunquam omnino periculi fuga committendum est, ut imbelles timidique uideamur: sed fugiendum etiam illud, ne offeramus nos periculis sine causa: quo nihil potest esse stultius. Quapropter in aduendis periculis consuetudo imitanda medicorum est, qui leuiter ægratantes leuiter curant, grauioribus autem morbis periculosas curationes, et ancipites adhibere coguntur. Quare in tranquillo tempestatem aduersam optare, dementis est. subuenire autem tempestati quauis ratione, sapientis, eo que magis, si plus adi



piscare re explicata boni,quàm addubitata mali.Periculosa autem rerum actiones partim ijs sunt, qui eas suscipiunt: partim Reip. itémque alij de uita, alij de gloria, & beneuolentia ciuium in discrimen uocantur.Promptiores igitur debemus esse ad nostra pericula,quàm ad communia, dimicareque paratius de honore,& gloria,quàm de cæteris commodis.Inuenti autem multi sunt, qui non modo pecuniam, sed uitam etiam profunderere pro patria parati essent: iſdem gloriæ iacturam ne minimam quidem facere uellent, ne Rep. quidem postulante: ut Callicratidas, qui, cum Lacedæmoniorum dux esset Peloponnesiaco bello, multaque fecisset egregie, uertit ad extremum omnia, cum consilio non paruuit eorum, qui classem ab Arginnusis remouendam, nec cum Atheniensibus dimicandū putabant. quibus ille respondit: Lacedæmonios, classe illa amissa, aliam parare posse: se fugere sine suo dedecore non posse. Atque hæc quidem Lacedæmonijs plaga mediocris fuit: illa pestifera, qua cum Cleombrotus inuidiam timens, temere cum Epaminunda conflifixisset, Lacedæmoniorū opes corruerunt. quanto Q. Maximus melius? de quo Ennius:

- .. Vnus homo nobis cunctando restituit rem:
- .. Non ponebat enim rumores ante salutem.
- .. Ergo postque, magisque uiri nunc gloria claret.

Quod genus peccandi uitandū est etiam in rebus urbanis. sunt enim, qui quod sentiunt, etiam si optimum sit, tamen inuidiæ metu non audent dicere. Omnino qui Reip. præfuturi sunt, duo Platonis præcepta teneāt: unum, ut utilitatem ciuium sic tueantur, ut quicquid agunt, ad eam referant, obliti commodorum suorum:

alterum, ut totum corpus Reip. curent: ne dum partem aliquam tuentur, reliquas deserant. ut enim tutela, sic procuratio Reip. ad utilitatē eorum qui commissi sunt, non ad eorum, quibus commissi, gerenda est. Qui autem parti civiū consulunt, partem negligunt, rē perniciosissimam in ciuitatem inducunt, seditionem, atq; discordiā: ex quo euenit, ut alij populares, alij studiosi optimi cuiusque uideantur, pauci uniuersorum. Hinc apud Athenienses magnæ discordiæ ortæ, in nostra Rep. non solū seditiones, sed pestifera etiam bella ciuilia. quæ grauis et fortis ciuis, in Rep. dignus principatu fugiet, atq; oderit, tradetque se totum Reip. neq; opes, aut potentiā consecrabitur, totūque eam sic tuebitur, ut omnibus consulat. nec uero criminibus falsis in odium aut inuidiam quenquam uocabit: omninoque ita iustitiæ, honestatiq; adhærescet, ut dū eam conseruet, quanuis grauius offendat, mortem appetat potius, quàm deserat illa quæ dixi. Miserrima est omnino ambitio, honorūque contentio. de qua præclare apud eundem est Platonem: similiter facere eos qui inter se contenderent, uter potius Remp. administraret, ut si nautæ certarent, quis eorum potissimum gubernaret. Idemque præcepit, ut eos aduersarios existimemus, qui arma contra ferant: non eos qui suo iudicio tueri Remp. uelint: qualis fuit inter P. Africanum, et Q. Metellum sine acerbitate dissensio. Nec uero audiendi, qui grauius irascendum inimicis putant, idque magnanimi, et fortis uiri esse censent. nihil enim laudabilius, nihil magno et præclaro uiro dignius placabilitate, atque clementia. In liberis uero populis, et iuris æquabilitate, exercenda etiam est facilitas, et altitudo C.ij.

animi quæ dicitur: ne, si irascamur aut intempestive  
 accedentibus, aut impudenter rogantibus, in morosi-  
 tatem inutilem, et odiosam incidamus. Et tamen ita  
 probanda est mansuetudo, atque clementia, ut adhi-  
 beatur Reip. causa severitas: sine qua administrari ci-  
 vitas non potest. Omnis autem et animadversio, et  
 castigatio contumelia uacare debet, neque ad eius qui  
 punit aliquem, aut verbis castigat, sed ad Reip. utilita-  
 tem referri. Cauendum est etiam, ne maior poena,  
 quam culpa sit, et ne iisdem de causis alij plectan-  
 tur, alij ne appellentur quidem. Prohibenda autem ma-  
 xime est ira in puniendo. nunquam enim iratus qui  
 accedet ad poenam, mediocritatem illam tenebit, quæ  
 est inter nimium, et parum: quæ placet Peripateti-  
 cis, et recte placet, modo ne laudarent iracundiam,  
 et dicerent utiliter à natura datam. Illa uero omni-  
 bus in rebus repudianda est: optandumque, ut ij qui  
 præsumt Reip. legum similes sint: quæ ad puniendum  
 non iracundia, sed æquitate ducuntur. Atque etiam  
 in rebus prosperis, et ad uoluntatem nostram fluen-  
 tibus, superbiam magnopere, fastidium, arrogantiam-  
 que fugamus. nam ut aduersas res, sic secundas im-  
 moderate ferre, leuitatis est: præclaræque est æqua-  
 bilitas in omni uita, et idem semper uultus, eadẽ-  
 que frons: ut de Socrate, item de Caio quoque Lælio  
 accepimus. Philippum quidem Mæcedonum Regem, re-  
 bus gestis et gloria superatum à filio, facilitate uero  
 et humanitate uideo superiorem fuisse. itaque alter  
 semper magnus, alter sæpe turpissimus fuit: ut recte  
 præcipere uideantur qui monent, ut quanto superio-  
 res simus, tãto nos summissius geramus. Panætius qui-

dem auditorem Africanum, & familiarem suum solitum ait dicere: ut equos propter crebras contentiones praeliorum ferocitate exultantes domitoribus tradere soleant, ut his facilioribus possint uti, sic homines secundis rebus effrenatos, sibi que præsidentes tanquam in gyrū rationis, & doctrinæ duci oportere, ut perspicerent rerum humanarum imbecillitatem, uarietatemque fortunæ. Atque etiam in secundissimis rebus maxime est utendum consilio amicorum: hisque etiam maior, quam ante, tribuenda est auctoritas: ipsdēque temporibus cauendum est, ne assentatoribus patefaciamus aures, nec adulari nos sinamus. in quo falli facile est. tales enim nos esse putamus, ut iure laudemur. ex quo nascuntur innumerabilia peccata, cum homines inflati opinionibus, turpiter irridentur, & in maximis uersantur erroribus. Sed hæc quidem hætenus.

Illud autem sic est iudicandū, maximas geri res, & maximi animi ab ijs, qui Remp. regant, quòd eorum administratio latissime pateat, ad plurimosque pertineat. esse autem magni animi, & fuisse multos, etiam in uita otiosa, qui aut inuestigarēt, aut conarentur magna quædam, seseque suarum rerum finibus continerent: aut interiecti inter philosophos, & eos qui Remp. administrarent, delectarentur re sua familiari, non eam quidem omni ratione exaggerātes, neque excludentes ab eius usu suos, potiusque & amicis impartientes, & Reip. si quando usus esset. quæ primum bene parata sit, nullōque turpi quæstu, neque odioso: tum quamplurimis, modo dignis, se utilem præbeat: deinde augeatur ratione, diligentia, parsimonia: nec libidini potius, luxuriæque, quam liberalitati, & beneficentiæ

C. iij.

pateat. Hæc præscripta seruantem licet magnifice, gra-  
uiter, animosèque uiuere, atque etiam simpliciter, fi-  
deliter, uitæque hominum amice. Sequitur ut de illa  
reliqua parte honestatis dicendum sit, in qua uerecun-  
dia, & quasi quidam ornatus uitæ, temperantia &  
modestia, omnisque sedatio perturbationum animi, &  
rerum modus cernitur. hoc loco continetur id, quod di-  
ci Latine decorum potest: Græcè enim *ἀρετή* dicitur.  
huius uis est ea, ut ab honesto nõ queat separari. nam  
& quod decet, honestum est: & quod honestum est, de-  
cet. Qualis autem differentia sit honesti, & decori, fa-  
cilis intelligi, quàm explanari potest. quicquid enim  
est quod decet, id tum apparet, cum antegressa est ho-  
nestas. itaque non solū in hac parte honestatis, de qua  
hoc loco differendum est, sed etiam in tribus superio-  
ribus, quid decet apparet. nam & ratione uti, atque  
oratione prudenter: & agere, quod agas, considerate:  
omniūque in re quid sit ueri, uidere & tueri decet: con-  
trāque falli, errare, labi, decipi tam dedecet, quàm de-  
lirare, & mente captum esse. & iusta omnia decora  
sunt: iniusta omnia contra, ut turpia, sic indecora. Si-  
milis est ratio fortitudinis. quod enim uiriliter, animo  
que magno fit, id dignum uiro, & decorū uidetur: quod  
contra, id ut turpe, sic indecorū. Quare pertinet qui-  
dem ad omnem honestatem hoc, quod dico, decorum:  
& ita pertinet, ut non recondita quadam ratione cer-  
natur, sed sit in pròptu. est enim quiddā, idq; intelli-  
gitur in omni uirtute, quod decet: quod cogitatione ma-  
gis à uirtute potest, quàm re separari. ut enim uenu-  
stas, & pulchritudo corporis scærni non potest à ua-  
letudine: sic hoc, de quo loquimur, decorū, totum quidē

illud est cum uirtute confusum, sed mente, & cogitatione distinguitur. Est autem eius descriptio duplex. nam & generale quoddam decorum intelligimus, quod in omni honestate uersatur: & aliud huic subiectum, quod pertinet ad singulas partes honestatis. Atque illud superius sic ferè definiri solet: decorum id esse, quod consentaneum sit hominis excellentiæ in eo, in quo natura eius à reliquis animantibus differat. Quæ autem pars subiecta generi est, eam sic definiunt, ut id decorum esse uelint, quod ita naturæ consentaneum sit, ut in eo moderatio, & temperantia appareat cum specie quadam liberali. Hæc ita intelligi à philosophis, possumus existimare ex eo decoro, quod poetæ sequuntur, de quo alio loco plura dici solent. Sed tum seruare illud, poetæ dicimus quod deceat, cum id, quod quaque persona dignum est, & fit, & dicitur: ut si aut Aëacus, aut Minos diceret, ODERINT, dñ metuant: aut, NATIS sepulcrum ipse est parens: indecorum uideretur, quod eos fuisse iustos accepimus. at Atreo dicente, plausus excitantur. est enim digna persona oratio. Sed poetæ, quid quæque deceat, ex persona iudicabunt. nobis autem personam imposuit ipsa natura, magna cum excellentia, præstantiaque animantium reliquorum. Quocirca poetæ in magna uarietate personarum, etiam uitiosis quid conueniat, & quid deceat, uidebunt. nobis autem cum à natura constantiæ, moderationis, temperantiæ, uerecundiæ partes datæ sint: cumque eadem natura doceat non negligere, quemadmodum nos aduersus homines geramus, efficitur, ut & illud quod ad omnem honestatē pertinet decorum, quàm late fusum sit, appareat, & hoc quod spe-

C. iij.

Etatur in uno quoque genere uirtutis. Vt enim pulchritudo corporis apta compositione membrorum mouet oculos, & delectat hoc ipso, quod inter se omnes partes cum quodam lepore consentiunt: sic hoc decorum, quod elucet in uita, mouet approbationem eorum quibuscum uiuitur ordine, & constantia, moderatione dictorum omnium, atque factorum. Adhibenda est igitur quedam reuerentia aduersus homines, & optimi cuiusque & reliquorum. nam negligere, quid de se quisque sentiat, non solum arrogantis est, sed etiam omnino dissoluti. Est autem, quod differat in omni ratione habenda, inter iustitiam, & uerecundiam. Iustitiæ partes sunt, non uiolare homines: uerecundiæ, non offendere: in quo maxime perspicitur uis decori. His igitur expositis, quale sit id quod decere dicimus, intellectum puto. Officium autem quod ab eo ducitur, hanc primum habet uiam, quæ deducit ad conuenientiam, conseruationemque naturæ: quam si sequemur ducem, nunquam aberrabimus: sequemurque & id quod acutum, & perspicax natura est: & id quod ad hominum societatem accommodatum: & id quod uehemens, atque forte. Sed maxima uis decori in hac inest parte, de qua disputamus. neque enim solum corporis, qui ad naturam apti sunt, sed multo etiam magis animi motus probandi, qui item ad naturam accommodati sunt. Duplex est enim uis animorum, atque naturæ. una pars in appetitu posita est, quæ est ὁρμή Græcæ, quæ hominem huc & illuc rapit: altera in ratione, quæ docet & explanat, quid faciendum, fugiendumque sit. ita fit, ut ratio præsit: appetitus uero obtemperet. Omni autem affectui uacare debet temeritate, & negligentia: nec uero



agere quicquam, cuius non possit causam probabilem reddere. hæc est enim ferè descriptio officij. Efficiendum autem est, ut appetitus rationi obediant, eamque neque præcurrant, nec propter pigritiã aut ignaviã deserant: sintque tranquilli, atque omni perturbatione animi careant. ex quo elucebit omnis constantia, omnisque moderatio. nam qui appetitus lōgius euagantur, & tanquam exultantes siue cupiendo, siue fugiendo non satis à ratione retinentur, hi sine dubio finem & modum transeunt. relinquunt enim & abijciunt obedientiam, nec rationi parent cui sunt subiecti lege naturæ. à quibus non modo animi perturbantur, sed etiã corpora. Licet ora ipsa cernere iratorum aut eorum, qui aut libidine aliqua, aut metu commoti sunt, aut uoluptate nimia gestunt: quorum omnium nultus, uoces, motus, statúsque mutantur. ex quibus illud intelligitur (ut ad officij formam reuertamur) appetitus omnes contrahendos sedandósque, excitandámque esse animaduersionem & diligentiam, ut nequid temere, ac fortuitu inconsiderate negligentérque agamus. neque enim ita generati à natura sumus, ut ad ludũ & iocum facti esse uideamur, sed ad seueritatem potius, & ad quædam studia grauiora atque maiora. Ludo autem & toco uti illis quidem licet, sed sicut somno & quietibus cæteris, tum cum grauib; serijsque rebus satisfecerimus. ipsũque genus iocandi non profusum; nec immodestum, sed ingenuum & factum esse debet. Ut enim pueris non omnem licentiam ludēdi damus, sed eã quæ ab honestatis actionibus non sit aliena: sic in ipso ioco aliquod probi ingenij lumen eluceat. Duplex omnino est iocandi genus: unũ illiberale, petu-



lans, flagitiosum, obscœnum: alterum elegans, urbanum, ingeniosum, factum. quo genere non modo Plautus noster, & Atticorum antiqua comœdia, sed etiam philosophorum Socraticorū libri referti sunt: multaq; multorum facite dicta, ut ea quæ à sene Catone sunt collecta, quæ uocantur ἀποφύγματα. Facilis est igitur distinctio ingenui, & illiberalis ioci. alter est, si tempore sit, ac remisso animo, libero dignus. alter ne homine quidem, si rerum turpitudini adhibetur uerborum obscœnitas. Ludendi etiam est quidā modus retinendus, ut ne nimis omnia profundamus, elatīque uoluptate in aliquam turpitudinem delabamur. Suppeditant autem & campus noster, & studia uenādi honesta exempla ludendi. sed pertinet ad omnem officij quæstionem semper in promptu habere, quantum natura hominis pecudibus, reliquisq; bestijs antecedit. illæ enim nihil sentiunt nisi uoluptatē, ad eamq; ferūtur omni impetu: hominis autem mens discendo alitur, & cogitando semper aliquid aut inquit aut agit, uidendūq; & audiēdi delectatione ducitur. Quæmetiam, si quis est paulo ad uoluptates propensior, modo ne sit ex pecudū genere (sunt enim quidam homines non re, sed nomine) sed si quis est paulo erectior, quanuis uoluptate capiatur, occultat & dissimulat appetitū uoluptatis, propter uerecundiam. ex quo intelligitur corporis uoluptatem non satis esse dignam hominis præstantia, eamq; contemni & reiici oportere. sin sit quispiam qui aliquid tribuat uoluptati, diligenter ei tenendum esse modum eius fruendæ. Itaque uictus cultusque corporis ad ualitudinem referantur & ad uires, non ad uoluptatem, atque etiam, si considerare uolumus quæ sit in natura

excellētia & dignitas, intelligemus quā sit turpe diffluere luxuria, & delicate ac molliter uiuere: quāmq; honestum parce, continenter, seuerē, sobriēque. Intelligendum est etiā, duabus quasi nos à natura indutos esse personis, quarum una est communis, ex eo quòd omnes participes sumus rationis, præstantiēque eius qua antecellimus bestijs, à qua omne honestū decorūque trahitur, & ex qua ratio inueniendi officij exquiritur: altera autem, quæ proprie singulis est tributa. ut enim in corporibus magnæ dissimilitudines sunt (alios enim uidemus uelocitate ad cursum, alios uiribus ad luctandum ualere: itēque in formis, alijs dignitatem inesse, alijs uenustatem) sic & in animis existunt etiā maiores uarietates. Erat in L. Crasso, & L. Philippo multus lepos, maior etiā magisque de industria in C. Cæsare L. filio. At ijsdem temporibus in M. Scario, & in M. Druso adolescente singularis seueritas, in C. Lælio multa hilaritas, in eius familiari Scipione ambitio maior, uita tristior. De Græcis autem dulcem & facetum, festiuique sermonis, atque in omni ratione simulatorem quem ἀπωα Græci nominauerunt, Socratem accepimus: contra Pythagoram, & Periclem summam auctoritatem consecutos sine ulla hilaritate. Callidum Annibalem ex Pœnōrū, ex nostris ducibus Q. Maximum accepimus, facile celare, tacere, dissimulare, insidiari, præripere hostium consilia. In quo genere Græci Themistoclem Atheniensem, & Pheræum Iasonem cæteris anteponunt. in primisq; uersutum, & callidum factum Solonis: qui quo & tutior uita eius esset, & plus aliquanto Reip. prodesset, furere se simulauit. Sunt his alijs multum dispares, simplices, & aperti,

qui nihil ex occulto, nihil ex insidijs agendum putant, veritatis cultores, fraudis inimici: itémque alij, qui quiduis perpetiantur, cuius deserviant, dum quod velint consequantur: ut Syllam, et M. Crassum uidebamus. Quo in genere uersutissimum et patientissimum Laedæmonium Lysandrum accepimus, contraque Callicratidam, qui praefectus classis proximus post Lysandrum fuit. Itémque in sermonibus, alium quidem uidemus, quanuis praepotens sit, efficere, ut unus de multis esse uideatur. quod in Catulo et in patre, et in filio, idémque et in Q. Mutio Mancino uidimus. Audiui et ex maioribus natu hoc idem fuisse in P. Scipione Nasica, contraque patrem eius, illum qui Tiberij Gracchi conatus perditos uindicauit, nullam comitatem habuisse sermonis: necnon Xenocratem quidem seuerissimum philosophorum, ob eamque rem ipsam magnum clarumque fuisse. Innumerabiles aliae dissimilitudines sunt naturæ, morumque; minime tamen uituperandorum. Admodum autem tuenda sunt sua cuique non uitiosa, sed tamen propria, quo facilius decorum illud quod quærimus, retineatur. sic enim est faciendum, ut contra naturam uniuersam nihil contendamus: ea tamen conseruata, propriam naturam sequamur: ut etiam si sint alia grauiora atque meliora, tamen nos studia nostra naturæ regula metiamur. neque enim naturæ attinet repugnare, nec quicquam sequi quod assequi nequeas. Ex quo magis emergit, quale sit decorum illud: ideo quia nihil decet inuita (ut aiunt) Minerva: id est aduersante et repugnante natura. Omnino si quicquam est decorum, nihil est profecto magis quam æquabilitas uniuersæ uitæ, tum singularum

actionum: quam conseruare non possis, si aliorum naturam imiteris, omittas tuam. ut enim sermone eo debemus uti, qui notus est nobis, ne, ut quidā Græca uerba inculcantes, iure optimo rideamur: sic in actiones omnemque uitam nullam discrepantiam conferre debemus. Atque hæc differentia naturarū tantam habet uim, ut nonnunquam mortem sibi ipsi alius consciscere debeat, alius in eadem causa non debeat. non enim alia in causa M. Cato fuit, alia cæteri qui se in Africa Cæsari tradiderūt. Atqui cæteris forsitan uitio datum esset, si se interemissent, propterea quod eorum uita lenior, & mores fuerant faciliores: Catoni autem cum incredibilē tribuisset natura grauitatem, eamque ipse perpetua constantia roborasset, semperque in proposito, susceptoque consilio permansisset, moriendum potius, quàm tyranni uultus aspiciendus fuit. Quàm multa passus est Vlysses in illo errore diuturno, cum & mulieribus (si Circe & Calypso mulieres appellandæ sunt) inseruiret, & in omni sermone omnibus affabilem se esse uellet: domi uero & cōtumelias seruorum ancillarūque pertulit, ut ad id aliquando, quod cupiebat, perueniret. At Ajax quo animo traditur, milles oppetere mortem, quàm illa perpeti ab alio maluisset. quæ contemplantes. expēdere oportebit, quid quisque habeat sui: eaq; moderari, nec uelle experiri, quàm se aliena deceant. id enim quenque deat, quod est cuiusque suum maxime. Suum igitur quisque noscat ingenium, acrēmque se & uitiorum, & bonorum suorum iudicem præbeat: ne scenici plus quàm nos uideantur habere prudentiæ. illi enim non optimas, sed sibi accommodatissimas fabulas eligunt. qui enim uocæ

freti sunt, Epigonos, Medeamque: qui gestu Menalippam, Clytemnæstram. semper Rupilius, quem ego meminî, Antiopam: non sæpe AEsopus Aiacem. ergo histrio hoc uidebit in scena, quod non uidebit sapiens in uita? Ad quas igitur res aptissimi erimus, in his potissimam elaborabimus. sin aliquando necessitas nos ad ea detruserit, quæ nostri ingenij non erunt: omnis adhibenda erit cura, meditatio, diligentia, ut ea si non decore, at quamminimum indecore facere possimus: nec tam est enitendum, ut bonæ quæ nobis data non sunt sequamur, quàm ut uitia fugiamus. Ac duabus his personis quas supra dixi, tertia adiungitur: quam casus aliquis, uel tempus imponit: quarta etiam, quam nobismetipsis iudicio nostro accommodabimus. nam regna, imperia, nobilitates, honores, diuitiæ, opes, eaque quæ sunt his contraria, in casu sita, temporibus gubernantur: ipsi autem quam personam gerere uelimus, à nostra uoluntate proficiscitur. Itaque se alij ad philosophiam, alij ad ius ciuile, alij ad eloquentiam applicant, ipsarumque uirtutum in alia alius mauult excellere: quorum uero patres, aut maiores in aliqua gloria præstiterunt, eorum plerique in hoc genere laudis student excellere: ut Q. Mutius P. filius in iure ciuili, Pauli filius Africanus in re militari. Quidam autem ad eas laudes, quas à patribus acceperunt, addunt aliquam suam: ut hic idem Africanus eloquentia cumulauit bellicam gloriam: quod idem fecit Timotheus Cononis filius: qui cum belli laude non inferior fuisset quàm pater, ad eam laudem, doctrinæ & ingenij gloriam adiecit. Fit autem interdum, ut nonnulli omiſſa imitatione maiorum, suum quoddam

*institutum consequantur: maximèque in eo plerunque elaborant ij, qui magna sibi proponunt, obscuris orti parētibus. Hæc igitur omnia cum quærimus, quid debeat, complecti animo et cogitatione debemus. In primis autem constituendum est, quos nos et quales esse uelimus, et in quo genere uitæ. quæ deliberatio est omnium difficillima. ineunte enim adolescentia, cum inest maxima imbecillitas consilij, tunc id sibi quisque genus ætatis degendæ constituit, quod maxime adamat: itaque ante implicatur aliquo certo genere cursi- que uiuendi, quàm potuit, quod optimum esset, iudicare. Nam quod Herculem Prodicus dicit (ut est apud Xenophōtem) cum primum pubesceret, quod tempus à natura ad deligendum, quam quisque uiam uiuendi sic ingressurus, datum est, exisse in solitudinem: atque ibi sedentem diu secum, multumq; dubitasse, cum duas cerneret uias, unam uoluptatis, alteram uirtutis, utram ingredi melius esset. hoc Herculi Iouis satù edito potuit fortasse contingere: nobis non item, qui imitamur quos cuique uisum est, atque ad eorum studia institutæque impellimur. plerunque autem parentum præceptis imbuti, ad eorum consuetudinem morèmq; deducimur. alij multitudinis iudicio feruntur: quæque maiori parti pulcherrima uidentur, ea maxime exoptant. nonnulli tamen siue felicitate quadam, siue bonitate naturæ, siue parentum disciplina, rectam uitæ secuti sunt uiam. Illud autem maxime rarum genus eorum, qui aut eccellente ingenij magnitudine, aut præclara eruditione atque doctrina, aut utraque re ornati, spatium deliberandi habuerunt; quem potissimum uitæ cursum sequi uellent: in qua delibera-*

tione ad suam cuiusque naturam consiliū est omne re-  
 uocandum. nam cum in omnibus, quæ aguntur, ex eo  
 modo quo quisque natus est, ut supra dictum est, quid  
 deceat exquirimus: tum in tota uita constituenda, mul-  
 to est eius rei cura maior adhibēda, ut constare in ui-  
 tæ perpetuitate possimus nobismetipsis, nec in ullo of-  
 ficio claudicare. Ad hanc autem rationem quoniam  
 maximam uim natura habet, fortuna proximam, uiri-  
 usque omnino ratio habenda est in deligendo gene-  
 re uitæ, sed naturæ magis. multo enim & firmitior est,  
 & constantior: ut fortuna nonnunquam ipsa mortalis  
 cum immortalī natura pugnare uideatur. qui igitur  
 ad naturæ suæ non uitiosæ genus, cōsiliū uitæ omne  
 contulerit, is constantiam teneat: id enim maxime de-  
 cet. nisi forte se errasse intellexerit in deligendo gene-  
 re uitæ. quod si acciderit (potest autē accidere) facien-  
 da morum, institutorūmq; mutatio est. Eam igitur mu-  
 tationem, si tempora adiuuabunt, facilius commodiūsf-  
 que faciemus: sin minus, sensim erit pedetentimque fa-  
 cienda. ut amicitias quæ minus delectent, & minus  
 probentur, magis decere censeant sapiētes sensim dissue-  
 re, quàm repēte præcidere. Commutato autem genere  
 uitæ, omni ratione curandū est, ut id bono consilio fe-  
 cisse uideamur. Sed quoniam paulo ante dictum est  
 imitandos esse maiores, primum illud exceptum sit, ne  
 uitia sint imitanda: deinde, si natura non ferret, ut  
 quædam imitari possint. ut superioris Africani filius,  
 qui hūc Paulo natum adoptauit, propter infirmitatem  
 uoletudinis non tam potuit patris similis esse, quàm il-  
 le fuerat sui. Si igitur non poterit siue causis defensi-  
 tare, siue populum concionibus tenere, siue bella gere-



re: illa tamen præstare debet, quæ erunt in ipsius potestate, iustitiam, fidem, liberalitatem, modestiam, temperantiam, quo minus ab eo id quod desit, requiratur. Optima autem hæreditas à patribus traditur liberis, omniq̃ patrimonio præstantior, gloria uirtutis, rerumq̃ gestarum: cui dedecori esse, nefas & uitium iudicandum est. Et quoniam officia non eadem disparibus ætatibus tribuuntur, aliâq̃ sunt iuuenum, alia seniorum: aliquid etiam de hac distinctione dicendum est. Est igitur adolescentis maiores natu uereri, ex hisq̃ eligere optimos & probatissimos, quorum consilio atque auctoritate nitatur. ineuntis enim ætatis inscitia, senum constituenda & regenda prudentia est. Maxime autem hæc ætas à libidinibus arceda est, exercendâq̃ in labore, patientiâq̃ & animi & corporis, ut eorum & in bellicis & civilibus officijs uigeat industria. atque etiam cum relaxare animos, & dare se iucunditati uolent, caueant intemperantiam, meminerint uerecundiæ: quod erit facilius, si eiusmodi quoque rebus maiores natu interesse uelint. Senibus autē labores corporis sunt minuendi, exercitationes animi etiam augendæ uidetur: danda uero opera ut amicos, & iuuentutem, & maxime Rempub. consilio & prudentia quamplurimum adiuuent. Nihil autem magis cauendum est senectuti, quàm ne languori desidiæq̃ se dedat. Luxuria uero cum omni ætati turpis, tum senectuti foedissima est. sin autem & libidinum intemperantia accesserit, duplex malum est, quod & ipsa senectus concipit dedecus, & facit adolescentium impudentiorem intemperantiam.

Ac ne illud quidem alienum est de magistratuum,

de priuatorum, de ciuium, de peregrinorū officijs dicere. Est igitur propriū munus magistratus, intelligere se gerere personam ciuitatis, deberēque eius dignitatem & decus sustinere, seruare leges, iura describere, ea fidei suae commissa meminisse. Priuatum autem oportet a quo & pari cum ciuibus iure uiuere, neque summis- sum & abiectum, neque se efferentem: tum in Rep. ea uelle, quae tranquilla & honesta sint. talem enim & sentire, & bonum ciuem dicere solemus. Peregrini autem & incolae officium est, nihil praeter suum negotium agere, nihil de alio inquirere, minimēque in aliena esse Rep. curiosum. Ita ferē officia reperiuntur, cum quaeretur quid deceat, & quid aptum sit personis, temporibus, aetatibus. nihil est autem quod tam deceat, quā in omni re gerenda, consilioque capiendo seruare constantiam. Sed quoniam decorū illud in omnibus factis & dictis, in corporis deniq; motu & statu cernitur, idque positum est in tribus rebus, formositate, ordine, ornatu ad actionem apto, (difficilius ad eloquendum, sed satis erit intelligi) in his autem tribus continetur cura etiam illa, ut probemur ab ijs cum quibus, & apud quos uiuamus: his quoque de rebus pauca dicantur. Principio, corporis nostri magnam natura ipsa uidetur habuisse rationem: quae formam nostram, reliquāque figuram, in qua esset species honesta, eam posuit in promptu: quae autem partes corporis ad naturae necessitatem datae aspectum essent deformem habiturae atque turpem, eas contextit atque abdidit. hanc naturae tam diligentem fabricam imitata est hominum uerecundia. quae enim natura occultauit, eadem omnes, qui sana mente sunt, remouent ab oculis, ipsique

*necessitati dant operam, ut quam occultissime pareant: quarumque partium corporis usus sunt necessarij, eas neque partes, neque earum usus suis nominibus appellant: quodque facere non turpe est, modo occulte, id dicere obscœnum est. itaque nec actio rerum illarum aperta petulantia uacat, nec oratio obscœnitate. Nec uero audiendi sunt Cynici, aut siqui fuerunt Stoici penè Cynici, qui reprehedunt & irrident, quod ea, quæ turpia re non sunt, uerbis flagitiosa dicamus: illa autem quæ turpia sint, nominibus appellemus suis. Latrocinari, fraudare, adulterari re turpe est, sed dicitur non obscœne. liberis dare operam, re honestum est, nomine obscœnum: pluraque in eam sententiam ab eisdem contra uerecundiam disputantur. Nos autem naturam sequamur, & ab omni, quod abhorret ab ipsa oculorum auriumque comprobatione, fugiamus. status, incessus, sessio, accubatio, uultus, oculi, manuum motus teneant illud decorum. Quibus in rebus duo sunt maxime fugienda, nequid effœminatum, aut molle, aut nequid durum, aut rusticum sit. Nec uero histrionibus oratoribusque concedendum est, ut ijs hæc apta sint, nobis dissoluta. Scenicorum quidem mos tantam habet à uetere disciplina uerecundiam, ut in scena sine subligaculo prodeat nemo. uerentur enim ne, si quo casu e-uenerit, ut corporis partes quædam aperiantur, aspi-ciantur non decore. nostro quidem more cum paren-tibus puberes filij, cum soceris quidem generi non la-uantur. Retinenda est igitur huius generis uerecundia, præsertim natura ipsa magistra & dux. Cum au-tem pulchritudinis duo genera sint, quorum in altero uenustas sit, in altero dignitas: uenustatem muliebrem*

ducere debemus, dignitatem uirilem. Ergo & à forma remoueat<sup>r</sup> omnis uiro non dignus ornatus, & huic simile uitium in gestu motuque caueatur. nam & palæstrici motus sæpe sunt odiosiores, & histrionū nonnulli gestus ineptijs non uacant: & in utroque genere, quæ sunt recta & simplicia laudantur. Formæ autem dignitas coloris bonitate tuenda est, color exercitationibus corporis. Adhibenda est præterea munditia non odiosa, neque exquisita nimis: tantum quæ fugiat agrestem, & inhumanam negligentiam. eadem ratio est habenda uestitus: in quo sicut in plerisque rebus mediocritas optima est. Cauendum est autem, ne aut tarditatibus utamur in gressu mollioribus, ut similes pomparum ferculis esse uideamur: aut in festinationibus suscipiamus nimias celeritates: quæ cum fiunt, anhelitus mouentur, uultus mutantur, ora torquentur: ex quibus magnæ significatio fit, non adesse constantiam. Sed multo etiam magis elaborandum est, ne animi motus à natura recedant: quod assequemur, si cauebimus ne in perturbationes, atq; exanimationes incidamus, & si attentos animos ad decori conseruationem tenebimus. Motus autem animorū duplices sunt: alteri cogitationis, alteri appetitus. cogitatio in uero exquirendo maxime uersatur: appetitus impellit ad agendum. curandum est igitur ut cogitatione ad res quam optimas utamur, appetitū rationi obedientem præbeamus.

Et quoniam magna uis orationis est, eadēque duplex: altera contētionis, altera sermonis: contentio disceptationibus tribuatur iudiciorū, concionum, Senatus: sermo in circulis, disputationibus, congressionibus familiarium uersetur, persequatur etiam conuiuia. conten-

tionis præcepta rhetorum sunt, nulla sermonis. quam haud scio, an possint hæc quoque esse. sed discentium studijs inueniuntur magistri. huic autem qui studeant, sunt nulli. rhetorū turba referta omnia. quam quæ uerborum sententiarūque præcepta sunt, eadem ad sermonem pertinebunt. Sed cum orationis indicem uocem habeamus, in uoce autem duo sequamur, ut clara sit, ut suavis: utrunque omnino à natura petendum est. uerum alterum exercitatio augebit: alterum inuitatio presse loquentium, et leniter. Quid fuit in Catulis, ut eos exquisito iudicio putares uti literarum? quanquam erant literati: sed et alij. hi autem optime uti lingua Latina putabātur. sonus erat dulcis: literæ neque expressæ, neque oppressæ: ne aut obscurum esset, aut nimis putidum. sine contentione uox nec languens, nec canora. uberior oratio L. Crassi, nec minus facta: sed bene loquendi de Catulis opinio non minor. sale uero conditus, et facetijs Cæsar: Catuli patris frater uicit omnes, ut in ipso illo forensi genere dicendi, contentiones aliorum sermone uinceret. in omnibus igitur his elaborādum est, si in omnibus, quod deceat, exquirimus. Sit igitur hic sermo, in quo Socratici maxime excellunt, lenis, minimèque pertinax: insit in eo lepos. nec uero tanquam in possessionem suam uenerit, excludat alios: sed cum reliquis in rebus, tum in sermone communi, uicissitudine nonnunquam utendum putet. ac uideat in primis, quibus de rebus loquatur: si serijs, seueritatem adhibeat: si iocosis, leporem. in primis prouideat ne sermo uitium aliquod indicet inesse moribus. quod maxime tum solet euenire, cum studiose de absentibus detrahendi causa aut

per ridiculum, aut seuerè, maledicè, contumeliosè que dicitur. Habentur autem plerunque sermones aut de domesticis negotijs, aut de Repub. aut de artium studijs & doctrina. Danda igitur opera est, ut etiam si aberrare ad alia cœperit, ad hæc reuocetur oratio: sed utique aderunt res. neque enim iisdem de rebus, nec in omni tempore, nec similiter delectamur. Animaduertendum est etiam quatenus sermo delectationem habeat, & ut incipiendi ratio fuerit, ita sit desinendi modus. sed quoniam in omni uita rectissime præcipitur ut perturbationes fugamus, id est motus animi nimios, rationi non obtemperantes: sic eiusmodi motibus sermo debet uacare: ne aut ira existat, aut cupiditas aliqua, aut pigritia, aut ignauia, aut quid tale appareat. maximeque curandū est, ut eos, quibuscum sermonem conferimus, & uereri, & diligere uideamur. Obiurgationes etiam nonnunquam incidunt necessariae: in quibus utendum est fortasse & uocis contentione maiore, & uerborum grauitate acriore. Id agendum etiam, ut ea facere non uideamur irati, sed ut ad urendum & secandum medici, sic nos ad hoc genus castigandi raro, inuitiq; ueniamus, nec unquam nisi necessario, si nulla reperietur alia medicina. sed tamen ira procul absit, cum qua nihil recte fieri, nihil considerate potest. Magna autem ex parte clementi castigatione licet uti, grauitate tamen adiuncta, ut seueritas adhibeatur, & contumelia repellatur. atque etiam illud ipsum, quod acerbitatis habet obiurgatio, significandum est ipsius causa, qui obiurgetur, susceptum esse. Rectum est autem, etiam in illis contentionibus quæ cum inimicissimis fiunt, etiam si nobis in-

digna audiamus, tamen gravitatem retinere, iracundiam repellere. quæ enim cum aliqua perturbatione fiunt, ea neque constanter fieri possunt, nec ab ijs qui adsunt approbari. Deforme etiam est de se ipso prædicare, falsa præsertim, & cum irrisione audientium imitari militem gloriosum. Et quoniam omnia persequimur, uolumus quidem certe: dicendū est etiam, qualem hominis honorati & principis domum placeat esse. cuius finis est usus: ad quem accommodanda est ædificandi descriptio: & tamen adhibenda dignitatis commoditatisque diligentia. Cn. Octavio, qui primus ex illa familia Consul factus est, honori fuisse accepimus, quod præclaram ædificasset in palatio, & plenam dignitatis domum: quæ cum uulgo uideretur, suffragata domino, nouo homini, ad Consulatum putabatur. hanc Scæurus demolitus, accessionem adiunxit ædibus. Itaque ille in suâ domum Consulatum primus intulit: hic summi, & clarissimi uiri filius in domum multiplicatam non repulsam solum retulit, sed ignominiam, & calamitatem. ornata est enim dignitas domo, non ex domo dignitas tota quærenda: nec domo dominus, sed domino domus honestanda est, & ut in cæteris habenda ratio non sua solum, sed etiam aliorū: sic in domo clari hominis, in quam & hospites multi recipiendi, & admittenda hominum cuiusque generis multitudo, adhibenda est cura laxitatis. aliter ampla domus dedecori domino sæpe fit, si est in ea solitudo: & maxime, si aliquando alio domino solita est frequentari. odiosum est enim cum à prætereuntibus dicitur:

” O domus antiqua, heu quàm dispari dominaris domino. quod quidem his temporibus in multis licet dicere. Ca



uendum est etiam, præsertim si ipse ædificas, ne extra modum sumptu & magnificentia prodeas. quo in genere multum mali etiam in exemplo est. studiose enim pleriq; præsertim in hac parte, facta principum imitantur. ut L. Luculli summi uiri uirtutem quis? quàm multi uillarum magnificentiam imitati sunt? quarum quidem certe est adhibendus modus, ad mediocritatem reuocandus: eadèmq; mediocritas ad communem usum cultumq; uitæ referenda est. sed hæc hactenus. In omni autem actione suscipienda, tria sunt tenenda. primum ut appetitus rationi pareat: quo nihil est ad officia conseruanda accommodatius. deinde ut animaduertatur quanta illa res sit, quam efficere uelimus: neu minor, nèue maior cura & opera suscipiatur, quàm causa postulet. tertium est ut caueamus, ut ea quæ pertinent ad liberalem speciem & dignitatem, moderata sint. Modus autem est optimus, deus ipsum tenere, de quo ante diximus, nec progredi longius. horum autem trium præstantissimum est, appetitum obtemperare rationi. Deinceps de ordine rerum & temporum opportunitate dicendum est. hæc autem scientia continet eam quam Græci ὀρθότης nominant, non hanc quam interpretamur modestiam: quo in uerbo modus inest. sed illa est ὀρθότης, in qua intelligitur ordinis conseruatio. Itaque, ut eandem nos modestiam appellemus, sic definitur à Stoicis, ut modestia sit scientia earum rerum quæ agentur aut dicentur loco suo collocandarum. itaque uidetur eadem uis ordinis, & collocationis fore. Nā & ordinem sic definiunt, compositionem rerū aptis & accommodatis locis. locū autem actionis, opportunitatem tēporis esse di-

cunt. Tēpus autem actionis opportunum Græcè ἀνα-  
 πιά, Latine appellatur occasio. sic fit, ut modestia hæc  
 quam interpretamur ita, ut dixi, scientia sit opportu-  
 nitati idoneorum ad agendum temporum. Sed potest  
 eadem esse prudentiæ diffinitio: de qua principio di-  
 ximus. hoc autem loco de moderatione, et temperan-  
 tia, et alijs similibus uirtutibus quærimus. Itaque, quæ  
 erant prudentiæ propria, suo loco dicta sunt. quæ au-  
 tem harum uirtutum, de quibus iamdudum loqui-  
 mur: quæ pertinent ad uerecundiam, et ad eorum ap-  
 probationem quibuscum uiuimus, nunc dicenda sunt.

Talis est igitur ordo actionum adhibendus, ut quæ ad  
 modum in oratione constanti, sic in uita omnia sint  
 apta, et inter se conuenientia. turpe est enim ualdè.  
 que uitiosum, in re seuera, conuiuium dignum aut deli-  
 catum aliquem inferre sermonem. Bene Pericles, cum  
 haberet collegam in Prætura Sophoclem, hique de com-  
 muni officio conuenissent, et casu formosus puer præ-  
 teriret, dixissetque Sophocles, O puerum pulchrum Pe-  
 ricle. At enim, Pericles, Prætozem Sophocle decet non  
 solum manus, sed etiam oculos abstinentes habere. at-  
 que hoc idem Sophocles si in athletarum approbatione  
 dixisset, iusta reprehensione caruisset. tanta uis est et  
 loci, et temporis. Ut si quis cum causam sit acturus, in  
 itinere aut in ambulatione secum ipse meditetur, aut  
 siquid aliud attentius cogitet, non reprehendatur. at  
 hoc idem si in conuiuium faciat, inhumanus uideatur in-  
 scitia temporis. sed ea quæ multum ab humanitate di-  
 screpant, ut si quis in foro cantet, aut siqua est alia ma-  
 gna peruersitas, facile apparent, nec magnopere admo-  
 nitionem, et præcepta desiderant. quæ autem parua

fit, exquirunt: sic aliorum iudicio permulta nobis et facienda, et non facienda, et mutanda, et corrigenda sunt. Quæ uero more aguntur, et institutis civilibus, de his nihil est præcipiendum. illa enim ipsa præcepta sunt: nec quenquam hoc errore duci oportet, ut siquid Socrates, aut Aristippus contra morem, consuetudinemque civilem fecerint, locutiue sint, idem sibi arbitretur licere. magnis illi, et diuinis bonis hanc licentiam assequebantur. Cynicorum uero ratio tota est eijcienda. est enim inimica uerecundiæ, sine qua nihil rectum esse potest, nihil honestum. Eos autem, quorum uita perspecta in rebus honestis, atque magnis est, de Rep. sentientes, ac bene meritos, aut merentes, aliquo honore aut imperio affectos obseruare et colere debemus: tribuere etiam multum senectuti: cedere iis qui magistratum habebunt: habere delectum ciuis et peregrini: in ipso quoque peregrino, priuatimne an publicæ uenerit. Ad summam (ne agam de singulis) communem totius generis hominum conciliationem, et consociationem colere, tueri, seruare debemus. Iam de artificijs et quæstibus, qui liberales habendi, qui sordidi sint, hæc ferè accepimus. Primum improbatur ij quæstus, qui in odia hominum incurrunt: ut portitorum, et fœneratorum. Illiberales autem, et sordidi quæstus mercenariorum omnium, quorum operæ, non quorum artes emuntur. est enim in illis ipsa merces auctorem seruitutis. Sordidi etiam putandi, qui mercantur à mercatoribus, quod statim uendant. nihil enim proficiunt, nisi admodum mentiantur: nec uero quicquam est turpius uanitate. opificesque omnes in sordida arte uersantur. nec uero quicquam ingenuum potest

habere officina. nūquāque artes probandæ, quæ ministræ sunt uoluptatum:

11. Cætarū, lanū, coqui, factores, piscatores, ut ait Terentius. adde his si placet, unguentarios, saltatores, totūque ludum talarium. Quibus autem artibus aut prudentia maior inest, aut non mediocris utilitas queritur, ut medicina, architectura, ut doctrina rerum honestarum: hæ sunt ijs quorum ordini conueniunt honestæ. Mercatura autem, si tenuis est, sordida putanda est: si magna et copiosa, multa undique apportans, multisque sine uanitate impartiens, non est admodū uituperanda: atque etiam, si satiata quæstu, uel contenta potius, ut sæpe ex alto in portum, ex ipso portu se in agros possessionesque contulerit, uidetur iure optimo posse laudari. Omnium autem rerum, ex quibus aliquid exquiritur, nihil est agricultura melius, nil uberior, nil dulcius, nil libero homine dignius. de qua quoniam in Catone Maiore satis multa diximus, illinc assumes, quæ ad hunc locum pertinebunt. Sed ab ijs partibus quæ sunt honestatis, quemadmodum officia ducerentur, satis expositum uidetur. Eorum autem ipsorum quæ honesta sunt, potest incidere sæpe contentio et comparatio, de duobus honestis utrum honestius: qui locus à Panætio est præternissus. nam cum omnis honestas manet à partibus quatuor, quarum una sit cognitionis, altera communitalis, tertia magnanimitatis, quarta moderationis: hæ in deligendo officio sæpe inter se comparentur necesse est. Placet igitur aptiora esse naturæ ea officia, quæ ex communitate, quàm ea quæ ex cognitione ducantur: idque hoc argumento confirmari potest, quod si contigerit ea uita sa-

pianti, ut omnium rerum affluentibus copijs ditetur: quanuis ea quæ cognitione digna sunt, summo otio secum ipse consideret, & contempletur: tamen si solitudo tanta sit, ut hominem uidere non possit, excedat è uita. Princẽpsque omnium uirtutum est illa sapientia quam σοφία Græci uocant. prudentiam enim, quam Græci φρόνησις dicunt, aliam quandam intelligimus: quæ est rerum expetendarum, fugiendarumque scientia. Illa autem sapientia, quam principem dixi, rerum est diuinarum, atque humanarum scientia: in qua continetur deorum, & hominum communitas, & societas ipsorum inter ipsos. Ea si maxima est, ut certe: necesse est, quod à communitate ducatur officium, id esse maximum. etenim cognitio contemplatioque naturæ manca quodammodo, atque inchoata sit, si nulla actio rerum consequatur. ea uero actio in hominum commed̃is tuendis maxime cernitur. pertinet igitur ad societatem generis humani: ergo hæc cognitioni anteponenda est: atque id optimus quisque re ipsa ostendit, & indicat. Quis est enim tam cupidus in perspicieda cognoscendaque rerum natura, ut si ei tractanti contemplantique res cognitione dignissimas, subito sit allatum periculum discriminẽque patriæ, cui subuenire opitularique possit, non illa omnia relinquat atque abijciat, etiam si dinumerare se stellas, aut metiri mundi magnitudinem posse arbitretur: atque hoc idem in parentis, in amici re, aut periculo fecerit? Quibus rebus intelligitur, studijs officijsque scientiæ præponenda esse officia iustitiæ: quæ pertinent ad hominum utilitatem: qua nihil homini debet esse antiquius. Atque illi quorum studia, uitæque omnis in rerum cognitione uersa-

ta est, tamen ab augendis hominum utilitatibus, & commodis non recesserunt. nam & erudierunt multos, quomeliores ciues, utilioresque in rebus suis publicis essent: ut Thebanum Epaminundam Lysis Pythagoreus, Syracusium Dionem Plato, multique multos: nosque ipsi, quicquid ad Remp. attulimus, (si modo aliquid attulimus) à doctoribus atque doctrina instructi ad eam & ornati accessimus. Neque solum uiui atque praesentes studiosos discendi erudiunt atque docent, sed hoc idem etiam post mortem monumentis literarum assequuntur. nec enim locus ullus praetermissus est ab ijs, qui ad leges, qui ad mores, qui ad disciplinam Reip. pertineret, ut otium suum ad nostrum negotium contulisse uideantur. ita illi ipsi doctrinae studijs, & sapientiae dediti, ad hominum utilitatem suam sapientiam, prudentiam, intelligentiamque potissimum conferunt. Ob eam etiam causam eloqui copiose, modo prudenter, melius est, quam uel acutissime sine eloquentia cogitare: quod cogitatio in se ipsa uertitur: eloquentia uero complectitur eos, quibuscum communitate iuncti sumus. atque, ut apum examina non fingendorum fauorum causa congregantur, sed cum congregabilia natura sint, fingunt fauos: sic homines, ac multo etiam magis natura congregati, adhibent agendi, cogitadique solertiam. Itaque nisi ea uirtus, quae constat ex hominibus tuendis, id est ex societate generis humani, attingat rerum cognitionem, soliuaga cognitio & ieiuna uideatur: itemque magnitudo animi, remota communitate, coniunctioneque humana, feritas sit quaedam, & immanitas. ita fit, ut uincat cognitionis studium consociatio hominum, atque communitas. Nec uerum est,

quod dicitur à quibusdam, propter necessitatem uitæ, quòd ea quæ natura desideraret, consequi sine alijs, atque efficere non possemus, igitur istam esse cum hominibus communitatem & societatem: quòd, si omnia nobis, quæ ad uictum cultumque pertinent, quasi uirgula diuina (ut aiunt) suppeditarentur, tum optimo quisque ingenio, negotijs omnibus omissis, totum se in cognitione, & scientia collocaret. Non est ita. nam & solitudinem fugeret, & socium studiij quæreret: tum docere, tum discere uellet, tum audire, tum dicere. Ergo omne officium, quod ad coniunctionem hominum & ad societatem tuendam ualet, anteponendum est illi officio, quod cognitione & scientia continetur. Illud forsitan quærendum sit, num hæc communitas, quæ maxime est apta naturæ, sit etiam moderationi, modestiæque semper anteponenda. Non placeat. sunt enim quædam partim ita fœda, partim ita flagitiosa, ut ea ne conseruandæ quidem patriæ causa sapiens facturus sit: Ea Posidonius collegit permulta, sed ita tetra quædam, ita obscœna, ut dictu quoque uideantur turpia. hæc igitur non suscipiet quisquam Reip. causa, nec Resp. quidem pro se suscipi uolet. Sed hæc commodius se res habet, quòd non potest accidere tempus, ut intersit Reip. quicquam illorum facere sapientem. Quare hoc quidē effectum sit in officijs diligendæ, hoc genus officiorum excellere, quod teneatur hominum societate. etenim cognitionem, prudentiamque sequetur considerata actio. ita fit, ut considerate agere, pluris sit, quàm cogitare prudenter. Atque hæc quidem hæctenus. patefactus est enim locus ipse, ut non sit difficile in exquirendo officio, quod cuique sit



præponendum uidere. In ipsa autem communitate sunt gradus officiorum, ex quibus, quod cuique præstet, intelligi possit: ut prima dijs immortalibus, secunda patriæ, tertia parentibus: deinceps gradatim reliqua reliquis debeantur. Quibus ex rebus breuiter disputatis intelligi potest, non solum id homines solere dubitare, honestumne an turpe sit: sed etiam, duobus propositis honestis, utrum honestius. hic locus à Pannætio est (ut supra dixi) prætermisus. Sed ad reliqua pergamus.

M. T V L L I I C I C E R O N I S  
O F F I C I O R V M A D M A R -  
C V M F I L I V M L I B. I I.

V E M A D M O D V M officia dicerentur ab honestate, Marce fili, atq; ab omni genere uirtutis, satis explicatum arbitror libro superiore. Sequitur, ut hæc officiorum genera persequar, quæ pertinent ad uitæ cultum, & ad earum rerum, quibus utuntur homines, facultatem, ad opes, ad copias. in quo tum quæri dixi, quid utile, quid inutile: tum ex utilibus quid utilius, aut quid maxime utile. de quibus dicere aggrediar, si pauca prius de instituto, ac de iudicio meo dixerò. Quanquam enim libri nostri complures non modo ad legendi, sed etiã ad scribendi studium excitauerint: tamen interdum uereor, ne quibusdã bonis uiris philosophiæ nomen sit inuisum, mirenturque in ea tantum me operæ, & temporis pone-

re. Ego autem, quàm diu Resp. per eos regebatur, quibus se ipsa commiserat, omnes meas curas, cogitationesque in eam conferebam. cum autem dominatu unius omnia tenerentur, neque esset usquam consilio, aut auctoritati locus, socios denique tuendæ Reip. summos viros amisissim: nec me angoribus dedi, quibus essem confectus, nisi ijs restitissim: nec rursus indignis homine docto uoluptatibus. Atque utinam Resp. stetisset, quo cœperat, statu: nec in homines non tam commutandarum rerum, quàm euertendarum cupidos incidisset. primum enim, ut stante Rep. facere solebamus, in agendo plus, quàm in scribendo operæ poneremus: deinde ipsis scriptis non ea quæ nunc, sed actiones nostras mandarem, ut sæpe fecimus. cum autem Resp. in qua omnis mea cura, cogitatio, opera poni solebat, nulla esset omnino, illæ scilicet literæ contiauerunt forenses, & senatoriæ. Nihil autem agere cum animus non posset, in ijs studiis ab initio uersatus ætatis, existimaui honestissime molestias deponi posse, si me ad philosophiam retulissim. cui cum multum adolescens discendi causa temporis tribuissim, posteaquam honoribus inseruire cœpi, meque totum Reip. tradidi: tantum erat philosophiæ loci, quantum superfuerat amicorū, & Reip. temporibus. id autem omne consumebatur in legendo: scribendi otium non erat. Maximis igitur in malis hoc tantum boni affecti uidemur, ut ea literis mandarem, quæ nec satis erant nota nostris, & erant cognitione dignissima. Quid est enim per deos optabilius sapientia? quid præstantius? quid homini melius? quid homine dignius? Hanc qui expetunt igitur, philosophi nominantur: nec quicquam aliud est

philosophia, si interpretari uelis, quàm studium sapientiae. Sapiencia autem est (ut à ueteribus philosophis definitum est) rerum diuinarum, & humanarum, causarumque quibus hæ res continentur, scientia. Cuius studium qui uituperat, haud sanè intelligo, quidnam sit, quod laudandum putet. nam siue oblectatio quaeritur animi, requiesque curarum quæ conferri cum eorum studiis potest, qui semper aliquid acquirunt, quod spectet, & ualeat ad bene, beatèque uiuendum? siue ratio constantiae, uirtutisque quaeritur: aut hæc ars est, aut nulla omnino, per quam eas assequamur. nullam dicere maximarum rerum artem esse, cum minimarum sine arte nulla sit, hominum est parum considerate loquentium, atque in maximis rebus errantium. Si autem est aliqua disciplina uirtutis: ubi ea quaeretur, cum ab hoc discendi genere discesseris? sed hæc, cum ad philosophiam cohortamur, accuratius solent disputari: quod alio quidem libro fecimus. Hoc autem tempore tantum nobis declarandum fuit, cur orbatî Reip. muneribus ad hoc nos studium potissimum contulissimus. Occurritur autem nobis, & quidem à doctis & eruditis quaerentibus, satisne constanter facere uideamur, qui cum percipi nihil posse dicamus, tamen & alijs de rebus differere soleamus, & hoc ipso tēpore præcepta officij persequamur. Quibus uellem satis cognita esset nostra sententia. non enim sumus ij quorum uagetur animus errore, nec habeat unquam quid sequatur. quæ enim esset ista mens uel quæ uita potius, non solum disputandi, sed etiam uiuendi ratione sublata? Nos autem, ut cæteri, qui alia certa, alia incerta esse dicunt, sic ab his dissentientes,

*alia* probabilia, contrà *alia* improbabilia esse dicimus. Quid est ergo, quod me impediat ea quæ nubi probabilia uideantur, sequi: quæ contra, improbare: atque affirmandi arrogantia uitare, fugere temeritatem quæ à sapientia dissidet plurimum? Contra autem omnia disputatur à nostris, quòd hoc ipsum probabile elucere non posset, nisi ex utraque parte causarū esset facta contentio. sed hæc explanata sunt in Academicis nostris satis (ut arbitror) diligenter. Tibi autem mi Cicero, quanquam in antiquissima, nobilissimaque philosophia Cratippo auctore uersaris ijs simillimo, qui ista præclara pepererunt: tamen hæc nostra, finitima uestris, ignota esse nolui. sed iam ad instituta pergamus. Quinque igitur rationibus propositis officiū persequendi, quarū duæ ad decus, honestatēque pertinent: duæ ad commoda uitæ, copias, opes, facultates: quinta ad eligendi iudicium, si quando ea quæ dixi, pugnare inter se uiderētur: honestatis pars perfecta est: quam quidem tibi cupio esse notissimam. Hoc autem de quo nunc agimus, id ipsum est, quod utile appellatur. in quo uerbo lapsa consuetudo deflexit de uia, sensimque eò deducta est, ut ab honesto utile scerneret, & constitueret honestum aliquod, quod utile non esset: & utile, quod non honestum: qua nulla perniciēs maior hominum uitæ potuit afferri. Summa quidem auctoritate philosophi seuerè sanè atque honestè hæc tria genera confusa, cogitatione distinguunt. quicquid enim iustum sit, id utile etiam esse censerent: itemque, quod honestum, idem esse iustum: ex quo efficitur, ut quicquid honestum sit, idem sit utile. Quod qui parum prospiciunt, hi sæpe uersutos homines, & callidos admirantes

eorum malitiam, sapientiam indicant. quorum error  
 eripiendus est: omnisque opinio ad eam spem tradu-  
 cenda, ut honestis consilijs iustisque factis, non fraude  
 et malitia se intelligant ea quæ uelint, consequi posse.  
 Quæ ergo ad uitam hominum tuendâ pertinent, par-  
 tim sunt inanimata, ut aurum, argentum, ut ea quæ  
 gignuntur è terra, ut alia eiusdem generis: partim ani-  
 malia, quæ habent suos impetus, et rerum appetitus.  
 Eorum autem alia rationis expertia sunt, alia ratio-  
 ne utentia. Expertes rationis sunt equi, boues, reliquæ  
 pecudes, apes, quarum opere efficitur aliquid ad ho-  
 minum usum atque uitam. Ratione autem utentium  
 duo genera ponuntur: unum deorum, alterum homi-  
 num. deos placatos pietas efficiet et sanctitas. proxime  
 autem, et secundum deos, homines hominibus maxi-  
 me utiles esse possunt. Earumque iterum rerum quæ  
 noceant et obsint, eadem diuisio est. sed quia deos no-  
 cere non putant, his exceptis homines hominibus pluri-  
 mum obesse, uel prodesse arbitrâtur. ea enim ipsa quæ  
 inanimata diximus, pleraque sunt hominum effecta  
 operis: quæ nec haberemus nisi manus, et ars acces-  
 sisset: nec his sine hominû administratione uteremur.  
 neque enim ualeitudinis curatio, neque nauigatio, ne-  
 que agricultura, neque frugum, fructuumque reliquo-  
 rum perceptio, et conseruatio sine opera hominum ul-  
 la esse potuisset. Iam uero et earum rerum, quibus  
 abundaremus exportatio, et earum quibus egeremus  
 inuectio certe nulla esset, nisi his muneribus homines  
 fungerentur. eademque ratione nec lapides excide-  
 rentur à terra ad usum nostrum necessarij: nec fer-  
 rum, aurum, æs, argentum effoderetur penitus abdi-

tum, sine hominum labore & manu. Tecta uero, quibus & frigorum uis pelleretur, & calorum molestiae sedarentur, unde aut initio generi humano dari potuissent, aut postea subuenire, si aut uis tempestatis, aut terrae motu, aut uetustate cecidissent, nisi communis uita ab hominibus harum rerum auxilia petere didicisset? adde ductus aquarum, derivationes fluminum, agrorum irrigationes, moles oppositas fluctibus, portus manu factos: quæ non sine hominum opere habere possemus. Ex quibus omnibus, multisque alijs perspicuum est qui fructus, quæque utilitates ex rebus ijs quæ sunt inanimatæ, percipiantur, eas nos nullo modo sine hominum manu, atque opera capere potuisse. Qui denique ex bestiis fructus, aut quæ commoditas, nisi homines adinuarent, percipi posset? nam & qui principes inueniendi fuerunt quem ex quaque bellua usum habere possemus, homines certe fuerunt: nec hoc tempore sine hominū opera aut pascere equos, aut domare, aut tueri, aut tempestuosos fructus ex his capere possemus: ab eisdemque & ea quæ nocent, interficiuntur, & quæ usui possunt esse, capiuntur. Quid enumerem artium multitudinem, sine quibus uita omnino nulla esse potuisset? quis enim agris subueniret, quæ esset oblectatio ualentium, qui uictus, aut cultus, nisi tam multæ nobis artes ministrarent? quibus rebus exulta hominū uita tantū destitit à uictu & cultu bestiarum. Vrbes uero sine hominum cœtu non potuissent nec edificari, nec frequentari: ex quo leges, moresque constituti: tum iuris æqua descriptio, certaque uiuendi disciplina: per quas bene, beatèq; uiuitur. quas res & mansuetudo animorum consecuta, & uerecun-

dia est: effectumque est, ut esset uita munitior, atque ut dando, et accipiendo, permutandisque facultatibus, et commodis nulla re egeremus. Lōgiores hoc loco sumus, quàm necesse est. quis est enim, cui non perspicua sint illa, quæ pluribus uerbis à Panætio commemorantur, neminem neque ducem in bello, nec principem domi magnas res, et salutare sine hominum studijs gerere potuisse? Commemoratur ab eo Themistocles, Pericles, Cyrus, Agesilaus, Alexander: quos negat sine adiumentis hominum tantas res efficere potuisse. Vtitur in re non dubia testibus non necessarijs. Atque ut magnas utilitates adipiscimur conspiratione hominum, atque consensu: sic nulla tam detestabilis pestis est, quæ non homini ab homine nascatur. Est Dicaearchi liber de interitu hominum, Peripatetici magni et copiosi: qui collectis cæteris causis, eluuiōis, pestilentiae, uastitatis, belluarum etiam repentinæ multitudinis: quarum impetu docet quædam hominum genera esse consumpta: deinde comparat, quanto plures deleti sint homines hominum impetu, id est bellis, aut seditionibus, quàm omni reliqua calamitate. Cū igitur hic locus nihil habeat dubitationis, quin homines plurimum hominibus et prosint et ob sint, proprium hoc statuo esse uirtutis, conciliare sibi animos hominum, et ad usus suos adiungere. itaque quæ in rebus inanimis, quæque in usu, et tractatione belluarum sunt utiliter ad hominum uitam, artibus ea tribuuntur operosis. hominum autem studia ad amplificationem nostrarum rerum prompta, ac parata uiro-  
rum præstantiū sapientia, et uirtute excitantur. Etenim uirtus ferè omnis in tribus rebus uertitur. qua-



rum una est in perspicendo, quid in quaque re uerū  
sincerūque sit, quid consentaneum cuique, quid con-  
sequens, ex quo quæque gignantur, quæ cuiusq; rei sit  
causa. alterū, cohibere motus animi turbatos, quos Græ-  
ci πᾶσι nominant: appetitiones, quas illi ὁρμᾶς, obedi-  
entes efficere rationi. tertium, ijs quibuscum congrega-  
mur, uti moderate et scienter, quorum studijs eā quæ  
natura desiderat, expleta, cumulataque habeamus:  
per eos denique, siquid importetur nobis incommodi,  
propulsemus: ulciscamurque eos qui nocere nobis cona-  
ti sunt: tantāque poena afficiamus, quantam æquitas  
humanitasque patitur. Quibus autem rationibus hęc  
facultatem assequi possimus, ut hominum studia comple-  
ctamur, eāque teneamus, dicemus neque ita multo post.  
Sed pauca ante dicenda sunt. Magnam ium esse in  
fortuna in utranque partem, uel ad secundas res, uel  
aduersas, quis ignorat? nam et cum prospero flatu e-  
ius utimur, ad optatos exitus prouehimur: et cum re-  
flauit, affligimur. Hęc igitur ipsa fortuna cæteros ca-  
sus rariores habet: primum ab inanimis procellis, tē-  
pestates, naufragia, ruinas, incēdia: deinde à bestijs  
ictus, morsus, impetus. Hęc igitur (ut dixi) rariora. At  
uero interitus exercituum, ut proxime triū, sæpe mul-  
torum: clades imperatorum, ut nuper summi, ac sin-  
gularis uiri: inuidiæ præterea multitudinis, atque ob  
eas bene meritorum sæpe ciuium expulsionēs, calamita-  
tes, fugæ. rursusque secundæ res, honores, imperia,  
uictoriæ, quanquam fortuita sunt, tamen sine homi-  
num operibus, et studijs neutram in partem effici pos-  
sunt. Hoc igitur cognito, dicendum est, quonam mo-  
do hominum studia ad utilitates nostras allicere, at-

que excitare possimus. quæ si longior fuerit oratio, cum magnitudine utilitatis comparetur: ita fortasse etiam brevior uidebitur. Quæcunq; igitur homines homini tribuunt ad eum augendum atque honestandũ, aut beneuolentiæ gratia faciunt, cum aliqua de causa quempiam diligunt: aut honoris, si cuius uirtutem suspiciunt, & si quem dignum fortuna quam amplissima putant: aut cui fidem habent, & bene rebus suis consulere arbitrantur: aut cuius opes metuunt: aut contra, à quibus aliquid expectant: ut cum Reges, popularesue homines largitiones aliquas proponunt: aut postremo pretio, aut mercede ducuntur. quæ sordidissima quidem est ratio, & inquinatissima & ijs qui ea tenentur: & illis qui ad eam confugere conantur. male enim se res habet, cum quod uirtute effici debet, id tentatur pecunia. Sed quoniam nonnunquam subsidium hoc necessarium est, quemadmodum sit utendum eo dicemus, si prius ijs de rebus, quæ uirtuti propiores sunt, dixerimus. Atque etiam subiiciunt se homines imperio alterius, & potestati pluribus de causis. ducuntur enim aut beneuolentiâ, aut beneficiorum magnitudine, aut dignitatis præstantia, aut spe, sibi id utile futurum: aut metu, ne uì parere cogantur: aut spe largitionis, promissionisque capti: aut postremo, ut sæpe in nostra Rep. uidemus, mercede conducti. Rerum autem omnium nec aptius est quicquam ad opes tuendas, quàm diligi: nec alienius, quàm timeri. Præclare Ennius:

„ Quem metuunt, oderunt:

„ Quem quisque odit, perijisse expetit.

Multorum autem odijs nullas opes posse obsistere, si an-

tea fuit ignotum, nuper est cognitum. Nec uero huius tyranni solum, quem armis oppressa pertulit ciuitas, interitus declarat, quantum odium hominum ualet ad pestem: sed reliquorum similes exitus tyrānorum, quorum haud ferè quisquam interitum similem efgit. malus enim custos diuturnitatis metus: contrāque beneuolentia fidelis est uel ad perpetuitatem. Sed ijs qui ui oppressos imperio coercent, sit sanè adhibenda scēuitia, ut heris in famulos, si aliter teneri nō possunt. qui uero in libera ciuitate ita se instrunt, ut metuantur: his nihil potest esse dementius. quauis enim demersæ sint leges alicuius opibus, quauis tremefacta libertas, emergunt tamen hæc aliquando aut iudicijs tacitis, aut occultis de honore suffragijs: acriores autem morsus sunt intermissæ libertatis, quā retētæ. Quod igitur latissime patet, neque ad incolumitatem solum, sed etiam ad opes & potentiam ualet plurimum. id amplectamur: ut metus absit, charitas retineatur, ita facillime quæ uolumus, & priuatis in rebus & in Repub. consequemur. etenim qui se metui uolēt, à quibus metuuntur, eosdem metuāt ipsi, necesse est. Quid enim censemus superiorem illum Dionysium, quo cruciatu timoris angī solitum, qui cultros metuens tonsorios candente carbone sibi adurebat capillum? quid Alexandrum Pheræum, quo animo uixisse arbitramur? qui (ut scriptum legimus) cum uxorem Theben admodum diligeret, tamen ad eam ex epulis in cubiculū ueniens, barbarum, & eum quidem (ut scriptum est) compunctum notis Threicijs, districto gladio iubebat anteire: præmittebātq; de stipatoribus suis, qui perscrutarentur araulas muliebres, & nequod in uestimentis ocul

taretur telum, exquireret. O miserum, qui fidiorem  
et barbarum, et stigmatiam putaret, quam coniugem.  
nec eum fefellit opinio: ab ea est enim ipse propter  
pellicatus suspicionem interfectus. Nec uero ulla uis  
imperij tanta est, quæ premente metu possit esse diu-  
turna. testis est Phalaris: cuius est præter cæteros no-  
bilitata crudelitas: qui non ex insidijs interijt ut is  
quem modo dixi, Alexander: non a paucis, ut hic no-  
ster: sed in quem uniuersa Agrigentinarum multitudo  
impetum fecit. Quid Macedones? nõnne Demetrium  
reliquerunt, uniuersique se ad Pyrrhum contulerunt?  
quid Lacedæmonios iniuste imperantes? nõnne repen-  
te omnes ferè socij deseruerunt, spectatoresque se ocio-  
sos præbuerunt Leuctricæ calamitatis? externa liben-  
tius in tali re, quam domestica recordor. ueruntamen  
quàm diu imperium populi Ro. beneficijs tenebatur,  
non iniurijs bella, aut pro socijs, aut de imperio gere-  
bantur: exitus erant bellorum aut mites, aut necessa-  
rij. Regum, populorum, nationum portus erat, et refu-  
gium Senatus. Nostri autem magistratus, imperato-  
resque ex una hac re maximam laudem capere stude-  
bant, si provincias, si socios æquitate et fide defendis-  
sent. Itaque illud patrociniũ orbis terræ uerius, quàm  
imperium poterat nominari. sensim hanc consuetudi-  
nem, et disciplinam iam antea minuebamur, post ue-  
ro Syllæ uictoriã penitus amisimus: desitum est enim  
uideri quicquam in socios iniquum, cum extitisset e-  
tiam in ciues tanta crudelitas. ergo in illo secuta est ho-  
nestam causam non honesta uictoria: est enim ausus  
dicere, hasta posita, cum bona in foro uenderet et bo-  
norum uirorum, et locupletum, et certe ciuium, præ-

dam suam se uendere. secutus est, qui in causa impia, uictoria etiam fœdiore nō solum singulorum ciuium bona publicaret, sed uniuersas quoque prouincias, regionesque uno calamitatis iure comprehenderet: itaque uexatis, & perditis exteris nationibus, ad exemplum amissi imperij portari in triumpho Massiliam uidimus, & ex ea urbe triumphari, sine qua nūquam nostri imperatores ex transalpinis bellis triumpharunt. multa præterea commemorarem nefaria in socios, si hoc uno sol quicquam uidisset indignius. iure igitur plectimur: nisi enim multorum impunita scelera tulissemus, nunquam ad unum tanta peruenisset licentia: à quo quidem rei familiaris ad paucos, cupiditatum ad multos improbos uenit hæreditas. Nec uero unquam bellorum ciuiliū semen & causa deerit, dum homines perditī hastam illam cruentam & meminerint, & sperabūt, quam P. Sylla cum uibrasset, Dictatore propinquo suo, idem sexto & tricesimo anno post à sceleratiore hasta eadem non reāssit. alter autem qui in illa Dictatura Scriba fuerat, in hac fuit Quæstor urbanus. Ex quo debet intelligi, talibus præmijs propositis, nunquam defutura bella ciuilia. itaque parietes urbis modo stant, & manent, ijque ipsi iam extrema scelera metuentes. Rem uero publicam penitus amisimus. atque in has clades incidimus (redeundum est enim ad propositum) dum metui, quā chari esse & diligī, maluimus. Quæ si populo R. iniuste imperanti accidere potuerunt, quid debent putare singuli? quod cum perspicuum sit beneuolentiæ uim esse magnam, metus imbecillem: sequitur, ut differamus, quibus rebus possimus facillime eam quam uolumus, adipisci

cum honore, & fide charitatem. sed ea non pariter omnes egemus. nam ad cuiusque uitam instituendam accommodandum est, à multis ne opus sit, an satis sit à paucis diligere. Certum igitur hoc sit, & id quod & primum, & maxime necessarium, familiaritates habere fidas amantium nos amicorum, & nostra mirantium. hæc enim est una res prorsus, ut non differat multum inter summos & mediocres uiros: eaque utrisque propemodum comparanda. Honore, & gloria, & beneuolentia ciuium fortasse non æque omnes egent: sed tamen si cui hæc suppetunt, adiuvant aliquantum tum ad cætera, tum ad amicitias comparandas. Sed de amicitia libro dictum est, qui inscribitur Lælius. Nunc dicamus de gloria: quanquam ea quoque de re duo sunt nostri libri. sed attingamus, quandoquidem ea in rebus maioribus administrandis adiuvat plurimum.

Summa igitur & perfecta gloria constat ex tribus his: si diligit multitudo: si fidem habet: si cum admiratione quadam, honore nos dignos putat. Hæc autem, si est simpliciter breviterque dicendum, quibus rebus pariuntur à singulis, eisdem ferè à multitudine. sed est alius quoque quidam aditus ad multitudinem, ut in uniuersorum animos tanquam influere possimus. Ac primum de illis tribus, quæ ante dixi beneuolentiæ præcepta, uideamus: quæ quidem beneficijs capitur maxime: secundo autem loco benefica uoluntate beneuolentia mouetur, etiam si res forte non suppetit. uehementer autem amor multitudinis commouetur ipsa fama, & opinione liberalitatis, beneficentiæ, iustitiæ, fidei, omniumque earum uirtutum, quæ pertinent ad mœursuetudinem morum, ac facilitatem. Etenim

illud ipsum quod decorum honestumque diximus, quia per se nobis placet, animosque omnium natura et specie sua commouet, maximeque quasi perlucet ex iis quas commemoravi uirtutibus, itcirco illos in quibus eas uirtutes esse remur, à natura ipsa diligere cogimur. atque hæ quidem causæ sunt diligendi grauissimæ. possunt enim præterea nonnullæ esse læuiores. Fides autem ut habeatur, duabus rebus effici potest: si existimabimur adepti coniuncta cum iustitia prudentiam. nam et iis fidem habemus, quos plus intelligere, quam nos, arbitramur, quosque et futura prospicere credimus, et cum res agatur, in discrimenque uentum sit, expedire rem, et consilium ex tempore capere posse. (hanc enim omnes existimant utilem, ueramque prudentiam) iustis autem et fidis hominibus, id est bonis, ita fides habetur ut nulla sit in his fraudis iniuriæque suspicio. itaque his salutem nostram, his fortunas, his liberos rectissime committi arbitramur. Harum igitur • duarum ad fidem faciendam iustitia plus pollet, quippe cum ea sine prudentia satis habeat auctoritatis: prudentia sine iustitia nihil ualeat ad faciendam fidem. quo enim quis uersutior et callidior est, hoc inuisior et suspectior detracta opinione probitatis. Quamobrem intelligentiæ iustitia coniuncta, quantum uolet habebit ad faciendam fidem uirium: iustitia sine prudentia multum poterit: sine iustitia nihil ualebit prudentia. Sed ne quis sit admiratus, cur cum inter omnes philosophos constet, à meque ipso sæpe disputatum sit, qui unam haberet, omnes habere uirtutes: nunc ita seiungam, quasi possit quisquam, qui non idem prudens sit, iustus esse: alia est illa, cum ueritas ipsa limatur in di-



sputatione, subtilitas: alia cum ad opinionem communem omnis accommodatur oratio. Quāobrem, ut uulgus, ita nos hoc loco loquimur, ut alios fortes, alios bonos uiros, alios prudentes dicamus: popularibus enim uerbis est agendum et usitatis, cum loquamur de opinione populari: idque eodem modo fecit Panætius. sed ad propositum reuertamur. Erat igitur ex tribus, quæ ad gloriā pertinerent, hoc tertium, ut cum admiratione hominum honore ab his digni iudicaremur. Admiratur igitur communiter illi quidē omnia quæ magna, et præter opinionem suam animaduenterunt: separatim autem in singulis, si perspiciunt nec opinata quidem bona: itaque eos uiros suspiciunt, maximisque efferunt laudibus, in quibus existimant se excellētes quasdam, et singulares uirtutes perspicere: despiciunt autem eos et contemnunt, in quibus nihil uirtutis, nihil animi, nihil neruorum putant. non enim omnes eos contemnunt, de quibus male existimant. nam quos improbos, maleficos, fraudulētos putant, et ad faciendā iniuriam instructos, eos haud cōtemnunt quidē, sed de ijs male existimant. Quamobrē (ut ante dixi) contemnuntur ij qui nec sibi, nec alteri prosunt, ut dicitur: in quibus nullus labor, nulla industria, nulla cura est: admiratione quadam uero afficiuntur ij, qui anteire cæteros uirtute putantur, et cum omni carere dedecore, tum uero ijs uitijs, quibus alij non facile possunt obsistere: nam et uoluptates blandissimæ dominæ sæpe maiores partes animi à uirtute detorquent: et dolorum cum admoventur facies, præter modum plerique exterrentur: uita, mors, diuitiæ, paupertas omnes homines uehementissime permouent. quæ qui in utranque partem ex-

cælo animo magnòque despiciunt: cùmque aliqua his  
ampla & honesta res obiecta est, totos ad se conuer-  
tit & rapit: tum quis non admiretur splendorem, pul-  
chritudinèque uirtutis? Ergo & hæc animi despi-  
cientiæ admirabilitatem magnam facit: & maxime  
iustitia, ex qua una uirtute uiri boni appellantur: mi-  
rifica quædam res multitudini uidetur, nec iniuria.  
nemo enim iustus esse potest, qui mortem, qui dolorẽ,  
qui exilium, qui egestatem timet, aut qui ea quæ his  
sunt contraria, æquitati anteposit. maximèque admi-  
ratur eum qui pecunia non monetur: quod in quo ui-  
ro perspectum sit, hunc dignum spectatu arbitrantur.  
Itaque illa tria quæ proposita sunt ad gloriam, omnia  
iustitia conficit & beneuolentiam: quod prodesse uult  
plurimis: & ob eandem causam fidem & admiratio-  
nem, quod eas res spernit & negligit ad quas pleriq;  
inflammati auiditate rapiuntur. Ac mea quidem sen-  
tentia omnis ratio & institutio uitæ adiumenta ho-  
minum desiderat, in primisque ut habeas quibuscum  
possis familiares conferre sermones: quod est difficile,  
nisi speciem præ te boni uiri feras. Ergo etiam soli-  
tario homini, atq; in agro uitam agenti opinio iustitiæ  
necessaria est, eoque etiam magis quod, si eam non ha-  
bebunt, iniusti habebuntur: nullis præsidys septi mul-  
tis afficientur iniurijs. Atque his etiam qui uendunt,  
emunt, conducunt, locant, contrahendisque negotijs im-  
plicantur, iustitia ad rem gerendam necessaria est. cu-  
ius tanta uis est, ut nec illi quidem, qui maleficio &  
scelere pascuntur, possint sine ulla particula iustitiæ ui-  
uere. nam qui eorum cuipiam, qui unà latrocinan-  
tur, furatur aliquid, aut clam eripit, is sibi ne in la-

trocinio quidem relinquit locum. ille autem, qui archipirata dicitur, nisi æquabiliter prædā dispartiat, aut occidetur à socijs, aut relinquetur. quinetiam leges latronum esse dicuntur, quibus pareant, quas obseruent. Itaque propter æquabilem præde portionem & Bargulus. Illyricus latro, de quo est apud Theopompum, magnas opes habuit: & multo maiores Viriatus Lusitanus: cui quidem exercitus nostri, imperatorésque cesserunt: quæ C. Lælius, is qui sapiens usurpatur, Prætor fregit & comminuit, ferocitatēque eius ita repres- sit, ut facile bellum reliquis traderet. Cum igitur tanta uis iustitiæ sit, ut ea etiam latronum opes firmet at- que augeat, quantam eius uim inter leges & iudicia, & instituta Reip. fore putamus? Milui quidem non apud Medos solum (ut ait Herodotus) sed apud etiam maiores nostros fruendæ iustitiæ causa uidentur olim bene morati Reges constituti. nam cum premeretur ini- tio multitudo ab ijs, qui maiores opes habebant, ad u- num aliquem confugebant uirtute præstantem: qui cum prohiberet iniuria tenuiores æquitate constituen- da, summos cum infimis pari iure retinebat. Eadēmq; constituendarum legum fuit causa, quæ Regum: ius e- nim semper quæsitum est æquabile: neque enim ali- ter esset ius. id si ab uno iusto, & bono uiro conseque- bantur, eo erant contenti. cum id minus contingeret, leges sunt inuētæ, quæ cum omnibus semper una, at- que eadem uoce loquerentur. Ergo hoc quidem perspi- cuum est, eos ad imperandum deligi solitos, quorum de iustitia magna esset opinio multitudinis. adiuncto uero hoc, ut iſdem etiam prudentes haberentur, ni- hil erat quod homines his auctoribus non posse conse-

qui se arbitrantur. Omni igitur ratione colenda, et retinenda iustitia est: tum ipsa propter sese (nam aliter iustitia non esset) tum propter amplificationem honoris et gloriæ. Sed ut pecuniæ quærendæ non solū ratio est, sed etiam collocandæ, quæ perpetuos sumptus suppetet, nec solum necessarios, sed etiam liberales: sic gloria quærenda et collocanda ratione est. quanquam præclare Socrates hanc viam ad gloriam proximam et quasi compediariam dicebat esse, si quis id ageret, ut qualis haberi uellet, talis esset. Quod si qui simulatione et inani ostentatione, ficto non modo sermone, sed etiam uultu stabilem se gloriam consequi possentur, uehementer errant. Vera gloria radices agit, atque etiam propagat: cuncta omnia celeriter, tanquam flosculi, decidunt: nec simulatum potest quicquā esse diuturnum. testes sunt permulti in utrāque partē, sed breuitatis causa familia erimus contenti una. Ti. enim Gracchus P. filius tam diu laudabitur, dum memoria rerum Romanarum manebit. ac eius filij nec uiui probantur à bonis, et mortui numerum obtinent iure cæsorum. Qui igitur adipisci ueram iustitiæ gloriam uolet, iustitiæ fungatur officijs. ea quæ essent, dictum est in superiore libro. Sed ut facillime quales simus, tales esse uideamur: etsi in eo ipso uis maxima est, ut simus ij qui haberi uelimus: tamen quedam præcepta danda sunt. nam si quis ab ineunte ætate habet causam celeritatis et nominis: aut à patre acceptam, quod tibi mi Cicero arbitror contigisse: aut aliquo casu, atque fortuna: in hunc oculi omniū coniiciuntur, atque in eo quid agit, quemadmodum uiuat, inquiritur, et tanquam in clarissima luce uersetur, ita nullum obscurum potest

nec dictum eius esse nec factum : quorum autem prima ætas propter humilitatem & obscuritatem in hominum ignoratione uersatur, hi simul ac iuuenes esse cœperunt, magna spectare, & ad ea rectis studiis debent contendere. quod eo firmiore animo facient, quia non modo non inuidetur illi ætati, uerumetiam fauetur. Prima igitur est adolescenti commendatio ad gloriã, si qua ex bellicis rebus comparari potest. in qua multi apud maiores nostros extiterunt : semper enim ferè bella gerebantur. tua autem ætas incidit in id bellum, cuius altera pars sceleris nimium habuit, altera felicitatis parum. Quo tamen in bello, cum te Pompeius alicui præfecisset, magnam laudem & à summo uiro, & ab exercitu consequere, equitando, iaculando, omnia militari labore tolerando. atque ea quidem tua laus pariter cum Rep. cecidit. Mihi autem hæc oratio suscepta non de te est, sed de genere toto. quamobrem ad ea quæ restant, pergamus. Ut igitur in reliquis rebus multo maiora sunt opera animi, quam corporis: sic et res, quas persequimur ingenio, ac ratione, gratiores sunt, quam illæ, quas uiribus. Prima igitur commendatio proficiscitur à modestia, tum pietate in parentes, tum in suos beneuolentia. Facillime autem in optimam partem cognoscuntur adolescentes, qui se ad claros & sapientes uiros, bene consulentes Reipub. contulerunt. quibuscum si frequentes sunt, opinionem afferunt populo, eorum fore se similes, quos sibi ipsi delegerunt ad imitandum. P. Rutilij adolescentiam ad opinionem & innocentiam, & iuris scientiam, P. Mutij commendauit domus. nam L. quidem Crassus, cum esset admodum adolescens, non aliunde mu-

tuatus est, sed sibi ipse peperit maximam laudem ex illa accusatione nobili & gloriosa. & qua ætate qui exercentur, laude affici solent: ut de Demosthene accepimus: ea ætate L. Crassus ostendit, id se in foro optime iam præmeditatum facere, quod etiam tum poterat domi cum laude meditari. Sed cum duplex sit ratio orationis: quarum in altera sit sermo, in altera contentio: non est id dubium, quin contentio orationis plurimum possit, & maiorem vim habeat ad gloriam: ea est enim, quam eloquentiam dicimus: sed tamen difficile dictu est, quantopere conciliet animos hominum comitas, affabilitasque sermonis. Extant epistolæ & Philippi ad Alexandrum, & Antipatri ad Cassandrum, & Antigoni ad Philippum, trium prudentissimorum, (sic enim accepimus) quibus præcipiunt, ut oratione benigna multitudinis animos ad benevolentiam alliciant, militesque blando appellando sermone deliniant. quæ autem in multitudine cum contentione habetur oratio, ea sæpe uniuersam excitat gloriam: magna est enim admiratio copiose sapienterque dicentis: quem qui audiunt, intelligere etiam & sapere plus quam cæteros arbitrantur. si uero inest in oratione mixta modestiæ grauitas, nil admirabilius fieri potest: eoque magis, si ea sunt in adolescente. Sed cum sint plurima causarum genera, quæ eloquentiam desiderant: multique in nostra Repub. adolescentes, & apud iudices, & apud Senatum dicendo laudem assecuti sint: maxima admiratio est in iudicijs. quorum ratio duplex est. nam ex accusatione & defensione constat: quarum etsi laudabilior est defensio, tamen etiam accusatio probata per sæpe est. Dixi paulo ante de Crasso. idem

fecit adolescens M. Antonius: etiam P. Sulpitij eloquentiam accusatio illustravit, cum seditiosum & inutilem ciuem C. Norbanum in iudicium uocauit. sed hoc quidem non est sæpe faciendum: nec unquam, nisi aut Reip. causa, ut duo Luculli: aut patrocínio, ut nos pro  
 \* Siculis, pro Sardis, pro M. Albutio Iulius Cæsar. in accusando etiam M. Aquilio L. Fusij cognita industria est. Semel igitur, non sæpe certe. sin erit, cui faciendum sit sæpius, Reipub. tribuat hoc munus: cuius inimicos ulcisci sæpe, non est reprehendendum: modus tamen adsit. duri enim hominis, uel potius uix hominis uidetur, periculum capitis inferre multis: id enim tum periculosum ipsi est, tum etiam sordidum ad famiam, committere, ut accusator nominetur: quod contigit M. Bruto summo genere nato illius filio, qui iuris ciuilis in primis peritus fuit. Atque etiam hoc præceptum officij diligenter tenendum est, ne quem unquam innocentem in iudicium capitis arcessas: id enim sine scelerere fieri nullo pacto potest. nam quid est tam inhumanum quàm eloquentiam à natura ad salutem hominum & ad conseruationem datam, ad bonorum pestem perniciemque conuvertere? Nec tamen, ut hoc fugiendum est, ita habendum est religioni contrarium, nocentem aliquando, & nefarium impiumque defendere. uult hoc multitudo, patitur consuetudo, fert etiam humanitas. iudicis est, semper in causis uerum sequi: patroni nonnunquam uerisimile, etiam si minus sit uerum, defendere: quod scribere, præsertim cum de philosophia scriberem, non auderem, nisi idem placeret grauissimo Stoicorum Panætio. maxime autem & gloria paritur, & gratia defensionibus, eoque maior,



si quando accidit, ut ei subueniatur qui potentis alicuius opibus circumueniri, urgerique uideatur: ut nos & saepe alios, & adolescentes contra L. Syllae dominantis opes pro Sex. Roscio Amerino fecimus: quæ (ut scis) extat oratio. Sed expositis adolescentium officiis, quæ ualeant ad gloriam adipiscendam, deinde de beneficentia ac liberalitate dicendum est. cuius est ratio duplex. nam aut opera benigne fit indigentibus, aut pecunia. facilius est hæc posterior, locupletis præsertim: sed illa lautior ac splendidior, & uiro forti claroque dignior. quanquam enim in utroque inest gratificandi liberalis uoluntas, tamen altera ex arca: altera ex uirtute depromitur: largitioque quæ fit ex re familiaris, fontem ipsum benignitatis exhaurit: ita benignitate benignitas tollitur: qua quo in plures usus sis, eo minus in multos uti possis. At, qui opera, id est uirtute, & industria, benefici & liberales erunt, primum quo pluribus profuerint, eo plures ad benigne faciendum adiutores habebunt: deinde consuetudine beneficentiae paratiores erunt, & tanquam exercitatiores ad bene de multis promerendum. Præclare in epistola quadam Alexandrum filium Philippus accusat, quod

- .. largitione beneuolentiæ Macedonum cōsectetur. Quid
- .. te (malum) inquit, rationis in istam spem induxit, ut
- .. eos tibi fideles putares fore, quos pecunia corrupisses?
- .. an tu id agis, ut Macedones non te Regem suum, sed
- .. ministrum & præbitorem putent? Bene ministrum & præbitorem, quia sordidum Regi. melius etiam, quod largitionem corruptelam dixit esse. fit enim deterior qui accipit, atque ad idem semper expectandum paratior. Hoc ille filio. sed præceptum putemus omni-

bus. Quamobrem id quidem non est dubium, quin illa benignitas, quæ constat ex opera & industria, & honestior sit, & latius patèat, & possit prodesse pluribus: nonnunquam tamen est largiendum: nec hoc benignitatis genus omnino repudiandum est: & sæpe idoneis hominibus indigentibus de re familiari imperiendū, sed diligenter atque moderate: multi enim patrimonialia effuderunt inconsulte largiēdo. Quid autem est stultius, quàm quod libèter facias, curare ut id diutius facere non possis? atque etiam sequuntur largitionem rapinæ. cum enim dando egere cœperunt, alienis bonis manus afferre coguntur: ita, cum benevolentia comparādæ causa benefici esse uelint, non tanta studia assequuntur eorum quibus dederūt, quanta odia eorum quibus ademerunt. Quamobrem nec ita claudēda est res familiaris, ut eam benignitas aperire non possit: nec ita referāda, ut pateat omnibus: modus adhibeatur, isque referatur ad facultates. Omnino meminisse debemus id, quod à nostris hominibus sæpissime usurpatum, iāmque in prouerbij consuetudinem uenit, Largitionem fundum non habere. etenim quis potest esse modus, cum & ijdem qui consueuerunt, & illud idem alij desiderent? Omnino duo sunt genera largitorum, quorum alteri prodigi, alteri liberales. prodigi, qui epulis, & uiscerationibus, & gladiatorum muneribus, ludorum uenationūque apparatu pecunias profundunt in eas res, quarū memoriam aut breuem, aut nullam sint relicturi omnino. liberales autem, qui suis facultatibus aut captos à prædonibus redimunt, aut æs alienum suscipiunt amicorum causa, aut in familiarum collocatione adiuant, aut opitulantur uel in

re quærenda, uel augenda. Itaque miror, quid in mentem uenerit Theophrasto in eo libro quem de diuitijs scripsit: in quo multa præclare, illud absurde. est enim multus in laudanda magnificentia, et apparatione popularium munerum: taliūque sumptuum facultatem, fructum diuitiarum putat. Mihi autem ille fructus liberalitatis, cuius exempla pauca posui, multo et maior uidetur, et certior. Quanto Aristoteles grauius et uerius nos reprehendit, qui has effusiones pecuniarum non admiremur, quæ sunt ad multitudinem delinendam. at ij qui ab hostibus obsidentur, si emere aquæ sextarium mina cogerentur, hoc primo auditu incredibile nobis uideri, omnesque mirari: sed cum attenderimus, ueniam necessitati dare: in his immanibus iacturis, infinitisque sumptibus nihil nos magnopere mirari: cum præsertim neque necessitati subueniatur, nec dignitas augeatur, ipsaque illa delinitio multitudinis ad breue tempus exiguumque duratura sit, eaque à leuissimo quoque animo: in quo tamen ipso una cum satietate memoria quoque moriatur uoluptatis. bene etiam colligitur hæc pueris, et mulierculis, et seruis, et seruorum similibus liberis esse grata: graui uero homini, et ea quæ fiunt, iudicio certo ponderati, probari posse nullo modo. quāquam intelligo in nostra ciuitate inueterasse iam bonis temporibus, ut splendor AEdilitatum ab optimis uiris postuletur. Itaque P. Crassus cum cognomine diues, tum copiis, functus est AEdilitio maximo munere. et paulo post L. Crassus cum omnium hominum moderatissimo. Q. Mutio magnificentissima AEdilitate functus est: deinde C. Claudius App. filius: multi post, Lucullus, Hortensius, Silanus. omnes autem P. Lentulus me Con

Jule uicit superiores. hunc est Scaurus imitatus. Magnificentissima uero nostri Pōpeiū munera secundo Consulatu. in quibus omnibus, quid mihi placeat, uides. Vitāda tamen est suspicio auaritiæ. nam Mamercus homini ditissimo, prætermisio AEdilitatis Cōsulatus repulsam attulit. quare & si postulatur à populo, bonis uiris si non desiderantibus, attamen approbantibus faciendū est, modo pro facultatibus: nos ipsi ut fecimus: & si quando aliqua res maior, aut utilior populari largitione acquiritur: ut Orestis nuper prandia in semitis decimæ nomine magno honori fuerūt. ne M. quidem Seio uitio datum est, quod in caritate annonæ asse modium populo dedit. magna enim se & inueterata inuidia, nec turpi iactura, quando erat AEdilis, nec maxima liberauit. Sed honori summo nuper nostro Miloni fuit, quod gladiatoribus emptis Reipub. causa, quæ salute nostra continebatur, omnes P. Clodij conatus furorēque compressit. Causa igitur largitionis est, si aut necesse est, aut utile. In his autem ipsis mediocritatis regula optima est. L. quidem Philippus Q. filius, magno uir ingenio, in primisque clarus, gloriari solebat se sine ullo munere adeptum esse omnia, quæ haberentur amplissima. Dicebat idem Cotta Curio. nobis quoque licet in hoc quodāmodo gloriari. nam pro amplitudine honorum quos cunctis suffragiis adepti sumus nostro quidem anno, quod contigit eorū nemini, quos modo nominavi, sanè exiguus sumptus AEdilitatis fuit. Atque etiam illæ impensæ meliores sunt, muri, naualia, portus, aquarum ductus, omniaq; quæ ad usum Reipub. pertinent. quanquam, quod præsens tanquam in manu datur, iucundius est: tamen hæc

in posterum graviora, theatra, porticus, noua templa. uerecundius reprehendo propter Pompeium: sed doctissimi non probant: ut & hic ipse Panætius, quem multum in his libris secutus sum, non interpretatus: & Phalereus Demetrius, qui Periclem principem Græciæ uituperabat, quòd tantam pecuniam in præclara illa Propylea coniecit. Sed de hoc genere toto in ijs libris, quos de Rep. scripsi, diligenter est disputatum. Totâ igitur ratio talium largitionum genere uitiosa est, temporibus necessaria, & tum ipsa, & ad facultates accommodanda, & mediocritate moderanda est. In illo autem altero genere largiendi, quod à liberalitate proficiscitur, non uno modo in disparibus causis affecti esse debemus. alia causa est eius, qui calamitate premitur: & eius qui res meliores quærit nullis suis rebus aduersis. propensior benignitas esse debet in calamitosos: nisi forte erunt digni calamitate. in ijs tamen qui se adiunari uolent, non ut ne affligantur, sed ut ad altiore gradum ascendant, restricti omnino nullo modo esse debemus: sed in deligendis idoneis iudicium, & diligentiam adhibere. nam præclare Ennius:

„ Benefacta male locata, malefacta arbitror.

Quod autem tributum est bono uiro, & grato, in eo cum ex ipso fructus est, tum etiam ex cæteris. temeritate enim remota, gratissima est liberalitas: eoque eam studiosius plerique laudant, quòd summi cuiusque bonitas commune perfugium est omnium. Danda igitur opera est, ut hos beneficijs quamplurimis afficiamus, quorum liberis, posterisque prodatur memoria, ut his ingratis esse non liceat. omnes enim immemorem beneficij oderunt: eamque iniuriam in deterrenda li-

beralitate sibi etiam fieri: eumque qui faciat, communem hostem tenuiorum putant. Atque hæc benignitas etiam Reip. utilis est, redimi è seruitute captos, locupletari tenuiores: quod quidē uulgo solitum fieri ab ordine nostro, in oratione Crassi scriptū copiose uidemus. hanc ergo consuetudinem benignitatis largitioni munerum antepono. hæc est grauium hominum, atque magnorum: illa quasi assentatorū populi, multitudinis leuitatem uoluptate quasi titillantium. conuenit autem tū in dando munificum esse, tum in exigendo non acerbum: in omni que re contrahenda, uedendo, emendo, conducendo, locando, in uicinitatibus, & confinijs æquum & facilem, multa multis de iure suo concedentem: à litibus uero, quantum liceat, & nescio an paulo plus etiam quàm liceat, abhorretem. Est enim non modo liberale, paulum nonnunquam de suo iure dedere, sed interdum etiam fructuosum. habēda autem est ratio rei familiaris: quam quidem dilabi sinere flagitiosum est: sed ita, ut illiberalitatis, auaritiæq; absit suspicio. posse enim liberalitate uti, non spoliante se patrimonio, nimirum est pecuniæ fructus maximus. Recte etiam à Theophrasto est laudata hospitalitas. est enim (ut mihi uidetur) ualde decorū, patere domos hominum illustrium illustribus hospitibus: idque etiam Reip. est ornamento, homines externos hoc liberalitatis genere in urbe nostra non egere: est etiam uehementer utile ijs qui honeste posse multa uolunt, per hospites apud externos populos ualere opibus & gratia. Theophrastus quidē scribit Cimonem Athenis etiam in suos curiales Laciadas hospitalem fuisse. ita enim instituisse, & uillicis imperasse, ut omnia præberentur, qui-

cunque Laciades in uillā suam diuertisset. Quæ autem opera, non largitione beneficia dantur: hæc tum in uniuersam Remp. tum in singulos ciues conferuntur. nam in iure cauere, consilio iuuare, atque hoc scientiæ genere prodesse quamplurimis, uehementer & ad opes augendas pertinet, & ad gratiam. Itaque cum multa præclara maiorum, tum quamoptime constituti iuris ciuilibus summo semper in honore fuit cognitio, atq; interpretatio: quam quidem ante hanc confusionem temporum in possessione sua principes retinuerunt. nunc, ut honores, ut omnis dignitatis gradus, sic huius scientiæ splendor deletus est: idque eo indignius, quòd eo tempore hoc contigit, cum is esset, qui omnes superiores, quibus honore par esset, scientia facile uicisset. Hæc igitur opera grata multis, & ad beneficijs astringendos homines accommodata. Atq; huic arti finitima est dicendi grauior facultas, & gratior, & ornatio. quid enim eloquentia laudabilius, & præstabilius, uel admiratione audientium, uel spe indigentium, uel eorum qui defensi sunt, gratia? huic quoque ergo à maioribus nostris est in tota dignitate principatus datus. disertus igitur hominis, & facile laborantis, quòdque in patrijs est moribus, multorum causas & non grauate, & gratuito defendentis, beneficia, & patrocinia late patent. Admonebat me res, ut hoc quoque loco intermissione eloquentiæ, ne dicam interitum, deplorarem: nisi uererer, ne de me ipso aliquid uiderer queri. sed tamen uidemus, quibus extinctis oratoribus, quàm in paucis spes, quàm in paucioribus facultas, quàm in multis sit audacia. Cū autē omnes non possint, ne multi quidē aut iuris periti esse, aut disertis, li-



æt tamen opera prodesse multis, beneficia petentem:  
 commendantem iudicibus, et magistratibus: uigilan-  
 tem pro re alterius: eos ipsos qui aut consulunt, aut de-  
 fendunt, rogantem: quod qui faciunt, plurimum gratiæ  
 consequuntur, latissimæque eorum manat industria.  
 Iam illud non sunt admonendi (est enim in promptu)  
 ut animaduertant, cum alios iuuare uelint, ne quos of-  
 fendant. sæpe enim aut eos lædunt, quos non debent:  
 aut eos quos non expedit: si imprudentes, negligentie  
 est: si scientes, temeritatis. Utendum etiam est excusa-  
 tione aduersus eos quos inuitus offendas, quacunque  
 possis, quare id quod feceris, necesse fuerit, nec aliter fa-  
 cere potueris: certisque operis, et officijs erit, quod uio-  
 latum est, compensandum. Sed cum in hominibus iu-  
 uandis aut mores spectari, aut fortuna soleat, dictu qui-  
 dem est procliue, itaque uulgo loquuntur, sese in be-  
 neficijs collocandis mores hominum, non fortunam se-  
 qui. honesta oratio est. sed quis est tandem, qui inopis,  
 et optimi uiri causæ non anteponat in opera danda  
 gratiam fortunati et potentis? a quo enim expeditior,  
 et celerior remuneratio fore uidetur, in eum ferè est  
 uoluntas nostra propensior. Sed animaduertendum  
 est diligentius, quæ natura rerum sit. nimirum enim  
 inops ille, si bonus est uir, etiam si referre gratiam nõ  
 potest, habere certe potest. Commodè autem, quicunque  
 dixit: Pecuniam qui habeat, non reddidisse: et qui red-  
 diderit, habere. gratiam autem, et qui reddiderit, ha-  
 bere: et qui habeat, retulisse. At qui se locupletes, hono-  
 ratos, et beatos putant, hi ne obligari quidem benefi-  
 cio uolunt: qui etiam beneficium se dedisse arbitran-  
 tur, cum, ipsi quauis aliquod magnum acceperint, æque

etiã à se aut postulari, aut expectari aliquid suspicantur: patrociniò uero se usos, aut cliẽtes appellari, mortis instar putant. At uero ille tenuis, cum quid factum sit, sese spectatum non fortunam putans, non modo illi qui est meritis: sed etiam illis, à quibus expectat (egget enim multis) gratum se uideri studet. neque enim uerbis auget suum munus, si quo forte fungatur: sed etiam extenuat. uidendũque illud idem, quòd si opulẽtum, fortunatũque defenderis, in illo uno, aut forte in liberis eius manet gratia: sin autem inopem, probum tamen & modestum, omnes non improbi humiles, quæ magna in populo multitudo est, præsidium sibi paratum uidet. Quamobrem melius apud bonos, quàm apud fortunatos beneficium collocari puto. danda omnino opera est, ut omni generi satisfacere possimus: sed si res in contentionem ueniet, nimirum Themistocles est auctor adhibendus: qui, cum consulere-  
tur utrum bono uiro pauperi, aut minus probato diuiti filiam collocaret: Ego, inquit, malo uirum, qui pecunia egeat: quàm pecuniam, quæ uiro. Sed corrupti mores, deprauatque sunt admiratione diuitiarum. quarum magnitudo quid ad unumquemque nostrum pertinet? illum fortasse adiuuat, qui habet: ne id quidem semper. sed fac iuuare: potentior sanè sit, honestior uero quo modo? quòd si etiam bonus erit uir, ne impediant diuitiæ, quo minus iuuetur: modo ne adiuent, sitque omne iudicium, non quàm locuples, sed qualis quisque sit. Extremum autem præceptum in beneficijs operaque danda est. nequid contra æquitatem contendas, ne quid per iniuriam. fundamentum enim perpetuæ commendationis, & famæ est iustitia: sine qua ni

hil potest esse laudabile. Sed quoniam de eo genere beneficiorum dictum est, quæ ad singulos spectant: deinceps de iis quæ ad uniuersos, quæque ad Remp. pertinent, disputandum est. Eorū autem ipsorum partim eiusmodi sunt, ut ad uniuersos ciues pertineant: partim, singulos ut attingant: quæ sunt etiam gratiora. danda est opera omnino, si possit, utrisque, nec minus ut etiam singulis consulatur, sed ita, ut ea res aut prosit, aut certe ne obsit Reip. C. Gracchi frumentaria magna largitio fuit: exhauriebat igitur ærarium. modica M. Octauij, et Reip. tolerabilis, et plebi necessaria: ergo et ciuibus, et Reip. salutaris. In primis autem uidendum erit ei qui Remp. administrabit, ut suum quisque teneat, neque de bonis priuatorum publicæ diminutio fiat. perniciose enim Philippus in Tribunatu, cum legem agrariam ferret: quam tamen antiquari facile passus est, et in eo uehementer se moderatum præbuit: sed cum in agendo multa populariter, tum illud male: non esse in ciuitate duo millia hominum qui rem haberent. capitalis omnino oratio est ad æquationem bonorum pertinens: qua peste quæ potest esse maior? Hanc enim ob causam maxime, ut sua tenerentur, Resp. ciuitatēsq; constitutæ sunt. nam etsi duæ natura congregabantur homines, tamen spe custodiæ rerum suarum urbium præsidia quærebant. Danda etiam opera est, ne (quod apud maiores nostros sæpe fiebat) propter ærarij tenuitatem, assiduitatēque bellorum tributum sic conferendum. idque ne eueniat, multo ante erit providendum. sin qua necessitas huius muneris alicui Reipub. obuenerit, (malo enim alteri, quàm nostræ, ominari: neque tamen de nostra, sed de

omni Rep. disputo) danda erit opera, ut omnes intelligant, si salui esse uelint, necessitati esse parendum. atque etiam omnes, qui Remp. gubernabunt, consulere debebunt, ut earum rerum copia sit, quæ sunt necessariae. quarum qualis comparatio fieri soleat, et debeat, non est necesse disputare. est enim in promptu. tantum locus attingendus fuit. Caput autem est in omni procuratione negotij, et muneris publici, ut auaritiæ pellatur etiam minima suspitio. Vtinam, inquit C. Pontius Samnis, ad illa tempora fortuna me seruasset, et tunc essem natus, quando Romani dona accipere cepissent: non essem passus diutius eos imperare. ne illi quidem multa secula expectanda fuerunt. modo enim hoc malum in hanc Remp. inuasit. itaque facile patior tunc potius Pontium fuisse, siquidem in illo tantum fuit roboris. Nondum ætatem, et decem anni sunt, cum de pecunijs repetundis à L. Pisone lata est lex, nulla antea cum fuisset. at uero postea tot leges, et proximæ quæque duriores: tot rei, tot damnati: tantum Italicum bellum propter iudiciorum metum excitatum: tanta sublatis legibus et iudicijs expilatio, direptioque sociorum: ut imbecillitate aliorum, non nostra uirtute ualeamus. Laudat Africanus Panætius quod fuerit abstinent. quidni laudetur? sed in illo alia maiora: laus enim abstinentiæ non hominis est solum, sed etiam temporum illorum. Omni Macedonum gaza quæ fuit maxima, potitus est Paulus: tantum in ærarium pecuniæ inuexit, ut unius imperatoris præda finem attulerit tributorum. at hic nihil in domum suam intulit præter memoriam nominis sempiternam. imitatus patrem Africanus nihil locupletior

Carthagine euerſa. Quid, qui eius collega in Cenſura fuit, L. Mūmius? nunquid copioſior, cum copioſiſſimam urbem funditus ſuſtulſſet? Italiā ornare, quā domum ſuam maluit: quanquam, Italia ornata, domus i-  
 pſa uidetur mihi ornatioꝝ. Nullum igitur uitium eſt tetrius (ut eò, unde egreſſa eſt, referat ſe oratio) quā auaritia, præſertim in principibus, & Remp. gubernantibus. habere enim quæſtui Remp. non modo turpe eſt, ſed ſcleratum etiam & nefarium. Itaque, quod Apollo Pythius oraculo edidit, Spartam nulla re alia, niſi auaritia eſſe perituram, id uidetur non ſolum Lacedæmonijs, ſed & omnibus opulentis populis prædiſſe. nulla autem re conciliare facilius beneuolentiam multitudinis poſſunt ij qui Reip. præſunt, quā abſtinentia, & cōtinentia. Qui uero eſſe populares uolunt, ob eāque cauſam aut agrariam rem tentant, ut poſſeſſores ſuis ſedibus pellantur: aut pecunias creditas debitoribus condonandas putant: labefactant fundamenta Reip. concordiam primum tollunt, quæ eſſe non poteſt cum alijs adimuntur, alijs condonantur pecuniæ: deinde æquitatem, quæ tollitur omnis, ſi habere ſuum cuique non licet. id enim eſt proprium, ut ſuprà dixi, ciuitatis, atque urbis, ut ſit libera, & non ſo-  
 licita ſuæ rei cuiusque cuſtodia. Atque in hac perniciē Reipub. ne illam quidem conſequentur, quam putant, gratiam: nam, cui res erepta eſt, inimicus: cui data eſt, etiam diſſimulat ſe accipere uoluiffe: & maxime in pecunijs creditis occultat ſuum gaudium, ne uideatur non fuiſſe ſoluendo. At uero ille qui accipit iniuriam, & meminit, & præ ſe fert dolorem ſuum. nec ſi plures ſunt ij, quibus improbe datum eſt, quā illi

quibus iniuste ademptum est, itcirco plus etiã ualent. nõ enim numero hæc iudicantur, sed pondere. quã autem habet æquitatẽ, ut agrum multis annis, aut etiam seculis ante possessum, qui nullũ habuit, habeat: qui autem habuit, amittat? At propter hoc iniuriæ genus Laædemonij Lysandrũ Ephorum expulerunt: Agin Regem, quod nunquam antea apud eos acciderat, necauerũt. ex quo eo tempore tantæ discordiæ secutæ sunt, ut tyranni existerent, & optimates exterminarentur, & præclarissime constituta Resp. dilaberetur. nec uero solum ipsa cecidit, sed etiam reliquam Græciã euertit contagionibus malorũ, quæ à Laædemonijs profectæ manarunt latius. Quid nostros Gracchos Ti. Gracchi summi uiri filios, Africani nepotes? nõnne agrariæ cõtentiones perdiderunt? At uero Aratus Sicyonius iure laudatur, qui cum eius ciuitas quinquaginta annos à tyrannis teneretur, profectus Argis Sicyonẽ, clandestino introitu urbe est potitus: cĩmq; tyrannum Nicocleẽ improviso oppressisset, sexcentos exules, qui fuerãt eius ciuitatis locupletissimi, restituit: Rẽmq; pub. aduẽtu suo liberauit. Sed cum magnam animaduerneret in bonis, & possessionibus difficultatẽ, quod & eos quos & ipse restituerat, quorũ bona alij possederant, egere iniquissimum arbitrabatur: & quinquaginta annorũ possessiones mouere, non nimis æquum putabat: propterea quod tam longo spatio multa hæreditatibus, multa emptionibus, multa dotibus detinebantur: sine iniuria iudicauit, neque illis adimĩ, neque his non satisfieri, quorum illa fuerant, oportere. Cum igitur statuisset opus esse ad eam rem constituendam pecunia, Alexandriã se proficisci uelle dixit, rẽmq; integram ad redi-

tum suum iussit esse: isque celeriter ad Ptolemæum suum hospitem uenit, qui tum regnabat alter post Alexandriam conditam: qui cum exposuisset patriam se liberare uelle, causamque docuisset, à Rege opulento uir summus facile impetrauit, ut grandi pecunia adiuuaretur. quā cum in Sicyonem attulisset, adhibuit sibi in consilium quindecim principes, cum quibus causas cognouit, et eorum qui aliena detinebant, et eorum qui sua amiserant: præfecitque aestimandis possessionibus, et ut persuaderent alijs ut pecuniam accipere mallerent, et possessionibus cederent: alijs ut commodius putarent numerari sibi quod tanti esset, quā suū recuperare. ita perfectum est, ut omnes constituta concordia sine querela discederent. O uirū magnū, dignūque qui in nostra Rep. natus esset! Sic par est agere cum ciuibus, nō ut bis iam uidimus, hastam in foro ponere, et bona ciuiū uoci subijcere præconis. at ille Græcus, id quod fuit sapientis et præstantis uiri, omnibus consulendum putauit. eāque est summa ratio, et sapientia summi ciuis, commoda ciuium defendere, non diuellere, atque omnes æquitate eadem continere. Habitent gratis in alieno. quid ita? ut cum ego emerim, ædificauerim, tuear, impendā, tu me inuito fruare meo? quid est aliud, nisi alijs sua eripere, alijs dare aliena? tabulae uero nouæ quid habent argumenti, nisi ut emas mea pecunia fundum, et eum tu habeas, ego non habeam pecuniam? Quamobrem ne sit æs alienum, quod Reip. noceat, providendum est: quod multis rationibus caueri potest, si hoc non fuerit, ut locupletes suum perdant, debitores lucrentur alienum. nec enim ulla res uehementius Rēp. continet, quā fides: quæ esse nulla potest, nisi erit ne-



cessaria solutio rerū creditarum. Nūquam enim uehe-  
 mentius actum est, quā me Consule, ne solueretur.  
 armis et castris tentata res est ab omni genere homi-  
 num, et ordine: quibus sic restiti, ut hoc tantū malum  
 de Rep. tolleretur. nunquā nec maius æs alienum fuit:  
 nec melius, nec facilius dissolutū est. fraudādi enim spe  
 sublata, soluendi necessitas cōsecuta est. At uero hic no-  
 ster uictor, nunc quidem uictus, quæ cogitaret ea per-  
 fecit, cum eius iam nihil interesset. tanta in eo peccan-  
 di libido fuit, ut hoc ipsum eū delectaret peccare, etiam  
 si causa non esset. Ab hoc igitur genere largitionis, ut  
 alijs detur, alijs auferatur, aberunt ij qui Remp. tue-  
 buntur: in primisque operam dabunt, ut iuris, et iudi-  
 ciorū æquitate suum quisque teneat: et neque tenuio-  
 res propter imbecillitatē circunueniantur, neque locu-  
 pletibus ad sua uel tenenda, uel recuperāda obsit in-  
 uidia: præterea quibuscunque rebus uel belli, uel domi  
 poterunt, Remp. augeant imperio, agris, uectigalibus.  
 hæc magnorum hominum sunt: hæc apud maiores no-  
 stros facitata: hæc genera officiorū qui persequuntur,  
 cum summa utilitate Reip. magnam ipsi adipiscuntur  
 et gratiā, et gloriam. In his autem utilitatum præ-  
 ceptis Antipater Tyrius Stoicus, qui Athenis nuper est  
 mortuus, duo præcepta censet esse à Panætio prætermis-  
 sa: ualetudinis curationē, et pecuniæ. quas res à sum-  
 mo philosopho præteritas arbitror, quod essent faci-  
 les: sunt certe utiles. Sed ualetudo suscitatur notitia sui  
 corporis, et obseruatione earum rerum, quæ res aut  
 prodesse soleant, aut obesse: et continentia in uictu o-  
 mni atque cultu, corporis tuendi causa, et prætermit-  
 tendis uoluptatibus: postremo arte eorum, quorum

ad scientiā hęc pertinent. Res autē familiaris quæri  
debet ijs rebus, à quibus abest turpitudine: conseruari au-  
tem diligentia, & parsimonia: ijsdem etiā rebus auge-  
ri. has res commodissime Xenophon Socraticus persecu-  
tus est in eo libro, qui OEconomicus inscribitur. quem  
nos, ista ferè ætate cū essemus qua es tu nunc, è Græco  
in Latinum conuertimus. Sed utilitatum comparatio  
(quoniā hic locus erat quartus à Panætio prætermis-  
sus) sæpe est necessaria. nam & corporis cōmoda cum  
externis, & externa cum corporis, & ipsa inter se cor-  
poris, & externa cum externis comparari solent. cum  
externis, corporis hoc modo comparātur, ualere ut ma-  
lis, quā diues esse: cum corporis, externa hoc modo, di-  
ues esse potius, quā maximis corporis uiribus. ipsa in-  
ter se corporis cōparantur sic: bona ualetudo uoluptati  
anteponatur, uires celeritati: externorum autem, ut glo-  
ria diuitijs, uestigia urbana rusticis. Ex quo genere cō-  
parationis illud est Catonis senis: à quo cum querere-  
tur, quid maxime in re familiari expediret, respondit,  
Bene pascere: quid secundū, Satis bene pascere: quid ter-  
tiū, Bene uestire: quid quartum, Arare: & cum ille qui  
quæsierat, dixisset: Quid fœnerari? tū Cato: Quid ho-  
minē, inquit, occidere? Ex quo, & multis alijs intelligi  
debet, utilitatū comparationes solere fieri, rectēque hoc  
adiunctum esse quartum exquirendorū officiorum ge-  
nus. Sed toto hoc de genere, de quæreda, de collocanda  
pecunia, etiam de utenda, commodius à quibusdā opti-  
mis uiris ad medium Ianum sedentibus, quā ab ullis  
philosophis ulla in schola, disputatur. sunt tamen ea cō-  
gnosceda. pertinent enim ad utilitatem, de qua hoc  
libro disputandū est. Reliqua deinceps persequemur.

M. TVLLII CICERONIS  
OFFICIORVM AD MAR-  
CVM FILIVM LIB. III.

P. SCIPIONEM Marce fili, cum  
qui primus Africanus appellatus est,  
dicere solitum scripsit Cato, qui fuit  
ferè eius æqualis, Nūquam se minus  
otiosum esse, quàm cum otiosus : nec  
minus solū, quàm cum solus esset. Magnifica uero uox,  
et magno uiro, et sapiēte digna: quæ declarat illum  
et in otio de negotijs cogitare, et in solitudine secum  
loqui solitum: ut neque cessaret unquam, et interdū  
colloquio alterius non egeret. Itaque duæ res quæ lan-  
guorem afferunt cæteris, illum acuebant, otium, et  
solitudo. uellem et nobis hoc idem uere dicere liceret:  
sed si minus imitatione tantam ingenij præstantiam  
consequi possumus, uoluntate certe proxime accedimus.  
nam et à Reip. forensibúsq; negotijs armis impijs,  
uique prohibiti, otium persequimur: et ob eam causam  
urbe relicta, rura peragrantes, sæpe soli sumus. Sed  
nec otium hoc cum Africani otio, nec solitudo cum illa  
comparanda est. ille enim requiescens à Reip. pulcher  
rimis muneribus, otium sibi sumebat aliquando, et à  
cætu hominum, frequentiaque interdum tanquam in  
portum se in solitudinem recipiebat. nostrum autem  
otium negotij inopia, nec requiescendi studio constitu-  
tum est. extincto enim Senatu, deletisque iudicijs, quid  
est, quod dignum nobis aut in curia, aut in foro agere  
possimus? Itaque in maxima celebritate, atque in oculis  
C. iij.

ciuium quondam uiximus: nunc fugientes conspectum  
sceleratorum, quibus omnia redūdant, abdimus nos,  
quantum licet, & sæpe soli sumus. Sed quia sic ab ho-  
minibus doctis accepimus, non solum ex malis eligere  
minima oportere, sed etiam ex ærperere ex his ipsis, si-  
quid inesset boni: propterea & otio fruor, nō illo qui-  
dem, quo debeat is qui quondam peperisset otii ciui-  
tati: nec eam solitudinem languere patior, quam mihi  
affert necessitas, non uoluntas. Quāquam Africanus  
maiores laudem uel meo iudicio assequebatur: nulla  
tamen eius ingenij monimenta mandata literis, nullū  
opus otij, nullum solitudinis munus extat. ex quo intel-  
ligi debet, illū mentis agitatione, inuestigationēq; earū  
rerum, quas cogitando consequebatur, nec otiosum, nec  
solum unquam fuisse. Nos autem qui non tantum ro-  
boris habemus, ut cogitatione tacita à solitudine abstra-  
hamur, ad hanc scribendi operam, omne studium cu-  
ramq; conuertimus. itaque plura breui tempore euer-  
sa, quàm multis annis stante Rep. scripsimus. Sed cum  
tota philosophia mi Cicero frugifera & fructuosa, nec  
ulla pars eius inculta ac deserta sit: tamen nullus fe-  
racior in ea locus est, nec uberior, quàm de officijs: à  
quibus constanter, honestēque uiuendi præcepta ducun-  
tur. Quare, quanquā à Cratippo nostro, principe hu-  
ius memoriæ philosophorum, hoc te assidue audire  
atque accipere confido: tamen conducere arbitror, tali-  
bus aures tuas uocibus undiq; circūsonare, nec eas si  
fieri possit, quicquā aliud audire. quod cum omnibus  
est faciendū, qui uitam honestam ingredi cogitant: ta-  
men haud scio, an nemini potius, quàm tibi. sustines e-  
nim non paruum expectationem imitandæ industriæ

nostræ, magnam honorũ, nonnullam fortasse nominis. suscepisti onus præterea graue & Athenarũ, & Cratippi: ad quos cum tãquam ad mercaturam bonarum artium sis profectus, inanem redire turpissimum est, dedecorantem & urbis auctoritatẽ, & magistri. Quare, quantũ conniti animo potes, quantum labore contendere: (si discendi labor est potius, quàm uoluptas) tantum fac ut efficias: nèue committas, ut cum omnia suppeditata sint à nobis, tute tibi defuisse uideare. Sed hæc hæctenus. multa enim sæpe ad te cohortandi gratia scripsimus. nunc ad reliquam partem propositæ diuisionis reuertamur. Panætius igitur, qui sine controuersia de officijs accuratissime disputauit, quẽmque nos correctione quadã adhibita potissimum secuti sumus: tribus generibus propositis, in quibus de liberare homines, & consultare de officio solerent: uno, cum dubitarent, honestũne id esset, de quo ageretur, an turpe: altero, utilẽne esset, an inutile: tertio, si id quod speciem haberet honesti, pugnaret cum eo quod utile uideretur, quo modo ea discerni oporteret: de duobus generibus primis tribus libris explicauit: de tertio autem genere deinceps se scripsit dicturum: nec exsoluit, quod promiserat. Quod eo magis miror, quia scriptum à discipulo eius Posidonio est, triginta annos uixisse Panætium post quàm illos libros edidisset. quem locum miror à Posidonio breuiter esse tractatum in quibusdam commentarijs: præsertim cũ scribat nullũ esse locum in tota philosophia tam necessariũ. Minime uero assentior ijs qui negant eũ locum à Panætio prætermisissum, sed consulto relictum: nec omnino scribendũ fuisse, quia nunquam posset utilitas cum ho-

nestate pugnare. de quo alterum potest habere dubitationem, adhibendumne fuerit hoc genus, quod in diuisione Panætij tertium est, an planè omittendū: alterū dubitari non potest quin à Panætio susceptum sit, sed derelictum. nam qui è diuisione tripartita duas partes absoluerit, huic necesse est restare tertiam. præterea in extremo libro tertio de hac parte pollicetur se deinceps esse dicturum. accedit eodem testis locuples Posidonius: qui etiam scribit in quadam epistola, P. Rutilium Rufum dicere solere, qui Panætium audiuerat: ut nemo pictor esset inuentus, qui Veneris eam partem, quam Apelles inchoatam reliquisset, absolueret, (oris enim pulchritudo reliqui corporis imitandi spem auferebat) sic ea quæ Panætius prætermisisset, et non perfecisset, propter eorum quæ fecisset præstantiam, neminem esse persecutum. Quamobrem de iudicio Panætij dubitari non potest. rectène autè hanc tertiam partem ad exquirendū officium adiunxerit, an secus, de eo fortasse dubitari potest. nam siue honestum solum bonum est, ut Stoicis placet: siue quod honestum est, id ita summum bonum est: quemadmodū Peripateticis nostris uidetur, ut omnia ex altera parte collocata, uix minimi momenti instar habeant: dubitandū non est, quin nunquam possit utilitas cum honestate contendere. Itaque accepimus, Socratem solitum execrari eos, qui primum hæc natura coherencia, opinionione distraxissent. cui quidē ita sunt Stoici assensi, ut etiā quicquid honestum esset, id utile esse censerēt: nec utile quicquā, quod non honestum. Quod si is esset Panætius, qui uirtutem propterea colēdam diceret, quod ea efficiēs utilitatis esset: ut ij qui res expetendæ uel uo

luptate uel indolentia metiuntur:liceret ei dicere,honestatem aliquando cum utilitate pugnare.sed cum sit is, qui id solum bonum iudicet, quod honestum sit: quæ autem huic repugnent specie quadam utilitatis, eorum neque accessione meliorem uitam fieri, nec discessione peiorem: non uidetur huiusmodi debuisse deliberationem introducere: in qua, quod utile uideretur, cum eo quod honestum est, comparetur. Etenim quod summum bonum à Stoicis dicitur, conuenienter naturæ uiuere: id habet hanc (ut opinor) sententiam, cum uirtute congruere semper: cætera autem quæ secundum naturam essent, ita legere, si ea uirtuti non repugnarent. quod cum ita sit, putant quidā hanc comparisonem recte non esse introductam, nec omnino de eo genere quicquam præcipiendum fuisse. Atque illud quidem honestum, quod proprie uerèque dicitur, id in sapientibus est solis, neque à uirtute diuelli unquam potest: in ijs autem in quibus sapientia perfecta non est, ipsum illud quidem perfectum honestum nullo modo esse potest: similitudines honesti esse possunt. Hæc igitur omnia officia, de quibus his libris disputamus, media stoici appellāt: & ea communia sunt & late patent: quæ & ingenij bonitate multi assequuntur, & progressionē discendi. Illud autem quod rectum ijdē appellant, perfectum atque absolutum est, & ut ijdē dicunt, omnes numeros habet, nec præter sapientem cadere in quenquam potest. Cum autem aliquid actum est, in quo media officia comparātur, id cumulate uidetur esse perfectum: propterea quod uulgus, quid absit à perfecto, ferè non ex toto intelligit: quatenus autem intelligit, nihil putat prætermisissum. Quod autem



in poematibus & in picturis usu euenit, in alijsque compluribus, ut delectentur imperiti, laudentque ea quæ laudanda non sint: ob eam credo causam quòd misit in his aliquid probi, quod capiat ignaros, qui quidem, quid in unaquaque re uitij sit, nequeant iudicare. itaque cum sint docti à peritis, desistunt facile à sententia. Hæc igitur officia, de quibus his libris differimus, quasi secunda quædam honesta dicunt esse, non sapientum modo propria, sed cum omni hominum genere communia. itaque ij omnes, in quibus est uirtutis indoles, commouentur. Nec uero cum duo Decij, aut duo Scipiones fortes uiri commemorantur, aut cum Fabritius aut Aristides iustus nominatur, aut ab illis fortitudinis, aut ab his iustitiæ tanquam à sapiente, petitur exemplum. nemo enim horum sic sapiens, ut sapientem intelligi hic uolumus: nec ij qui sapientes habiti sunt & nominati, M. Cato & C. Lælius; sapientes fuerunt: nec illi quidem septem: sed ex mediocriorum officiorum frequentia similitudinem quandam gerebant, speciẽmque sapiẽtium. Quocirca nec id quod uere honestum est, fas est cum utilis repugnãtia comparari: nec id quod communiter appellamus honestum, quòdque colitur ab ijs qui bonos se uiros haberi uolunt, cum emolumentis unquam est comparandum: tamque id honestum, quod in nostram intelligentiam cadit, tuendum conseruandũque est nobis, quàm id quod proprie dicitur, uerẽque est honestum, sapientibus. aliter enim teneri non potest, si qua ad uirtutem est facta progressio. sed hæc quidem de ijs qui conseruatione officiorum existimãtur boni. Qui autem omnia metiuntur emolumentis & commodis, neque ea

uolunt præponderari honestate, hi solent in deliberando honestum cum eo quod utile putant, comparare: boni uiri non solent. Itaque existimo Panætium, cum dixerit homines solere in hac comparatione dubitare: hoc ipsum sensisse quod dixerit, solere modo, non etiam oportere. etenim non modo pluris putare, quod utile uideatur, quàm quod honestum, sed hæc etiam inter se cõparare, & in his dubitare turpissimum est. Quid est ergo quod nonnuquam addubitationem asferre soleat, considerandumque uideatur? credo, si quando dubitatio accidit, quale sit id, de quo consideretur. sæpe enim tẽpore fit, ut quod plerũque turpe haberi soleat, inueniatur non esse turpe. Exẽpli causa ponatur aliquid quod pateat latius. Quod potest esse maius scelus, quàm non modo hominem, sed etiã familiare occidere? num igitur se obstrinxit scelere, si quis tyrannum occidit quamuis familiare? populo quidem Romano non uidetur: qui ex omnibus præclaris factis illud pulcherrimum existimat. Vicit igitur utilitas honestatẽ: immo uero honestas utilitatem secuta est. Itaque, ut si ne ullo errore dijudicare possimus, si quando cum illo quod honestum intelligitur, pugnare id uidebitur quod appellamus utile, formula quẽdã constituẽda est: quam si sequemur in comparatione rerũ, ab officio nunquam recedemus. Erit autem hæc formula Stoicorum rationi disciplinẽq; maxime consentanea. quam quidẽ in his libris propterea sequimur, quod quanquã a ueteribus Academicis & Peripateticis nostris, qui quondã ijdem erant qui Academici, quæ honesta sunt, anteponuntur ijs quæ uidẽtur utilia, tamen splẽdidius hæc ab eis disseruntur, quibus quicquid honestum est, idem utile ui-

detur, nec utile quicquam, quod non honestum, quàm ab ijs quibus est honestum aliquod non utile, aut utile non honestū. Nobis autē nostra Academia magnam licentiam dat, ut quodcunque maxime probabile occurrat, id nostro iure liceat defendere. Sed redeo ad formulā. Detrahēre igitur aliquid alteri, & hominem hominis incommodo suum augere commodū, magis est contra naturam, quàm mors, quàm paupertas, quàm dolor, quàm cætera quæ possunt aut corpori accidere, aut rebus externis. nam principio tollit conuictum humanum, & societatem: si enim sic erimus affecti, ut propter suum quisque emolumentum spoliet, aut uiolet alterum, disrūpi necesse est eam quæ maxime est secundum naturam, humani generis societatem. ut si unumquodque membrum sensum hunc haberet, ut posse putaret se ualere, si proximi membri ualitudinem ad se traduxisset, debilitari & interire totum corpus necesse esset: sic si unusquisque nostrum rapiat ad se commoda aliorum, detrahātque quod cuique possit, emolumentum sui gratia, societas hominum & communitas euertatur necesse est. nam sibi ut quisque malit, quod ad usum uitæ pertineat, quàm alteri acquirere, concessum est non repugnante natura. Illud quidem natura non patitur, ut aliorum spolijs nostras facultates, copias, opes augeamus. Neque uero hoc solum natura, id est iure gentium: sed & legibus populorum, quibus in singulis ciuitatibus Respub. continentur, eodem modo constitutum est, ut non liceret sui commodi causa nocere alteri. hoc enim spectant leges, hoc uolunt, incolumem esse ciuium coniunctionem: quam qui dirimunt, eos morte, exilio, uinculis, damno coercent. atque

hoc multo magis exigit ipsa naturæ ratio, quæ est lex diuina & humana: cui parere qui uelit (omnes autem parebunt, qui secundum naturam uolent uiuere) nunquam committet ut alienum appetat, & id quod alteri detraxerit, sibi assumat. Etenim multo magis est secundum naturam celsitas & animi magnitudo, itémque communitas, iustitia, liberalitas, quàm uoluptas, quàm uita, quàm diuitiæ. quæ quidem contemnere, & pro nihilo ducere comparantem cum utilitate communi, magni animi & exælsi est. Detrahere autem alteri sui commodi causa, magis est contra naturam, quàm mors, quàm dolor, quàm cætera generis eiusdè: itémque magis est secundum naturam, pro omnibus gentibus (si fieri possit) conseruandis aut iuuandis maximos labores molestiasque suscipere, imitantes Herculem illum, quem hominum fama beneficiorum memor in concilio cælestium collocauit, quàm uiuere in solitudine non modo sine ullis molestiis, sed etiam in maximis uoluptatibus, abundante omnibus copiis, ut excellas etiam pulchritudine & uiribus. Quocirca optimo quisque splendidissimoque ingenio longe illam uitam huic anteponebat, ex quo efficitur, hominem naturæ obedientem, homini nocere non posse. Deinde qui alterum uiolat, ut ipse aliquid commodi consequatur: aut nihil se existimat contra naturam facere, aut magis fugiendam censeret mortem, paupertatem, dolorem, amissionem etiam liberorum, propinquorum, amicorum, quàm facere cuiquam iniuriam. si nihil existimat contra naturam fieri hominibus uioladis: quid cum eo differas, qui omnino hominem ex homine tollat? sin fugiendum id quidem censeret, sed multo illa pe-

iora, mortem, paupertatem, dolorem: errat in eo quòd ullum aut corporis, aut fortunæ uitium, animi uitijis grauius existimat. Ergo unū debet esse omnibus propositum, ut eadem sit utilitas uniuscuiusque, & uniuersorum: quam si ad se quisque rapiat, dissoluetur omnis humana consociatio. atque si etiam hoc natura præscribit, ut homo hominī quicumque sit, ob eam ipsam causam tamen, quòd is homo sit, consultum uelit, necesse est secundum eandem naturam omnium utilitatem esse communem. quod si ita est, una continemur omnes, & eadem lege naturæ. idque ipsum si ita est, certe uiolare alterum lege naturæ prohibemur. Verum autem primum: uerum igitur & extremum. nam illud quidem absurdum est quod quidam dicunt, parenti se, aut fratri nihil detracturos commodi sui causa, aliam rationem esse ciuium reliquorū. hi sibi nihil iuris & nullam societatem communis utilitatis causa statuunt esse cum ciuibus: quæ sententia omnem societatem distrahit ciuitatis. Qui autem ciuium rationem dicunt esse habendam, externorum negant: hi dirimunt communem humani generis societatem: quæ sublata, beneficentia, liberalitas, bonitas, iustitia funditus tollitur: quæ qui tollunt, etiam aduersus deos immortales impij iudicandi sunt. ab his enim constitutam inter homines societatem euertunt: cuius societatis arctissimum uinculum est, magis arbitrari esse contra naturam, hominem hominī detrahere sui commodi causa, quàm omnia incommoda subire uel externa, uel corporis, uel etiam ipsius animi, quæ uacent iustitia. hæc enim uirtus omnium est domina & regina uirtutum. Forsitan quispiam dixerit: Nōne igitur sa-

piens, si fame ipse conficiatur, abstulerit cibum alteri homini ad nullam rem utili? minime uero. non enim mihi est uita mea utilior, quàm animi talis affectio, neminem ut uiolem commodi mei gratia. Quid? si Phalarim crudelem tyrannum, & immanem uir bonus, ne ipse frigore conficiatur, uestitu spoliare possit, nònne faciat? Hæc ad iudicandum sunt facillima. nam si quid ab homine ad nullam partem utili, utilitatis tuæ causa detraxeris, inhumane feceris, contrâque naturæ legem: sin autem is tu sis, qui multam utilitatem Reip. atque hominum societati, si in uita remaneas, afferre possis: siquid ob eam causam alteri detraxeris, non sit reprehendendum: sin autem id non sit eiusmodi, suum cuique incommodum ferendum est potius, quàm de alterius commodis subtrahendum. Non igitur magis est contra naturam morbus, aut egestas, aut quid eiusmodi, quàm detractio, atque appetitio alieni. Sed communis utilitatis derelictio cōtra naturam est: est enim iniusta. Itaque lex ipsa naturæ, quæ utilitatem hominum cōseruat & continet, decernit profecto, ut ab homine inerti atque inutili ad sapientem, bonum, fortemque uirum transferantur res ad uiuendum necessariae: qui si occiderit, multum de communi utilitate detraxerit: modo hoc ita faciat, ut ne ipse de se bene existimans, seseque diligens, hanc causam habeat ad iniuriam. itaque semper officio fungatur, utilitati consulens hominum, & ei quam sæpe commemoro, humanæ societati. Nam quod ad Phalarim attinet, perfacile iudicium est. nulla est enim societas nobis cum tyrannis, sed potius summa distractio: neque est contra naturam spoliare eum, si possis,

quem honestum est necare. Atque hoc omne genus pestiferum atque impium ex hominum communitate exterminandum est. etenim ut membra quædam amputantur, si & ipsa sanguine & tanquam spiritu carere cœperunt, & nocent reliquis partibus corporis: sic ista in figura hominis feritas, & immanitas belluæ à communi tanquam humanitate corporis segreganda est. huius generis quæstiones sunt omnes eæ in quibus ex tempore officii exquiritur. Eiusmodi igitur credo res Panætium persecuturum fuisse, nisi aliquis casus aut occupatio consilium eius præuenisset: ad quas ipsas consultationes ex superioribus libris satis multa præcepta sunt, quibus perspicui possit, quid sit propter turpitudinem fugiendum: quid sit id, quod ictu fugiendum non sit, quia omnino turpe non est. Sed quoniã operi inchoato, propè tamen absoluto tanquam fastigium imponimus, ut geometræ solent nō omnia docere, sed postulare ut quædã sibi concedantur, quo facilius quæ uelint explicent: sic ego à te postulo mi Cicerone, ut mihi concedas, si potes, nihil præter id quod honestum sit, esse propter se expetendum. sin hoc non licet propter Cratippum: at illud certe dabis, quod honestum sit, id esse maxime propter se expetendum. mihi utrumuis satis est: & cum hoc, tum illud probabilius uidetur, nec præterea quicquam probabile. Ac primum Panætius in hoc loco defendendus est, quod non utilia cum honestis pugnare dixerit aliquando posse, (neque enim ei fas erat) sed ea quæ uiderentur utilia. Nihil uero utile, quod non idem honestum: nec honestum, quod non idem utile sit, sæpe testatur: negatque ullam pestem maiorem in uitam hominum inuasisse, quàm eorum opinionem



qui ista distraxerint. Itaq; non ut aliquādo antepone-  
remus utilia honestis, sed ea sine errore dūdicaremus,  
si quando incidissent, induxit eam quæ uideretur esse,  
non quæ esset, repugnantiam. Hanc igitur partem reli-  
ctam explebimus, nullis adminiculis, sed (ut dicitur)  
Marte nostro. neque enim quicquam de hac parte post  
Panætium explicatum est, quod mihi probaretur, de ijs  
quæ in manus meas uenerunt. Cū igitur aliqua species  
utilitatis obiecta est, nos commoueri necesse est. sed si  
cum animum attenderis, turpitudinem uideas adiun-  
ctam ei rei quæ speciem utilitatis attulerit: tunc utilitas  
non requirenda est: sed intelligendum, ubi turpitude  
sit, ibi utilitatem esse non posse. Quòd si nihil est tam  
contra naturam, quàm turpitude, (recta enim, & con-  
ueniētia & constantia natura desiderat, aspernaturq;  
contraria) nihilq; tam secundum naturam, quàm uti-  
litas: certe in eadem re utili turpitude esse non potest.  
itēmq; si ad honestatem nati sumus, eaq; aut sola expe-  
tenda est, (ut Zenoni est uisum) aut certe omni pōde-  
re grauior est habēda quàm reliqua omnia, quod Ari-  
stoteli placet: necesse est, quod honestum sit, id esse aut  
solū, aut summum bonum: quod autem bonum, id certe  
utile. itaque quicquid honestum, id utile. quare error  
hominum non proborū cum aliquid, quod utile uisum  
est, arripuit: id cōtinuo secernit ab honesto. Hinc sicæ,  
hinc uenena, hinc falsa testamēta nascuntur, hinc fur-  
ta, hinc peculatus, expilationes, direptionēsq; sociorum  
& ciuiū, hinc opum nimiarū potentiae non ferendæ.  
postremo etiam in liberis ciuitatibus existunt regnandi  
cupiditates, quibus nihil nec tetrius nec fœdius exco-  
gitari potest: emolumenta enim rerū fallacibus iudi-

cū vident, pœnam non dico legum, quas sæpe pererrant, sed ipsius turpitudinis, quæ acerbissima est, non vident. Quamobrē hoc quidem deliberantiū genus pel-  
latur è medio (est enim totum sceleratum, & impium) qui deliberant, utrum id sequantur, quod honestum esse videant, an se scientes scelere contaminent. in ipsa enim dubitatione facinus inest, etiā si ad id non peruenirent. Ergo ea deliberanda omnino non sunt, in quibus est turpis ipsa deliberatio. atque etiā in omni deliberatione celandi & occultandi, spes opiniōque remouenda est. satis enim nobis (si modo in philosophia aliquid proficimus) persuasum esse debet, si omnes deos, hominēsq; celare possimus, nihil tamen auare, nihil iniuste, nihil libidinosē, nihil incontinenter esse faciendum. Hinc ille Gyges inducitur à Platone: qui, cum terra discessisset magnis quibusdā imbribus, in illum hiatus descendit, æneūmq; equum (ut ferūt fabulæ) animaduertit, cuius in lateribus fores essent: quibus apertis, hominis mortui vidit corpus magnitudine inusitata, annulūque aureum in digito: quem ut detraxit, ipse induit. erat autem regius pastor. tum in concilium pastorum se recepit. ibi cum palam eius annuli ad palmam cōuerterat, à nullo uidebatur, ipse autem omnia uidebat: idem rursus uidebatur, cum in lucem annulum inuerterat. Itaque hac opportunitate annuli usus. Reginaē stuprū intulit, eāque adiutricē Regem dominum interemit, sustulitque quos obstare arbitrabatur: nec in his quisquam eum facinoribus potuit uidere. sic repente annuli beneficio Rex ortus est Lydiæ. Hunc igitur ipsum annulum si habeat sapiens, nihil plus sibi licere putet peccare, quàm si non haberet. ho-

nesta enim bonis uiris, non occulta quærentur. atque hoc loco philosophi quidam, minime mali illi quidem, sed non satis acuti, fictam et commentitiam fabulam dicunt prolatam à Platone. quasi uero ille aut factum id esse, aut fieri potuisse defendat. Hæc est uis huius annuli, et huius exempli: si nemo sciturus, nemo ne suspicaturus quidem sit, cum aliquid diuitiarum, potentie, dominationis, libidinis causa feceris, si id diis, hominibusque futurum sit semper ignotum, si ne factururus. negant id fieri posse: quanquam non potest id quidem. sed quæro, quod negant posse, id si posset, quidnam faceretur? Vrgent rustice sanè. negant enim posse, et in eo perstant: hoc uerbum quid ualeat non uident. cum enim quærimus, si possint celare quid factururi sint: non quærimus, possint ne celare: sed tanquam tormenta quædam adhibemus, ut si responderint se impunitate proposita facturos quod expediat, facinorosos se esse fateantur: negent, omnia turpia per seipsa fugienda esse concedant. sed iam ad propositum reuertamur. Incidunt sæpe multæ causæ, quæ conturbant animos utilitatis specie: non cum hoc deliberetur, Relinquendane sit honestas propter utilitatis magnitudinem (nam id quidem improbum est) sed illud, Possitne id quod utile uideatur, fieri non turpiter. Cum Collatino Tarquinio collegæ Brutus imperium abrogabat, poterat uideri facere id iniuste: fuerat enim in Regibus expellendis socius Bruti, consiliorum etiam adiutor. cum autem consilium hoc principes cepissent, cognationem Superbi, nomenque Tarquiniorum, et memoriam regni esse tollendam, quod erat utile patriæ consulere: id erat ita honestum, ut etiam ipsi Collatino placere deberet.

Itaque utilitas ualuit propter honestatem: sine qua nec utilitas quidem esse potuisset. at in eo Rege, qui urbem condidit, non ita. species enim utilitatis animum pepulit eius: cui cum uisum esset utilius, solum se quàm cum altero regnare, fratrem interemit. omisit hic & pietatem & humanitatem, ut id quod utile uidebatur, neque erat, assequi posset. & tamen muri causam opposuit speciem honestatis nec probabilem, nec satis idoneam. Peccauit igitur, pace uel Quirini, uel Romuli dixerim. Nec tamē nostræ nobis utilitates omittendæ sunt, alijsq; tradendæ, cum his ipsi egeamus: sed suæ cuique utilitati, quod sine alterius iniuria fiat, seruiendum est. Scite Chrisippus, ut multa: Qui stadiū, inquit, currit, eniti & contendere debet, quàm maxime possit, ut uincat: supplātare eum quicum certet, aut manu depellere nullo modo debet. sic in uita sibi quenque petere, quod pertineat ad usum, non iniquum est: alteri surripere, ius non est. Maxime autem perturbātur officia in amicitijs: quibus & non tribuere quod recte possis: & tribuere quod non sit æquum, contra officiū est. sed huius generis totius breue, & non difficile præceptum est. quæ enim uidentur utilia, honores, diuitiæ, uoluptates, & cætera generis eiusdem, hæc amicitia nunquam anteponenda sunt. At neque contra Remp. neq; contra iusiurandū, ac fidem, amici sui causa uir bonus faciet: nec si iudex quidem erit de ipso amico. ponit enim personam amici, cum induit iudicis. tantum dabit amicitia, ut ueram amici causam esse malit: ut perorandæ litis tempus, quoad per leges licet, accommodet. Cū uero iurato dicenda sententia sit, meminerit deum se adhibere testem, id est (ut ego arbitror) mentē suam

qua nihil homini dedit ipse deus diuinius. Itaq; præclarū à maioribus accepimus morem rogandi iudicis, si eū teneremus: QVAE salua fide facere possit. hæc rogatio ad ea pertinet, quæ paulo ante dixi honeste amico à iudice posse concedi. nam si omnia faciēda sint, quæ amici uelint, non amicitiae tales, sed coniurationes putandæ sunt. loquor autem de communibus amicitijs. nam in sapientibus uiris atque perfectis nihil potest esse tale. Damonem & Pythiam Pythagoreos fecerunt hoc animo inter se fuisse, ut cum eorum alteri Dionysius tyrannus diem necis destinauisset: & is qui morti addiētus esset, paucos sibi dies commendandorum suorum causa postulauisset, uas factus sit alter eius sistendi: ut si ille non reuertisset ad diem, moriendum esset sibi ipsi. qui cum ad diem se recepisset, admiratus eorū fidem tyrannus, petiuit ut se in amicitia tertium ascriberent. Cum igitur id quod utile uidetur in amicitia, cum eo quod honestum est comparatur, iaceat utilitatis species, ualeat honestas. cum autem in amicitia, quæ honesta non sunt postulabūtur, religio & fides anteponantur amicitiae: & sic habebitur is quem exquirimus, delectus officij. Sed utilitatis specie in Rep. sæpissime peccatur, ut in Corinthi disturbance nostri. durius etiam Athenienses, qui sciuerunt ut AEginetis qui classe ualebant, pollices præciderentur. hoc uisum est utile: nimis enim imminebat propter propinquitatem AEgina Piræeo. Sed nihil, quod crudele, utile est enim hominum naturæ, quam sequi debemus, maxime inimica crudelitas. Male etiā qui peregrinos urbibus uti prohibent, eosque exterminant, ut Petronius apud patres nostros: Papius nuper. nam esse pro ciue qui ci-

uis non sit, rectum est non licere: quam tulerūt legem sapientissimi consules Crassus & Scæuola: usu uero urbis prohibere peregrinos, sanè inhumanum est. illa præclara, in quibus publicæ utilitatis species præ honestate contemnitur. Plena exemplorū est nostra Respub. tum sæpe aliàs, tum maxime bello Punico secūdo: quæ Cannensi calamitate accepta maiores animos habuit, quàm unquam rebus secundis. nulla fuit timoris significatio, nulla mentio pacis. tanta uis est honesti, ut speciem utilitatis obscuraret. Athenienses cum Persarum impetum nullo modo possent sustinere, statuerēntque ut urbe relicta, coniugibus, & liberis Trœzēne depositis, naues conscenderent, libertatēque Græciæ classe defenderent, Cyrsilum quendam suadentem, ut in urbe manerent, Xerxēque reciperent, lapidibus obruerunt. atque ille sequi utilitatem uidebatur: sed ea nulla erat repugnante honestate. Themistocles post uictoriam eius belli, quod cum Persis fuit, dixit in concione se habere cōsiliū Reip. salutare, sed id sciri opus non esse: postulauit ut aliquem populus daret, quicum communicaret. datus est Aristides. Huic ille, classē Lacedæmoniorū, quæ subducta esset ad Gythium, clām incendi posse: quo facto, frangi Lacedæmoniorum opes necesse esset. quod Aristides cum audiuiſſet, in concionem magna expectatione uenit, dixitque perutile esse cōsiliū, quod Themistocles afferret, sed minime honestum. itaque Atheniēſes, quod honestum non esset, id ne utile quidem putarunt, totāmq; eam rem quam ne audiuerant quidē, auctore Aristide repudiauerūt. melius hi quàm nos, qui piratas immunes, socios uestigales habemus. Maneat ergo quod turpe sit, id nunquam esse

utile, ne tum quidem cum id quod esse utile putes, ad  
 piscare. hoc enim ipsum utile putare quod turpe sit, ca-  
 lamitosum est. Sed incidunt et supra dixi) sæpe causæ,  
 cum repugnare utilitas honestati videtur: ut animad-  
 uertendū sit repugnētne honestati, an possit cum honesta-  
 te coniūgi. Eius generis sunt et hæc questiones: Si, exempli  
 gratia, uir bonus ab Alexandria profectus, Rhodum ma-  
 gnum frumenti numerum aduexerit in Rhodiorū ino-  
 pia et fame, summāque annonæ caritate: si idem sciat  
 complures mercatores ab Alexandria soluisse, nauésq;  
 in cursu frumento onūstas petentes Rhodum uiderit:  
 dicturūne sit id Rhodijs, an silentio suum quampluri-  
 mo uenditurus. sapientem et bonum uirum fingimus:  
 de eius deliberatione et consultatione quærimus, qui  
 celaturus Rhodios non sit, si id turpe iudicet: sed dubi-  
 tet, an turpe non sit. In huiusmodi causis aliud Diogeni  
 Babylonio uideri solet, magno et graui Stoico: aliud  
 Antipatro discipulo eius, homini acutissimo. Antipatro  
 omnia patefacienda, ut nequid omnino, quod uendi-  
 tor norit, emptor ignoret: Diogeni, uenditorē quate-  
 nus iure ciuili constitutum sit, dicere uitia oportere, cæ-  
 tera sine insidijs agere, et quoniā uēdat, uelle quam-  
 optime uendere. Aduexi, exposui: uendo meū non plu-  
 ris, quàm cæteri: fortasse etiā minoris, cum maior est co-  
 pia: cui fit iniuria? exoritur Antipatri ratio ex altera  
 parte: Quid agis? tute cū hominibus cōsulere debeas,  
 et seruire humanæ societati: eāque lege natus sis, ut ea  
 habeas principia naturæ, quibus parere, et quæ sem-  
 per sequi debeas: ut utilitas tua cōmunis utilitas sit, ui-  
 cissim et æque communis utilitas tua sit: celabis homi-  
 nes, quid ijs adsit, et cōmoditatis, et copię? responde-



bit Diogenes fortasse sic: Aliud celare, aliud est tacere. neque ego nunc te celo, si tibi non dico quæ natura deorum sit, quis sit finis honorum: quæ tibi plus prodesse cognita, quam uita uillitas. sed non quicquid tibi audire utile est, id nunc tacere necesse est. Immo uero, inquit ille, necesse est, ut inter homines natura meministi coniunctam societatem. Memini, inquit ille. sed num ista societas talis est, ut nihil suum cuiusq; sit? quod si ita est, nec uendendum quidem quicquam est, sed donandum. Vides in hac tota disceptatione non illud dici: quanuis hoc turpe sit, tamen quoniã expedit, faciam: sed ita expedire, ut turpe non sit: ex altera autem parte, ea re, quia turpe sit non esse faciendum. Vendat ædes uir bonus propter aliqua uitia, quæ ipse norit, cæteri ignorent: pestilentes sint, & habeantur salubres: ignoretur in omnibus cubilibus apparere serpentes: male materiata, ruinosæ: sed hoc præter dominum nemo sciat: quæro, si hoc emptoribus uëditor non dixerit, ædésq; uendiderit pluris multo, quam se uëditurum putarit, num id iuste aut improbe fecerit? Ille uero, inquit Antipater, improbe facit. quid enim est aliud, erranti uia non monstrare, quod Athenis execrationibus publicis sancitum est, si hoc non est, emptorem pati ruere, & per errorem in maximam fraudem incurrere? plus etiã est, quam uiam non monstrare. nam est, scientem in errorem alterum inducere. Diogenes contra: Num te emere coegit, qui ne hortatus quidem est? ille, quod non placebat, proscripsit: tu quod placebat, emisti. quod si qui proscribunt uillam bonam (ut ipsi asserunt) benèq; ædificatam, non existimantur sefellisse, etiam si illa nec bona est, nèc ædificata ratione: multo minus

qui domum non laudarunt. ubi enim iudicium emptoris est, ibi fraus uenditoris quæ potest esse? sin autem dictum non omne præstandum est: quod dictum non est, id præstandum putas? Quid uero est stultius, quàm uenditorem eius rei quam uendat, uitia narrare? quid autem tam absurdum, quàm si domini iussu ita præco prædicet, Domum pestilentem uendo? sic ergo in quibusdam causis dubijs, ex altera parte defenditur honestas: ex altera ita de utilitate dicitur, ut id quod utile uideatur, non modo honestum facere sit, sed etiam non facere, turpe. Hæc est illa quæ uidetur utilium fieri cum honestis sæpe dissensio: quæ diiudicanda sunt. non enim ut quæreremus exposuimus, sed ut explicaremus. Non igitur uidetur nec frumentarius ille Rhodius, nec hic edium uenditor celare emptores debuisse. neque enim id est celare, quicquid reticeas: sed cum quod tu scias, id ignorare emolumenti tui causa uelis eos, quorum intersit id scire. Hoc autem celandi genus quale sit, et cuius hominis, quis non uidet? certe non aperti, non simplicis est, non ingenui, non iusti, non uiri boni: uersuti potius, obscuri, astuti, fallacis, malitiosi, callidi, ueteratoris, uasfri. hæc tot et alia plura nonne inutile est uitiorum subire nomina? Quod si uituperandi sunt, qui reticuerunt: quid de ijs existimandum est, qui orationis uanitatem adhibuerunt? C. Canius eques R. homo nec infacetus, et satis literatus, cum se Syracusas oliandi causa, non negotiandi (ut ipse dicere solebat) contulisset, dictitabat se hortulos aliquos uelle emere, quò inuitare amicos, et ubi se oblectare sine interpellatoribus posset. quod cum percrebuisse, Pythius ei quidam, qui argentariâ faceret Sy-

*racusis, dixit, uenales quidem se hortos non habere, sed  
 licere uti Canio, si uellet, ut suis: & simul ad cœnā in-  
 uitauit in posterum diem. cum ille promississet, tum Py-  
 thius, ut argētarius, qui esset apud omnes ordines gra-  
 tiosus, piscatores ad se conuocauit, & ab ijs petiuit, ut  
 ante suos hortulos postera die piscarentur, dixitque  
 quid eos facere uellet. ad cœnā tēpore uenit Canius.  
 opipare paratum erat conuiuium. cymbarū ante ocu-  
 los multitudo. pro se quisque, quod cœperat, afferebat.  
 ante pedes Pythij pisces abijciebantur. tū Canius, Quæ-  
 so, inquit, quid est ò Pythi, tantūmne piscium? tantūm-  
 ne cymbarū? Et ille, Quid mirū? inquit. hoc loco est,  
 Syracusis quicquid est piscium: hic aquatio: hac uilla  
 isti carere non possunt. incensus Canius cupiditate, cō-  
 tendit à Pythio, ut uenderet. grauante ille primo. quid  
 multa? impetrat: emit homo cupidus & locuples tūti,  
 quanti Pythius uoluit, & emit instructos: nomina fa-  
 cit: negotium conficit. inuitat Canius postera die fami-  
 liares suos, uenit ipse mature: scalmum nullum uidet:  
 quærit ex proximo uicino, num feriæ quædam piscato-  
 rum essent, quod eos nullos uideret. Nullæ, quod sciā,  
 inquit ille: sed hic piscari nulli solent: itaque heri mira-  
 bar, quid accidisset. stomachari Canius: sed quid fac-  
 ret? nondū enim Aquilius collega, & familiaris meus  
 protulerat de dolo malo formulas. in quibus ipsis, cum  
 ex eo quærerem, quid esset dolus malus: respondebat,  
 Cum esset aliud simulatum, aliud actum. hoc quidem  
 sanè luculenter, ut ab homine perito definiendi. Ergo  
 & Pythius, & omnes aliud agentes, aliud simulātes,  
 perfidi, improbi, malitiosi sunt. nullum igitur factum  
 eorum potest utile esse, cum sit tot uitij inquinatum.*

Quòd si Aquiliana definitio uera est, ex omni uita simulatio, dissimulatioq; tollēda est. ita nec ut emat melius, nec ut uendat, quisquam simulabit, aut dissimulabit uir bonus. Atque iste dolus malus etiam legibus erat uindicatus: ut tutela Duodecim tabulis, et circumscriptio adolescentium lege Plectoria, et sine lege iudicij, in quibus EX FIDE BONA, agitur. Reliquorū autem iudiciorum hæc uerba maxime excellūt, in arbitrio rei uxoriæ, MELIUS, AEQVIVS: in fiducia, VT INTER BONOS BENE AGIER. Quid ergo? aut in eo quod Melius, æquius, est, potest ulla pars inesse fraudis? aut, cū dicitur, Inter bonos bene agier, quicquam agi dolose, aut malitiose potest? Dolus autē malus simulatione et dissimulatione (ut ait Aquilius) continetur. tollendum est igitur in rebus contrahendis omne mendaciū. non licitatore uenditor, nec qui contra se licatur, emptor opponet. uterq; si ad loquendū uenerit, non plus quàm semel loquetur. Quintus quidē Scæuola P. filius, cū postulasset, ut sibi fundus, cuius emptor erat, semel indicaretur, idq; uenditor ita fecisset, dixit se pluris aestimare, addidit centū nullia. nemo est qui hoc uiri boni fuisse neget: sapientis negant: ut si minoris quàm potuisset, uēdidisset. Hæc igitur est illa perniciēs, quòd alios bonos, alios sapiētes existimant. ex quo Ennius: Nequicquam sapere sapiētem, qui sibi ipsi prodesse nequiret. uere id quidem, si quid esset prodesse, mihi cū Ennio conueniret. Hecatonem quidem Rhodium discipulum Panætij uideo in ijs libris, quos de officijs scripsit Q. Tuberoni, dicere, sapientis esse, nihil contra mores, leges, instituta facientem, habere rationem rei familiaris.

neque enim solum nobis diuites esse uolumus, sed liberis, propinquis, amicis, maximèque Reip. singulorum enim facultates & copiae, diuitiae sunt ciuitatis. Huic Scaeuolae factum, de quo paulo ante dixi, placere nullo modo potest. etenim omnino se negat facturum compendij sui causa, quod non liceat. huic nec laus magna tribuenda est, nec gratia. sed siue & simulatio, & dissimulatio dolus malus est, per paucae res sunt, in quibus dolus iste malus non uersetur: siue uir bonus est is qui prodest, quibus potest, nocet nemini, recte iustū uirum, bonum non facile reperiemus. Nūquam igitur est utile peccare, quia semper est turpe: & quia semper est honestum uirum bonum esse, semper est utile. Ac de iure quidem praediorum sancitum est apud nos iure ciuili, ut in his uendendis uitia etiam dicerentur, quae nota essent uenditori. nam cum ex Duodecim tabulis satis esset cautum: ea praestari, quae essent lingua nuncupata, quae qui inficiatus esset, duplicem poenam subiret: à iurisconsultis etiam reticentiae poena est constituta. quicquid enim inest praedio uitij, id statuerunt si uenditor sciret, nisi nominatim dictum esset, praestari oportere. ut cum in arce augurium Augures acturi essent, iussissentque T. Claudium Centimalum, qui aedes in Caelio monte habebat, demoliri eas quarum altitudo officeret auspicijs: Claudius proscripsit, insulam uendidit: emit P. Calphurnius Lanarius. huic ab Auguribus illud idem denunciatum est. Itaque Calphurnius cum demolitus esset, cognouissetque Claudium aedes postea proscripsisse, quam esset ab Auguribus demoliri iussus, arbitrum illum adegit: QVICQVID sibi de ea re facere oporteret ex fide bona. M. Cato sen

tentiam dixit huius nostri Catonis pater. ut enim cæteri ex patribus, sic hic qui illud lumen progeniuit, ex filio est nominandus. Is igitur iudex ita pronunciauit: cum in uendando rem eam scisset, & non pronunciauisset, emptori damnum præstari oportere. igitur ad fidem bonam statuit pertinere, notum esse emptori uitium, quod nosset uenditor. quod si recte diiudicauit, non recte frumentarius ille, non recte ædiū pestilentium uenditor tacuit. sed huiusmodi reticentiæ iure civili omnes comprehendi non possunt: quæ autem possunt, diligenter tenentur. M. Marius Gratiidianus propinquus noster C. Sergio Oratæ uendiderat ædes eas quas ab eodem ipse paucis ante annis emerat. hæc Sergio seruibant: sed hoc in mancipio Marius non dixerat. adducta res in iudiciū est. Oratam Crassus, Gratiidianum defendebat Antonius. ius Crassus urgebat: quod uitium uenditor non dixisset sciens, id oportere præstari. æquitatem Antonius: quoniam id uitium ignotum Sergio non fuisset, qui illas ædes uendidisset, nihil fuisse necesse dici: nec eū esse deceptum, qui id quod emerat, quo iure esset, teneret. Quorsum hæc? ut illud intelligas, non placuisse maioribus nostris astus. Sed aliter leges, aliter philosophi tollunt astutias. leges, quatenus manus tenere res possunt: philosophi, quatenus ratione & intelligentia. Ratio igitur hoc postulat, ne quid insidiosè, nequid simulate, nequid fallaciter. Sūnt ne igitur insidiæ, tendere plagas, etiam si excitaturus nō sis, nec agiturus? ipsæ enim feræ nullo insequente sæpe incidunt. sic tu cum ædes proscribas, tabulam tanquam plagam ponas, domum propter uitia uēdas, in eam aliquis incurrat imprudens. hoc quanquam

uideo propter deprauationem consuetudinis neq; more turpe haberi, neque aut lege sanciri, aut iure civili: naturæ tamen lege sancitum est. Societas enim est (quod etsi sæpe dictum est, dicendum tamen est sæpius) latissime quidē quæ pateat, hominum inter homines: interior eorum qui eiusdem gentis sunt: propior eorū, qui eiusdē ciuitatis. Itaq; maiores aliud ius gentium, aliud ius ciuile esse uoluerunt. quod enim ciuile, non idem continuo gentium: quod autem gentium, idem ciuile esse debet. Sed nōs ueri iuris, germanæque iustitiæ solidā, & expressam effigiem nullā tenemus: umbra & imaginibus utimur: easque ipsas utinam sequeremur. feruntur enim ex optimis naturæ principijs, & ueritatis exemplis. nā quanti uerba illa? **VT INE PROPTER TE, FIDE' MVE TVAM CAPTVS, FRAVDATV'S VE SIM: quā illa aurea? VT INTER BONOS BENE AGIER OPORTET, ET SINE FRAVDATIONE.** Sed qui sint boni, & quid sit bene agi, magna quæstio est. Quintus quidē Scæuola Pontifex Maximus summam uim esse dicebat in omnibus ijs arbitrijs, in quibus ageretur ex fide bona: fideique bonæ nomen existimabat manare latissime, idq; uersari in tutelis, societatibus, fiducijs, mandatis, rebus emptis, uēditis, conductis, locatis: quibus uitæ societas continetur: in his magni esse iudicis statuere: præsertim cum in plerisque essent iudicia contraria, quid quæque cuiq; præstare oporteret. Quocirca astutiæ tollendæ sunt, eaq; malitia, quæ uult quidē uideri se esse prudentiam, sed abest ab ea, distatque plurimum. prudentia est enim locata in delectu bonorū, & malorū: malitia, si omnia



quæ turpia sunt, mala sunt, mala bonis anteposit. Nec uero in prædijs solum ius ciuile ductum à natura, malitiam, fraudemque uindicat: sed & in mancipiorum uenditione uenditorum fraus omnis excluditur. qui enim scire debuit de sanitate, de fuga, de furtis, præstat edicto AEdilium. hæredum alia causa est. ex quo intelligitur, quoniam iuris natura fons sit, hoc secundum naturam esse, neminem id agere, ut ex alterius prædetur inscitia. nec ulla perniciēs uitæ maior inueniri potest, quam in malitia simulatio intelligentiæ. Ex quo illa innumerabilia nascuntur, ut utilia cum honestis pugnare uideantur. quotus enim quisque reperietur, qui impunitate & ignoratione omnium proposita, abstinere possit iniuria? Periclitemur (si placet) in ijs quidem exemplis, in quibus peccare uulgus hominum fortasse non putat. neque enim de sicarijs, ueneficis, testamentarijs, furibus, peculatoribus hoc loco differendum est: qui non uerbis sunt, & disputatione philosophorum, sed uinculis & carcere castigandi. sed hæc consideremus, quæ faciunt ij qui habentur boni. L. Minutij Basilij locupletis hominis falsum testamentum quidam è Græcia Romam attulerunt. quod quo facilius obtinerent, scripserunt hæredes secum M. Crassum, & Q. Hortensium, homines eiusdem ciuitatis potentissimos. qui cum illud falsum esse suspicarentur, sibi autem nullius essent conscij culpæ, alieni facinoris munusculum non repudiauerunt. Quid ergo? satin' hoc est, ut non deliquisse uideantur? mihi quidem non uidetur: quanquam alterum amari uiuum, alterum non odi mortuum. sed cum Basilius M. Satirium sororis filium nomen suum ferre uoluisset, cumque fecisset hæredem: hunc

dico patronum agri Piceni, & Sabini: (O turpem notam temporum illorum!) non erat equum principes civitatis rem habere, ad Satirium nihil præter nomen peruenire. Etenim si is qui non defendit iniuriam, neque propulsat à suis cum potest, iniuste facit, ut in primo libro differui: qualis habendus est is, qui non modo repellit, sed etiam adiuvat iniuriam? Mihi quidem etiam ueræ hereditates non honestæ uidentur, si sint malitiosis blanditijs officiorum, non ueritate, sed simulatione quæsitæ. atqui in talibus rebus aliud utile interdum, aliud honestum uideri solet: falso. nam eadē utilitatis, quæ honestatis est regula. qui hoc non præuiderit, ab hoc nulla fraus aberit, nullum fectinus. sic enim cogitans: Est istud quidem honestum, uerum hoc expedit: res à natura copulatas audebit errore diuellere: qui fons est fraudum, maleficiorum, scelerum omnium. Itaque si uir bonus habeat hanc uim, ut si digitis concrepuerit, possit in locupletium testamenta nomen eius irrepere, hac ui non utatur, ne si exploratum quidem habeat id omnino neminem unquam suspicaturum. At si dares hanc uim M. Crasso, ut digitorum percussione hæres posset scriptus esse, qui re uera non esset hæres: in foro (mihi crede) saltaret. Homo autem iustus & is quem sentimus uirum bonum, nihil cuiquam, quod in se transferat, detrahet. hoc qui admiratur, is se, quis sit uir bonus, nescire fatetur. At uero, si quis uoluerit animi sui complicatam notionem euoluere, iam se ipse doceat, eum uirum bonum esse, qui profit quibus possit: noceat nemini, nisi laçessitus iniuria. Quid ergo hic non noceat, qui quodam quasi ueneno perficiat, ut ueros hæredes moneat, in eorum locum ipse succedat?

non ergo faciat, dixerit quis, quod utile sit, quódque expediat? immo intelligat, nihil nec expedire, nec utile esse, quod sit iniustum. hoc qui non didicerit, bonus esse non poterit. Fimbriam consularem, audiebam de patre nostro puer, iudicem M. Lutatius Pythiae fuisse, equiti R. sane honesto, cum is sponsionem fecisset, N I bonus uir esset: itaque ei dixisse Fimbriam, se illam rem nunquam iudicaturum: ne aut spoliaret fama probatum hominem, si contra iudicasset: aut statuisset uideretur uirum bonum aliquem esse, cum ea res innumerabilibus officijs, et laudibus contineretur. Huic igitur uiro bono, quem Fimbria etiam, non modo Socrates nouerat, nullo modo uideri potest quicquam esse utile, quod non honestum sit. itaque talis uir non modo facere, sed ne cogitare quidem quicquam audebit, quod non audeat prædicare. Hæc nonne est turpe dubitare philosophos, quæ ne rustici quidem dubitent? a quibus natum est id, quod iam tritum est uetustate prouerbum. cum enim fidem alicuius, bonitatemque laudant, dignum esse dicunt, quicum in tenebris mices. hoc quam habet uim, nisi illam, nihil expedire, quod non deceat, etiam si id possis nullo refellente obtinere? Vidēsne igitur hoc prouerbio, neque Cygi illi posse ueniam dari, neque huic, quem paulo ante fingebam digitorum percussione hæreditates omnium posse ad sese conuvertere? Ut enim quod turpe est, id quamuis occultetur, tamen honestum fieri nullo modo potest: sic quod honestum non est, id utile ut sit, effici non potest, aduersante etiam et repugnante natura. At enim, cum permagna præmia sunt, est causa peccandi. C. Marius, cum a spe Consulatus longe abesset, et septimum

annum post Præturam iaceret, neque petiturus unquam Consulatum uideretur, Q. Metellum, cuius Legatus erat, summum uirum & ciuem, cum ab eo imperatore suo Romam missus esset, apud populum Ro. criminatus est, bellum illum producere: si se Consulem fecissent, breui tempore aut uiuum, aut mortuum Iugurtham se in potestatem populi R. redacturum. Itaque factus est ille quidem Consul, sed à fide iustitiæque discessit, qui optimum & grauissimum ciuem, cuius Legatus, & à quo missus esset, in inuidiam falso crimine adduxerit. Nec noster quidē Gratidianus officio boni uiri functus est tum, cum Prætor esset, collegiūque prætorium Tribuni pl. adhibuissent, ut res numaria de communi sententia constitueretur. iactabatur enim temporibus illis numus, sic, ut nemo posset scire, quid haberet. Conscripserunt communiter editum cum pœna atque iudicio: constitueruntque ut omnes simul in Rostra post meridiem descenderent. & cæteri quidem alius aliò: Marius à subsellijs in Rostra recta: idque quod communiter compositum fuerat, solus edixit: & ea res (si quæris) ei magno honori fuit: omnibus uicis statuæ factæ sunt: ad eas thus & cerei. quid multa? nemo unquam multitudini fuit cærior. Hæc sunt quæ conturbant homines in deliberatione nonnunquam, cum id, in quo uiolatur æquitas, nō habetur ita magnum. illud autem quod ex eo paritur, permagnum uidetur. ut Mario præripere collegis, & Tribunis pl. popularem gratiam, non ita turpe: Consulē ob eam rem fieri, quod sibi tunc proposuerat, ualde utile uidebatur. Sed omnium una regula est, quam cupio tibi esse notissimam: aut illud quod utile uidetur,

turpe ne sit: aut si turpe est, ne uideatur esse utile. quid igitur? possumusne aut illum Marium uirum bonum iudicare, aut hunc? explica atque excute intelligentiam tuam, ut uideas quæ sit in ea species, forma, et notio uiri boni. Cadit ergo in uirum bonum mentiri emolumentum sui causa, criminari, præripere, fallere? nihil profecto minus. est ergo ulla res tanti, aut commodum ullum tam expetendum, ut uiri boni et splendorem, et nomen amittas? quid est, quod afferre tantum utilitas ista quæ dicitur, possit, quantum auferre, si boni uiri nomen eripuerit: fidem, iustitiamque detraxerit? Quid enim interest, utrum ex homine se conuertat quis in belluam, an in hominis figura immanitatem gerat belluæ? Quid qui omnia recta et honesta negligunt, dummodo potentiam consequantur: nonne id faciunt quod is, qui etiam socerum habere uoluit eum, cuius ipse audacia potens esset? utile enim uidebatur plurimum posse alterius inuidia. id quàm iniustum in patriam, quàm inutile, quàm turpe esset non uidebat. Ipse autem socer in ore semper Græcos uersus Euripidis de Phœnissis habebat: quos dicam, ut potero, incondite fortasse, sed tamen ut res possit intelligi:

” Nam si uiolandum est ius, regnandi gratia

” Violandum est: alijs rebus pietatem colas.

Capitalis Eteocles, uel potius Euripides, qui id unum solum, quod omnium sceleratissimum fuerat, exceperit. quid igitur minuta colligimus, hæreditates, mercaturas, uenditiones fraudulentas? ecce tibi, qui Rex populi Ro. dominusque omnium gentium esse concupierit, idque perfecrit. Hanc cupiditatem si quis honestam

esse dicit, amens est. probat enim legum, & libertatis interitum : earumque oppressionem tetram, & detestabilem, gloriosam putat. Qui autem fateatur honestum non esse in ea ciuitate quæ libera fuit, quæque esse debeat, regnare, sed ei qui id facere possit, esse utile: qua hunc obiurgatione, aut quo potius conuictio à tanto errore coner auertere? Poteest enim, dii immortales, cuiquam esse utile, foedissimum & teterimum parricidium patriæ: quanuis eo qui se obstrinxerit, ab oppressis ciuibus parens nominetur? Honestate igitur dirigenda utilitas est, & quidem sic, ut hæc duo uerba inter se discrepare : sed tamen unum sonare uideantur. Nunc ab eo ad uulgi opinionem. quæ maior utilitas, quam regnandi esse possit? nihil contra inutilius ei qui id iniuste consecutus sit inuenio, cum ad ueritatem cœpi reuocare rationem. possunt enim cuiquam esse utiles angores, sollicitudines, diurni & nocturni metus, uita insidiarum periculorumque plenissima?

Multi iniqui, atque infideles regno, pauci boni sunt, inquit Axius. at cui regno? quod à Tantalò & Pelope proditum iure obtinebatur. nam quanto plures ei Regi putas, qui cum exercitu populi Rom. populum ipsum Romanum oppressisset, ciuitatemque non modo liberam, sed etiam gentibus imperantem seruire sibi coegisset? Huc tu quas conscientiae labe in animo censes habuisse? quæ uulnera? cuius autem uita ipsi potest utilis esse, cum eius uitæ ea conditio sit, ut qui illam eripuerit, in maxima gratia futurus sit & gloria? Quod si hæc utilia non sunt, quæ maxime uidentur, quia plena sunt dedecoris, ac turpitudinis: satis persuasum esse debet, nihil esse utile, quod non honestum sit. Quan-

quam id quidem cum sæpe aliàs, tum Pyrrhi bello à C. Fabritio Consule iterum, & à Senatu nostro iudicatum est. cum enim Rex Pyrrhus populo Ro. bellum ultro intulisset: cumque de imperio certamen esset cum Rege generoso ac potente, per fuga ab eo uenit in castra Fabritij, ei que est pollicitus, si præmium ei proposuisset, se, ut clam uenisset, sic clam in Pyrrhi castra rediturum, & eum ueneno necaturum. hunc Fabritius reducendum curauit ad Pyrrhum: idque eius factum à Senatu laudatum est. Atqui si speciem utilitatis, opinionemque quærimus, magnum illud bellum per fuga unus, & grauem aduersarium imperij sustulisset: sed magnum dedecus & flagitium, quicum laudis certamen fuisset, eum non uirtute, sed scelere superatum. Vtrum igitur utilius uel Fabritio, qui talis in hac urbe, qualis Aristides Athenis fuit: uel Senatui nostro, qui nunquam utilitatem à dignitate sciunxit, armis cum hoste certare, an uenenis? Si gloriæ causa imperium expetendum est, scelus absit: in quo non potest esse gloria. Si ipsæ opes expetuntur quoquo modo, non poterunt esse utiles cum infamia. Non igitur utilis illa L. Philippi Q. filij sententia: quas ciuitates L. Syl la pecunia accepta ex S. C. liberauisset, ut eæ rursus uestigiales essent, neque ijs pecuniam, quam pro libertate dederant, redderemus. est ei Senatus assensus. turpe imperio. piratarum enim melior fides, quam Senatus. at aucta uestigalia: utile igitur. quousque audebunt dicere, quicquam utile, quod non honestum? potest autem ulli imperio, quod gloria debet fultum esse, & beneuolentia sociorum, utile esse odium, & infamia? Ego etiam cum Catone meo sæpe dissensi. ni-

I. iij.



mis enim mihi uidebatur præfracte ærarium, uesti-  
 galiaque defendere : omnia publicanis negare, multa  
 socijs : cum in hos beneficia esse deberemus, cum illis sic  
 agere, ut cum colonis nostris soleremus : eoque magis,  
 quod illa ordinum coniunctio ad salutem Reipublicæ  
 pertinebat. Male etiam Curio, cum causam Transpa-  
 danorum æquam esse dicebat : semper autem adde-  
 bat, Vincat utilitas. potius diceret nō esse æquam, quia  
 non esset utilis Reipublicæ, quàm cum æquam esse di-  
 ceret, non esse utilem fateretur. Plenus est sextus liber  
 de officijs Hecatonis talium questionum : Jitne boni ui-  
 ri, in maxima caritate annonæ familiam non alere.  
 in utrāque partem disputat : sed tamen ad extremum  
 utilitate putat officium dirigi magis, quàm humani-  
 tate. Quærit, si in mari iactura facienda sit, equine  
 pretiosi potius iacturam faciat, an seruuli uilis? hic  
 aliò res familiaris, aliò ducit humanitas. Si tabulā de  
 naufragio stultus arripuerit, extorquebitne eam sapi-  
 ens, si potuerit? negat, quia sit iniuriū. quid dominus  
 nauis? eripietne suū? minime, non plus, quàm si na-  
 uigantem in altum eijcere de navi uelit, quia sua non  
 sit. quoad enim peruentum sit eò, quò sumpta nauis  
 est, non domini est nauis, sed nauigantium. Quid, si  
 in una tabula sint duo naufragi, hique sint sapientes,  
 sibi uterque rapiat, an alter cedit alteri? cedit ue-  
 ro, sed ei, cuius magis intersit uel sua, uel Reip. cau-  
 sa uiuere. quid si hæc paria in utroque? nullum e-  
 rit certamen : sed quasi in sorte, aut in micando ui-  
 ctus, alteri cedit alter. Quid, si pater fana expilet, cu-  
 niculos agit ad ærarium, indicetne id magistratibus  
 filius? nefas id quidem est : quinetiam defendat pa-

trem, si arguatur. non igitur patria præstat omnibus  
 officijs? immo uero: sed ipsi patriæ conducit, pios ha-  
 bere ciues in parentes. Quid, si tyrannidem occupa-  
 re, si patriâ prodere conabitur pater, silebitne filius?  
 immo uero obsecrabit patrē, ne id faciat: si nihil pro-  
 ficiet, accusabit, minabitur etiam: ad extremum, si ad  
 perniciem patriæ res spectabit, patriæ salutem ante-  
 ponet saluti patris. Quærit etiam, si sapiens adulteri-  
 nos numos accipiet imprudens pro bonis, cum id re-  
 scierit, soluturusne sit eos, sicuti debeat, pro bonis. Dio-  
 genes ait, Antipater negat: cui potius assentior. Qui ui-  
 num fugiens uendat sciens, debeatne dicere? non necesse  
 putat Diogenes, Antipater uiri boni existimat. Hæ  
 sunt quasi controuersie in iure Stoicorum. in manci-  
 pio uendendo, dicendane uitia? non ea quæ nisi dixe-  
 ris, redhibeatur mancipiū iure civili: sed hæc, menda-  
 cem esse, aleatorem, furacem, ebriosum, alteri dicenda  
 uidentur, alteri non dicenda. si quis aurum uendens,  
 orichalcum se putat uendere, indicetne ei uir bonus  
 aurū illud esse, an emat denario quod sit millenarium?  
 Perspicuum iam est, et quid mihi uideatur, et quæ sit  
 inter eos philosophos quos nominavi, controuersia. Pa-  
 cta et promissa semperne seruanda sint, quæ nec ui,  
 nec dolo malo (ut Prætores solent dicere) facta sint? Si  
 quis medicamentum cuipiâ dederit ad aquam inter-  
 cutem, pepigeritque, ne illo medicamento unquam postea  
 uteretur: si eo medicamēto sanus factus fuerit, et an-  
 nis aliquot post inciderit in eundem morbum, nec ab  
 eo quicquid pepigerat, impetret ut item eo liceat uti, quid  
 faciendum sit, cum sit is inhumanus, qui non concedat  
 uti, nec ei quicquam fiat iniuriæ: uitæ et saluti consi-

lendum est. Quid si quis sapiens rogatus sit ab eo qui eum hæredem faciat, cum ei testamento sestertium milles relinquatur, ut ante quàm hæreditatem adeat, lucè palàm in foro saltet: idque se facturum promiserit, quod aliter eum hæredem scripturus ille non esset: faciat, quod promiserat ille, necne? promisisse nollem, et id arbitror fuisse grauitatis: sed quoniam promissit, si saltare in foro turpe daret, honestius mentietur, si ex hæreditate nihil æperit: nisi forte eam pecuniam in Reip. magnum aliquod tempus contulerit, ut uel saltare eum, cum patriæ consulturus sit, turpe non sit. Ac ne illa quidem promissa seruanda sunt, quæ non sunt ijs ipsis utilia, quibus illa promiseris. Sol Phæthonti filio (ut redeamus ad fabulas) facturum se esse dixit, quicquid optasset: optauit ut in currum patris tolleretur: sublatus est insanus, atque quâ constitit, ictu fulminis deflagrauit. quâto melius fuerat in hoc promissum patris non esse seruatum? Quid, quod Theseus exegit promissum à Neptuneo? cui cum tres optiones Neptunus dedisset, optauit interitum Hippolyti filij sui, cum is patri suspectus esset de nouerca. quo optato impetrato, Theseus in maximis fuit luctibus. quid Agamemnon? cū deuouisset Dianæ quod in suo regno pulcherrimum natum esset illo anno, immolauit Iphigeniam, qua nihil erat eo quidē anno natum pulchrius. promissum potius non faciendum, quàm tam tetrum facinus admittendum fuit. ergo et promissa non facienda nonnunquam. Neque semper deposita reddenda sunt. si gladiū quis apud te sanæ mentis deposuerit, repetat insaniens: reddere peccatū sit, non reddere officiū. Quid si is qui apud te pecuniam deposuerit, bellū

*inferat patriæ, reddēne depositum? non, credo: facies enim contra Remp. quæ debet esse charissima. sic multa, quæ natura honesta uidentur esse, temporibus fiunt non honesta. facere promissa, stare conuentis, reddere deposita, commutata utilitate fiunt non honesta. Ac de his quidem quæ uidetur esse utilitatis contra iustitiam, simulatione prudentiæ, satis arbitror dictum. Sed quoniam à quatuor fontibus honestatis primo libro officia duximus, in eisdem uersabimur, cum docebimus ea quæ uidentur esse utilia, neque sunt, quàm sint uirtutis inimica. ac de prudentia quidem, quam uult imitari malitia: itémque de iustitia quæ semper est utilis, disputatum est. Reliquæ sunt duæ partes honestatis: quarum altera in animi excellentis magnitudine, et præstantia cernitur: altera in conformatione et moderatione continentiae, et temperantiæ. utile uidebatur Vlyssi (ut quidam poetæ tragici prodiderunt: nam apud Homerum optimum auctorem talis de Vlysse nulla suspicio est) sed insimulant eum tragœdiæ simulatione insanici militiam subterfugere uoluisse. non honestum consilium. at utile (ut aliquis fortasse dixerit) regnare, et Ithacæ uiuere otiose cum parentibus, cum uxore, cum filio. Vllum tu decus in quotidianis periculis et laboribus, cum tranquillitate hac conferendum putas? ego uero istam contemnendam et abiiciendā: quoniam quæ honesta non sit, ne utilem quidē esse arbitror. quid enim auditurū putas fuisse Vlyssēm, si in illa simulatione perseverasset? qui cum maximas res gesserit in bello, tamen hæc audiunt ab Aiac:*

- .. Cuius ipse princeps iurisurandi fuit,  
 .. Quod omnes scitis, solus neglexit fidem:

- .. Partem affulgentem ne cires infestis.
- .. Quam in Palamida perficiat prudentia
- .. Utinam pervenisset multosque audiam,
- .. Fides faciatque ius perpetuo falleret.

Ille vero non modo cum hostibus, actionem cum fluctibus, id quod fecit, dominare melius fuit, quam deserre consuetudinem Græciam ad bellum barbaris inferendum. Sed dominatus est fabulas, et externas: ad rem factique venimus. M. Atilius Regulus cum Consul iterum in Africam ex insidiis captus esset, duce Xanthippo Landemaniis imperatore autem patre Annibale a milite, iuratus missus est ad Senatam, ut nisi reddita essent Prætoris captivi nobiles quidam, rediret ipse Carthaginem. cum Romanam venisset, utilitatis speciem videbat, sed eam res declarat, falsam iudicavit. quæ erat talis, manere in patria, esse domum suam cum uxore, cum liberis: quam calamitatem accepisset in bello, committere frange bellicæ indicantem, tenere consularis dignitatis gradum. quis hæc neget esse utilia? quid confesse magnitudo animi et fortitudo negat. An locupletiores quæris actiores? harum enim est virtutum proprium, nil extimescere, omnia humana despicere, nihil quod homini accidere possit, intolerandum putare. itaque quid se iterum Senatam venit: mandata exposuit: sententiam ne diceret, recusavit: quàm diu inretinendo hostium teneretur, non esse se senatorem. atque illud etiam: (O stultum hominem, dixerit quispiam, et repugnarem utilitati suæ!) reddi captivos negavit esse utile. illos enim adolescentes, et bonos duces, se iam confectam senectute. cuius cum valuisset auctoritas, captivi retenti sunt, ipse Carthaginem rediit,

neque eum charitas patriæ retinuit, nec suorum. neque uero tamen ignorabat se ad crudelissimum hostem, & ad exquisita supplicia proficisci: sed iusiurandum conseruandum putabat. Itaque tum, cum uigilando necabatur, erat in meliore causâ, quàm si domi senex captiuus, feriurus, & consularis remansisset. at stultæ, qui non modo non censerit captiuos remittendos, uerum etiam dissuaserit. quo modo stultæ? etiâne si Reipub. conducebat? potest autem quod inutile Reip. sit, id cuiquam ciui utile esse? Peruertunt homines ea quæ sunt fundamēta naturæ, cum utilitatem ab honestate seiungunt: omnes enim expetimus utilitatem, ad eamque rapimur: nec facere aliter ullo modo possumus. nam quis est qui utilia fugiat? aut quis potius qui eam non studiosissime persequatur? sed quia nusquam possumus, nisi in laude, decore, honestate utilia reperire: propterea illa prima, & summa habemus, utilitatis nomen non tam splendidum, quàm necessarium ducimus. Quid est igitur, dixerit quis, in iureiurando? num iratum timemus Iouem? at hoc quidem commune est omnium philosophorū, non eorum modo, qui deum nihil habere ipsum negotij dicunt, & nihil exhibere alteri: sed eorū etiam qui deū semper agere aliquid & moliri uolunt, nunquam nec irasci deum nec nocere. Quid autem iratus Iupiter plus nocere potuisset, quàm nocuit sibi ipse Regulus? nulla igitur uis fuit religionis, quæ tantā utilitatem peruerteret. an ne turpiter faceret? primū minima de malis. num igitur tantum mali turpitudine ista habebit, quantum ille cruciatus? deinde illud etiam apud Actium,

.. Fregisti ne fidem? neque dedi, neque do infideli cuiquam,

uideo propter deprauationem consuetudinis neq; mo-  
 re turpe haberi, neque aut lege sanciri, aut iure civili:  
 naturæ tamen lege sancitum est. societas enim est (quod  
 etsi sæpe dictum est, dicendum tamen est sæpius) latif-  
 sime quidē quæ pateat, hominum inter homines: inte-  
 rior eorum qui eiusdem gentis sunt: propior eorū, qui  
 eiusdē ciuitatis. Itaq; maiores aliud ius gentium, aliud  
 ius civile esse uoluerunt. quod enim civile, non idem  
 continuo gentium: quod autem gentium, idem civile es-  
 se debet. Sed nos ueri iuris, germanæque iustitiæ solidā,  
 & expressam effigiem nullā tenemus: umbra & ima-  
 ginibus utimur: easque ipsas utinam sequeremur. fe-  
 runtur enim ex optimis naturæ principijs, & uerita-  
 tis exemplis. nā quanti uerba illa? **VT INE PRO-  
 PTER TE, FIDE' M'VE TVAM CA-  
 PTVS, FRAVDATV'SVE SIM:** quā illa au-  
 rea? **VT INTER BONOS BENE AGI-  
 ER OPORTET, ET SINE FRAUDA-  
 TIONE.** Sed qui sint boni, & quid sit bene agi, ma-  
 gna quæstio est. Quintus quidē Scævola Pontifex Ma-  
 ximus summam uim esse dicebat in omnibus ijs arbi-  
 trijs, in quibus ageretur ex fide bona: fideique bonæ no-  
 men existimabat manare latissime, idq; uersari in tu-  
 telis, societatibus, fiducijs, mandatis, rebus emptis, uēdi-  
 tis, conductis, locatis: quibus uitæ societas continetur:  
 in his magni esse iudicis statuere: præsertim cum in ple-  
 risque essent iudicia contraria, quid quæque cuiq; præ-  
 stare oporteret. Quocirca astutiæ tollendæ sunt, eaq;  
 malitia, quæ uult quidē uideri se esse prudentiam, sed  
 abest ab ea, distatque plurimum. prudentia est enim  
 locata in delectu bonorū, & malorū: malitia, si omnia



quæ turpia sunt, mala sunt, mala bonis anteposit. Nec uero in prædijs solum ius ciuile ductum à natura, malitiam, fraudemque uindicat: sed & in mancipiorum uenditione uenditorum fraus omnis excluditur. qui enim scire debuit de sanitate, de fuga, de furtis, præstat edicto AEdilium. hæredum alia causa est. ex quo intelligitur, quoniam iuris natura foris sit, hoc secundum naturam esse, neminem id agere, ut ex alterius prædetur inscitia. nec ulla perniciēs uitæ maior inueniri potest, quam in malitia simulatio intelligentiæ. Ex quo illa innumerabilia nascuntur, ut utilia cum honestis pugnare uideantur. quotus enim quisque reperietur, qui impunitate & ignoratione omnium proposita, abstinere possit iniuria? Periclitemur (si placet) in ijs quidem exemplis, in quibus peccare uulgus hominum fortasse non putat. neque enim de sicarijs, ueneficis, testamentarijs, furibus, peculatoribus hoc loco differendum est: qui non uerbis sunt, & disputatione philosophorum, sed uinculis & carcere castigandi. sed hæc consideremus, quæ faciunt ijs qui habentur boni. L. Minutij Basilij locupletis hominis falsum testamentum quidam è Græcia Romam attulerunt. quod quo facilius obtinerent, scripserunt hæredes secum M. Crassum, & Q. Hortensium, homines eiusdem ciuitatis potentissimos. qui cum illud falsum esse suspicarentur, sibi autem nullius essent conscij culpæ, alieni facinoris munusculum non repudiauerunt. Quid ergo? satin' hoc est, ut non deliquisse uideantur? mihi quidem non uidetur: quamquam alterum amari uiuum, alterum non odi mortuum. sed cum Basilius M. Satirium sororis filium nomen suum ferre uoluisset, eumque fecisset hæredem: hunc

dico patronum agri Piceni, & Sabini: (O turpem no-  
 tam temporum illorum!) non erat æquum principes  
 ciuitatis rem habere, ad Satirium nihil præter nomen  
 peruenire. Etenim si is qui non defendit iniuriam, ne-  
 que propulsat à suis cum potest, iniuste facit, ut in pri-  
 mo libro disserui: qualis habendus est is, qui non mo-  
 do repellit, sed etiam adiuvat iniuriam? Mihi quidem  
 etiam ueræ hæreditates non honestæ uidentur, si sint  
 malitiosis blanditijs officiorum, non ueritate, sed simu-  
 latione quæsitæ. atqui in talibus rebus aliud utile in-  
 terdum, aliud honestum uideri solet: falso. nam eadē uti-  
 litatis, quæ honestatis est regula. qui hoc non præuide-  
 rit, ab hoc nulla fraus aberit, nullum finis. sic enim  
 cogitans: Est istud quidem honestum, uerum hoc expe-  
 dit: res à natura copulatas audebit errore diuellere:  
 qui fons est fraudum, maleficiorum, scelerum omnium.  
 Itaque si uir bonus habeat hanc uim, ut si digitis con-  
 crepuerit, possit in locupletium testamenta nomen eius  
 irrepere, hac ui non utatur, ne si exploratum quidem  
 habeat id omnino neminem unquam suspicaturum.  
 At si dares hanc uim M. Crasso, ut digitorum percus-  
 sione hæres posset scriptus esse, qui re uera non esset  
 hæres: in foro (mihi crede) saltaret. Homo autem iustus  
 & is quem sentimus uirum bonum, nihil cuiquam, quod  
 in se transferat, detrahet. hoc qui admiratur, is se,  
 quis sit uir bonus, nescire fatetur. At uero, si quis uolue-  
 rit animi sui complicatam notionem euoluere, iam se  
 ipse doceat, eum uirum bonum esse, qui profit quibus  
 possit: noceat nemini, nisi laçessitus iniuria. Quid er-  
 go? hic non noceat, qui quodā quasi ueneno perficiat,  
 ut ueros hæredes moueat, in eorum locum ipse succedat?

non ergo faciat, dixerit quis, quod utile sit, quódque expediat? immo intelligat, nihil nec expedire, nec utile esse, quod sit iniustum. hoc qui non didicerit, bonus esse non poterit. Fimbriam consularem, audiebam de patre nostro puer, iudicem M. Lutatius Pythiae fuisse, equiti R. sane honesto, cum is sponsionem fecisset, N I bonus uir esset: itaque ei dixisse Fimbriam, se illam rem nunquam iudicaturum: ne aut spoliaret fama probatum hominem, si contra iudicasset: aut statuisset uideretur uirum bonum aliquem esse, cum ea res innumeralibus officijs, et laudibus contineretur. Huic igitur uiro bono, quem Fimbria etiam, non modo Socrates nouerat, nullo modo uideri potest quicquam esse utile, quod non honestum sit. itaque talis uir non modo facere, sed ne cogitare quidem quicquam audebit, quod non audeat prædicare. Hæc nonne est turpe dubitare philosophos, quæ ne rustici quidem dubitent? à quibus natum est id, quod iam tritum est uetustate prouerbium. cum enim fidem alicuius, bonitatemque laudant, dignum esse dicunt, quicum in tenebris nices. hoc quam habet uim, nisi illam, nihil expedire, quod non deceat, etiam si id possis nullo refellente obtinere? Vidēsne igitur hoc prouerbio, neque Gygi illi posse ueniam dari, neque huic, quem paulo ante fingebam digitorum percussione hereditates omnium posse ad se se conuvertere? Ut enim quod turpe est, id quauis occultetur, tamen honestum fieri nullo modo potest: sic quod honestum non est, id utile ut sit, effici non potest, aduersante etiam et repugnante natura. At enim, cum permagna præmia sunt, est causa peccandi. C. Marius, cum à spe Consulatus longe abesset, et septimum

annum post Præturam iaceret, neque petiturus unquam Consulatum uideretur, Q. Metellum, cuius Legatus erat, summum uirum & ciuem, cum ab eo imperatore suo Romam missus esset, apud populum Ro. criminatus est, bellum illum producere: si se Consulem fecissent, breui tempore aut uiuum, aut mortuum Iugurtham se in potestatem populi R. redacturum. Itaque factus est ille quidem Consul, sed à fide iustitiæque discessit, qui optimum & grauissimum ciuem, cuius Legatus, & à quo missus esset, in inuidiam falso crimine adduxerit. Nec noster quidē Gratidianus officio boni uiri functus est tum, cum Prætor esset, collegiūque prætorium Tribuni pl. adhibuissent, ut res numaria de communi sententia constitueretur. iactabatur enim temporibus illis numus, sic, ut nemo posset scire, quid haberet. Conscripserunt communiter editum cum pœna atque iudicio: constitueruntque ut omnes simul in Rostra post meridiem descenderent. & cæteri quidem alius aliò: Marius à subsellijs in Rostra recta: idque quod communiter compositum fuerat, solus edixit: & ea res (si quæris) ei magno honori fuit: omnibus uicis statuæ factæ sunt: ad eas thus & cerei. quid multa? nemo unquam multitudini fuit cærior. Hæc sunt quæ conturbant homines in deliberatione nonnunquam, cum id, in quo uiolatur æquitas, nō habetur ita magnum. illud autem quod ex eo paritur, permagnum uidetur. ut Mario præripere collegis, & Tribunis pl. popularem gratiam, non ita turpe: Consulē ob eam rem fieri, quod sibi tunc proposuerat, ualde utile uidebatur. Sed omnium una regula est, quam cupio tibi esse notissimam: aut illud quod utile uidetur,

turpe ne sit: aut si turpe est, ne uideatur esse utile. quid igitur? possumusne aut illum Marium uirum bonum iudicare, aut hunc? explica atque excute intelligentiam tuam, ut uideas quæ sit in ea species, forma, et notio uiri boni. Cadit ergo in uirum bonum mentiri enolumentum sui causa, criminari, præripere, fallere? nihil profecto minus. est ergo ulla res tanti, aut commodum ullum tam expetendum, ut uiri boni et splendorem, et nomen amittas? quid est, quod asferre tantum utilitas ista quæ dicitur, possit, quantum auferre, si boni uiri nomen eripuerit: fidem, iustitiamque detraxerit? Quid enim interest, utrum ex homine se conuertat quis in belluam, an in hominis figura immanitatem gerat belluæ? Quid qui omnia recta et honesta negligunt, dummodo potentiam consequantur: nonne id faciunt quod is, qui etiam socerum habere uoluit cum, cuius ipse audacia potens esset? utile enim uidebatur plurimum posse alterius inuidia. id quam iniustum in patriam, quam inutile, quam turpe esset non uidebat. Ipse autem socer in ore semper Græcos uersus Euripidis de Phœnißis habebat: quos dicam, ut potero, mcondite fortasse, sed tamen ut res possit intelligi:

- ” Nam si uiolandum est ius, regnandi gratia
- ” Violandum est: alijs rebus pietatem colas.

Capitalis Eteocles, uel potius Euripides, qui id unum solum, quod omnium sceleratissimum fuerat, exceperit. quid igitur minuta colligimus, hæreditates, mercaturas, uenditiones fraudulentas? ecce tibi, qui Rex populi Ro. dominusque omnium gentium esse concupierit, idque perfecit. Hanc cupiditatem si quis honestam

esse dicit, amens est. probat enim legum, & libertatis interitum : earumque oppressionem tetram, & detestabilem, gloriosam putat. Qui autem fateatur honestum non esse in ea ciuitate quæ libera fuit, quæque esse debeat, regnare, sed ei qui id facere possit, esse utile: qua hunc obiurgatione, aut quo potius conuictio à tanto errore coner auertere? Poteest enim, dii immortales, cuiquam esse utile, fœdissimum & teterrimum periciduum patriæ: quanuis eo qui se obstrinxerit, ab oppressis ciuibus parens nominetur? Honestate igitur dirigenda utilitas est, & quidem sic, ut hæc duo uerba inter se discrepare : sed tamen unum sonare uideantur. Nunc ab eo ad uulgi opinionem. quæ maior utilitas, quam regnandi esse possit? nihil contra inutilius ei qui id iniuste consecutus sit inuenio, cum ad ueritatem cœpi reuocare rationem. possunt enim cuiquam esse utiles angores, sollicitudines, diurni & nocturni metus, uita insidiarum periculorumque plenissima?

Multi iniqui, atque infideles regno, pauci boni sunt, inquit Acius. at cui regno? quod à Tantalo & Pelope proditum iure obtinebatur. nam quanto plures ei Regi putas, qui cum exercitu populi Rom. populum ipsum Romanum oppressisset, ciuitatēque non modo liberam, sed etiam gentibus imperantem seruire sibi coegisset? Hūc tu quas conscientiae labe in animo censes habuisse? quæ uulnera? cuius autem uita ipsi potest utilis esse, cum eius uitæ ea conditio sit, ut qui illam eripuerit, in maxima gratia futurus sit & gloria? Quod si hæc utilia non sunt, quæ maxime uidentur, quia plena sunt dedecoris, ac turpitudinis: satis persuasum esse debet, nihil esse utile, quod non honestum sit. Quan-

quam id quidem cum sæpe aliàs, tum Pyrrhi bello à C. Fabritio Consule iterum, & à Senatu nostro iudicatum est. cum enim Rex Pyrrhus populo Ro. bellum ultro intulisset: cumque de imperio certamen esset cum Rege generoso ac potente, perfuga ab eo uenit in castra Fabritij, ei que est pollicitus, si præmium ei proposuisset, se, ut clam uenisset, sic clam in Pyrrhi castra rediturum, & eum ueneno necaturum. hunc Fabritius reducendum curauit ad Pyrrhum: idque eius factum à Senatu laudatum est. Atqui si speciem utilitatis, opinionemque quærimus, magnum illud bellum perfuga unus, & grauem aduersarium imperij sustulisset: sed magnum dedecus & flagitium, quicum laudis certamen fuisset, eum non uirtute, sed scelere superatum. Verum igitur utilius uel Fabritio, qui talis in hac urbe, qualis Aristides Athenis fuit: uel Senatui nostro, qui nunquam utilitatem à dignitate seiunxit, armis cum hoste certare, an uenenis? Si gloriæ causa imperium expetendum est, scelus absit: in quo non potest esse gloria. si ipsæ opes expetuntur quoquo modo, non poterunt esse utiles cum infamia. Non igitur utilis illa L. Philippi Q. filij sententia: quas ciuitates L. Syl la pecunia accepta ex S. C. liberauisset, ut eæ rursus uestigiales essent, neque ijs pecuniam, quam pro libertate dederant, redderemus. est ei Senatus assensus. turpe imperio. piratarum enim melior fides, quam Senatus. at aucta uestigalia: utile igitur. quousque audebunt dicere, quicquam utile, quod non honestum? potest autem ulli imperio, quod gloria debet fultum esse, & beneuolentia sociorum, utile esse odium, & infamia? Ego etiam cum Catone meo sæpe dissensi. ni-



mis enim mihi uidebatur præfracte ærarium, uesti-  
 galiaque defendere: omnia publicanis negare, multa  
 socijs: cum in hos beneficia esse deberemus, cum illis sic  
 agere, ut cum colonis nostris soleremus: eoque magis,  
 quod illa ordinum coniunctio ad salutem Reipublicæ  
 pertinebat. Male etiam Curio, cum causam Transpa-  
 danorum æquam esse dicebat: semper autem adde-  
 bat, Vincat utilitas. potius diceret non esse æquam, quia  
 non esset utilis Reipublicæ, quàm cum æquam esse di-  
 ceret, non esse utilem fateretur. Plenus est sextus liber  
 de officijs Hecatonis talium questionum: sitne boni ui-  
 ri, in maxima caritate annonæ familiam non alere.  
 in utrâque partem disputat: sed tamen ad extremum  
 utilitate putat officium dirigi magis, quàm humani-  
 tate. Querit, si in mari iactura facienda sit, equine  
 pretiosi potius iacturam faciat, an seruuli uilis? hic  
 aliò res familiaris, aliò ducit humanitas. Si tabulâ de  
 naufragio stultus arripuerit, extorquebitne eam sapi-  
 ens, si potuerit? negat, quia sit iniurium. quid dominus  
 naus? eripietne suum? minime, non plus, quàm si na-  
 uigantem in altum eijcere de nauis uelit, quia sua non  
 sit. quoad enim peruentum sit eò, quò sumpta nauis  
 est, non domini est nauis, sed nauigantium. Quid, si  
 in una tabula sint duo naufragi, hi que sint sapientes,  
 sibi uterque rapiat, an alter cedit alteri? cedit ue-  
 ro, sed ei, cuius magis inter sit uel sua, uel Reip. cau-  
 sa uiuere. quid si hæc paria in utroque? nullum e-  
 rit certamen: sed quasi in sorte, aut in iucando ui-  
 ctus, alteri cedit alter. Quid, si pater fana expilet, cu-  
 niculos agat ad ærarium, indicetne id magistratibus.  
 filius? nefas id quidem est: quin etiam defendat pa-

trem, si arguatur. non igitur patria præstat omnibus  
 officijs? immo uero: sed ipsi patriæ conducit, pios ha-  
 bere ciues in parentes. Quid, si tyrannidem occupa-  
 re, si patriâ prodere conabitur pater, silebitne filius?  
 immo uero obsecrabit patrē, ne id faciat: si nihil pro-  
 ficiet, accusabit, minabitur etiam: ad extremum, si ad  
 perniciem patriæ res spectabit, patriæ salutem ante-  
 ponet saluti patris. Quærit etiam, si sapiens adulteri-  
 nos numos accipiet imprudens pro bonis, cum id re-  
 scierit, soluturusne sit eos, sicuti debeat, pro bonis. Dio-  
 genes ait, Antipater negat: cui potius assentior. Qui ui-  
 num fugiens uendat sciens, debeatne dicere? non neces-  
 se putat Diogenes, Antipater uiri boni existimat. Hæ  
 sunt quasi controuersie in iure Stoicorum. in manci-  
 pio uendendo, dicendane uitia? non ea quæ nisi dixe-  
 ris, redhibeatur mancipiū iure civili: sed hæc, mendā-  
 cem esse, aleatorem, furacem, ebriosum, alteri dicenda  
 uidentur, alteri non dicenda. si quis aurum uendens,  
 orichalcum se putat uendere, indicetne ei uir bonus  
 aurū illud esse, an emat denario quod sit millenarium?  
 Perspicuum iam est, & quid mihi uideatur, & quæ sit  
 inter eos philosophos quos nominaui, controuersia. Pa-  
 cta & promissa semperne seruanda sint, quæ nec ui,  
 nec dolo malo (ut Prætores solent dicere) facta sint? Si  
 quis medicamentum cui piā dederit ad aquam inter-  
 cutem, pepigeritq; ne illo medicamento unquam postea  
 uteretur: si eo medicamēto sanus factus fuerit, & an-  
 nis aliquot post inciderit in eundem morbum, nec ab  
 eo quicquid pepigerat, impetret ut item eo liceat uti, quid  
 faciendum sit, cum sit is inhumanus, qui non concedat  
 uti, nec ei quicquam fiat iniuriæ? uitæ & saluti consi-

lendum est. Quid si quis sapiens rogatus sit ab eo qui eum heredem faciat, cum ei testamento scelerterium milies relinquatur, ut ante quam hereditatem adeat, luce palam in foro saltet: idque se facturum promiserit, quod aliter eum heredem scripturus ille non esset: faciat, quod promiserat ille, necne? promisisse nollem, et id arbitror fuisse grauitatis: sed quoniam promissit, si saltare in foro turpe ducet, honestius mentietur, si ex hereditate nihil ceperit: nisi forte eam pecuniam in Reip. magnum aliquod tempus contulerit, ut uel saltare eum, cum patriæ consulturus sit, turpe non sit. Ac ne illa quidem promissa seruanda sunt, quæ non sunt ijs ipsis utilia, quibus illa promiseris. Sol Phæthonti filio (ut redeamus ad fabulas) facturum se esse dixit, quicquid optasset: optauit ut in currum patris tolleretur: sublatus est insanus, atque quâ constitit, ictu fulminis deflagrauit. quâto melius fuerat in hoc promissum patris non esse seruatum? Quid, quod Theseus exegit promissum à Neptune? cui cum tres optiones Neptunus dedisset, optauit interitum Hippolyti filij sui, cum is patri suspectus esset de nouerca. quo optato impetrato, Theseus in maximis fuit luctibus. quid Agamemnon? cū deuouisset Dianæ quod in suo regno pulcherrimum natum esset illo anno, immolauit Iphigeniam, qua nihil erat eo quidē anno natum pulchrius. promissum potius non faciendum, quam tam tetrum facinus admittendum fuit. ergo et promissa non facienda nonnunquam. Neque semper deposita reddenda sunt. si gladiū quis apud te sanæ mentis deposuerit, repetat insaniens: reddere peccatū sit, non reddere officiū. Quid si is qui apud te pecuniam deposuerit, bellū

*inferat patriæ, reddēsne depositum? non, credo: facies enim contra Remp. quæ debet esse charissima. sic multa, quæ natura honesta uidentur esse, temporibus fiunt non honesta. facere promissa, stare conuentis, reddere deposita, commutata utilitate fiunt non honesta. Ac de his quidem quæ uidetur esse utilitatis contra iustitiam, simulatione prudentiæ, satis arbitror dictum. Sed quoniam à quatuor fontibus honestatis primo libro officia duximus, in eisdem uersabimur, cum docebimus ea quæ uidentur esse utilia, neque sunt, quàm sint uirtutis inimica. ac de prudentia quidem, quam uult imitari malitia: itémque de iustitia quæ semper est utilis, disputatum est. Reliquæ sunt duæ partes honestatis: quarum altera in animi excellentis magnitudine, et præstantia cernitur: altera in conformatione et mode ratione continentiae, et temperantiæ. utile uidebatur Vlyssi (ut quidam poetæ tragici prodiderunt: nam apud Homerum optimum auctorem talis de Vlysse nulla suspicio est) sed insimulant eum tragiæ simulatione insanici militiam subterfugere uoluisse. non honestum consilium. at utile (ut aliquis fortasse dixerit) regnare, et Ithacæ uiuere otiose cum parentibus, cum uxore, cum filio. Vllum tu decus in quotidianis periculis et laboribus, cum tranquillitate hac conferendum putas? ego uero istam contemnendam et abiiciendā: quoniam quæ honesta non sit, ne utilem quidē esse arbitror. quid enim auditurū putas fuisse Vlyssē, si in illa simulatione perseverasset? qui cum maximas res gesserit in bello, tamen hæc audiuit ab Aiæ:*

.. Cuius ipse princeps iurisiurandi fuit,  
.. Quod omnes scitis, solus neglexit fidem:

- .. Furere assimulauit: ne ciret, inſtit.
- .. Quòd ni Palamedis perſpicax prudentia
- .. Iſtiu' percepſet malitioſam audaciam,
- .. Fidei ſacrata ius perpetuo falleret.

Illi uero non modo cum hoſtibus, uerū etiam cum fluctibus, id quod fecit, dimicare melius fuit, quàm deſerere conſentientem Græciam ad bellum barbaris inferendum. Sed dimittamus & fabulas, & externa: ad rem factâque ueniamus. M. Attilius Regulus cum Conſul iterum in Africa ex inſidijs captus eſſet, duce Xantippo Lacedæmonio, imperatore autem patre Annibalis Amilcare, iuratus miſſus eſt ad Senatum, ut niſi rediti eſſent Pœnis captiui nobiles quidam, rediret ipſe Carthaginem. is cum Romam ueniſſet, utilitatis ſpeciem uidebat, ſed eā, ut res declarat, falſam iudicauit: quæ erat talis, manere in patria, eſſe domi ſuæ cum uxore, cum liberis: quam calamitatem accepiſſet in bello, communem fortunæ bellicæ iudicantem, tenere conſularis dignitatis gradum. quis hæc neget eſſe utilia? quid cenſes? magnitudo animi & fortitudo negat. An locupletiores quæris auctores? harum enim eſt uirtutum proprium, nil extimeſcere, omnia humana deſpicere, nihil quod homini accidere poſſit, intolerandum putare. itaque quid fecit? in Senatum uenit: mandata expoſuit: ſententiam ne diceret, reſuſcit: quàm diu iureiurando hoſtium teneretur, non eſſe ſe ſenatorem. atque illud etiam: (O ſtultum hominem, dixerit quiſpiam, & repugnātem utilitati ſuæ!) reddi captiuos negauit eſſe utile. illos enim adoleſcentes, & bonos duces, ſe iam conſectum ſenectute. cuius cum ualiſſet auctoritas, captiui retenti ſunt, ipſe Carthaginem redijt,

neque eum charitas patriæ retinuit, nec suorum. neque uero tamen ignorabat se ad crudelissimum hostem, & ad exquisita supplicia proficisci: sed iniurandum conseruandum putabat. Itaque tum, cum uigilando necabatur, erat in meliore causâ, quàm si domi senex captiuus, periurus, & consularis remansisset. at stulte, qui non modo non censuerit captiuos remittendos, uerum etiam dissuaserit. quo modo stulte? etiâne si Reipub. conducebat? potest autem quod inutile Reip. sit, id cuiquam ciui utile esse? Peruertunt homines ea quæ sunt fundamēta naturæ, cum utilitatem ab honestate seiungunt: omnes enim expetimus utilitatem, ad eamque rapimur: nec facere aliter ullo modo possumus. nam quis est qui utilia fugiat? aut quis potius qui eam non studiosissime persequatur? sed quia nusquam possumus, nisi in laude, decore, honestate utilia reperire: propterea illa prima, & summa habemus, utilitatis nomen non tam splendidum, quàm necessarium ducimus. Quid est igitur, dixerit quis, in iureiurando? num iratum timemus Iouē? at hoc quidem commune est omnium philosophorū, non eorum modo, qui deum nihil habere ipsum negotij dicunt, & nihil exhibere alteri: sed eorū etiam qui deū semper agere aliquid & moliri uolunt, nunquam nec irasci deum nec nocere. Quid autem iratus Iupiter plus nocere potuisset, quàm nocuit sibi ipse Regulus? nulla igitur uis fuit religionis, quæ tantā utilitatem peruerteret. an ne turpiter faceret? primū minima de malis. num igitur tantum mali turpitudine ista habebit, quantum ille cruciatus? deinde illud etiam apud Actium,

„ Fregisti ne fidē? neque dedi, neque do infideli cuiquam,

quanquam ab impio rege dicitur, luculente tamen dicitur. Addunt etiam: quemadmodum nos dicamus uideri quædam utilia quæ non sint: sic se dicere, uideri quædam honesta quæ non sint: ut hoc ipsum, uidetur honestum conseruandi iurisiurandi causa ad cruciatum reuertisse: sed fit non honestum, quia quod per uim hostiū esset actum, ratum esse non debuit. Addunt etiam quicquid ualde utile sit, id fieri honestū, etiam si antea non uideretur. hæc ferè contra Regulum. sed prima uideamus. Non fuit Iupiter metuendus, ne iratus noceret, quia neque irasci solet, neque nocere. hæc quidem ratio non magis contra Regulū, quàm contra omne iusiurandum ualet. sed in iureiurando non qui metus, sed quæ uis sit, debet intelligi. est enim iusiurandum, affirmatio religiosa. quod autē affirmatiue, quasi deo teste promiseris, id tenendū est. iam enim non ad iram deorum quæ nulla est: sed ad iustitiam et ad fidem pertinet. nam præclare Ennius,

„ O fides alma apta pennis, et iusiurandum Iouis.  
 Qui igitur iusiurandum uiolat, is fidem uiolat: quam in Capitolio uicinam Iouis Optimi Maximi, ut in Catonis oratione est, maiores nostri esse uoluerunt. At enim ne iratus quidem Iupiter plus Regulo nocuisset, quàm sibi nocuit ipse Regulus. certe, si nihil malum esset nisi dolere: id autem non modo non summum malum, sed nec malum quidem esse, maxima auctoritate philosophi affirmant. quorū quidem testem non mediocrem, sed haud scio an grauissimum, Regulum nolite, quæso, uituperare. quem enim locupletiore quærimus, quàm principē Reip. qui retinendi officij causa, cruciatum subierit uoluntarium? Nam quod aiunt mi-



nima de malis, id est ut turpiter potius quam calamitose. an est ullum maius malum turpitudine? quæ si in deformitate corporis habeat aliquid offensionis, quantâ illa deprauatio & foeditas turpificati animi debet uideri? Itaque neruosius qui ista differunt, solum audent malum dicere id quod turpe sit: qui autem remissius, hi tamen non dubitant summum malum dicere. nam illud quidem,

- „ Neque dedi, neque do fidem infideli cuiquam,  
 iccirco recte à poeta dicitur: quia cum tractaretur Atræus, personæ seruiendū fuit. sed si hinc sibi sumunt, nullā esse fidem quæ infideli data sit: uideant ne queratur latebra periurio. Est autem etiam ius bellicum fidesq; iurisiurādī sæpe hosti seruanda. quod enim ita iuratum est, ut mens deferentis conciperet fieri oportere, id obseruandū est. quod aliter: id si non fecerit, nullum periuriū est. ut si prædonibus pactum pro capite pretium nō attuleris, nulla fraus est, ne si iuratus quidem id non feceris. nam pirata non est ex perduellium numero definitus, sed communis hostis omniū. cum hoc non fides esse debet, nec iusiurādum cōmune. non enim falsum iurare, peierare est: sed quod ex animi tui sententia iuraueris, sicut uerbis concipitur more nostro, id non facere, periurium est. scite enim Euripides,

- „ Iuravi lingua, mentem iniuram gero.

Rēgulus uero non debuit conditiones pactionēsq; bellicas & hostiles perturbare periurio. cum iusto enim & legitimo hoste res gerebatur: aduersus quem & totum ius fœciale, & multa sunt iura communia. quod ni ita esset, nunquam claros uiros Senatus uinctos hostibus dedisset. At uero T. Veturius, & Sp. Posthumius

cum iterum Consules essent, quia cum male pugnatum apud Caudiū esset, legionibus nostris sub iugum missis pacem cum Samnitibus fecerant, dediti sunt his. in iussu enim populi Senatūque fecerant. eodēque tempore T. Numitius, Q. Aemilius, qui tum Tribuni pl. erant, quod eorum auctoritate pax erat facta, dediti sunt, ut pax Samnitum repudiaretur. atque huius deditio ipse Posthumius qui dedebatur, suator et auctor fuit. quod item multis annis post C. Mācinus: qui ut Numātiniis, quibus cum sine Senatus auctoritate fœdus fecerat, dederetur, rogationem suasit eam quam L. Furius, et Sex. Attilius ex S. C. ferebant: qua accepta, est hostibus deditus. Honestus hic, quā Q. Pompeius, quo cum in eadem causa esset, deprecāte, accepta lex non est. hic ea quæ uidebatur utilitas, plus ualuit quā honestas: apud superiores utilitatis species falsa, ab honestatis auctoritate superata est. At non debuit ratum esse, quod erat actum per uim. quasi uero forti uiro uis possit adhiberi. Cur igitur ad Senatum proficisceretur, cum præsertim de captiuis dissuasurus esses? quod maximum in eo est, id reprehenditis. non enim suo iudicio stetit: sed suscepit causam, ut esset iudicium Senatus: cui nisi ipse auctor fuisset, captiui profecto Pœnis redditi essent. ita incolumis in patria Regulus restitisset. quod quia patriæ utile nō putauit, ictu co honestum sibi et sentire illa, et pati credidit. nam quod aiunt, quod ualde utile sit, id fieri honestum: immo uero esse, non fieri. est enim nihil utile, quod idem non honestum: nec quia utile, honestum est, sed quia honestum, utile. Quare ex multis mirabilibus exemplis, haud facile quis dixerit hoc exemplo aut laudabi-

lius, aut præstantius. sed ex tota hac laude Reguli, unum illud est admiratione dignum, quòd captiuos retinendos ænsuerit. nam quòd redijt, nobis non mirabile uidetur: illis quidem temporibus aliter facere non potuit. itaque ista laus non est hominis, sed temporũ. nulum enim uinculũ ad stringendam fidem iureiurando maiores arctius esse uoluerunt. id indicant leges in Duodecim tabulis, indicant sacra, indicant fœdera, quibus etiã cum hoste deuincitur fides: indicant notationes animaduersionesque Censorum, qui nulla de re diligentius, quàm de iureiurando iudicabant. L. Manlio A. filio, cum Dictator fuisset, M. Pomponius Tribunus pl. diem dixit, quòd is paucos sibi dies ad Dictaturam gerendam addidisset. Criminabatur etiam, quòd Titum filium, qui Torquatus postea est appellatus, ab hominibus relegasset, & ruri habitare iussisset. quod cum audiuiisset adolescens filius, negotium exhiberi patri, accurrisse Romam, & prima luce Põponij domum uenisse dicitur. cui cum esset nuntiatum, quòd illum iratum allaturum ad se aliquid contra patrem arbitraretur, surrexit è lectulo, remotisq; arbitris ad se adolescentem iussit uenire. at ille ut ingressus est, confestim gladium distrinxit, iurauitque se illũ statim interfectorum, nisi iusiurandum sibi dedisset, se patrem missum esse facturum. iurauit hoc terrore coactus Pomponius: rem ad populum detulit: docuit cur sibi à causa desistere necesse esset: Manlium missum fecit. Tantum temporibus illis iusiurandum ualebat. atque hic T. Manlius, is est qui ad Anienem Gallo, quem ab eo prouocatus occiderat, torque detracto, cognomen inuenit. cuius tertio Consulatu Latini ad Vese-

rim fusi, & fugati: magnus uir in primis: & qui nuper indulgens in patrem, idem acerbus & seuerus in filium. Sed ut laudandus Regulus in conseruando iureiurando: sic decem illi, quos post Cannensem pugnam iuratos ad Senatum misit Annibal, in castra redituros ea, quorum erant potiti Pœni, nisi de redimendis captiuis impetrauissent: si non redierunt, uituperandi. de quibus non omnes uno modo. nam Polybius, bonus auctor in primis, scribit ex decem nobilissimis qui tunc erant missi, nouem reuertisse, à Senatu re non impetrata: unum ex decem qui paulo post quàm egressus erat è castris, redisset, quasi aliquid esset oblitus, Romæ remansisse. reditu enim in castra, liberatum se esse iureiurando interpretabatur: non recte. fraus enim distringit, non dissoluit periurium. Fuit igitur stulta calliditas, peruerse imitata prudentiam. itaque decreuit Senatus, ut ille ueterator & callidus uinctus ad Annibalem duceretur. sed illud maximum, Octo hominum milia tenebat Annibal, non quos in acie cepisset, aut qui periculo mortis diffugissent, sed qui relictī in castris fuissent à Paulo & Varrone Consulibus: eos Senatus non cœsui redimendos, cum id parua pecunia fieri potuisset: ut esset insitū militibus nostris aut uincere, aut emori. qua quidē re audita fractum animum Annibalis scribit idem, quòd Senatus, populisq̃ Ro. rebus afflictis tam excelsō animo fuisset. sic honestatis comparisonē ea quæ uidentur utilia, uincuntur. Acilius autem ille, qui Græcæ scripsit historiam, plures ait fuisse qui in castra reuertissent, eadem fraude, ut iureiurando liberarentur, eosq̃ à Censoribus omnibus ignominij notatos. Sit iam huius loci finis. perspicuū est enim

quæ timido animo, humili, demisso, fractoque fiant, quale fuisset Reguli factum, si aut de captiuis, quod ipsi opus esse uideret, non quod Reip. censuisset, aut domi remanere uoluisset, non esse utilia, quia sunt flagitiosa, fœda, et turpia. Restat quarta pars, quæ decore, moderatione, modestia, continentia, temperantia continetur. potest igitur quicquam esse utile, quod sit huic talium uirtutum choro contrarium? Atque ab Aristippo Cyrenaici atque Annicerij philosophi nominati, omne bonum in uoluptate posuerunt: uirtutemque censuerunt ob eam rem esse laudandam, quod efficiens esset uoluptatis. quibus obsoletis floret Epicurus, eiusdem ferè adiutor, auctorque sententiæ. Cum his, uelis, equisque (ut dicitur) si honestatem tueri ac retinere sententia est, decertandum est. nam si non modo utilitas, sed uita omnis beata, corporis firma constitutione, eiusque constitutionis spe explorata (ut à Metrodoro scriptum est) continetur: certe hæc utilitas, et quidem summa (sic enim censent) cum honestate pugnabit. nam ubi primum prudentiæ locus dabitur? an, ut conquirat undique suauitates? quàm miser uirtutis famulatus seruientis uoluptati! quod autem munus prudentiæ? an legere intelligenter uoluptates? fac nihil isto esse iucundius: quid excogitari potest turpius? Iam qui dolorem summum malum dicat, apud eum quem habet locum fortitudo, quæ est dolorum laborumque contemptio? quanuis enim multis in locis dicat Epicurus (sicut hic dicit) satis fortiter de dolore: tamen non id spectandum est, quid dicat, sed quid consentaneum sit ei dicere qui bona uoluptate terminauerit, mala dolore: ut si illum audiam de continentia et temperantia. Dicit ille quidam multa mul

tis locis: sed aqua hæret, ut aiunt. nam quo modo potest temperantiam laudare is qui ponat summum bonum in uoluptate? est enim temperantia libidinum inimica, libidines autem consecratrices uoluptatis. Atque in his tamen tribus generibus, quoquo modo possunt, non incallide terguersantur. prudentiam introducunt scientiam suppeditantem uoluptates, depellentem dolores. fortitudinem quoque aliquo modo expediunt, cum tradunt rationem negligendæ mortis, perpetiendique doloris. etiam temperantiam inducunt, non facillime illi quidem, sed tamen quoquo modo possunt. dicunt enim uoluptatis magnitudinem doloris detractio fieri. Iustitia uacillat, uel iacet potius, omnesque hæc uirtutes quæ in communitate cernuntur, et in societate generis humani. neque enim bonitas, nec liberalitas, nec comitas esse potest, non plus quam amicitia, si hæc non per se expetantur, sed ad uoluptatem, utilitatemue referantur. Conferamus igitur in pauca. nam ut utilitatem nullam esse docuimus, quæ honestati esset contraria: sic omnem uoluptatem dicimus honestati esse contrariam. quo magis reprehendendos Calliphonem et Dinomachum iudico: qui se dirempturos controuersiam putauerunt, si cum honestate uoluptatem, tanquam cum homine pecudem, copulauissent. non recipit istam coniunctionem honestas, aspernatur, repellit. nec uero finis bonorum, et malorum, qui simplex esse debet, ex dissimilibus rebus misceri, et temperari potest. Sed de hoc hæc tenus: magna enim res, alio loco pluribus uerbis disputata. nunc ad propositum. Quemadmodum igitur, si quando ea quæ uideretur utilitas, honestati repugnat, diiudicanda res sit, satis est supra disputatum. sin autem spe-

ciem utilitatis etiam uoluptas habere dicatur, nulla potest esse ei cum honestate coniunctio. nam ut tribuamus aliquid uoluptati, condimenti fortasse nonnihil, utilitatis certe nihil habebit.

Habes à patre munus Marce fili, mea quidem sententia, magnum: sed perinde erit, ut acceperis. quam tibi hi tres libri inter Cratippi commentarios, tanquam hospites, erunt recipiendi. Sed ut si ipse uenissem Athenas, quod quidem esset factum, nisi me de medio cursu clara uoce patria reuocasset, aliquādo me quoque audires: sic, quoniam his uoluminibus ad te profecta uox mea est, tribues his temporis quantum poteris: poteris autem quantum uoles. cum uero intellexero te hoc scientiæ genere gaudere, tum et præsens tecum propediem (ut spero) et dñ aberis, absens loquar.

Vale igitur mi Cicero, tibi que persuade, te mihi quidem esse charissimum: sed multo fore chariorem, si talibus monimentis, præceptisque lætabere.



M. TVLLII CICERONIS CA-  
TO MAIOR, uel DE SENECTU  
TE AD T. POMPONIVM AT-  
TICVM.

DIALOGI PERSONAE, SCI-  
PIO, CATO, LAELIVS.

- ” O Tite, siquid ego adiuto, curâ me leuaffo,  
” Quæ nunc te coquit, & uersat sub pectore fixa,  
” Ecquid erit præmij?

licet enim uersibus ijsdem mihi affari te Atticæ, qui-  
bus affatur Flaminiûm ille uir haud magna cum re,  
sed fide plenus. Quanquam certo scio, non ut Flami-  
niûm, solitari te Atticæ sic noctesque diésque. noui e-  
nim moderationem animi tui, & æquitatem: teq; non  
cognomen solum Athenis deportasse, sed humanita-  
tem & prudentiam intelligo. & tamen suspicor ijs-  
dem rebus te, quibus me ipsum, interdum grauius  
commoueri. quarum consolatio & maior est, & in a-  
liud tempus differenda. Nunc autem mihi uisum est  
de senectute aliquid ad te scribere, hoc enim onere,  
quod mihi tecum commune est, aut iam urgentis, aut  
certe aduentantis senectutis & te, & me ipsum leua-  
ri uolo. etsi te quidem id modeste ac sapienter, sicut  
omnia & ferre, & laturum esse certo scio. sed mihi  
cum de senectute uellem aliquid scribere, tu occurre-  
bas dignus eo munere, quo uterque nostrû communiter  
uteretur. Mihi quidē ita iucunda huius libri confectio

fuit, ut nō modo omnes absterferit senectutis molestias, sed effecerit mollem etiam et iucundam senectutem. nunquā igitur satis laudari digne poterit philosophia: cui qui pareat, omne tempus ætatis sine molestia possit degere. Sed de cæteris et diximus multa, et sæpe dicemus. hunc uero librū de senectute ad te misimus. Omnem autem sermonē tribuimus non Tithono, ut Aristoteli Chius, ne parū esset auctoritatis in fabula, sed M. Catoni seni, quo maiore auctoritatem haberet oratio: apud quem Leliū, et Scipionem facimus admirantes, quod is tam facile senectutem ferat, ijsque eum respondentem. qui si eruditius uidebitur disputare, quā consuevit ipse in suis libris, attribuito Græcis literis: quarum constat eum perstudiosum fuisse in senectute. sed quid opus est plura? iam enim ipsius Catonis sermo explicabit nostram omnem de senectute sententiam.

SCI. Sæpenumero mirari soleo cum hoc C. Lelio, tum cæterarum rerum tuam excellentem M. Cato, perfectamque sapientiam, tum uel maxime, quod senectutem tuam nunquam tibi grauem esse senserim: quæ plebisque senibus sic odiosa est, ut onus se Aetna grauius dicant sustinere. CA. Rem haud sanè Scipio, et Leli difficile admirari uidentini. quibus enim nihil opis est in ipsis ad bene beatæque uiuendum, ijs omnis grauis est ætas. qui autem omnia bona à se ipsis petūt, ijs nihil potest malum uideri, quod naturæ necessitas afferat. quo in genere in primis est senectus, quam ut adipiscantur, omnes optant: eandem accusant adepti. tanta est inconstantia, stultitia, atque perversitas. Obrepere aiunt eā citius, quā putassent. primum, quis cogit eos falsum putare? qui enim citius adoleſcētiæ se-

*neſtus, quàm pueritiæ adoleſcētia obrepit? deinde, qui minus grauis eſſet iſ ſeneſtus, ſi octingenteſimum annum agerēt, quàm octogeſimum? præterita enim ætas, quanuis longa, cum effluxiſſet, nulla conſolatione permulcere poſſet ſtultam ſeneſtutem. Quocirca ſi ſapientiam meã admirari ſoletis, quæ utinam digna eſſet opinione ueſtra, noſtroque cognomine: in hoc ſumus ſapiētes, quòd naturã optimam ducem, tanquam deũ ſequimur, eiſque paremus. à qua non ueriſimile eſt, cum cæteræ partes ætatis bene deſcriptæ ſint, extremum actum, tanquã ab inerti poeta, eſſe neglectum. ſed tamen neceſſe fuit eſſe aliquod extremum, & tanquã in arborum bacis, terræq; frugibus, maturitate tēpeſtina quaſi uietum & caducum: quod ferendum eſt molliter ſapientii. quid enim eſt aliud gigantũ more bellare cum diſ, niſi naturæ repugnare? LAE. Atqui Cato gratiſſimũ nobis, ut etiã pro Scipione pollicear, feceris, ſi, quoniam ſperamus & uolumus quidem ſenes fieri, ante multo à te didicerimus, quibus facillime rationibus ingraueſcentem ætatem ferre poſſimus. CA. Faciã uero Læli, præſertim ſi utrique ueſtrum gratum, ut dicis, futurum eſt. LAE. Volumus ſanè, niſi moleſtum eſt tibi Cato, tanquam aliquam uiam longam confeceſis, qua nobis quoque ingrediendum ſit, iſtuc, quò perueniſti, uidere quale ſit. CA. Faciam ut potero, Læli: ſæpe enim interſui querelis meorũ æqualium, (pares autem cum paribus ueteri prouerbio facillime congregantur) quas C. Salinator, quas Sp. Albinus, homines cōſulares, noſtri ferè æquales deplorare ſolebant: tum quòd uoluptatibus carerēt, ſine quibus uitam nullam putarēt: tum quòd ſpernerentur ab iſ, à quibus eſſent coli ſoli-*

ti. qui mihi non id uidebantur accusare, quod esset accusandum. nam si id culpa senectutis accideret, eadem mihi usu euenirent, reliquisque omnibus maioribus natu: quorum ego multorum cognoui senectutem sine querela, qui se à libidinum uinculis laxatos esse non moleste ferrent, nec à suis despicerentur. sed omnium istiusmodi querelarum in moribus est culpa, non in ætate. moderati enim, nec difficiles senes, nec inhumani tolerabilem agunt senectutem. importunitas autem et inhumanitas omni ætate molesta est. LAE. Est ut dicis Cato, sed fortasse dixerit quispiam, tibi propter opes, et copias, et dignitatem tuam, tolerabilem senectutem uideri, id autem non posse multis contingere. CA. Est istud quidem Læli aliquid, sed nequaquam in isto sunt omnia. ut Themistoclem ferunt Seriphio cuidam in iurgio respondisse, cum ille dixisset, non illū sua, sed patriæ gloria splendorem assecutum: Nec hercle, inquit, si ego Seriphius essem, nobilis: nec, si tu Atheniensis esses, clarus unquam fuisses. quod eodem modo de senectute potest dici. nec enim in summa inopia leuis esse senectus potest, ne sapienti quidem: nec insipienti in summa copia, non grauis. Aptissima omnino sunt Scipio et Læli arma senectutis, artes, citationesque uirtutum. quæ in omni ætate cultæ, et multum diuque uixeris, mirificos afferunt fructus, non solum quia nunquam deserunt, nec in extremo quidem tempore ætatis: (quanquā id maximum est) uerum etiam quia consciētia bene actæ uitæ, multorumque benefactorum recordatio iucundissima est. Ego quidem Q. Maximus, cum qui Tarentum recepit, adolescens ita dilexi senem, ut æqualem. erat enim in illo uero comi-

tate condita grauitas : nec senectus mores mutauerat. quanquā cum colere cœpi non admodū grandem natu: sed tamen iam ætate prouectum . anno enim post quā primum Consul fuerat , ego natus sum: cūque eo quartū Cōsule adolescentulus miles profectus sum ad Capuā, quintōque anno post ad Tarentum Quæstor: demde A. Edilis, quadriēnio post factus sum Prætor, quem magistratum gessi Consulibus Tuditano, et Cethego, cum quidem ille admodum senex, suator legis Cinciae de donis et muneribus fuit. Hic et bella gerebat ut adolescens, cum planè grandis esset: et Annibalem iuueniliter exultantem patientia sua mollicibat: de quo præclare familiaris noster Ennius:

- „ Vnus homo nobis cunctando restituit rem:
- „ Non ponebat enim rumores ante salutem.
- „ Ergo postque, magisque uiri nunc gloria claret.

Tarentū uero qua uigilantia, quo consilio recepit? cum quidem, me audiente, Salinatori qui amisso oppido fugerat in arcem, glorianti atque ita dicenti: Mea opera Q. Fabi Tarētum recepisti. Certe, inquit ridēs, nisi tu amisisses, nunquā recepissem. Nec uero in armis præstantior quā in toga, qui Consul iterum, Sp. Carulio collega quiescente, C. Flaminio Tribuno pl. quoad potuit, restitit, agrum Picenum et Gallicum uiritim contra Senatus auctoritatem diuidenti: Augurque cum esset, dicere ausus est, optimis auspicijs ea geri quæ pro Reipub. salute gererentur: quæ contra Remp. fierent, contra auspicia fieri. multa in eo uiro præclara cognoui: sed nihil est admirabilius, quā quo modo ille mortem Marci filij tulit, clari uiri, et consularis. Est in manibus uiri laudatio: quā cum legimus,

quem philosophum non contemnimus? Nec uero ille in luce modo, atq; in oculis ciuium magnus: sed intus, domique præstantior. qui sermo? quæ præcepta? quantæ notitiæ antiquitatis? quæ scientia iuris augurij? multæ etiam, ut in homine Romano, literæ: omnia memoria tenebat non domestica solum, sed etiam externa bella. cuius sermone ita tū cupide fruebar, quasi iam diuinam rem id quod euenit, illo extincto fore, unde discerem neminem. Quorsum igitur hæc tam multa de Maximo? quia profecto uidetis nefas esse dictu, miseram fuisse talē senectutem. Nec tamen omnes possunt esse Scipiones, aut Maximi, ut urbium expugnationes, ut pedestres, navalēsque pugnas, ut bella à se gesta, ut triūphos recordentur. est enim quies, et pure, et eleganter ætatis placida, ac levis senectus: qualem accepi-mus Platonis, qui uno et octogesimo anno scribens mortuus est: qualem Isocratis, qui eum librū qui Pannathenaicus inscribitur, quarto et nonagesimo anno scripsisse dicitur, uixitque quinquennium postea: cuius magister Leontinus Gorgias centum et septem complēuit annos: neque unquam in suo studio, atque opere cessauit. qui cum ex eo quæreretur, cur tandiu uellet esse in uita, Nilil habeo, inquit, quod accusem senectutem. præclarum responsum, et docto homine dignum. sua enim uitia insipientes, et suam culpam in senectutem conferunt: quod non faciebat is, cuius modo mentionem feci, Ennius,

“ Sicut fortis equus, spatio qui sæpe supremo

“ Vicit Olympia, nunc senio confectus quiescit.

equi fortis et uictoris senectuti comparat suam. quæ quidem probe meminisse potestis. anno enim undeci-

gesimo post eius mortem hi Consules, L. Flaminius, & M. Attilius, facti sunt. ille autem Cæpione, & Philippo iterum Consulibus mortuus est, cum ego quidem quinque & sexaginta annos natus legem Voconiam uoce magna, & bonis lateribus suasissem. annos septuaginta natus (tot enim uixit Ennius) ita ferebat duo, quæ maxima putantur, onera, paupertatem & senectutem, ut eis penè delectari uideretur. Etenim cum completor animo, quatuor causas reperio, cur senectus misera uideatur: unam quòd auocet à rebus gerendis: aliam quòd corpus faciat infirmum: tertiam quòd priuet omnibus ferè uoluptatibus: quartam quòd haud procul absit à morte. earum, si placet, causarum quantum quæque ualeat, quantumque iusta sit, uideamus. A rebus gerendis senectus abstrahit: quibus? an ijs, quæ iuuentute geruntur, & uiribus? nullæne igitur res seniles sunt, quæ uel infirmis corporibus, animo tamen administrentur? Nihil igitur agebat Q. Maximus? nihil L. Paulus pater tuus Scipio, socer optimi uiri filij mei? cæteri senes, Fabritij, Curij, Coruncani, cum Remp. consilio & auctoritate defendebant, nihil agebant? ad App. Claudij senectutem accedebat etiã ut cæcus esset: tamen cum sententia Senatus inclinaret ad pacem, & fœdus faciendum cum Pyrrho, non dubitauit dicere illa quæ uersibus persecutus est Ennius:

„ Quò uobis mentes, recte quæ stare solebant

„ Antehac, dementi sese flexere ruina?

cæteraque grauissime. notum uobis enim carmen: & tamen ipsius Appij extat oratio. Atque hæc ille egit septem & decem annis post alterũ Consulatum, cum inter duos Consulatus anni decem interfuissent; Cen-



ſorque ante Conſulatum ſuperiorem fuiſſet: ex quo intelligitur, Pyrrhi bello grandem ſanè fuiſſe: Et tamen ſic à patribus accepimus. Nihil igitur afferunt, qui in re gerenda uerſari ſenectutem negant: ſimilèſque ſunt, ut ſiqui gubernatorem in nauigando agere nihil dicant, cum alij malos ſcandāt, alij per foros curſent, alij ſentinam exhauriant: ille autem clauum tenens, ſedeat in puppi quietus, nō facit ea quæ iuuenes. at uero multo maiora, Et meliora facit. non enim uiribus, aut uelocitatibus, aut celeritate corporum res magnæ gerūtur: ſed conſilio, Et auctoritate, Et ſententia. quibus non modo non orbari, ſed etiam augeri ſenectus ſolet. Niſi forte ego uobis, qui Et miles, Et Tribunus, Et Legatus, Et Conſul uerſatus ſum in uario genere bellorum, ceſſare nunc uideor, cum bella non gero. at Senatui quæ ſunt gerenda, præſcribo: Et quo modo Carthagini male iam diu cogitanti bellum inferatur, multo ante denuncio. de qua nō ante uereri deſinam, quàm illam exciſam eſſe cognouero. quam palmam utinam dii immortales tibi Scipio reſeruent: ut aui reliquias perſequare: cuius à morte hic tertius Et trigeſimus eſt annus: ſed memoriam illius uiri excipient omnes anni conſequētes. Anno ante me Cenſorē mortuus eſt, nouem annis poſt meū Conſulatum: cum Conſul iterum, me Conſule creatus eſſet. num igitur, ſi ad centeſimum annum uixiſſet, ſenectutis eum ſuæ poeniteret? nec enim excuſſione, aut ſaltu, nec eminus haſtis, aut comminus gladijs uteretur: ſed conſilio, ratione, ſententia. quæ niſi eſſent in ſenibus, non ſummum conſilium maiores noſtri appellaeſſent Senatum. apud Lædæmonios quidē ij qui ampliſſimū magiſtratum

gerunt, ut sunt, sic etiam appellantur senes. Quòd si legere & audire uoletis externa, maximas Resp. per adolescentulos labefactatas, à senibus sustentatas reperiatis.

» Cedo, qui uestram Rempublicam tantam amisistis tam cito? sic enim percunctanti, ut est in Næuij ludo, respondentur & alia, & hæc in primis:

» Proueniebant oratores noui, stulti adolescentuli.

temeritas est uidelicet florentis ætatis, prudentia senectutis. At memoria minuitur: credo, nisi exerceas eã, aut etiam si sis natura tardior. Themistocles omnium ciuium nomina perceperat. num igitur censeret eum, cum ætate processisset, qui Aristides esset, Lysimachum salutare solitum? Equidẽ non modo eos noui qui sunt, sed eorum patres etiam, & auos: nec sepulchra legens, uereor (quod aiunt) ne perdam memoriam. his enim ipsis legendis redeo in memoriam mortuorum. nec uero quenuquam senum audiui oblitum, quo loco thesaurũ obruisset. omnia quæ curant, meminerũt, uadimonia constituta: qui sibi, quibus ipsi debeant. Quid iurisperiti, quid Pontifices, quid Augures, quid philosophi senes? quàm multa meminerunt? manent ingenia senibus, modo permaneat studium & industria: nec ea solum in claris & honoratis uiris, sed in uita etiam priuata & quieta. Sophocles ad summam senectutem tragicædiæ fecit. qui propter studium cum rem familiarem negligere uideretur, à filijs in iudicium uocatus est, ut quemadmodum nostro more male rem gerentibus patribus, bonis interdici solet, sic illum, quasi desipientem, à re familiari remouerent iudices. tum senex dicitur eam fabulam, quam in manibus habebat, & proxime scripserat, OEdipum Coloneũ recitasse iudici-

bus, quæ sisse quæ, num illud carmen desipientis uideretur. quo recitato, sententijs iudicium est liberatus. Nū igitur hunc, num Hesiodum, num Simonidem, num Stesichorum, num quos ante dixi, Isocratem, Gorgiam, num Homerum, num philosophorum principes Pythagorā, Democritum, num Platonem, num Xenocratem, num postea Zenonem, Cleanthem, aut eum quem uos etiā Romæ uidistis, Diogenem Stoicum coegit in suis studijs obmutescere senectus? an non in omnibus his studiorum agitatio uitæ æqualis fuit? Age, ut ista diuina studia omittamus, possum nominare ex agro Sabino rusticos uicinos, & familiares meos, quibus absentibus nunquā ferè ulla in agro maiora opera sunt, non ferendis, non percipiendis fructibus, non condendis. quāquam in ijs hoc minus mirum. nemo enim est tam senex qui se annum non putet posse uiuere. sed iudē laborant in eis, quæ sciunt nihil ad se omnino pertinere:

- ” Serunt arbores, quæ alteri seculo profunt,  
ut ait Statius noster in Synephebis. Nec uero dubitat agricola quauis senex, quærenti, cui serat, respondere, Dijs immortalibus, qui me non accipere tantummodo hæc à maioribus uoluerunt, sed etiam posteris prode-  
re. melius Cæcilius de sene alteri seculo prospiciente, quā illud idem:
- ” AEdopol senectus, si nihil quicquam aliud uitij .  
” Apportet secum, cum aduenerit: unum id satis est,  
” Quòd diu uiuendo, multa quæ non uult, uidet:  
et multa fortasse quæ uult: atque in ea quidem, quæ non uult, etiam adolescentia incurrit. illud uero idem Cæcilius uitiosius:  
” Tum etiam in senecta hoc reputo miserrimum,

• Sentire ea ætate esse odiosum se alteri.

Iucundum potius quàm odiosum. ut enim adolescentibus bona indole præditis sapiētes senes delectantur, leuiorq̃ue sit eorum senectus, qui à iuuentute colūtur, et diliguntur: sic adolescentes senum præceptis gaudent, quibus ad uirtutum studia ducuntur. nec minus intelligo me uobis, quàm uos mihi esse iucundos. sed uidetis, ut senectus non modo languida atque iners non sit, uerum etiam sit operosa, et semper agens aliquid, et moliens, tale scilicet, quale cuiusq̃ studium in superiore uita fuit. Quid, quòd etiam addiscunt aliquid: ut Solonē in uersibus gloriantē uidemus, qui se quotidie aliquid addiscentem, senem fieri dicit: ut ego feci, qui Græcas literas senex didici. quas quidē sic auide arripui, quasi diuturnam sitim explere cupiens: ut ea ipsa mihi nota essent, quibus me nūc exemplis uti uidetis. quod cum fecisse Socratem in fidibus audirem: uellem equidem et illud: (discerēt enim fidibus antiqui) sed in literis certe elaboraui. Nec nunc quidem uires desidero adolescentis, (is enim locus erat alter de uitij senectutis) non plus quàm adolescens etiam uires tauri, aut elephantis desiderabam. quod enim homini naturaliter insitum est, eo uti decet: et quicquid agas, agere pro uiribus. quæ enim uox potest esse contemptior, quàm Milonis Crotoniatæ? qui cum iam senex esset, athletasque se in curriculo exercentes uideret: aspexisse lacertos suos dicitur, illachrymansque dixisse:

At hi quidem iam mortui sunt.

Non uero tam isti, quàm tu ipse, nugari neque enim ex te unquam es. nobilatus, sed ex lateribus et lacertis tuis. Nihil sex. Aelius tale, nihil multis annis ante

T. Coruncanus, nihil modo P. Crassus: à quibus iuracibus præscribebantur: quorum usque ad extremum spiritum prouecta est prudentia. Orator, metuo, ne languescat senectute. est enim munus eius non ingenij solum, sed laterum etiam & uirium. Omnino canorum illud in uoce, splendet etiam nescio quo pacto in senectute. quod equidem non amisi adhuc: & tamē uidetis annos meos. sed tamen decorus est sermo senis quietus & remissus: facitque persæpe ipsa sibi audientiam disertis senis compta oratio & mitis. quòd si exequi nequeas, possis tamen Scipioni præcipere, & Lælio. quid enim est iucundius senectute stupata studijs iuuentutis? An ne eas quidem uires senectuti relinquemus, ut adolescentulos doceat, instituat, ad omne officij munus instruat? quo quidem opere quid potest esse præclarius? Mihi uero Cn. & P. Scipiones, & aui tui duo L. AEmilius, & P. Africanus comitatu nobilium iuuenum fortunati uidebantur. nec ulli bonarum artium magistri non beati putandi, quantum consenserint uires, atque defecerint: etsi ista ipsa defectio uirium adolescentiæ uitij efficitur sæpius, quam senectutis. libidinosa etenim & intemperans adolescentia effœtum corpus tradit senectuti. Cyrus quidem apud Xenophontem, eo sermone, quem moriens habuit, cum admodum senex esset, negat se unquam sensisse senectutem suam imbecilliorē factam, quam adolescentia fuisset. ego L. Metellum memini puer, qui cum quadriennio post alterum Consulatum Pontifex maximus factus esset, uiginti & duos annos ei sacerdotio præfuit, ita bonis uiribus esse in extremo tempore ætatis, ut adolescentiā nō requireret. Nihil necesse est de me

ipso dicere mihi. quanquam est id quidem senile, æt-  
 atiq; nostræ conceditur. uidetis enim, ut apud Homerū  
 sæpissime Nestor de uirtutibus suis prædicet. tertiam  
 enim iam ætatē hominum uiuebat: nec erat ei ueren-  
 dum, ne uera de se prædicans, nimis uideretur aut in-  
 solens, aut loquax. etenim (ut ait Homerus) ex eius lin-  
 gua melle dulcior fluebat oratio: quam ad suauitatem  
 nullis egebat corporis uiribus. Et tamen ille dux Græ-  
 ciæ nunquam optat, ut Aiæcis similes decem habeat, at  
 ut Nestoris: quod si acciderit, non dubitat quin breui  
 Troia sit peritura. Sed redeo ad me. quartum annum  
 ago Et octogesimum. equidem posse uellem idem glo-  
 riari, quod Cyrus: sed tamen hoc queo dicere, non me  
 quidem ijs esse uiribus, quibus aut miles Punico bello,  
 aut Quæstor in eodē bello, aut Cōsul in Hispania fue-  
 rim, aut quadriēnio post cum Tribunus militaris de-  
 pugnaui apud Thermopylas M. Attilio Glabrione Cō-  
 sule: sed tamen (ut uos uidetis) non planè me enerua-  
 uit, non afflixit senectus: non curia uires meas deside-  
 rat, non Rostra, non amici, non clientes, non hospites.  
 nec enim unquam sum assensus illi ueteri, laudatōq;  
 prouerbio: quod monet mature fieri senem, si diu uelis  
 esse senex. ego uero me minus diu senem esse malletm,  
 quàm esse senem ante, quàm essem. itaq; nemo adhuc  
 conuenire me uoluit, quin fuerim occupatus. at minus  
 habeo uirium, quàm uestrum uteruis. nec uos quidem  
 T. Pontij Centurionis uires habetis: num ictirco ille est  
 præstantior uobis? moderatio modo uirium adsit, Et  
 tantum, quantum quisque potest, nitatur: nã ille non  
 magno desiderio tenebitur uiriū. Olympicæ per stadiū  
 ingressus esse Milo dicitur, cum humeris sustineret bo-

uem. Verū igitur has corporis, an Pythagoræ tibi malis vires ingenij dari? deniq; isto bono utare, dum adsit: cum absit, ne requiras: nisi forte adolescentes pueritiam, paululum ætate progressi adolescentiam debeant requirere. cursus est certus ætatis, & uia una naturæ, edque simplex: suæque cuique parti ætatis tempestiuitas est data. ut enim infirmitas est puerorū, & ferocitas iuuenum, & grauitas iam constantis ætatis: sic senectutis maturitas naturale quiddam habet, quod suo tēpore percipi debeat. Arbitror te audire Scipio, hospes tuus Masinissa quæ faciat hodie, nonaginta annos natus: cum ingressus iter pedibus sit, in equum omnino non ascendere: cum equo, ex equo non descendere: nullo imbree, nullo frigore adduci, ut capite operato sit: summam in eo esse corporis siccitatem: itaq; exequi omnia regis officia & munera. Potest igitur exercitatio, & temperantia etiam in senectute conseruare aliquid pristini roboris. non sunt in senectute vires: nec postulantur quidem vires à senectute. ergo & legibus & institutis uacat ætas nostra, muneribus ijs quæ non possunt sine uiribus sustineri. itaque non modo, quod non possumus, sed ne quantum possumus quidē cogimur. At ita multi sunt imbecilles senes, ut nullum officij, aut omnino uitæ munus exequi possint: at id quidem non proprium senectutis est uitium, sed commune ualeitudinis. Quàm fuit imbecillis P. Africani filius, is qui te adoptauit! quàm tenui, aut nulla potius ualetudine! quod nisi ita fuisset, alterū ille extitisset lumē ciuitatis: ad paternam enim magnitudinem animi, doctrina uberior accesserat. Quid mirū igitur in senibus, si infirmi sunt aliquando, cum ne id quidē adolescen-



tes effugere possint? resistendum Læli & Scipio senectuti est: & eius uitia diligentia corrigenda sunt. pugnandū tanquam contra morbum, sic contra senectutem habenda ratio ualitudinis: utendū exercitationibus modicis: tantum cibi & potionis adhibendum, ut reficiantur uires, non opprimantur. Nec uero corpori solum subueniendū est, sed etiam menti atq; animo multo magis. nanq; hæc quoque, nisi tanquam lumini oleū instilles, extinguūtur senectute. & corpora quidem defatigatione & exercitatione ingrauescūt, animi autem se exercendo leuantur. nam, quos ait Cæcilius comicus stultos senes, hos significat credulos, obliuiosos, dissolutos. quæ uitia sunt non senectutis, sed inertis, ignauæ, somniculosæ senectutis. ut petulantia, ut libido magis est adolescentum quàm senum, nec tamen omnium adolescentum, sed non proborum: sic ista senilis stultitia, quæ deliratio appellari solet, senum leuium est, non omnium. Quatuor robustos filios, & filias quinque, tantam domum, tantas clientelas Appius regebat & senex, & cæcus. intetum enim animum tanquam arcum habebat: nec languescens succumbebat senectuti. tenebat non modo auctoritatem, sed etiam imperium in suos: metuebant eum serui, uerebantur liberi, charum omnes habebant: uigebat in ea domo patrius mos & disciplina. ita enim senectus honesta est, si se ipsa defendit, si ius suum retinet, si nemini mancipata est, si usque ad extremum spiritum dominatur in suos. ut enim adolescentem in quo senile aliquid, sic senem in quo adolescentis est aliquid, laudamus. quod qui sequitur, corpore senex esse poterit, animo nunquam erit. Septimius mihi Originum liber est in manibus: o-

omnia antiquitatis monimenta colligo: causarum illustrium, quasunque defendi, nunc quammaxime conficio orationes: ius augurium, pontificium, ciuile tracto. multum etiā literis Græcis utor: Pythagoreorumq; more exercendæ memoriæ gratia, quodcunque dixerim, audiuerim, egerim, commemoro uesperis. Hæ sunt exercitationes ingenij, hæc curricula mentis: in his desudans atq; elaborās, corporis uires non magnopere desidero: adsum amicis: uenio in senatum frequens, ultró que affero res multū, & diu cogitatas, easque tueor animi, non corporis uiribus. quæ si exequi nequirē, tamen me lectulus oblectaret meus ea ipsa cogitantem, quæ iam agere non possem. sed ut possim, facit acta uita. semper enim in his studijs, laboribꝫque uiuenti non intelligitur, quando obrepat senectus. ita sensim, sine sensu ætas senescit: nec subito frangitur, sed diuturnitate extinguitur. Sequitur tertia uituperatio senectutis, quod eam carere dicunt uoluptatibus. O præclarum munus ætatis: siquidem id aufert nobis, quod est in adolescentia uitiosissimum. accipite enim optimi adolescentes ueterē orationem Archytæ Tarentini, magni in primis, & præclari uiri: quæ mihi tradita est, cum essem adolescens Tarenti cum Q. Maximo. Nul- lam capitaliorē pestem quàm corporis uoluptatem, hominibus dicebat à natura datam: cuius uoluptatis auuidæ libidines, temere & effrenate ad potiūdum incitantur. hinc patriæ proditiones, hinc Rerump. euer- siones, hinc cum hostibus clandestina colloquia nasci dicebat: nullum denique scelus, nullum magnum facinus esse, ad quod suscipiendum non libido uoluptatis impelleret. stupra uero, & adulteria, & omne

tale flagitium nullis alijs illecebris excitari, nisi uoluptate: cumq; homini siue natura, siue quis deus nihil mente præstabilius dedisset, huic diuino muneri, ac dono nihil tam esse inimicum quàm uoluptatem. nec enim libidine dominante temperantiæ locum esse, nec omnino in uoluptatis regno uirtutem posse consistere. quod quo magis intelligi posset, fingere animo aliquem iubebat tanta incitatum uoluptate corporis, quanta percipi posset maxima. nemini censebat fore dubium, quin tam diu, dum ita gauderet, nihil agitare mente, nihil ratione, nihil cogitatione consequi posset: quocirca nihil tam detestabile, tamque pestiferum quàm uoluptatem: siquidem ea, cum maior esset atque longior, omne animi lumen extingueret. Hæc cum C. Pontio Samnite, patre eius, à quo in Caudino prælio Sp. Posthumius, & T. Veturius Consules superati sunt, locutum Archytam, Nearchus Tarentinus hospes noster, qui in amicitia populi Ro. permanserat, se à maioribus natu accepisse dicebat: cum quidem ei sermoni interfuisset Plato Atheniensis, quem Tarentum uenisse L. AEmilio, App. Claudio Coss. reperio. Quorsum hæc? ut intelligatis, si uoluptatem aspernari ratione & sapiëntia non possumus, magnam habendam senectuti gratiam, quæ effecerit, ut non liberet, quod non oporteret. impedit enim cõsiliu uoluptas, rationi inimica: ac mentis (ut ita dicam) perstringit oculos: nec habet ullum cum uirtute commercium. Inuitus quidem feci, ut fortissimi uiri T. Flaminij fratrem L. Flaminium è Senatu eijcerem septem annis post quàm Consul fuisset: sed notandam libidinem putauim nimiam. ille enim cum esset Consul in Gallia, exoratus est in conuiuio à scorto, ut

securi feriret aliquem eorum, qui in uinculis essent damnati rei capitalis. tunc, fratre suo Censore, qui proximus ante me fuerat, elapsus est. mihi uero & Flacco neutiquam probari potuit tam flagitiosa, & tam perditā libido, quæ cum probro priuato coniungeret imperij dedecus. sæpe à maioribus natu audiui, qui se porro pueros à senibus audiuisse dicebant, mirari solitum C. Fabritium, quòd cum apud Regem Pyrrhum Legatus esset, audisset à Thessalo Cineas, Athenis quædam esse, qui se sapientem profiteretur: eumque dicere, omnia quæ faceremus, ad uoluptatem esse referenda. quod ex eo audientes Manium Curium, & T. Coruncanum, optare solitos, ut id Samnitibus, ipsique Pyrrho persuaderetur: quo facilius uinci possent, cum se uoluptatibus dedissent. uixerat Manius Curius cum P. Decio, qui quinquennio ante eum Consulem se pro Republica quarto Consulatu deuouerat: norat eundem Fabritius, norat Coruncanus: qui tum ex sua uita, tum ex eius, quem dico, P. Decij factò iudicabant esse profecto aliquid natura pulchrum, atque præclarum, quod sua sponte peteretur, quòdque spreto, & contempta uoluptate optimus quisque sequeretur. Quorsum igitur hæc tam multa de uoluptate? quia non modo uituperatio nulla, sed etiam summa laus senectutis est, quòd ea uoluptates nullas magnopere desiderat. caret epulis, exstructisque mensis, & frequentibus poculis: caret ergo uinolentia, cruditate, & insomnijs. sed si aliquid dandum est uoluptati, quoniam eius blanditijs non facile obistimus (diuinus enim Plato escam malorum uoluptatem appellat, quòd ea uidelicet homines capiuntur, ut hamo pisces) quanquam immoderatis epu-

lis careat senectus, modicis conuiujs tamen potest delectari. C. Duillum M. filium, qui Pœnos primus classe deuicerat, redeuntem à cœna senem sæpe uidebam puer. delectabatur cæreo funali & tibicine: quæ sibi nullo exemplo priuatus sumpserat: tantum licentiæ dabat gloria. Sed quid ego alios? ad me ipsum iam reuertar. primum habui semper sodales. sodalitates autem me Quæstore constitutæ sunt, sacris Idæis Magnæ matris acceptis. epulabar igitur cum sodalibus, omnino modice, sed erat quidam feruor ætatis: quæ progrediente, omnia fiunt etiam in dies mitiora. nequæ enim ipsorum conuiuiorum delectationes corporis uoluptatibus magis quàm cœtu amicorum, & sermonibus metiebar. bene enim maiores accubationem epularem amicorum, quia uitæ coniunctionem haberet, conuiuium nominarunt: melius quàm Græci, qui hoc idem tum compotationem, tum concœnationem uocant: ut quod in eo genere minimum est, id maxime probare uideantur. Ego uero propter sermonis delectationem tempestiuus conuiujs delector, nec cum æqualibus solum, qui pauci admodum restant, sed cum uestra etiam ætate, atque uobiscum: habeoque senectuti magnam gratiam, quæ mihi sermonis auiditatem auxit, potionis & cibi sustulit. Quod si quem etiam ista delectant, ne omnino bellum indixisse uidear uoluptati, cuius est etiam fortasse quidam naturalis modus: non intelligo ne in istis quidem uoluptatibus ipsis carere sensu senectutem. Me uero & magisteria delectant à maioribus instituta: & is sermo, qui more maiorum à summo adhibetur magistro in poculo: & pocula, sicut in symposio Xenophontis, mi-

nuta atque rorantia, & refrigeratio æstate, & uicissim in hieme aut sol, aut ignis hybernus: quæ quidem in sabinis etiam persequi soleo: conuiuiumque uicinorum quotidie cõpleo: quod ad multā noctem, quammaxime possumus, uario sermone producimus. At non est uoluptatum tanta quasi titillatio in senibus. credo: sed nec desideratio quidem. nihil autem molestum, quod non desideres. Bene Sophocles, cum ex eo quidam iam confecto ætate quæreret, uteretur ne rebus Venereis, Dii meliora, inquit: libenter uero istinc tanquam à domino agresti ac furioso profugi. cupidis enim rerum talium odiosum, & molestum est fortasse carere: satiatis uero, & expletis iucundius est carere, quàm frui. (quanquam non caret is, qui non desiderat) ergo hoc non desiderare dico esse iucundius, quàm frui. quòd si istis ipsis uoluptatibus bona ætas fruitur libentius: primum paruulis fruitur rebus, ut diximus: deinde ijs quibus senectus, si etiam non abunde potitur, non omnino caret. ut Turpione Ambiuio magis delectatur, qui in prima cauea spectat: delectatur tamen etiam, qui in ultima. sic in adolescentia uoluptates propè intuens magis fortasse lætatur: sed delectatur etiam senectus procul eas spectans, tantum quantum sat est. At illa quanti sunt, animum tanquam emeritis stipendijs libidinis, ambitionis, contentionis, inimicitiarum, cupiditatum omnium, secum esse, secumque (ut dicitur) uiuere? si uero habet aliquod tanquam pabulum studij atque doctrinæ, nihil est otiosa senectute iucundius. Mori uidebamus in studio dimetiendi penè cæli, atque terræ Gallum familiarem patris tui Scipio. quoties illum lux, noctu ali-

quid describere ingressum, quoties nox oppressit, cum  
cœpisset mane? quàm delectabatur, cum defectiones  
solis & lunæ multo nobis ante prædiceret? Quid in  
leuioribus studijs, sed tamen acutis? quàm gaudebat  
bello suo Punico Næuius? quàm Truculento Plautus?  
quàm Pseudulo? Vidi etiam senem Liuium: qui cum  
septem annis ante quàm ego natus sum, fabulam do-  
cuisset, Centone, Tuditanoque Consulibus, usque ad a-  
dolescentiam meam processit ætate. quid de P. Licini  
Crassi & pontificij, & ciuilibus iuris studio loquar? aut  
de huius P. Scipionis, qui his paucis diebus Pontifex  
maximus factus est? Atqui eos omnes quos commemo-  
raui, his studijs flagrant senes uidimus. Marcum ue-  
ro Cethegum, quem recte suadæ medullam dixit En-  
nius, quanto studio exerceri in dicendo uidebamus e-  
tiam senem? quæ sunt igitur epularum, aut ludorum,  
aut scortorum uoluptates cum his uoluptatibus compa-  
randæ? Atque hæc quidem studia sunt doctrinæ: quæ  
quidem prudētibus, & bene institutis pariter cum æ-  
tate crescunt. ut honestum illud Solonis est, quod ait  
uerficulo quodam, (ut ante dixi) Senescere se multa in  
dies addiscentem: quæ uoluptate animi nulla certe po-  
test esse maior. Venio nunc ad uoluptates agricola-  
rum: quibus ego incredibiliter delector: quæ nec ul-  
la impediuntur senectute, & mihi ad sapientis ui-  
tam proxime uidentur accedere. habent enim ratio-  
nem cum terra: quæ nunquam recusat imperium, nec  
unquam sine usura reddit, quod accepit: sed aliàs mi-  
nore, plerunque maiore cum fœnore. quanquam me  
quidem non fructus modo, sed etiam ipsius terræ uis  
ac natura delectat. quæ cum gremio mollito ac sub-



acto semen sparsum exæpit, primum id occatum co-  
 hibet: ex quo occatio, quæ hoc efficit nominata est. de-  
 inde tepesfactum uapore & cõplexu suo diffundit &  
 elicit herbescentem ex eo uiriditatem: quæ nixa fibris  
 stirpium sensim adolescit, culmóque erecta geniculato,  
 uaginis iam quasi pubescens includitur: è quibus cum  
 emerferit fundit frugem spicæ ordine structam, & con-  
 tra auium minorũ morsum munitur uallo aristarum.  
 quid ego uitium satus, ortus, incrementa commemorẽ?  
 satiari delectatione non possum: ut meæ senectutis re-  
 quiem oblectamentumque noscatis. Omitto enim uim  
 ipsam omnium quæ generantur è terra: quæ ex fici  
 tantulo grano, aut ex acino uinaceo, aut ex cæterarũ  
 frugum aut stirpiũ minutissimis seminibus tantos trun-  
 cos ramóque procreet: malleoli, plantæ, sarmenta, ui-  
 uiradices, propagines nõnne ea efficiũt, ut quemuis ad-  
 miratione delectent? uitis quidem, quæ natura caduca  
 est, & nisi fulta sit, ad terram fertur, eadem ut se eri-  
 gat, clauiculis suis quasi manibus, quicquid est na-  
 cta, complectitur: quam serpentem multiplici lapsu &  
 erratico, ferro amputans cœræt ars agricolarum, ne  
 siluescat sarmentis, & in omnes partes nimia funda-  
 tur. Itaque ineunte uere in ijs quæ relictæ sunt, existe  
 tanquam ad articulos sarmentorũ ea quæ gemma di-  
 citur: à qua oriens uua sese ostendit: quæ & succo ter-  
 ræ & calore solis augecẽs, primo est peracerba gustui,  
 deinde maturata dulcescit, uestitæque pãpinis, nec mo-  
 dico tepore caret, & nimios solis defendit ardores:  
 qua quid potest esse tum fructu lætius, tum aspectu  
 pulchrius? cuius quidem non utilitas me solũ, (ut ante  
 dixi) sed etiam cultura, & ipsa natura delectat: admi-

niculorū ordines, caputū coniugatio, & religatio, & propagatio uitium, sarmentorum ea, quam dixi, aliorum amputatio, & aliorum immissio. quid ego irrigationes, quid agri fossiones repastinationesq; proferam, quibus fit multo terra fecundior? quid de utilitate loquar stercorandi? dixi in eo libro, quem de rebus rusticis scripsi: de qua doctus Hesiodus ne uerbum quidem fecit, cum de cultura agri scriberet. at Homerus, qui multis (ut mihi uidetur) ante seculis fuit, Laertem lenientem desiderium, quod capiebat ē filio, colentem agrum, & eum stercorantem facit. Nec uero segetibus solam, & pratis, & uineis, & arbustis res rusticae laetae sunt, sed pomarijs etiam & hortis, tum pecudum pastu, & apum examinibus, tum florū omnium uarietate. nec consitiones modo delectant, sed etiam insitiones: quibus nihil inuenit agricola solertius. Possum persequi multa oblectamenta rerum rusticarum: sed ea ipsa quae dixi, sentio fuisse longiora. ignoscetis autem: nam & studio rerum rusticarū prouectus sum: & senectus est natura loquacior: ne ab omnibus eā uitij uidear uendicare. Ergo in hac iuta M. Curius, cum de Samnitibus, de Sabinis, de Pyrrho triumphasset, consumpsit extremū tēpus aetatis. cuius quidem uillā ego contemplan (abest enim non longe à me) admirari satis non possum uel ipsius hominis continētiam, uel temporum disciplinam. Curio ad focum sedenti magnum auri pondus Samnites cum attulissent, repudiati ab eo sunt. non enim aurum habere praclarum sibi uideri dixit, sed eis qui haberent aurum, imperare. poterātne tantus animus non iucundam efficere senectutem? Sed uenio ad agricolas, ne à me ipso recedā. in agris erāt

tunc Senatores, id est senes: siquidem L. Quintio Cincinnato in agro aranti nūciatum est, eum Dictatorem esse factum. cuius Dictatoris iussu Magister Equitum C. Seruilius Hala Sp. Melium regnum appetētem, et occupantem interemit. à uilla in Senatum accersébantur et Curius, et cæteri senes: ex quo qui eos accersébant, Viatores nominati sunt. num igitur eorum senectus miserabilis fuit, qui se agri cultione oblectabant? Mea quidem sententia, haud scio, hac an ulla uita beatior esse possit: neque solum officio, quòd hominum generi uniuerso cultura agrorum est salutaris: sed et delectatione quam dixi, et saturitate, copiamque omnium rerum quæ ad uictum hominum et cultum etiam deorum pertinent: ut quoniam hæc quidam desiderant, in gratiam iam cum uoluptate redeamus. semper enim boni assiduique domini referta cella uinaria, olearia, et penuaria est: uillaque tota locuples est: abundat porco, hœdo, agno, gallina, lacte, caseo, melle. iam hortum ipsi agricolæ succidiam alteram appellant. tum conditiora facit hæc supernuacaneis operis aucupium, atque uenatio. Quid de pratorum uiriditate, aut arborum ordinibus, aut uinearum, oliuetorumue specie dicam? breui expediam. Agro bene culto nil potest esse nec usu uberius, nec specie ornatiùs: ad quem fruentum non modo non retardat, uerum etiam inuitat atque allectat senectus. ubi enim potest illa ætas aut calefcere, uel apricatione melius, uel igni: aut uicissim umbris, aquisue refrigerari salubrius? habeant igitur alij sibi arma, sibi equos, sibi hastas, sibi clauam et pilam, sibi natationes, et cursus: nobis senibus ex lusionibus multis talos relinquant et tesseras. id i-

psum tamen ut lubebit, quoniã sine his beata esse senectus potest. Multas ad res perutiles Xenophontis libri sunt: quos legite, quæso, studiose, ut facitis. quàm copiose ab eo agricultura laudatur in eo libro, qui est de tuenda re familiari, qui *Oeconomicus* inscribitur! atque, ut intelligatis nihil ei tam regale uideri, quàm studium agri colendi: Socrates in eo libro loquitur cum Critobulo, Cyrum minorem regem Persarum præstantem ingenio atque imperij gloria, cum Lysander Lacedæmonius uir summæ uirtutis uenisset ad eum Sardis, ei que dona à socijs attulisset: & cæteris in rebus commem erga Lysandrum, atque humanum fuisse, & ei quædam conscriptum agrum, diligenter consitum ostendisse. cum autem admiraretur Lysander & proceritates arborum, & directos in quincuncem ordines, & humum subactam atque puram, & suauitatem odorum qui efflarentur è floribus: tum eum dixisse, mirari se non modo diligentiam, sed etiam solertiam eius, à quo essent illa dimensa atque descripta: & ei Cyrum respondisse, Atqui ego ista sum dimensus: mei sunt ordines, mea descriptio: multæ etiam istarum arborum mea manu sunt sata. tum Lysandrum intuentem eius purpuram & nitorem corporis, ornatumque Persicum multo auro, multisque gemmis, dixisse: Recte uero te Cyre beatum ferunt, quoniam uirtuti tuæ fortuna coniuncta est. Hac igitur fortuna frui licet senibus: nec ætas impedit, quo minus & cæterarum rerum, & in primis agri colendi studia teneamus usque ad ultimum tempus senectutis. Marcum quidem Valerium Coruinum accepimus ad centesimum annum uitam perduxisse, cum esset exacta iam ætate in agris, eosque coleret: cuius inter primum & sex-

tum Consulatum sex et quadraginta anni interfuerunt. Itaque quatum spatium ætatis maiores nostri ad senectutis initium esse uoluerunt, tantus illi cursus honorum fuit. atque eius extrema ætas hoc beator, quam media, quod auctoritatis plus habebat, laboris uero minus. Apex autem senectutis est auctoritas. Quanta fuit in L. Cæcilio Metello, quanta in Attilio Calatino? in quæ illud elogium, Vnicum plurimæ consentiunt gentes populi primarium fuisse uirum: notum est totum eius carmen incisum in sepulchro. iure igitur grauis, cuius de laudibus omnium esset fama consentiens. quem uirum nuper P. Crassum Pontificem Maximum, quem postea M. Lepidum eodem sacerdotio præditum uidimus? quid de Paulo, aut Africano loquar? aut iam ante de Maximo? quorum non in sententia solum, sed etiam in nutu residebat auctoritas? Habet senectus, honorata præsertim, tantam auctoritatem, ut ea pluris sit, quam omnes adolescentiæ uoluptates. sed in omni oratione meminitote eam me laudare senectutem, quæ fundamentis adolescentiæ constituta sit. ex quo id efficitur, quod ego quondam magno cum assensu omnium dixi, Miseram esse senectutem, quæ se oratione defenderet. non canis, non rugæ repente auctoritatem asferre possunt: sed honeste acta superior ætas fructus auctoritatis capit extremos. hæc enim ipsa sunt honorabilia, quæ uidentur leuia atque communia, salutari, appeti, decedi, assurgere, deduci, reduci, consuli: quæ et apud nos, et in alijs ciuitatibus, ut quæque optime morata, ita diligentissime obseruantur. Lysandrum Lacedæmonium, cuius modo mentionem feci, dicere aiunt solitum, Lacedæmone esse honestissimum domiciliū senectutis. nusquam enim

tantum tribuitur ætati, nusquam est senectus honora-  
 tior. quinetiam memoriæ proditum est: cum Athenis  
 ludis quidam in theatrum grandis natu uenisset, in ma-  
 gno consessu locum ei à suis ciuibus nusquam datum.  
 cum autem ad Lacedæmonios accessisset, qui cum Le-  
 gati essent, in loco certo consederant, consurrexisse o-  
 mnes, & senem illum sessum recepisse: quibus cum à  
 cuncto consessu plausus esset multiplex datus, dixisse  
 ex ijs quædam, Athenienses scire quæ recta essent, sed  
 facere nolle. Multa in nostro collegio præclara, sed hoc  
 de quo agimus, in primis, quod ut quisque ætate ante-  
 cellit: ita sententiæ principatum tenet: neque solum ho-  
 nore antecedentibus, sed ijs etiam qui cum imperio  
 sunt, maiores natu Augures anteponuntur. Quæ sunt  
 igitur uoluptates corporum cum auctoritatis præmijs  
 comparandæ? quibus qui splendide usi sunt, ij mihi  
 uidentur fabulam ætatis peregisse, nec tanquam inex-  
 ercitati histriones, in extremo actu corruisse. at sunt  
 morosi, & anxij, & iracundi, & difficiles senes: si  
 querimus, etiam auari. sed hæc morum uitia sunt,  
 nõ senectutis. At morositas tamē, & hæc uitia, quæ di-  
 xi, habet aliquid excusationis, non illius quidem iustæ,  
 sed quæ probari posse uidetur. contemni se putant,  
 despici, illudi. præterea in fragili corpore odiosa omnis  
 offensio est. quæ tamen omnia dulciora sunt & bonis  
 moribus & artibus: idque tum in uita, tum in scena  
 intelligi potest ex ijs fratribus, qui in Adelphis sunt.  
 quanta in altero duritas, in altero comitas? sic se res  
 habent. ut enim non omne uinum, sic non omnis æ-  
 tas uetustate coacta scit. seueritatem in senectute probo,  
 & eam, sicut alia, modicam: acerbitate nullo modo.

auaritia uero senilis quid sibi uelit, non intelligo. potest enim quicquam esse absurdius, quàm quo minus uiuæ restat, eo plus uiatici quærere? Quarta restat causa, quæ maxime angere atque sollicitam habere nostram ætatem uidetur, appropinquatio mortis: quæ certe à senectute non potest longe abesse. O miserum senem, qui mortem contemnendam esse in tam longa ætate non uiderit: quæ aut planè negligenda est, si omnino extinguit animum: aut etià appetenda, si aliquò eum deducit, ubi sit futurus æternus! atqui tertium certe nihil inueniri potest. Quid igitur timeam, si aut non miser post mortem, aut beatus etià futurus sum? quanquam quis est tam stultus, quanuis sit adolescens, cui sit exploratum, se ad uesperum esse uicturum? quin etiam ætas illa multo plures quàm nostra, mortis causus habet. facilius in morbos incidunt adolescentes: grauius ægrotant, tristius curantur. itaque pauci ueniunt ad senectutem. quod nisi ita accideret, melius et prudentius uiueretur: mens enim et ratio, et consilium in senibus est: qui si nulli fuissent, nullæ omnino ciuitates fuissent. Sed redeo ad mortem impendentem. quod illud est crimen senectutis, cum illud uideatis cum adolescentia esse commune? sensi ego tu in optimo filio meo, tum in expectatis ad amplissimam dignitatem fratribus tuis Scipio, omni ætati mortem esse communem. At sperat adolescens diu se uicturum: quod sperare idem senex non potest. insipienter sperat. quid enim est stultius, quàm incerta pro certis habere, falsa pro ueris? at senex ne quid speret, habet quidē. at est eo meliore conditione quàm adolescens: cum id quod sperat ille, hic iam assecutus est. ille uult diu uiuere: hic diu uixit. quanquam



ô dū boni, quid est in hominis uita diu? da enim supremum tempus: expectemus Tartessorū regis ætatem. fuit enim (ut scriptum uideo) Arganthonius quidam Gadibus, qui octoginta regnavit annos, centum & uiginti uixit. Sed mihi ne diuturnum quidem quicquam uidetur, in quo est aliquid extremum. cum enim id aduenerit, tunc illud quod præterijt, effluxit: tantum remanet quidem, quod uirtute & recte factis sis consecutus. horæ quidem cedūt & dies, menses & anni: nec præteritum tempus unquam reuertitur: nec quid sequatur, sciri potest. quod cuique temporis ad uiuendū datur, eo debet contentus esse: neque enim histrioni, ut placeat, peragenda est fabula: modo, in quocunque fuerit actu, probetur: neque sapienti usque Plaudite, uiuendū: breue enim tēpus ætatis satis est longū ad bene honesteque uiuendū: sin processeris longius, non magis dolendū est, quàm agricolæ dolent, præterita uerni temporis suauitate, æstatem, autumnūque uenisse. uer enim tanquam adolescentia, significat ostenditque fructus futuros: reliqua tempora demetendis fructibus, aut percipiendis accommodata sunt: fructus autem senectutis est (ut sæpe dixi) in ante partorum bonorum memoria, & copia. Omnia uero, quæ secundū naturā fiunt, sunt habēda in bonis. quid est autē tam secundū naturam, quàm senibus emori? quod idem contingit adolescentibus aduersante & repugnante natura. itaque adolescentes mori sic mihi uidentur, ut cum aquæ multitudine uis flammæ opprimitur: senes autem, sicut sua sponte, nulla adhibita ui, consumptus ignis extinguitur. & quasi poma ex arboribus, si cruda sunt, ui auelluntur: si matura & cocta, decidunt: sic uitā ado-

lescētibus uis aufert, senibus maturitas: quæ mihi quidem tam iucunda est, ut quo propius ad mortem accedam, quasi terrā uidear uidere, aliquandōque in portum ex longa nauigatione esse uenturus. Omnium ætatum certus est terminus: senectutis autē nullus certus est terminus: rectēque in ea uiuitur, quoad munus officij exequi et tueri possis, et tamen mortem contemneret. ex quo fit, ut animosior etiā senectus sit, quā adolescentia, et fortior. hoc est illud, quod Pisistrato tyranno à Solone responsum est, cum illi quærenti, qua tandem spe fretus, sibi tam audacter obsisteret, respōdisse dicitur, Senectute. sed uiuēdi est finis optimus, cum integra mente, certisque sensibus opus ipsa suum eadem quæ coagmentauit, natura dissoluit. ut nauem, ut ædificium idem destruit facillime, qui construxit: sic hominem eadem optime, quæ conglutinauit, natura dissoluit. nam omnis conglutinatio recens, ægre: inueterata, facile diuellitur. ita fit, ut illud breue uitæ reliquum nec auide appetendum senibus, nec sine causa deferendum sit: uetēque Pythagoras, iniussu imperatoris, id est dei, de præsidio, et statione uitæ decedere. Solonis quidem sapientis elogium est, quo se negat uelle suam mortem dolore amicorum, lamentisque uacare. uult se charū, credo, suis esse. sed haud scio an melius Ennius:

.. Nemo me lacrymis decoret, neque funera fletu

.. Faxit. non esse lugendam mortem censeret, quam immortalitas consequatur. iam sensus moriēdi, si aliquis esse potest, is ad exiguum tempus durat, præsertim senis: post mortem quidem sensus aut optandus, aut nullus est. sed hoc meditatū ab adolescentia debet esse, mortem ut negligamus: sine qua meditatione trāquillo

esse animo nemo potest. moriendum enim certe est, & id incertum an eo ipso die. Mortem igitur omnibus horis impendentem timens, quis possit animo consistere? de qua non ita longæ disputatione opus esse uidetur, cum recorder non solum L. Brutum, qui in liberanda patria est interfectus: non duos Decios, qui ad uoluntariam mortem cursum equorum incitauerunt: non M. Attilium qui ad supplicium est profectus, ut fidem hosti datam conseruaret: non duos Scipiones, qui iter Pœnis uel corporibus suis obstruere uoluerunt: non auum tuum L. Paulū, qui morte sua luit collegæ in Cannensi ignominia temeritatem: non M. Marcellum, cuius interitum ne crudelissimus quidem hostis honore sepulturæ carere passus est. sed legiones nostras, quod scripsi in Originibus, in eum locum sæpe profectas alacri animo & erecto, unde nunquam se redituras arbitrarentur. Quod igitur adolescentes, & ij quidem non solum indocti, sed etiam rustici contemunt, id docti senes extimescent? omnino (ut mihi quidem uidetur) rerum omnium satietas uitæ facit satietatem. Sunt pueritiæ certa studia: num igitur ea desiderant adolescentes? sunt & incuntis adolescentiæ: num ea iam constans requirit ætas, quæ dicitur media? sunt etiam huius ætatis: ne ea quidem in senectute quærentur. sunt autem extrema quædam studia senectutis: ergo, ut superiorum ætatum studia occidunt, sic occidunt etiam senectutis. quod cum euenit, satietas uitæ tempus maturū mortis affert. Equidē non uideo cur, quid ipse sentiam de morte, non audeā dicere uobis. quod eo melius cernere mihi uideor, quo ab ea propius absūm. Ego uestros patres P. Scipio, tuque C. Læli, uiros clarissimos, mihi amicissi-

mos uiuere arbitror, & eam quidem uitam, quæ est sola uita nominanda. nam dum sumus in his inclusi compagibus corporis, munere quodam necessitatis, & graui opere perfungimur. est enim animus cælestis ex altissimo domicilio depressus, & quasi demersus in terram, locum diuinæ naturæ, æternitatique contrariū. Sed credo deos immortales sparsisse animos in corpora humana, ut essent qui terras tuerentur, quique cælestium ordinem contemplantes, imitarentur eum uitæ modo atque constantia. nec me solū ratio ac disputatio impulit ut ita crederem: sed nobilitas etiam summorum philosophorum, & auctoritas. Audiebam Pythagoram Pythagoreosque, incolas penè nostros, qui essent Italici philosophi quondam nominati, nunquam dubitasse, quin ex uniuersa mente diuina delibatos animos haberemus. demonstrabantur mihi præterea quæ Socrates supremo uitæ die de immortalitate animorum differuisset, is qui esset sapientissimus oraculo Apollinis iudicatus. Quid multa? sic mihi persuasi, sic sentio, cum tanta celeritas animorum sit, tanta memoria præteritorū, futurorū providentia, tot artes, tantæ scientiæ, tot inuenta: non posse eam naturam, quæ res eas contineat, esse mortalem. cūque animus semper agitetur, nec principiū motus habeat, quia ipse se moueat: nec finem quidem habiturū esse motus, quia nunquam se ipse sit relicturus. & cum simplex animi natura esset, neque haberet in se quicquā admixtū dispar sui, atque dissimile: non posse eū diuidi. quòd si non posset, non posse interire: magnòque esse argumento, homines scire pleraque ante quàm nati sint, quòd iam pueri cum artes difficiles discant, ita celeriter res innume

rabiles arripiant, ut eas non tam primū accipere uideātur, sed reminisci & recordari. Hæc Platonis sunt ferè. Apud Xenophontem autem moriens Cyrus maior  
 „ hæc dicit: Nolite arbitrari ò mihi charissimi filij, me  
 „ cum à uobis discessero, nusquā aut nullū fore. nec enim  
 „ dum eram uobiscū, animum meum uidebatis: sed cum  
 „ esse in hoc corpore, ex ijs rebus quas gerebam, intelli-  
 „ gebatis. eundem igitur esse creditote, etiam si nullum  
 „ uidebitis. Nec uero clarorū uirorum post mortem ho-  
 „ nores permanerent, si nihil eorū ipsorum animi effice-  
 „ rent, quo diutius memoriam sui teneremus. Mihi qui-  
 „ dem nunquam persuaderi potuit, animos, dum in cor-  
 „ poribus essent mortalibus, uiuere: cum exissent ex ijs,  
 „ emori. nec uero tum animum esse insipientem, cum ex  
 „ insipienti corpore euasisset: sed cum omni admixtione  
 „ corporis liberatus, purus, & integer esse cœpisset, tum  
 „ esse sapientem. Atque etiam cum hominis natura mor-  
 „ te dissoluitur, cæterarum rerum, perspicuum est quò  
 „ quæque discedant. abeūt enim illuc omnia, unde orta  
 „ sunt: animus autem solus, nec cum adest, nec cum disce-  
 „ dit, apparet. Iam uero uidetis nihil morti esse tam simi-  
 „ le, quàm somnum. atqui dormientium animi maxime  
 „ declarant diuinitatem suam. multa enim cum remissi  
 „ & liberi sunt, futura prospiciunt. ex quo intelligitur,  
 „ quales futuri sint, cum se planè corporis uinculis rela-  
 „ xauerint. Quare, si hæc ita sunt, sic me colitote, ut deū.  
 „ sin una interiturus est animus cum corpore: uos tamen  
 „ deos uerètes, qui hanc omnē pulchritudinem tuentur,  
 „ & regunt, memoriā nostri pie inuiolatè que seruabitis.  
 Cyrus quidem hæc moriēs. nos, si placet, nostra uideamus.  
 Nemo unquā mihi Scipio persuadebit aut patrem

tuum Paulū, aut duos avos Paulum & Africanū, aut  
 Africani patrem, aut patruum, aut multos præstantes  
 viros quos enumerare non necesse est, tanta esse con-  
 tos, quæ ad posteritatis memoriã pertinerent: nisi ani-  
 mo cerneret posteritatem ad se pertinere posse. An cen-  
 ses (ut de me ipso aliquid more senum gloriæ) me tantos  
 labores diurnos nocturnosq; domi militiæq; suscepturū  
 fuisse, si iisdem finibus gloriã meã, quibus vitam essem  
 terminaturus? nõnne melius multo fuisset otiosam æ-  
 tatem & quietam, sine ullo labore aut contentione tra-  
 ducere? sed nescio quo modo animus erigens se, posterita-  
 tem semper ita prospiciebat, quasi cum excessisset è vi-  
 ta, tum denique uicturus esset. quod quidẽ ni ita se ha-  
 beret, ut animi immortales essent: haud optimi cuius-  
 que animus maxime ad immortalem gloriã niteretur.  
 Quid quod sapiētissimus quisq; æquissimo animo mo-  
 ritur, stultissimus iniquissimus? nõnne vobis uidetur a-  
 nimus, is qui plus ærnat & longius, uidere se ad me-  
 liora proficisci: ille autem cuius obtusior sit acies, non  
 uidere? Equidem efferor studio patres uestros, quos co-  
 lui & dilexi, uidendi: neque eos uero solum conuenire  
 aueo, quos ipse cognoui: sed illos etiã de quibus audiui  
 & legi, & ipse conscripsi. quod quidem me proficiscen-  
 tem haud sanè quis facile retraxerit, neue tanquam Pe-  
 liam recoxerit. quod si quis deus mihi largiatur, ut ex  
 hac ætate repuerascam, & in cunis uagiam, ualde re-  
 cusem: nec uero uelim, quasi decurso spatio, à calce ad  
 carceres reuocari. quid enim habet uita cõmodi? quid  
 non potius laboris? sed habeat sanè. habet certe tamen  
 aut satietatem, aut modum. non libet enim mihi deplo-  
 rare uitam, quod multi & ij docti, sæpe fecerūt: nec me

uixisse poenitet, quoniã ita uixi, ut non frustra me natum existinem: & ex uita ista discedo, tanquam ex hospitio, non tanquam ex domo. commorandi enim natura diuersorium nobis, non habitandi dedit. O præclarum diem, cum in illud animorũ concilium, coetumque proficiscar, & cum ex hac turba & colluione discedam! proficiscar enim non ad eos solũ uiros, de quibus ante dixi: sed etiam ad Catonem meum. quo nemo uir melior natus est, nemo pietate præstator: cuius à me corpus crematum est: quod contra decuit ab illo meum. animus uero non me deserēs, sed respectans, in ea profecto loca discessit, quò mihi ipsi cernebat esse ueniendũ. quem ego meum casum fortiter ferre uisus sum: non quòd æquo animo ferrem, sed me ipse consolabar, existimans non longinquum inter nos digressum, & discessum fore. His mihi rebus Scipio (id enim te cum Lælio admirari solere dixisti) leuis est senectus, nec solum non molesta, sed etiã iucunda. quòd si in hoc erro, quòd animos hominum immortales esse credam, libenter erro: nec mihi hunc errorem, quo delector, dum uiuo, extorqueri uolo. sin mortuus, ut quidã minuti philosophi censent, nihil sentiam: non uereor, ne hunc errorem meum mortui philosophi irrideant. quòd si non sumus immortales futuri, tamen extinguì homini suo tempore optabile est. nam habet natura, ut aliarũ omnium rerum, sic uiuendi modum. Senectus autem peractio ætatis est, tanquam fabulæ: cuius defatigationem fugere debemus, præsertim adiuncta satietate. Habui hæc de senectute quæ dicere. ad quam utinam perueniatis, ut ea quæ ex me audistis, re experti probare possitis.



M. TVLLII CICERONIS LAE-  
LIVS, uel DE AMICITIA, AD  
T. POMPONIVM ATTICVM.

DIALOGI PERSONAE,  
FANNIVS, SCAEVOLA, LAELIVS.

Mutius Augur Scaenola multa narra-  
re de C. Laelio socero suo memoriter,  
et incide solebat, nec dubitare illum  
in omni sermone appellare sapientem.

Ego autem à patre ita erā deductus  
ad Scauolam sumpta iurili toga, ut quoad possem, et  
mihi liceret, à senis latere nunquam discederem. itaq;  
multa ab eo prudenter disputata, multa breuiter et  
commode dicta, memoriae mandabam, fierique stude-  
bam eius prudentia doctior. quo mortuo, me ad Pon-  
tificem Scauolam contuli: quem unum nostrae ciuitatis  
et ingenio et iustitia praestantissimum audeo dicere.  
Sed de hoc aliàs. nūc redeo ad Augurē. Cum saepe mul-  
ta narraret, tum memini domi in hemicyclo sedētem  
(ut solebat) cum et ego essem unā, et pauci admodum  
familiares, in eum sermonem illum incidere, qui tum  
ferē erat multis in ore. meministi enim profecto (ut o-  
pinor) Attice, et eo magis, quod P. Sulpitio utebare mul-  
tum, cum is Tribunus pl. capitali odio à Q. Pompeio,  
qui tum erat Consul, dissideret, quicum coniūctissime  
et amantissime uixerat: quanta hominū esset uel ad-  
miratio, uel querela. Itaque tum Scaenola, cum in eam  
ipsam mentionem incidisset, exposuit nobis sermonem

Laelij de amicitia habitum ab illo secum, & cum altero genere C. Fannio M. filio paucis diebus post mortem Africani. cuius disputationis sententias memoriae mandavi: quas in hoc libro exposui meo arbitratu: quasi enim ipsos introduxi loquentes, ne, inquam, & inquit, sæpius interponeretur. atq; id eo feci, ut tanquã à præsentibus coràm haberi sermo uideretur. cum enim sæpe mecum ageres Atticæ, ut de amicitia scriberẽ aliquid, digna mihi res tum omniũ cognitione, tum nostra familiaritate uisa est. itaque feci non inuitus, ut prodessem multis tuo rogatu. Sed, ut in Catone maiore, qui est scriptus ad te de senectute, Catonem induxi senem disputantẽ, quia nulla uidebatur aptior persona, quæ de illa ætate loqueretur, quàm eius, qui & diutissime senex fuisset, & in ipsa senectute præ cæteris floruiſſet: sic cū accepissemus à patribus maxime memorabilẽ C. Laelij & P. Scipionis familiaritatem fuisse, idonea mihi Laelij persona uisa est, quæ de amicitia ea ipsa differeret, quæ disputata ab eo meminisset magister meus Scæuola. Genus autem hoc sermonũ positum in hominum ueterum auctoritate, & eorũ illustrium, plus nescio quo pacto uidetur habere grauitatis. itaq; ipse mea legẽs sic afficio interdũ, ut Catonem, non me loqui existimem, sed ut tum ad senem senex de senectute, sic in hoc libro ad amicum amicissimus de amicitia scripsi. tum est Cato locutus, quo erat nemo ferẽ senior temporibus illis, nemo prudẽtior: nunc Laelius & sapiens (sic enim est habitus) & amicitia gloria excellens, de amicitia loquitur. tu uelim à me animum parũper auertas, Laelium loqui ipsum putes. C. Fannius, & Q. Mutius ad socerũ ueniunt post mortẽ Africani. ab ijs sermo ori-

tur:respondet Lælius,cuius tota disputatio est de amicitia:quam legens tu ipse cognosces. F A N. Sunt ista uera Læli.nec enim melior uir fuit Africano quisquā nec clarior. sed existimare debes omnium oculos in te esse coniectos.unum te sapientem et appellant,et existimant. tribuebatur hoc ~~modo~~<sup>nunc</sup> M.Catoni. scimus L. Acilium apud patres nostros appellatum esse sapientem:sed uterque alio quodam modo. Acilius,quia prudēs esse in iure civili putabatur:Cato,quia multarum rerū usum habebat,multaq; eius et in Senatu,et in foro uel prouisa prudenter,uel acta constanter,uel responsa acute ferebātur,propterea quasi cognomen iam habebat in senectute sapientis. te autem alio quodam modo dicunt non solum natura et moribus,uerum etiam studio,et doctrina esse sapientem:nec sicut uulgus,sed ut eruditi solent appellare sapientem:qualem in reliqua Græcia neminem.nam qui septem appellātur,eos qui ista subtilius quærent,in numero sapientum nō habent. Athenis unum accepimus,et eū quidē etiā Apollinis oraculo sapientissimum iudicatum.hanc esse in te sapientiam existimant,ut omnia tua in te posita esse ducas,humanosque casus uirtute inferiores putes.itaque ex me quærent,credo ex hoc item Scæuola,quonam pacto mortem Africani feras: eoque magis,quod his proximis Nonis,cum in hortos D. Bruti Auguris commentandi causa(ut assolet)uenissemus,tu non affuisti,qui diligentissime semper illum diem,et illud munus solitus esses obire. S C A E.Quærent quidem C.Læli multi,ut est à Fannio dictum:sed ego id respondeo quod animaduerti,te dolorem quem acceperis tum summi uiri,tum amantiissimi morte,ferre

*moderate, nec potuisse non commoueri, nec fuisse id humanitatis tuæ. quod autem his Nonis in collegio nostro non affuisses, ualitudinem causam, non mœstiti- am fuisse. LAE. Recte tu quidem Scauola, et ue- re. nec enim ab isto officio, quod semper usurpau cum ualerem, abduci incommodo meo debui: nec ullo ca- su arbitror hoc constanti homini posse contingere, ut ulla intermissio fiat officij. Tu autem Fani, quod mi- hi tantum tribui dicis, quantum ego nec agnosco, nec postulo, facis amicæ. sed (ut mihi uideris) non recte iu- dicas de Catone. aut enim nemo, quod quidem magis credo: aut, si quisquam, ille sapiens fuit. quo modo e- nim (ut alia omittam) mortem filij tulit? memineram Paulum, uideram Gallum: sed hi nec comparantur Catoni maximo, et spectato uiro. quamobrem caue Catoni anteponas ne istum quidem ipsum; quem A- pollo (ut ais) sapientissimum iudicauit. huius enim fa- cta, illius dicta laudantur. De me autem, ut iam cum utroque loquar, sic habetote. Ego, si Scipionis deside- rio me moueri negem, quàm id recte faciam, uiderint sapientes: sed certe mentiar. moueor enim tali amico orbatus, qualis (ut arbitror) nemo unquam erit, et ut confirmare possum, nemo certe fuit. sed non ego me- dicina: me ipse consolor, et maxime illo solatio, quod eo errore careo, quo, amicorum decessu plerique ang- solent. nihil enim mali accidisse Scipioni puto: mihi accidit, siquid accidit. suis autem incommodis graui- ter ang, non amicum, sed se ipsum amantis est. cum illo uero quis neget actum esse præclare? nisi enim, quod ille minime putabat, immortalitatem optare uel- let: quid non est adeptus, quod homini fas esset optare?*

qui summam spem civium, quam de eo iam puero habuerant, continuo adolescens incredibili uirtute superauit: qui Consulatum petijt nunquam, factus est Consul bis, primum ante tempus, iterum sibi suo tempore, Reip. penè sero: qui duabus urbibus euersis inimicissimis huic imperio, non modo præsentiâ, uerum etiam futura bella deleuit. quid dicam de moribus facillimis? de pietate in matrem, liberalitate in sorores, bonitate in suos, iustitia in omnes? hæc nota sunt uobis. quàm autem ciuitati charus fuerit, mœrore funeris indicatum est. Quid igitur hunc paucorū annorum accessio iuuare potuisset? senectus enim, quāuis non sit grauis, ut memini Catonē uno anno, antequam mortuus est, mecum et cum Scipione differere: tamen aufert eā uiriditatem, in qua etiā nunc erat Scipio. Quamobrem uita quidem talis fuit uel fortuna, uel gloria, ut nihil posset accedere. moriendi autem sensum celeritas abstulit. quo de genere mortis difficile dictu est: quid homines suspiciantur, uidetis. hoc tamen uere licet dicere, P. Scipioni ex multis diebus, quos in uita celeberrimos, lætissimósque uiderit, illum diem clarissimum fuisse, cum Senatu dimisso domum reductus ad uesperam est à patribus conscriptis, à populo R. socijs, et Latinis, pridie quàm excessit è uita: ut ex tā alto dignitatis gradu ad superos uideatur potius, quàm ad inferos peruenisse. neque enim assentior ijs qui hæc nuper differere cœperunt, cum corporibus simul animos interire, atque omnia morte deleri. plus apud me antiquorū auctoritas ualet, uel nostrorum maiorū, qui mortuis tam religiosa iura tribuerūt: quod non fecissent profecto, si nihil ad eos pertinere arbitrarentur: uel eorū qui in hac

terra fuerunt, magnamque Græciam, quæ nunc quidem deleta est, tunc florebat, institutis, & præceptis suis erudierunt: uel eius, qui Apollinis oraculo sapientissimus: est indicatus: qui non tum hoc, tum illud, ut in plerisque, sed idem dicebat semper, animos hominum esse diuinos: ipsæque cum è corpore excessissent, reditum ad cælum patere, optimoque & iustissimo cuique expeditissimum. quod idem Scipioni uidebatur: qui, idem quasi præfagiret, per paucis ante mortem diebus, cum & Philus, & Maullius adessent, & alij plures, tunc etiam Scaeuola mecum uenisses, triduum differuit de Rep. cuius disputationis fuit extremum ferè de immortalitate animorum: quæ se in quiete per uisum ex Africano audisse dicebat. Id si ita est, ut optimi cuiusque animus in morte facillime euolet tanquam è custodia, uinculisque corporis: cui censemus cursum ad deos faciliorem fuisse, quàm Scipioni? Quocirca mœrere hoc eius euentu, uereor ne inuidi magis, quàm amici sit. Sin autem illa uereor, ut idem interitus sit animorum & corporum, nec ullus sensus maneat: ut nihil boni est in morte, sic certe nihil mali. sensu enim amisso, fit idem, quasi natus non esset omnino: quem tamen esse natum & nos gaudemus, & hæc ciuitas, dum erit, lætabitur. Quamobrem cum illo quidem (ut supra dixi) actum optime est, mecum autem incommodius: quem fuit æquius, ut prius introieram in uitam, sic prius exire de uita. sed tamen recordatione nostræ amicitiae sic fruor, ut beate uixisse uidear, quia cum Scipione uixerim. quocum mihi coniuncta cura de Repub. & de priuata fuit: quocum domus fuit, & militia communis, & id in quo est omnis uis amicitiae, uoluntatum,

studiorum, sententiarum summa consensus. Itaque non tam ista me sapientiæ, quam modo Fannius commemorauit, fama delectat, falsa præsertim: quàm quòd amicitiae nostrae memoriam spero sempiternam fore. idque mihi eo magis est cordi, quòd ex omnibus seculis uix tria, aut quatuor non nuntantur paria amicorū: quo in genere sperare uideor Scipionis amicitiam, et Lælij notam posteritati fore. F A N. Istud quidem Læli ita necesse est. Sed quoniam amicitiae mentionem fecisti, et sumus otiosi, pergratum mihi faceris, spero item Scaeuolæ, si quemadmodum soles de cæteris rebus, cum ex te quærentur, sic de amicitia disputabis, quid sentias, qualem existimes, quæ præcepta des.

S C A E. Mihi uero pergratum hoc erit: atque id ipsum cum tecum agere conarer, Fannius anteuertit. Quamobrem utrique nostrum gratum admodum faceris. L A E. Ego uero non grauarer, si mihi ipse considerem. nam et præclara uisa res est: et sumus (ut dixit Fannius) otiosi. Sed quis ego sum? aut quæ in me est facultas? doctorum est ista consuetudo, eaque Græcorū, ut ijs proponatur, de quo disputent quauis subito: magnum opus est, egētque exercitatione non parua. Quamobrem quæ disputari de amicitia possunt, ab eis censeo petatis, qui ista profitentur. ego uos hortari tantum possum, ut amicitiam omnibus rebus humanis anteponatis. nihil est enim tam naturæ aptū, tam conueniens ad res uel secundas, uel aduersas. Sed hoc primum sentio, nisi in bonis amicitiam esse non posse: neque id ad uivum refecit, ut illi qui hæc subtilius disserunt, fortasse uere, sed ad communem utilitatem parum. negant enim quenquam uirum bonum esse, nisi sa-



pieniem. sit ita sanè: sed eam sapientiam interpretantur, quam adhuc mortalis nemo est consecutus. nos autem ea quæ sunt in usu, uitæque communi, non ea quæ finguntur, aut optantur, sperare debemus. nunquam ego dicam C. Fabritium, M. Curium, T. Coruncanum, quos sapientes nostri maiores iudicabant, ad istorum normam fuisse sapientes. Quare sibi habeant sapietiae nomen, et inuidiosum, et obscurum: concedantque, ut hi boni uiri fuerint. ne id quidem facient: negabunt id, nisi sapienti, posse concedi. Agamus igitur pingui Minerva, ut aiunt. qui ita se gerunt, ita uiuunt, ut eorum probetur fides, integritas, æquitas, liberalitas, nec sit in eis ulla cupiditas, uel libido, uel audacia: sintque magna constantia, ut hi fuerunt, quos modo nominavi. hos uiros bonos, ut habiti sunt, sic etiam appellandos putemus: qui assequuntur, quantum homines possunt, naturam optimam recte uiuendi ducem. sic enim mihi perspicere uideor, ita natos esse nos, ut inter omnes esset societas quædam: maior autem, ut quisque proxime accederet. itaque ciues potiores sunt, quam peregrini: et propinqui, quam alieni. cum his enim amicitiam natura ipsa peperit: sed ea non satis habet firmitatis. nanque hoc præstat amicitia propinquitati, quod ex propinquitate beneuolentia tolli potest, ex amicitia autem non potest. sublata enim beneuolentia, amicitiae nomen tollitur, propinquitatis manet. quanta autem uis amicitiae sit, ex hoc intelligi maxime potest: quod ex infinita societate generis humani, quæ conciliauit ipsa natura, ita contracta res est, et adducta in angustum, ut omnis charitas aut inter duos, aut inter paucos iungeretur. Est autem amicitia nihil aliud, nisi omnium

diuinarum, humanarumque rerum cum beneuolentia,  
 et charitate summa consensio. qua quidem haud scio  
 an excerpta sapientia, quicquam melius homini sit à  
 dijs immortalibus datum. diuitias alij præponunt, bo-  
 nam alij ualetudinem, alij potentiam, alij honores, mul-  
 ti etiam uoluptates. belluarum hoc quidem extremum  
 est: illa autem superiora caduca et incerta, posita non  
 tam in nostris consilijs, quàm in fortunæ temeritate.  
 qui autem in uirtute summum bonum ponunt, præclare  
 illi quidem, sed hæc ipsa uirtus amicitiam gignit, et  
 continet: nec sine uirtute amicitia esse ullo pacto po-  
 test. Iam uirtutem ex consuetudine uitæ, sermonisque  
 nostri interpretemur: nec metiamur eam, ut quidam in-  
 docti, uerborum magnificentia. uirosque bonos eos qui  
 habentur, numeremus, Paulos, Catones, Caios, Scipio-  
 nes, Philos. his communis uita contenta est. Eos autem  
 omittamus, qui omnino nusquam reperiuntur. tales igitur  
 inter uiros amicitia tantas opportunitates habet,  
 quâtas uix queo dicere. Principio quis potest esse uita  
 uitalis, ut ait Ennius, qui non in amici mutua bene-  
 uolentia conquiescat? Quid dulcius, quàm habere, quo  
 cum omnia audeas sic loqui, ut tecum? quis esset tan-  
 tus fructus in prosperis rebus, nisi haberes, qui illis æ-  
 que, ac tu ipse, gauderet? aduersas uero ferre diffici-  
 le esset sine eo, qui illas grauius etiam, quàm tu, fer-  
 ret. denique cæteræ res quæ expetuntur, opportuna  
 sunt singulae rebus ferè singulis: diuitiæ, ut utare: opes  
 ut colare: honores, ut laudare: uoluptates, ut gau-  
 deas: ualetudo, ut dolore careas, et muneribus fun-  
 gare corporis: amicitia plurimas res continet: quoquo-  
 te uerteris, præsto est: nullo loco excluditur: nunquam

intempestiua, nunquam molesta est. itaque non aqua, non igni, non aere (ut aiunt) pluribus locis utimur, quàm amicitia. neque ego nunc de uulgari, aut de mediocri, quæ tamen ipsa delectat, & prodest: sed de uera & perfecta loquor: qualis eorum qui pauci nominantur, fuit. nam & secundas res splendiores facit amicitia, & aduersas partiens communicansque, leuior. cumque plurimas & maximas commoditates amicitia contineat, tum illa nimirum præstat omnibus, quòd bona spe præluet in posterum, nec debilitari animos, aut cadere patitur. uerū etenim amicum qui intuetur, tanquam exemplar aliquod intuetur sui. Quocirca & absentes adsunt, & egentes abūdant, & imbecilles ualent, & quod difficilius dictu est, mortui uiuunt. tantus eos honos, memoria, desiderium prosequitur amicorum. ex quo illorum beata mors uidetur: horum uita laudabilis. quod si exemeris ex natura rerum beneuolentiæ coniunctionem: nec domus ulla, nec urbs stare poterit: ne agri quidem cultus permanebit. id si minus intelligitur: quāta uis amicitiae, concordiaeque sit, ex dissensionibus, atque ex discordijs percipi potest. quæ enim domus tam stabilis, quæ tam firma ciuitas est, quæ non odijs, atque dissidijs funditus possit euertere? Ex quo, quantum boni sit in amicitia, iudicari potest. Agrigentinum quidem doctum quædam uirum carminibus Græcis naticinatum ferunt: quæ in rerū natura, totoque mundo constarent, quæque mouerentur, ea contrahere amicitiam, dissipare discordiam. atque hoc quidem omnes mortales & intelligunt, & reprobant. Itaque, si quando aliquod officium existit amici in periculis aut aduendis, aut communicandis, quis

est, qui id non maximis efferat laudibus? qui clamores tota cauea nuper hospitis, & amici mei M. Pacuuij in noua fabula, cum ignorante Rege, uter eorum esset Orestes, Pylades Orestem se esse diceret, ut pro illo necaretur: Orestes autem, ita ut erat, Orestem se esse perseneraret? stantes autem plaudebant in re ficta: quid arbitramur in uera fuisse facturos? facile indicabat ipsa natura uim suam: cum homines, quod facere ipsi non possent, id recte fieri in altero iudicarent.

Hactenus mihi uideor, de amicitia quid sentirem potissime dixisse. si qua praeterea sunt (credo autem esse multa) ab ijs, si uidebitur, qui ista disputant, queritote.

F A N. Nos autem à te potius, quanquam etiam ab istis saepe quaesui & audiui, non inuitus equidem: sed aliud quoddam expetimus filum orationis tuae.

S C A E. Tu magis id dices Fanni, si nuper in hortis Scipionis, cum de Republica disputatum est, affuisses. qualis tum patronus iustitiae fuit contra accuratam orationem Philii? F A N. Facile id quidem fuit, iustitiam iustissimo uiro defendere.

S C A E. Quid amicitiam? nonne facile ei erit, qui ob eam summa fide, constantia, iustitiaque seruata, maximam gloriam ceperit?

L A E. Vim hoc quidem est afferre. quid enim refert, qua me ratione cogatis? cogitis certe. studijs enim generorum, praesertim in re bona, cum difficile est, tum ne aequum quidem obistere. Saepe mihi igitur de amicitia cogitanti, maxime illud considerandum uideri solet, num propter imbecillitatem atque inopiam desideranda sit amicitia, ut in dandis, recipiendisque meritis, quod quisque minus per se posset, id acciperet ab alio, uicissimque redderet: an

esset hoc quidem proprium amicitiae, sed antiquior  
 & pulchrior, & magis à natura ipsa profecta alia  
 causa esset. amor enim, ex quo amicitia est nomina-  
 ta, princeps est ad benevolentiam coniungendam. nam  
 utilitates quidem etiam ab ijs percipiuntur sepe, qui  
 simulatione amicitiae coluntur, & observantur tem-  
 poris causa. In amicitia autem nihil fictum, nihil si-  
 mulatum: & quicquid in ea est, id & uerum, & uo-  
 luntarium est. Quapropter à natura mihi uidetur po-  
 tius, quàm ab indigentia, orta amicitia, applicatione  
 magis animi cum quodam sensu amandi, quàm cogi-  
 tatione, quantū illa utilitatis esset habitura. Quod qui-  
 dem quale sit, etiam in bestijs quibusdam animaduer-  
 ti potest, quæ ex se natos ita amant ad quoddam tem-  
 pus, & ab eis ita amantur, ut facile earum appareat  
 sensus. quod in homine multo est euidentius: primum  
 ex ea charitate, quæ est inter natos & parentes, quæ  
 dirimi nisi detestabili scelere non potest: deinde, cum  
 similis sensus extitit amoris, si aliquem nacti sumus, cu-  
 ius cum moribus & natura congruamus: quod in eo  
 quasi lumen aliquod probitatis & uirtutis perspicere  
 uideamur. nihil est enim amabilius uirtute: nihil  
quod magis alliciat homines ad diligendum: quippe  
 cum propter uirtutem, & probitatem eos etiam, quos  
 nunquam uidimus, quodam modo diligamus. Quis est  
 qui C. Fabritij, M. Curij cum charitate aliqua, & be-  
 neuolentia memoriam non usurpet, quos nunquam ui-  
 derit? quis autem est, qui Tarquinium Superbum, qui  
 Sp. Cassium, Sp. Melium non oderit? Cum duobus du-  
 cibus de imperio in Italia decertatum est, Pyrrho, &  
 Annibale. ab altero propter probitatem eius nō alie-

nos animos habemus: alterum propter crudelitatem eius semper hæc ciuitas oderit. Quod si tanta uis probitatis est, ut eam uel in eis, quos nunquam uidimus: uel, quod maius est, in hoste etiam diligamus: quid mirum, si animi hominum moueantur, cum eorum, quibuscum usu coniuncti esse possunt, uirtutem et bonitatem perspicere uideantur? Quanquam confirmatur amor et beneficio accepto, et studio perspecto, et consuetudine adiuncta. quibus rebus ad illum primum motum animi et amoris adhibitis, admirabilis quædam exardescit beneuolentiæ magnitudo. quam si qui putant ab imbecillitate proficisci, ut sit per quam quisque assequatur quod desideret: humilem sanè relinquunt, et minime generosum (ut ita dicam) ortum amicitiae: quam ex inopia, atque indigentia natam uolunt. quod si ita esset: ut quisque minimum in se esse arbitraretur, ita ad amicitiam esset aptissimus: quod longe secus est. ut enim quisque sibi plurimum confidit, et ut quisque maxime uirtute, et sapientia sic munitus est, ut nullo egeat, suæque omnia in se ipso posita ius dicet: ita in amicitijs expetendis, colendisque maxime excellit. Quid enim? Africanus erat indigens mei? minime hercule. at ne ego quidem illius: sed ego admiratione quadam uirtutis eius, ille iucissim opinione fortasse nonnulla, quam de meis moribus habebat, me dilexit: auxit beneuolentiam consuetudo. sed quanquam utilitates multæ, et magnæ consecutæ sunt: non sunt tamen ab earum spe causæ diligendi profectæ. Ut enim benefici, liberalisque sumus, non ut exigamus gratiam (neque enim beneficium fœneramur) sed natura propensi ad liberalitatem sumus: sic amicitiam non

spe mercedis adducti, sed quòd eius omnis fructus in ipso amore inest, expetendam putamus. Ab ijs qui pecudum ritu ad uoluptatem omnia referunt, longe dissentimus: nec mirum. nihil enim altum, nihil magnificum, nec diuinum suspicere possunt, qui omnes suas cogitationes abiecerunt in rem tam humilem, tamque contemptam. Quamobrem hos quidem ab hoc sermone remoueamus. ipsi autem intelligamus à natura gigni sensum diligendi, & beneuolentiæ charitatem, facta significatione probitatis: quam qui appetiuerunt, applicant sese, & propius admovent, ut & usu eius quem diligere coeperunt, fruantur, & moribus: sintque pares in amore, & æquales, propensioresque ad bene merendum, quàm ad reposcendum. atque hæc inter eos sit honesta certatio. sic & utilitates ex amicitia maximæ capientur: & erit eius ortus à natura, quàm ab imbecillitate, grauior & uerior. nam si utilitas amicitias conglutinaret, eadem commutata dissolueret: sed quia natura mutari non potest, ideo ueræ amicitie sempiternæ sunt. Ortum quidem amicitie uidetis, nisi quid adhuc forte uultis. F A N. Tu uero perge Læli. pro hoc enim, qui minor est natu, meo iure respondeo. S C A E. Recte tu quidem. quamobrem audiamus. L A E. Audite uero optimi uiri ea quæ sæpissime inter me, & Scipionem de amicitia disserebantur. quanquam ille quidem nihil difficilius esse dicebat, quàm amicitiam usque ad extremum uitæ diem permanere. nam uel ut non idem expediret utrique, incidere sæpe, uel ut de Republica non idem sentirent. mutari etiam mores hominum sæpe dicebat, aliàs aduersis rebus, aliàs ætate ingrauescente. atque



earum rerum exemplum ex similitudine capiebat incuntis ætatis, quòd summi puerorum amores sæpe unà cum prætexta, sumpta toga deponerentur. sin autem ad adolescentiam perduxissent, dirimi tamen interdum contentione uel luxuriæ, uel conditionis, uel commodi alicuius, quod idem adipisci uterque non posset: quòd siqui longius in amicitia prouecti essent, tamen sæpe labefactari, si in honoris contentionem incidissent. pestem enim maiorem esse nullam in amicitijs, quàm in plerisque pecuniæ cupiditatem: in optimis quibusque honoris certamen, & gloriæ. ex quo inimicitias maximas sæpe inter amicissimos extitisse: magna etiam dissidia, & plerunque iusta nasci, cum aliquid ab amicis, quod rectum non esset, postularetur, ut aut libidinis ministri, aut adiutores essent ad iniuriam. quod qui recusarent, quanuis honeste id facerent, ius tamen amicitiae deferere argueretur ab ijs quibus obsequi nollent. illos autem qui quiduis ab amico auderet postulare, postulatione ipsa profiteri omnia se amici causa esse facturos: eorum querela inueterata non modo familiaritates extinguere solere, sed etiã odia gigni maxima, atque sempiterna. hæc multa, ita, quasi fatæ, impendere amicitijs, ut omnia subterfugere, non modo sapientiæ, sed etiam felicitatis diceret sibi uideri. Quamobrẽ id primum uideamus, si placet, quatenus amor in amicitia progredi debeat. Num si Coriolanus habuit amicos, ferre contra patriã arma illi cum Coriolano debuere? num Becillinum, amici regnum appetentem, num Sp. Melium iuuare debuerunt? Tiberiũ quidem Gracchum Remp. uexantem, à Q. Tuberone, æqualibûsq; amicis derelictum uidebamus. At C. Blos

sius Cumanus, hospes familiae uestrae Scaeuola, cum ad me, qui aderam Lenati, & Rutilio Consulibus in consilio, deprecatum uenisset, hanc, ut sibi ignoscerem, causam afferebat, quod tanti Ti. Graechum fecisset, ut quicquid ille uellet, sibi faciendum putaret. tum ego, Etiamne, inquam, si te in Capitolium facere ferre uellet? Nunquam, inquit, uoluisset id quidem: sed si uoluisset, paruisssem. Videtis quam nefaria uox: & hercule ita fecit, uel plus etiam quam dixit. non enim paruit ille Ti. Graechi temeritati, sed praefuit: nec se comitem illius furoris, sed ducem praebuit. itaque hac amentia, quaestione noua perterritus, in Asiam profugit: ad hostes se contulit: poenas Reip. graues, iustasque persoluit. Nulla est igitur excusatio peccati, si amici causa peccaueris. nam cum conciliatrix amicitiae uirtutis opinio fuerit, difficile est amicitiam manere, si a uirtute defeceris. quod si rectum statuuerimus, uel concedere amicis, quicquid uelint: uel impetrare ab amicis quicquid uelimus: perfecta quidem sapientia sumus, si nihil habeat res uitij. sed loquimur de ijs amicis, qui ante oculos sunt, quos uidemus, aut de quibus memoria accepimus, quos nouit uita communis. ex hoc numero nobis exempla sumenda sunt, & eorum quidem maxime, qui ad sapientiam proxime accedunt. Videmus Papium AEnalium C. Luscinio familiare fuisse (sic a patribus accepimus) bis una Consules, & collegas in Censura. tum etiam cum ijs, & inter se coniunctissimos fuisse M. Curiū, & T. Coruncanum, memoriae traditum est. igitur ne suspicari quidem possumus, quenquam horum ab amico quippiam contendisse, quod contra fidem, contra iusiurandum, contra Remp. esset. nam hoc

quidem in talibus uiris quid attinet dicere, si contemdisset, scio impetraturum non fuisse: cum illi sanctissimi uiri fuerint: æque autem nefas sit, tale aliquid et facere rogatum, et rogare? At uero Ti. Gracchum sequebantur C. Carbo, C. Cato, et minime tunc quidem C. frater, nunc idem acerrimus hostis. Hæc igitur prima lex in amicitia sancitur, ut neque rogemus res turpes, nec faciamus rogati. turpis enim excusatio est, et minime accipienda, cum in cæteris peccatis, tum si quis contra Remp. se amici causa fecisse fateatur. Etenim eo loco Fanni, et Scaeuola locati sumus, ut nos longe prospicere oporteat futuros casus Reip. deflexit enim iam aliquantulum de spatio, curriculoque consuetudo maiorum. Ti. Gracchus regnum occupare conatus est, uel regnauit is quidem paucos menses. num quid simile populus R. audierat, aut uiderat? hunc etiam post mortem secuti amici, et propinqui, quid in P. Scipionem effecerint, sine lacrymis non queo dicere. nam Carbonem quoque, quem modo posuimus, propter recentem poenam Ti. Gracchi sustinuimus. De C. Gracchi autem Tribunatu quid expectem, non libet augurari. serpit enim deinde res, quæ procliuis ad perniciem, cum semel cœpit, labitur. uidetis in tabella iam ante quantam sit facta labe, primo Gabinia lege, biennio autem post Cassia. Videre iam uideor populum Ro. à Senatu disiunctum, multitudinisque arbitrio res maximas agi. plures enim discunt, quemadmodum hæc fiant, quam quemadmodum his resistatur. Quorsum hæc? quia sine socijs nemo quicquam tale conatur. præcipiendum est igitur bonis, ut si in eiusmodi amicitias ignari casu aliquo inciderint, ne existiment ita se alligatos, ut ab amicis in

magna re aliqua in Rep. peccantibus non discedant. improbis autem pœna statuenda est: nec minor uero ijs qui secuti erunt alterum, quàm ijs qui ipsi fuerint impietatis duces. Quis clarior in Græcia Themistocles? quis potentior? qui cum imperator bello Persico seruitute Græciam liberasset, propterque inuidiam in exilium pulsus esset, ingratae patriæ iniuriam non tulit, quam ferre debuit. fecit idem quod uiginti annis ante apud nos fecerat Coriolanus. his adiutor contra patriam inuentus est nemo: itaque mortem sibi uterque consciuit. Quare talis improborum consensio non modo excusatione amicitiae tegenda non est, sed potius omni supplicio uindicanda: ut nequis sibi concessum putet, amicum bellum patriæ inferentem sequi. quod quidem, ut res ire cœpit, haud scio an aliquando futurum sit. mihi autem non minori curæ est, qualis Respublica post mortem meam futura sit, quàm qualis hodie sit. Hæc igitur prima lex amicitiae sanciat, ut ab amicis honesta petamus, amicorum causa honesta faciamus. nec expectemus quidem, dum rogemur: sed studium semper adsit, cunctatio absit: consilium uerum dare gaudeamus libere. plurimum in amicitia, amicorum bene suadentium ualeat auctoritas: eaque adhibeatur ad monendum non modo aperte, sed etiã acriter, si res postulabit: et adhibitæ pareatur. Nam quibusdam, quos audio sapientes habitos in Græcia, placuisse opinor mirabilia quædam (sed nihil est, quod illi non persequantur suis argutis) partim fugiendas esse nimias amicitias, ne necesse sit, unum sollicitum esse pro pluribus: satis superque esse sibi suarum cuique rerum curam: alienis nimis implicari molestum esse:

commodissimum esse quam laxissimas habenas habere amicitiae, quas uel adducas, cum uelis, uel remittas. caput enim esse ad beate uiuendum securitatem: qua frui non possit animus, si tanquam parturiat unus pro pluribus. Alios autem dicere aiunt etiam multo inhumanius: quem locum breuiter perstrinxi paulo ante: praesidij adiumentique causa, non beneuolentiae, neque charitatis amicitias esse expetendas. itaque ut quisque minimum firmitatis habeat, minimūque uirum, ita amicitias appetere maxime. ex eo fieri ut mulierculae magis amicitiarum praesidia quaerant, quam uiri: & mopes, quam opulenti: & calamitosi, quam ij qui putantur beati. O praeclaram sapientiam! solem enim è manu tollere uidetur, qui amicitiam è uita tollunt: qua nihil à dijs immortalibus melius habemus, nihil iucundius. quae est enim ista securitas? specie quidē blanda, sed re ipsa multis locis repudianda est. neque enim est consentaneū, ullam honestam rem actionēque, ne sollicitus sis, aut non suscipere, aut susceptū deponere. Quod si curam fugimus, uirtus fugienda est, quae necesse est, ut cum aliqua cura res sibi contrarias aspernetur, atque oderit: ut bonitas malitiam, temperantia libidinem, ignauiam fortitudo. Itaque uideas rebus iniustis iustos maxime dolere, imbecilibus fortes, flagitiosis modestos. Ergo hoc propriū est animi bene constituti, & letari bonis rebus, & dolere contrarijs. Quamobrem si cadit in sapientem animi dolor, qui profecto cadit, nisi ex eius animo extirpatam humanitatem arbitremur: quae causa est, ut amicitiam funditus tollamus è uita, ne aliquas propter eā suscipiamus molestias? quid enim interest motu animi sublato, non dico inter pecudem

et hominem, sed inter hominem et saxū, aut trūcum, aut quiduis generis eiusdem? neque enim sunt isti audiendi, qui uirtutem duram, et quasi ferream esse uolunt: quæ quidem est tum multis in rebus, tum in amicitia tenera atque tractabilis: ut ex bonis amici quasi diffundatur, et incommodis contrahatur. Quamobrem angor iste qui pro amico sæpe capiendus est, non tantum ualet, ut tollat è uita amicitiam: non plus quàm ut uirtutes, quia nonnullas curas et molestias afferunt, repudientur. Cum autem contrahat uirtus amicitiam (ut supra dixi) si qua significatio uirtutis eluceat, ad quam se similis animus applicat, et adiungat: id cum contingit, amor ibi exoritur necesse est. quid enim tam absurdum, quàm delectari multis inanibus rebus, ut honore, ut gloria, ut ædificio, ut uestitu, cultūque corporis: animo autem uirtute prædito, eo qui uel amare, uel (ut ita dicam) redamare possit, non admodū delectari? nihil est enim remuneratione beneuolentiæ, nihil uicissitudine studiorū, officiorūque iucundius. Quod si etiam illud addimus, quod recte addi potest, nihil esse quod ad se rem ullam tam alliciat, et tam attrahat, quàm ad amicitia similitudo: concedatur profecto uerum esse, ut bonos boni diligant, asciscantq; sibi quasi propinquitatem coniunctos, atque natura. nihil est enim appetentius similiū sui: nihil rapacius, quàm natura. Quamobrē hoc quidem Fanni et Scaeuola constat (ut opinor) bonis inter bonos quasi necessariam beneuolentiam esse: qui est amicitia fons à natura constitutus. sed eadem bonitas etiam ad multitudinem pertinet. non est enim inhumana uirtus, neque superba: quæ etiam populos uniuersos tueri, eisq; optime cōsulare soleat: quod

• non faceret profecto, si à charitate vulgi abhorreret. Atque etiam mihi quidem videntur, qui utilitatis causa fingunt amicitias, amabiliissimum nodum amicitiae tollere. non enim tam utilitas parata per amicum, quam amici amor ipse delectat: tumque illud fit, quod ab amico est profectum, inuidum, si cum amore & studio est profectum. tantumque abest, ut amicitiae propter indigentiam colantur: ut ij qui opibus & copijs, maximèque uirtute præditi, in qua plurimum est praesidij, minime alterius indigeant, liberalissimi sint & beneficentissimi. Atque haud scio an ne opus sit quidem, nihil unquam omnino deesse amicis. ubi enim studia nostra inuigilant, si nunquam studio, nunquam consilio, nunquam opera nostra nec domi, nec militiae Scipio eguisset? non igitur utilitatem amicitia, sed utilitas amicitiam consecuta est. Non ergo erunt homines diuitijs affluentes audiendi, si quando de amicitia, quam nec usu, nec ratione habent cognita, disputabunt. Nam quis est, pro deum fidem, atque hominum, qui uelit, ut neque diligat quenquam, nec ipse ab ullo diligatur, circumfluere omnibus copijs, atque in omnium rerum abundantia uiuere? haec enim est tyrannorum uita nimirum: in qua nulla fides, nulla charitas, nulla stabilis beneuolentiae potest esse fiducia: omnia semper suspecta atque sollicita, nullus locus est amicitiae. quis enim aut eum diligat, quem metuit: aut eum, à quo se metui putat? colunt tamen simulatione amicitiae duntaxat ad tempus. Quod si forte (ut fit plerumque) ceciderint, tum intelligitur, quam fuerint inopes amicorum. quod Tarquinius dixisse ferunt, tum cum exul esset: se intellexisse, quos fidos amicos habuisset, quosque infidos, cum iam neutris gratiam referre pos-



set. quanquam miror, in illa superbia, et importunitate si quēquam habere potuit. Atque ut huius, quem dixi, mores, ueros amicos parare non potuere: sic multorum opes præpotentium, excludunt amicitias fideles. non enim solū ipsa fortuna cæca est, sed eos etiam plerunque efficit cæcos quos complexa est. itaque illi effervunt fastidio ferè et contumacia: neque quicquam insipiente fortunato intolerabilius fieri potest. Atque hoc quidē uidere licet, eos qui antea commodis fuerunt moribus, imperio, potestate, prosperis rebus immutari: spernūque ab ijs ueteres amicitias, et indulgeri nouis. Quid autem stultius, quā ut plurimum copijs, facultatibus, opibus possint, cætera parare quæ parant, pecuniam, equos, famulos, uestes egregias, uasa pretiosa: amicos non parare, optimam et pulcherrimam uitæ (ut ita dicam) suppellectilem? etenim cætera cum parant, cui parent nesciunt, nec cuius causa laborent. eius enim est istorum quodque, qui uincit uiribus. amicitiarum sua cuique permanet stabilis et certa possessio: ut etiam si illa maneant, quæ sunt quasi dona fortunæ, tamen uita inculta et deserta ab amicis, non possit esse iucunda. sed hæc hæcenus. Constituendi autem sunt qui sint in amicitia fines, et quasi termini diligendi. de quibus tres uideo ferri sententias, quarum nullā probo. unam, ut eodem modo erga amicum affecti simus, quo erga nosmetipsos: alteram, ut nostra in amicos beneuolentia, illorū erga nos beneuolentiæ pariter æqualitèrque respondeat: tertiā, ut quanti quisque se ipse facit, tanti fiat ab amicis. Harū trium sententiarum nulli prorsus assentior. nec enim illa prima uera est, ut quemadmodum in se quisque, sic in anu-

cum sit animatus. quàm multa enim quæ nostra causa nunquam faceremus, facimus causa amicorum? precari ab indigno, supplicare, tum acerbius in aliquem inuehi, insectariq; uehemētius: quæ in nostris rebus, non satis honeste, in amicorum fiunt honestissime. multæ quoque res sunt, in quibus de suis commodis uiri boni multa detrahunt, detrahique patiuntur, ut ijs amici potius quàm ipsi fruatur. Altera sententia est quæ definit amicitia paribus officijs ac uoluntatibus. hoc quidem est nimis exigue & exiliter ad calculos reuocare amicitiam, ut par sit ratio acceptorum & datorum. Ditiior mihi & affluentior uidetur esse uera amicitia, nec obseruare strictè, ne plus reddat, quàm acceperit. neque enim uerendum est nequid excidat, aut nequid in terram defluat, aut ne plus æquo quid in amicitia congeratur. Tertius uero ille finis deterrimus, ut quanti quisque se ipse faciat, tanti fiat ab amicis. sæpe enim in quibusdam aut animus abiectior est, aut spes amplificandæ fortunæ fractior. non est igitur amici, talem esse in eum, qualis ille in se est: sed potius eniti & efficere, ut amici iacentem animum excitet, inducâtque in spem cogitationemque meliorem. Alius igitur finis ueræ amicitiae constituendus est, si prius, quid maxime reprehendere Scipio solitus sit, edixero. negabat ullam uocem inimiciorem amicitiae potuisse reperiri, quàm eius qui dixisset, ita amare oportere, ut aliquando esset osurus. nec uero se adduci posse, ut hoc, quæadmodum putaretur, à Biante dictum esse crederet, qui sapiens habitus esset unus è septem: sed impuri cuiusdam aut ambitiosi, aut omnia ad suam potentiam reuocantis esse sententiam. quoniam enim modo quisquam amicus eius

esse poterit, cuius se putabit inimicum esse posse? quin etiam necesse erit cupere, etiam optare, ut quam sæpissime peccet amicus, quo plures det sibi tanquā ansas ad reprehendendum. rursus autem recte factis, commodisque amicorū necesse erit angere, dolere, inuidere. Quare hoc quidem præceptum, cuiuscunque est, ad tollendam amicitiam ualeat. Illud potius præcipiendum fuit, ut eam diligentiam adhiberemus in amicitijs comparandis, ut nequando amare inciperemus eū quem aliquando odisse possemus. quinetiam si minus felices in deligendo fuisset, ferendum id Scipio potius, quàm ininuciarum tempus cogitandum putabat. His igitur finibus utendum arbitror, ut cum emendati mores amicorum sint, tum sit inter eos omnium rerum, consiliorum, & uolūtatum sine ulla exceptione communitas: & si qua fortuna acciderit, ut minus iustæ amicorum uoluntates sint adiuuandæ, in quibus eorū aut de capite agatur, aut fama, declinandū sit de uia, modo ne summa turpitudine sequatur. est enim quatenus amicitiae dari uenia possit. nec uero negligenda est fama: nec mediocre telum ad res gerendas existimare oportet beneuolentiā ciuium, quam blanditijs & assentationibus colligere turpe est. uirtus quam sequitur charitas, minime repudianda est. Sed (sæpe enim redeo ad Scipionem, cuius omnis sermo erat de amicitia) querebatur, quòd in omnibus rebus homines diligentiores essent, capras & oves quot quisque haberet, dicere posset: amicos quot haberet, nō posse dicere. & in illis quidem parandis adhibere curā, in amicis eligendis negligentes esse: nec habere quasi signa quædam, & notas, quibus eos qui ad amicitia essent idonei, iudicarent.

Sunt igitur firmi, & stabiles, & constantes deligendi: cuius generis est magna penuria: & iudicare difficile est sanè nisi expertum. experiendum autem est in ipsa amicitia: ita præcurrit amicitia iudicium, tollitq; experiendi potestatem. Est igitur prudētis sustinere, ut cursum, sic impetum beneuolentiæ, quo utamur quasi a quis tētatis, sic amicitij, aliqua parte periclitatis moribus amicorū. quidam sæpe in parua pecunia perspicuntur quàm sint leues. quidā autem, quos parua mouere non potuit, cognoscuntur in magna. si uero erunt aliqui reperti qui pecuniam præferre amicitiae sordidum existimēt: ubi eos inueniemus qui honores, magistratus, imperia, potestates, opes amicitiae non anteponant: ut cum ex altera parte proposita hæc sint: ex altera uis amicitiae, non multo illa malint? Imbecilla enim natura est ad contemnendam potentiam: quam etiā si neglecta amicitia consecuti sunt, excusari se arbitrantur, quia non sine magna causa sit neglecta amicitia. Itaque ueræ amicitiae difficillime reperiuntur in ijs qui in honoribus, Rēq; publica uersantur. ubi enim isti inuenias qui honorē amici anteponat suo? Quid? (hæc ut omittam) quàm graues, quàm difficiles plerisque uidentur calamitatum societates? ad quas, non est facile inuentus, qui descendat. quanquam Ennius recte,

” Amicus certus in re incerta cernitur.

tamen hæc duo leuitatis, & infirmitatis plerosque conuincunt: aut si in bonis rebus continentur, aut si in malis deserunt. Qui igitur utraque in re grauem, constantem, stabilem se in amicitia præstiterit, hunc ex maxime raro hominū genere iudicare debemus, & penè diuino. Firmamentū autem stabilitatis, constantieq; eius

quam in amicitia quærimus, fides est. nihil enim stabili  
est, quod infidum est. simplicem præterea, & com-  
munem, & consentientem, id est qui rebus iisdem mo-  
ueatur, eligi par est: quæ omnia pertinent ad fidelita-  
tem. neque enim fidum potest esse multiplex ingeniū,  
& tortuosum: neque uero qui non iisdem rebus moue-  
tur, & natura consentit, aut fidus, aut stabilis potest es-  
se. Addendum eodem est, ut ne criminibus aut inferen-  
dis delectetur amicus, aut credat illatis. quæ pertinent  
omnia ad eam quam iandudum tracto, constantiam.  
Ita sit uerū illud quod initio dixi, amicitiam nisi inter  
bonos esse non posse. est enim boni uiri, quem eundem  
sapientem licet dicere, hæc duo tenere in amicitia: pri-  
mum, nequid fictum sit, néue simulatum (aperte enim  
uel odisse magis ingenuum est, quam fronte occultare  
sententiam) deinde non solum ab aliquo oblatas crimi-  
nationes depellere, sed ne ipsum quidē esse suspiciosum,  
semper aliquid existimantem ab amico esse uiolatum.  
Accedat huc suauitas quædam oportet sermonum, at-  
que morum, haudquaquam mediocri condimentum a-  
micitiæ. Tristitia autem, & in omni re seueritas absit.  
habet illa quidem grauitatem: sed amicitia remissior  
esse debet & liberior, & dulcior, & ad omnem comi-  
tatem, facilitatēq; procliuior. Existit autem hoc loco  
quædam quæstio subdifficilis: num quando amici noui,  
digni amicitia, ueteribus sint anteponendi, ut equis ue-  
tulis teneros anteponere solemus. indigna homine dubi-  
tatio. non enim amicitiarū esse debent, sicut aliarū re-  
rum satietates: ueterrimæ quæque (ut ea uina quæ ue-  
tustatem ferunt) esse debent suauissimæ: uerūq; illud  
est, quod uulgo dicitur, Multos modios salis simul eden

dos esse, ut amicitiae munus expletum sit. nouitates autem, si spem asserunt, ut tanquam in herbis non fallacibus fructus appareat, non sunt illae quidem repudiandae, uetustas tamen suo loco conseruanda est. maxima est enim uis uetustatis, et consuetudinis. atqui in ipso equo cuius modo mentionem feci, si nulla res impediatur, nemo est, qui non eo quo consueuit libetius utatur, quam intractato et nouo. nec modo in hoc, quod est animal, sed in ijs etiam quae sunt inanimata, consuetudo ualet: cum locis etiam ipsis motosis delectemur, et siluestribus, in quibus diutius comorati sumus. Sed maximum est in amicitia superiorem parem esse inferiori. saepe enim excellentiae quaedam sunt, qualis erat Scipionis in nostro (ut ita dicam) grege. nunquam se ille Philo, nunquam Rutilio, nunquam Mummio anteposuit, nunquam inferioris ordinis amicis. Quintum uero Maximum fratrem, egregium uirum, omnino sibi nequaquam parem: quod is anteibat aetate, tanquam superiorem colebat: suosque omnes per se esse posse ampliores uolebat. Quod faciendum imitandumque est omnibus: ut siquam praestantiam uirtutis, ingenij, fortunae consecuti sunt, impartiant eam suis, communicentque cum proximis. ut si parentibus nati sunt humilibus, si propinquos habeant imbecilliores uel animo uel fortuna, eorum augeant opes, eisque honori sint, et dignitati: ut in fabulis, qui aliquandiu propter ignorantiam stirpis et generis in famulatu fuerint, cum cogniti sunt, et aut deorum, aut regum filij inuenti, retinent tamen charitatem in pastores, quos patres suos multos annos esse duxerunt. Quod quidem est multo profecto magis in ueris patribus certisque faciendum. fructus enim in-

genij & uirtutis, omnisque præstantiæ tum maxime capitur, cum in proximum quenque confertur. Ut igitur ij qui sunt in amicitia, coniunctionisque necessitudine superiores, exæquare se cum inferioribus debent: sic inferiores dolere non debent, se à suis amicis aut ingenio, aut fortuna, aut dignitate superari. quorum plerique aut queruntur semper aliquid, aut etiam exprobrant, eoque magis, si aliquid habere se putant, quod officiose, aut amice, & cum labore aliquo suo factum queant dicere. Odiosum sanè genus hominum officia exprobrantium, quæ meminisse debet is in quem collata sunt, non commemorare qui contulit. Quãobrem ut ij qui superiores sunt, summittere se debent in amicitia, sic quodammodo inferiores extollere. sunt enim quidam qui molestas amicitias faciunt, cum ipsi se contemni putant: quod non ferè contingit, nisi ijs qui etiam contemnendos se arbitrantur: qui hac opinione non modo uerbis, sed etiam opere leuandi sunt. Tantum autem cuique tribuendum est, primum quantum ipse efficere possis: deinde etiam quantum ille quem diligas, atque adiues, possit sustinere. non enim tu possis, quãtumuis licet excellas, omnes tuos ad honores amplissimos perducere: ut Scipio P. Rutilium potuit Consulem efficere, fratrem eius Lucium non potuit. quòd si etiam possis quiduis deferre ad alterum: uidendum est tamen quid ille possit sustinere. Omnino amicitia corroboratis iam, confirmatisque & ingenijs & ætati- bus iudicandæ sunt: nec si qui ineunte ætate uenandi, aut pilæ studiosi fuerint, eos habere necessarios oportet, quos tum eodem studio præditos dilexerunt. isto enim modo nutrices & pædagogi iure uetustatis pluri-



mum beneuolētiæ postulabunt: qui negligendi quidem  
 non sunt, sed alio quodam modo colendi. aliter enim  
 amicitie stabiles permanere nō possunt. disparēs enim  
mores disparia studia sequuntur: quorum dissimilitu-  
 do dissociat amicitias. nec ob aliam causam ullam bo-  
 ni improbis, improbi bonis amici esse non possunt, ni-  
 si quod tanta est inter eos, quanta maxima potest esse  
 morum studiorūque distantia. Recte etiam præcipi  
 potest in amicitijs, nequis intemperata quadam bene-  
 uolentia (quod per sæpe fit) impediāt magnas utilitates  
 amicorum. nec enim (ut ad fabulas redeam) Troiam  
 Neoptolemus capere potuisset, si Lycomedē, apud quem  
 erat educatus, multis cum lacrymis iter suum impedi-  
 entem audire uoluisset. Et sæpe incidunt magnæ res,  
 ut discēdū sit ab amicis: quas qui impedire uult,  
 quod desiderium non facile ferat, is et infirmus est,  
 mollisq; natura, et ob eam ipsam causam in amicitia  
 parum iustus. Atque in omni re considerandum est,  
 et quid postules ab amico, et quid patiare à te impe-  
 trari. Est etiam quasi quædam calamitas in amicitijs  
 dimittendis nonnunquam necessaria. iam enim à sa-  
 pientum familiaritatibus ad uulgares amicitias ora-  
 tio nostra delabitur. Erumpunt sæpe uitia amicorum  
 tum in ipsos amicos, tum in alienos: quorum tamen ad  
 amicos redundet infamia. tales igitur amicitie sunt  
 remissione usus elenādæ, et (ut Catonem dicere audi-  
 ui) dissuendæ magis, quàm discindendæ sunt: nisi quæ-  
 dam admodum intolerabilis iniuria exarserit, ut ne-  
 que rectum, neque honestum sit, neq; fieri possit, ut non  
 statim alienatio, disiunctioque faciēda sit. si autem  
 morum aut studiorum commutatio quædam (ut fieri

solet) facta erit, aut in Reip. partibus dissensio inter-  
 cesserit (loquor enim ut paulo ante dixi, non de sapien-  
 tum, sed de communibus amicitijs) cauendum erit, ne  
 non solum amicitiae depositae, sed inimicitiae etiam su-  
 sceptrae uideantur. nihil enim turpius, quàm cum eo  
 bellum gerere, quicum familiariter uixeris. Ab amicitia  
 Q. Pompeij meo nomine se remouerat (ut scitis) Sci-  
 pio. propter dissensionem autem quae erat in Rep. a-  
 lienatus est à collega nostro Metello, utrumque egit gra-  
 uiter, auctoritate & offensione animi non acerba.  
 Quamobrem primum danda opera est, nequa amico-  
 rum dissidia fiant. sin tale aliquid euenierit: ut extin-  
 ctæ potius amicitiae, quàm oppressæ uideantur. Cauen-  
 dum uero est, ne etiā in graues inimicitias conuertant  
 se amicitiae: è quibus iurgia, maledicta, contumeliae gi-  
 gnuntur. quae tamen si tolerabiles erunt, ferendae sunt:  
 & hic honos ueteri amicitiae tribuendus est, ut is in cul-  
 pa sit qui faciat, non qui patiatur iniuriam. Omnino  
 omnium horum uitiorum, atque incommodorum una  
 cautio est, atque una prouisio: ut ne nimis cito diligere  
 incipiamus, neue indignos. Digni autem sunt amicitia,  
quibus in ipsis inest causa cur diligantur. Rarum istud  
 genus: & quidē omnia praecleara rara: nec quicquam  
 difficilius, quàm reperire, quod sit omni ex parte in  
 suo genere perfectum. sed plerique neque in rebus hu-  
 manis quicquam bonum norūt, nisi quod fructuosum  
 sit: & amicos, tanquam pecudes, eos potissimum dili-  
 gunt, ex quibus sperant se maximum fructum esse ca-  
 pturos. itaque pulcherrima illa, & maxime naturali  
 carent amicitia, per se & propter se expetenda: nec  
 ipsi sibi exēplo sunt, haec uis amicitiae qualis & quan-

ta sit. ipse enim se quisque diligit, non ut aliquam à se ipso mercedem exigat charitatis suæ, sed quòd per se sibi quisque charus est: quod nisi idem in amicitiam transferatur, uerus amicus nunquam reperietur. est enim is amicus quidem, qui est tanquam alter idem. Quòd si hoc apparet in bestijs, uolucris, agrestibus, natantibus, cicuribus, feris, primum ut se ipsæ diligant: (id enim pariter cum omni animante nascitur) deinde ut requirant, atque appetant, ad quas se applicent eiusdem generis animantes: idque faciunt cum desiderio, & cum quadã similitudine amoris humani: quanto id magis in homine sit natura, qui & se ipse diligit, & alterum acquirit, cuius animum ita cum suo commisceat, ut efficiat penè unum ex duobus? Sed plerique peruerse, ne dicam impudenter, amicum habere talem uolunt, quales ipsi esse non possunt: quæque ipsi non tribuunt amicis, hæc ab ijs desiderant. Par est autem primum ipsum esse uirum bonum, tum alterum similem sui querere. in talibus ea quam iam dudum tractabamus, stabilitas amicitiae confirmari potest: cum homines beneuolentia coniuncti, primum cupiditatibus ijs quibus ceteri seruiunt, imperabunt: deinde æquitate iustitiæque gaudebunt: omniæque alter pro altero suscipiet, neque quicquam unquam nisi honestum & rectum alter ab altero postulabit: neque solum colent se inter se ac diligunt, sed etiam uerebuntur. nam maximum ornamentum amicitiae tollit, qui ex ea tollit uerecundiam. Itaque in ijs perniciosus est error, qui existimant libidinum peccatorumque omnium patere in amicitia licentiam. uirtutum enim amicitia adiutrix à natura data est, non uitiorum comes: ut quo-

niam solitaria non posset uirtus ad ea quæ summa sunt peruenire, coniuncta & consociata cum altera perueniret. quæ siquos inter societas aut est, aut fuit, aut futura est: eorum est habendus ad summum naturæ bonum optimus beatissimisque comitatus. hæc est inquam societas, in qua omnia insunt, quæ putant homines expetenda: honestas, gloria, tranquillitas animi, atque iucunditas: ut cum hæc adsint, beata uita sit, & sine his esse non possit. Quod cum optimum, maximūq; sit, si id uolumus adipisci, uirtuti opera danda est: sine qua neque amicitiam, neque ullam rem expetendam consequi possumus: ea uero neglecta, qui se amicos habere arbitrantur, tum se denique errasse sentiunt, cum eos grauis aliquis casus experiri cogit. Quocirca (dicendū est enim sæpius) cum iudicaueris, diligere oportet: non cum dilexeris, iudicare. sed cum multis in rebus negligentia plectimur, tum maxime in amicis & deligendis, & colendis. præposteris enim utimur consilijs, & acta agimus: quod uetatur ueteri prouerbio. nam implicati ultro & citro uel usu diuturno, uel etiam officijs, repente in medio cursu amicitias, exorta aliqua offensione dirumpimus. quo etiam magis uituperanda est rei tam maxime necessariæ tanta incuria. Vna est enim amicitia in rebus humanis, de cuius utilitate omnes uno ore consentiunt. quāquam à multis ipsa uirtus contemnitur, & uenditatio quedam atque ostentatio esse dicitur. multi diuitias despicunt, quos paruo contentos tenuis uictus cultusque delectat: honores uero, quorū cupiditate quidam inflammantur, quā multi ita contemnunt, ut nihil inanius, nihil esse leuius existiment: itēque cætera, quæ qui-

busſam admirabilia uidentur, permulti ſunt qui pro nihilo putent: de amicitia omnes ad unum idem ſentiant, & ij qui ad Rēp. ſe contulerunt, & ij qui rerum cognitione doctrināq; delectantur, & ij qui ſuum negotium gerūt otioſe, poſtremo ij qui ſe totos tradiderūt uoluptatibus: ſine amicitia uitam eſſe nullam, ſi modo uelint aliqua ex parte liberaliter uiuere. ſerpit enim neſcio quo modo per omnium uitam amicitia: nec ullam ætatis degendæ rationem patitur eſſe expertē ſui. Quinetiā ſiquis ea aſperitate eſt & immanitate naturæ, ut congreſſus, ſocietatemq; hominū fugiat, atque oderit, qualē fuiſſe Athenis Timonem neſcio quem accipimus: tamē is pati non poſſit, ut non acquirat aliquē, apud quem euomat uirus acerbitalis ſuæ. atq; hoc maxime indicaretur, ſiquid tale poſſet contingere, ut aliquis nos deus ex hac hominū frequentia tolleret, & in ſolitudine uſpiā collocaret: atque ibi ſuppeditans omnium rerū quas natura deſiderat, abundantiā & copiam, hominis omnino aſpiciendi poteſtatem eriperet. quis tam eſſet ferreus, qui eam uitā ferre poſſet? cuique non auferret fructum uoluptatum omnium ſolitudo? Verum igitur illud eſt, quod à Tarentino Archyta (ut opinor) dici ſolitum noſtros ſenes cōmemorare audiui, ab alijs ſenibus auditum: Siquis cælū aſcendiſſet, naturamque mundi & pulchritudinem ſiderum perſpexiſſet, inſuauem illam admirationem ei fore, quæ iucundiſſima fuiſſet, niſi aliquē cui narraret, habuiſſet. Sic natura ſolitarium nihil amat, ſemp̄erque ad aliquod tanquam adminiculum annititur, quod in amiſſiſſimo quoque dulciſſimum eſt. ſed cum tot ſignis eadem natura declaret, quid uelit ac quærat, quid deſideret:

obsurdescimus tamen nescio quo modo, nec ea quæ ab ea monemur, audimus. est enim uariius & multiplex usus amicitiae, multæq; causæ suspicionū offensionūque dātur: quas tam euitare, tum eleuare, tum ferre sapientis est. una illa subleuanda offensio est, ut & utilitas in amicitia & fides retineatur. nam & monendi amici sæpe sunt & obiurgandi: & hæc accipienda amice cum beneuole fiunt. Sed nescio quo modo uerum est, quod in Andria familiaris meus Terentius dixit:

” Obsequium amicos, ueritas odium parit.

molesta ueritas est, si quidem ex ea nascitur odiū, quod est uenenum amicitiae: sed obsequium multo molestius, quod peccatis indulgens præcipitem amicum ferri sinnit. Maxima autem culpa in eo est, qui & ueritatem aspernatur, & in fraudē obsequio impellitur. Omnis igitur hac in re habenda ratio & diligentia est, primum ut monitio acerbitate, deinde obiurgatio contumelia careat. in obsequio autem (quoniam Terentiano uerbo libenter utimur) comitas adsit, assentatio uitiorum adiutrix procul amoueatur: quæ non modo amico, sed ne libero quidem digna est. aliter enim cum tyranno, aliter cum amico uiuitur. Cuius autem aures clausæ ueritati sunt, ut ab amico uerum audire nequeant: huius salus desperanda est. scitum est enim illud Catonis, Multo melius de quibusdam acerbos inimicos mereri, quàm eos amicos qui dulces uideantur: illos uerum sæpe dicere, hos nūquam. Atque illud absurdum est, quod ij qui monentur, eam molestiam quam debent capere non capiunt: eam capiunt, qua debent carere. peccasse enim se non anguntur: obiurgari moleste ferunt. quod contra oportebat, delicto dolere, obiurga-

tione gaudere. Vt igitur & monere, & moneri proprium est uerae amicitiae: & alterum libere facere, non asperere: alterum patienter accipere, non repugnanter: sic habendum est, nullam in amicitijs pestem esse maiorem, quàm adulationem, blanditias, assentationem. quanuis enim multis nominibus est hoc uitium notandum, leuium hominum atque fallacium, ad uoluntatem loquētium omnia, nihil ad ueritatem. Cum autē omnium rerum simulatio est uitiosa, (tollit enim iudicium ueri, idq; adulterat) tum amicitiae repugnat maxime. delet enim ueritatem, sine qua nomen amicitiae ualere non potest. nam cum amicitiae uis sit in eo, ut unus quasi animus fiat ex pluribus: qui id fieri potest, si ne in uno quidem unus animus erit, idēque semper, sed uarius, commutabilis, multiplex? Quid enim potest esse tam flexibile, tam deuium, quàm animus eius, qui ad alterius non modo sensum ac uoluntatem, sed etiam uultum, atque nutum conuertitur?

- „ Negat qs, nego: ait, aio. postremo imperaui egomet mihi  
 „ Omnia assentari:

ut ait idem Terentius: sed ille sub Gnatonis persona: quod amici genus adhibere, omnino leuitatis est. Multi autem Gnatonum similes cum sint, loco, fortuna, fama superiores: horū est assentatio molesta, cum ad uanitatem accessit auctoritas. scerni autem blandus amicus à uero, & internosci tam potest adhibita diligentia, quàm omnia fucata, & simulata à sinceris atque ueris. concio quæ ex imperitissimis constat, tamen iudicare solet, quid intersit inter popularem, id est assentatorem, & leuem ciuem, & inter constantem, seuerum, & grauem. Quibus blanditijs C. Papirius Cos.



nuper influebat in aures concionis, cum ferret legem de Tribunis pl. reficiendis? dissuasimus nos. sed nihil de me: de Scipione dicam libentius. Quanta illi, dij immortales, fuit gravitas, quanta in oratione maiestas: ut facile ducem populi R. non comitem diceres? sed affuisti: & est in manibus oratio. itaque lex popularis suffragijs populi repudiata est. Atque (ut ad me redeam) meministi, Q. Maximo fratre Scipionis, & L. Mancino Coss. quàm popularis lex de sacerdotijs C. Licinij Crassi uidebatur. cooptatio enim collegiorum ad populi beneficium transferebatur. atque is primum instituit in forum uersus agere cum populo. tamen illius uendibilem orationem, religio deorum immortalium nobis defendentibus facile uincebat. atque id actum est Prætor me, quinquennio ante, quàm Consul sum factus. itaque re magis quàm auctoritate causa illa defensa est. Quod si in scena, id est in concione, in qua rebus fictis & adumbratis loci plurimum est, tamen uerum ualet, si modo id patefactum, & illustratum est: quid in amicitia fieri oportet, quæ tota ueritate perpenditur? in qua nisi (ut dicitur) apertum amici pectus uideas, tuumque ostendas, nihil fidum, nihil exploratum habeas, ne amare quidem, aut amari possis, cum id quàm uere fiat, ignores. quanquam ista assentatio perniciosa sit, nocere tamen nemini potest, nisi ei qui eam recipit, atque ea delectatur. ita fit ut is assentatoribus patefaciat aures suas maxime, qui ipse sibi assentetur, & se maxime ipse delectet. Omnino est amans sui uirtus: optime enim se ipsa nouit: quàmque amabilis sit, intelligit. ego autem non de uirtute nunc loquor, sed de uirtutis opinione. uirtute

enim ipsa non tam multi præditi esse, quàm uideri uolunt. Hos delectat assentatio: his fictus ad eorum uoluntatem sermo cum adhibetur, orationem illam uanam testimonium esse laudum suarum putant. Nulla est igitur hæc amicitia, cum alter uerū audire non uult, alter ad mentiendum paratus est. nec parasitorū in comœdijs assentatio nobis faceta uideretur, nisi essent milites gloriosi.

- .. Magnas uero agere gratias Thais mihi?

Satis erat respondere, Magnas: Ingentes, inquit. Semper auget assentatio id, quod is, cuius ad uoluntatem dicitur, uult esse magnum. Quamobrem, quanuis blanda ista uanitas apud eos ualeat, qui ipsi illam allectant, & inuitant: tamen etiam grauiores, constantioreſque admonendi sunt, ut animaduertant, ne callida assentatione capiantur. aperte enim adulantem nemo non uidet, nisi qui admodum est excors: callidus ille, & occultus ne se insinuet, studioſe cauendum est. nec enim facillime agnoscitur, quippe qui aduersando sæpe assentetur, & litigare se simulans blanditur, atque ad extremum det manus, uincique se patitur, ut is qui illusus sit, plus uicisse uideatur. Quid autem turpius quàm illudi? quod ne accidat, magis cauendum est: ut in Epicureo,

- .. Hodie me ante omnis comicos stultos senes

- .. Versaris, atque luseris lautissime.

hæc enim in fabulis stultissima persona est improvidorum, & credulorum senum. Sed nescio quo pacto ab amicitijs perfectorum hominum, id est sapientum (de hac dico sapientia, quæ uidetur in hominem cadere posse) ad leues amicitias deflexit oratio. Quamob-

esse poterit, cuius se putabit inimicum esse posse? quin etiam necesse erit cupere, etiam optare, ut quam sæpissime peccet amicus, quo plures det sibi tanquā ansas ad reprehendendum. rursum autem recte factis, commodisque amicorū necesse erit angere, dolere, invidere. Quare hoc quidem præceptum, cuiuscunque est, ad tollendam amicitiam ualet. Illud potius præcipiendum fuit, ut eam diligentiam adhiberemus in amicitijs comparandis, ut nequando amare inciperemus eū quem aliquando odisse possemus. quinetiam si minus felices in deligendo fuisset, ferendum id Scipio potius, quàm inimicitiarum tempus cogitandum putabat. His igitur finibus utendum arbitror, ut cum emendati mores amicorum sint, tum sit inter eos omnium rerum, consiliorum, & uolūtatum sine ulla exceptione communitas: & si qua fortuna acciderit, ut minus iustæ amicorum uoluntates sint adiuuandæ, in quibus eorū aut de capite agatur, aut fama, declinandū sit de uia, modo ne summa turpitudine sequatur. est enim quatenus amicitiae dari uenia possit. nec uero negligenda est fama: nec mediocre telum ad res gerendas existimare oportet beneuolentiā ciuium, quam blanditijs & assentationibus colligere turpe est. uirtus quam sequitur charitas, minime repudianda est. Sed (sæpe enim redeo ad Scipionem, cuius omnis sermo erat de amicitia) querebatur, quòd in omnibus rebus homines diligentiores essent, capras & oves quot quisque haberet, dicere posset: amicos quot haberet, nō posse dicere. & in illis quidem parandis adhibere curā, in amicis eligendis negligentes esse: nec habere quasi signa quedam, & notas, quibus eos qui ad amicitia essent idonei, iudicarent.

Sunt igitur firmi, & stabiles, & constantes deligendi: cuius generis est magna penuria: & iudicare difficile est sanè nisi expertum. experiendum autem est in ipsa amicitia: ita præcurrit amicitia iudicium, tollitq; experiendi potestatem. Est igitur prudētis sustinere, ut airsum, sic impetum benevolentiae, quo utamur quasi a quis tētatis, sic amicitijs, aliqua parte periclitatis moribus amicorū. quidam sæpe in parua pecunia perspicuntur quàm sint leues. quidā autem, quos parua mouere non potuit, cognoscuntur in magna. si uero erunt aliqui reperti qui pecuniam præferre amicitiae sordidum existimēt: ubi eos inueniemus qui honores, magistratus, imperia, potestates, opes amicitiae non anteponant: ut cum ex altera parte proposita hæc sint: ex altera uis amicitiae, non multo illa malim? Imbecilla enim natura est ad contemnendam potentiam: quam etiā si neglecta amicitia consecuti sunt, excusari se arbitrantur, quia non sine magna causa sit neglecta amicitia. Itaque uerae amicitiae difficillime reperiuntur in iis qui in honoribus, Rēq; publica uersantur. ubi enim istis inuenias qui honorē amici anteponat suo? Quid? (hæc ut omittam) quàm graues, quàm difficiles plerisque uidentur calamitatum societates? ad quas, non est facile inuentus, qui descendat. quanquam Ennius recte,

“ Amicus certus in re incerta cernitur:

tamen hæc duo leuitatis, & infirmitatis plerosque conuincant: aut si in bonis rebus continent, aut si in malis deserunt. Qui igitur utraque in re grauem, constantem, stabilem se in amicitia præstiterit, hunc ex maxime raro hominū genere iudicare debemus, & penè diuino. Firmamentū autem stabilitatis, constantieq; eius

quam in amicitia quærimus, fides est. nihil enim stabili  
est, quod infidum est. simplici præterea, & com-  
munem, & consentientem, id est qui rebus iisdem mo-  
ueatur, eligi par est: quæ omnia pertinent ad fidelita-  
tem. neque enim fidum potest esse multiplex ingeniū,  
& tortuosum: neque uero qui non iisdem rebus moue-  
tur, & natura consentit, aut fidus, aut stabilis potest es-  
se. Addendum eodem est, ut ne criminibus aut inferen-  
dis delectetur amicus, aut credat illatis. quæ pertinent  
omnia ad eam quam iandudum tracto, constantiam.  
Ita fit uerū illud quod initio dixi, amicitiam nisi inter  
bonos esse non posse. est enim boni uiri, quem eundem  
sapientem licet dicere, hæc duo tenere in amicitia: pri-  
mum, nequid fictum sit, néue simulatum (aperte enim  
uel odisse magis ingenuum est, quam fronte occultare  
sententiam) deinde non solum ab aliquo oblatas crimi-  
nationes depellere, sed ne ipsum quidē esse suspiciosum,  
semper aliquid existimantem ab amico esse uiolatum.  
Accedat huc suauitas quædam oportet sermonum, at-  
que morum, haudquaquam mediocre condimentum a-  
micitiae. Tristitia autem, & in omni re seueritas absit.  
habet illa quidem grauitatem: sed amicitia remissior  
esse debet & liberior, & dulcior, & ad omnem comi-  
tatem, facilitatēq; procliuior. Existit autem hoc loco  
quædam quæstio subdifficilis: num quando amici noui,  
digni amicitia, ueteribus sint anteponendi, ut equis ue-  
tulis teneros anteponere solemus. indigna homine dubi-  
tatio. non enim amicitiarū esse debent, sicut aliarū re-  
rum satietates: ueterrimæ quæque (ut ea uina quæ ue-  
tustatem ferunt) esse debent suauissimæ: uerūq; illud  
est, quod uulgo dicitur, Multos modios salis simul eden

dos esse, ut amicitiae munus expletum sit. nouitates autem, si spem afferunt, ut tanquam in herbis non fallacibus fructus appareat, non sunt illae quidem repudiandae, uetustas tamen suo loco conseruanda est. maxima est enim uis uetustatis, et consuetudinis. atqui in ipso equo cuius modo mentionem feci, si nulla res impediat, nemo est, qui non eo quo consuevit libetius utatur, quam intractato et nouo. nec modo in hoc, quod est animal, sed in ijs etiam quae sunt inanimata, consuetudo ualet: cum locis etiam ipsis motosis delectemur, et siluestribus, in quibus diutius comorati sumus. Sed maximum est in amicitia superiorem parem esse inferiori. saepe enim excellentiae quaedam sunt, qualis erat Scipionis in nostro (ut ita dicam) grege. nunquam se ille Philo, nunquam Rutilio, nunquam Mummio anteposuit, nunquam inferioris ordinis amicis. Quintum uero Maximum fratrem, egregium uirum, omnino sibi nequaquam parem: quod is anteibat aetate, tanquam superiorem colebat: suosque omnes per se esse posse ampliores uolebat. Quod faciendum imitandumque est omnibus: ut siquam praestantiam uirtutis, ingenij, fortunae consecuti sunt, impartiant eam suis, communicentque cum proximis. ut si parentibus nati sunt humilibus, si propinquos habeant imbecilliores uel animo uel fortuna, eorum augeant opes, eisque honori sint, et dignitati: ut in fabulis, qui aliquandiu propter ignorantiam stirpis et generis in famulatu fuerint, cum cogniti sunt, et aut deorum, aut regum filij inuenti, retinent tamen charitatem in pastores, quos patres suos multos annos esse duxerunt. Quod quidem est multo profecto magis in ueris patribus certisque faciendum. fructus enim in-

genij & uirtutis, omnisque præstantiæ tum maxime capitur, cum in proximum quenque confertur. Ut igitur ij qui sunt in amicitia, coniunctionisque necessitudine superiores, exæquare se cum inferioribus debent: sic inferiores dolere non debent, se à suis amicis aut ingenio, aut fortuna, aut dignitate superari. quorum plerique aut queruntur semper aliquid, aut etiam exprobrant, eoque magis, si aliquid habere se putant, quod officiose, aut amice, & cum labore aliquo suo factum queant dicere. Odiosum sanè genus hominum officia exprobrantium, quæ meminisse debet is in quem collata sunt, non commemorare qui contulit. Quãobrem ut ij qui superiores sunt, summittere se debent in amicitia, sic quodammodo inferiores extollere. sunt enim quidam qui molestas amicitias faciunt, cum ipsi se contemni putant. quod non ferè contingit, nisi ijs qui etiam contemnendos se arbitrantur: qui hac opinione non modo uerbis, sed etiam opere leuandi sunt. Tantum autem cuique tribuendum est, primum quantum ipse efficere possis: deinde etiam quantum ille quem diligas, atque adiues, possit sustinere. non enim tu possis, quãtumuis licet excellas, omnes tuos ad honores amplissimos perducere: ut Scipio P. Rutilium potuit Consulem efficere, fratrem eius Lucium non potuit. quod si etiam possis quiduis deferre ad alterum: uidendum est tamen quid ille possit sustinere. Omnino amicitia corroboratis iam, confirmatisque & ingenijs & ætatibus indicandæ sunt: nec siqui ineunte ætate uenandi, aut pilæ studiosi fuerint, eos habere necessarios oportet, quos tum eodem studio præditos dilexerunt. isto enim modo nutrices & pædagogi iure uetustatis pluri-



mum beneuolētiæ postulabunt: qui negligendi quidem  
 non sunt, sed alio quodam modo colendi. aliter enim  
 amicitiae stabiles permanere nō possunt. disparēs enim  
mores disparia studia sequuntur: quorum dissimilitu-  
do dissociat amicitias. nec ob aliam causam ullam bo-  
 ni improbis, improbi bonis amici esse non possunt, ni-  
 si quòd tanta est inter eos, quanta maxima potest esse  
 morum studiorumque distantia. Recte etiam præcipi  
 potest in amicitijs, nequis intemperata quadam bene-  
 uolentia (quod persæpe fit) impediatur magnas utilitates  
 amicorum. nec enim (ut ad fabulas redeam) Troiam  
 Neoptolemus capere potuisset, si Lycomedē, apud quem  
 erat educatus, multis cum lacrymis iter suum impedi-  
 entem audire uoluisset. & sæpe incidunt magnæ res,  
 ut discedendum sit ab amicis: quas qui impedire uult,  
 quòd desiderium non facile ferat, is & infirmus est,  
 mollisq; natura, & ob eam ipsam causam in amicitia  
 parum iustus. Atque in omni re considerandum est,  
 & quid postules ab amico, & quid patiari à te impe-  
 trari. Est etiam quasi quædam calamitas in amicitijs  
 dimittendis nonnunquam necessaria. iam enim à sa-  
 pientum familiaritatibus ad uulgares amicitias ora-  
 tio nostra delabitur. Erumpunt sæpe uitia amicorum  
 tum in ipsos amicos, tum in alienos: quorum tamen ad  
 amicos redundet infamia. tales igitur amicitiae sunt  
 remissione usus eleuandæ, & (ut Catonem dicere audi-  
 ui) dissuendæ magis, quàm discindendæ sunt: nisi quæ-  
 dam admodum intolerabilis iniuria exarserit, ut ne-  
 que rectum, neque honestum sit, neq; fieri possit, ut non  
 statim alienatio, disiunctioque facienda sit. si autem  
 morum aut studiorum commutatio quædam (ut fieri

solet) facta erit, aut in Reip. partibus dissensio inter-  
 cesserit (loquor enim ut paulo ante dixi, non de sapien-  
 tum, sed de communibus amicitijs) cauendum erit; ne  
 non solum amicitiae depositae, sed inimicitiae etiam su-  
 scepthae uideantur. nihil enim turpius, quam cum eo  
bellum gerere, quicum familiariter uixeris. Ab amicitia  
 Q. Pōpeij meo nomine se remouerat (ut scitis) Sci-  
 pio. propter dissensionem autem quae erat in Rep. a-  
 lienatus est à collega nostro Metello, utrunque egit gra-  
 uiter, auctoritate & offensione animi non acerba.  
 Quamobrem primum danda opera est, nequa amico-  
 rum dissidia fiant. sin tale aliquid euenierit: ut extin-  
 ctæ potius amicitiae, quam oppressæ uideantur. Cauen-  
 dum uero est, ne etiā in graues inimicitias conuertant  
 se amicitiae: è quibus iurgia, maledicta, contumeliae gi-  
 gnuntur. quæ tamen si tolerabiles erunt, ferendæ sunt:  
 & hic honos ueteri amicitiae tribuendus est, ut is in cul-  
 pa sit qui faciat, non qui patiatur iniuriam. Omnino  
 omnium horum uitiorum, atque incommodorum una  
 cautio est, atque una prouisio: ut ne nimis cito diligere  
 incipiamus, nèue indignos. Digni autem sunt amicitia,  
quibus in ipsis inest causa cur diligantur. Rarum istud  
 genus: & quidē omnia præclara rara: nec quicquam  
 difficilius, quam reperire, quod sit omni ex parte in  
 suo genere perfectum. sed plerique neque in rebus hu-  
 manis quicquam bonum norūt, nisi quod fructuosum  
 sit: & amicos, tanquam pecudes, eos potissimum dili-  
 gunt, ex quibus sperant se maximum fructum esse ca-  
 pturos. itaque pulcherrima illa, & maxime naturali  
 carent amicitia, per se & propter se expetenda: nec  
 ipsi sibi exēplo sunt, hæc uis amicitiae qualis & quan

ta sit. ipse enim se quisque diligit, non ut aliquam à se ipso mercedem exigat charitatis suæ, sed quòd per se sibi quisque charus est: quod nisi idem in amicitiam transferatur, uerus amicus nunquam reperietur. est enim is amicus quidem, qui est tanquam alter idem. Quòd si hoc apparet in bestijs, uolucris, agrestibus, natantibus, cicuribus, feris, primum ut se ipsæ diligant: (id enim pariter cum omni animante nascitur) demde ut requirant, atque appetant, ad quas se applicent eiusdem generis animantes: idque faciunt cum desiderio, & cum quadã similitudine amoris humani: quanto id magis in homine fit natura, qui & se ipse diligit, & alterum acquirit, cuius animum ita cum suo commiscet, ut efficiat penè unum ex duobus? Sed plerique peruerse, ne dicam impudenter, amicum habere talem uolunt, quales ipsi esse non possunt: quæque ipsi non tribuunt amicis, hæc ab ijs desiderant. Par est autem primum ipsum esse uirum bonum, tum alterum similem sui quærere. in talibus ea quam iam dudum tractabamus, stabilitas amicitiae confirmari potest: cum homines beneuolentia coniuncti, primum cupiditatibus ijs quibus cæteri seruiunt, imperabunt: deinde æquitate iustitiæque gaudebunt: omniæque alter pro altero suscipiet, neque quicquam unquam nisi honestum & rectum alter ab altero postulabit: neque solum colent se inter se ac diligunt, sed etiam uerebuntur. nam maximum ornamentum amicitiae tollit, qui ex ea tollit uerecundiam. Itaque in ijs perniciosus est error, qui existimant libidinum peccatorumque omnium patere in amicitia licentiam. uirtutum enim amicitia adiutrix à natura data est, non uitiorum comes: ut quo-

niam solitaria non posset uirtus ad ea quæ summa sunt peruenire, coniuncta & consociata cum altera perueniret. quæ siquos inter societas aut est, aut fuit, aut futura est: eorum est habendus ad summum naturæ bonum optimus beatissimisque comitatus. hæc est inquam societas, in qua omnia insunt, quæ putant homines expetenda: honestas, gloria, tranquillitas animi, atque iucunditas: ut cum hæc adsint, beata uita sit, & sine his esse non possit. Quod cum optimum, maximumque sit, si id uolumus adipisci, uirtuti opera danda est: sine qua neque amicitiam, neque ullam rem expetendam consequi possumus: ea uero neglecta, qui se amicos habere arbitrantur, tum se denique errasse sentiunt, cum eos grauis aliquis casus experiri cogit. Quocirca (dicendū est enim sæpius) cum iudicaueris, diligere oportet: non cum dilexeris, iudicare. sed cum multis in rebus negligentia plectimur, tum maxime in amicis & deligendis, & colendis. præposteris enim utimur consilijs, & acta agimus: quod uetamur ueteri proverbio. nam implicati ultro & citro uel usu diuturno, uel etiam officijs, repente in medio cursu amicitias, exorta aliqua offensione dirumpimus. quo etiam magis uituperanda est rei tam maxime necessariæ tanta incuria. Vna est enim amicitia in rebus humanis, de cuius utilitate omnes uno ore consentiunt. quāquam à multis ipsa uirtus contemnitur, & uenditatio quedam atque ostentatio esse dicitur. multi diuitias despicunt, quos paruo contentos tenuis uictus cultusque delectat: honores uero, quorū cupiditate quidam inflammentur, quā multi ita contemnunt, ut nihil inanius, nihil esse leuius existiment: itēque cætera, quæ qui-

busdam admirabilia uidentur, permulti sunt qui pro  
 nihilo putent: de amicitia omnes ad unum idem sen-  
 tiunt, & ij qui ad Rēp. se contulerunt, & ij qui rerum  
 cognitione doctrināq; delectantur, & ij qui suum ne-  
 gotium gerūt otiose, postremo ij qui se totos tradiderūt  
 uoluptatibus: sine amicitia uitam esse nullam, si modo  
 uelint aliqua ex parte liberaliter uiuere. serpit enim  
 nescio quo modo per omnium uitam amicitia: nec ul-  
 lam ætatis degendæ rationem patitur esse experte sui.  
 Quinetiā si quis ea asperitate est & immanitate natu-  
 ræ, ut congressus, societatemq; hominū fugiat, atque o-  
 derit, qualē fuisse Athenis Timonem nescio quem acce-  
 pimus: tamē is pati non possit, ut non acquirat aliquē,  
 apud quem euomat uirus acerbitalis suæ. atq; hoc ma-  
 xime iudicaretur, siquid tale posset contingere, ut ali-  
 quis nos deus ex hac hominū frequentia tolleretur, & in  
 solitudine uspiā collocaret: atque ibi suppeditans omniū  
 rerū quas natura desiderat, abundantiā & copiam,  
 hominis omnino aspiciendi potestatem eriperet. quis  
 tam esset ferreus, qui eam uitā ferre posset? cuique non  
 auferret fructum uoluptatum omnium solitudo? Ve-  
 rum igitur illud est, quod à Tarentino Archyta (ut opi-  
 nor) dici solitum nostros senes cōmemorare audiui, ab  
 alijs senibus auditum: Siquis cælū ascendisset, natu-  
 ramque mundi & pulchritudinem siderum perspexis-  
 set, insuauem illam admirationem ei fore, quæ iucun-  
 dissima fuisset, nisi aliquē cui narraret, habuisset. Sic  
 natura solitarium nihil amat, semperque ad aliquod  
 tanquam adminiculum annititur, quod in amicissimo  
 quoque dulcissimum est. sed cum tot signis eadem na-  
 tura declaret, quid uelit ac quærat, quid desideret:

obsurdescinus tamen nescio quo modo, nec ea quæ ab ea monemur, audimus. est enim uariis & multiplex usus amicitiae, multæq; causæ suspicionū offensionūque dātur: quas tū euitare, tū eleuare, tū ferre sapientis est. una illa subleuanda offensio est, ut & utilitas in amicitia & fides retineatur. nam & monendi amici sæpe sunt & obiurgandi: & hæc accipienda amice cum beneuole fiunt. Sed nescio quo modo uerum est, quod in Andria familiaris meus Terentius dixit:

” Obsequium amicos, ueritas odium parit.

molesta ueritas est, si quidem ex ea nascitur odiū, quod est uenenum amicitiae: sed obsequium multo molestius, quod peccatis indulgens præcipitem amicum ferri sin- nit. Maxima autem culpa in eo est, qui & ueritatem aspernatur, & in fraudē obsequio impellitur. Omnis igitur hac in re habenda ratio & diligentia est, primum ut monitio acerbitate, deinde obiurgatio contumelia careat. in obsequio autem (quoniam Terentiano uerbo libenter utimur) comitas adsit, assentatio uitiorum adiutrix procul amoneatur: quæ non modo amico, sed ne libero quidem digna est. aliter enim cum tyranno, aliter cum amico uiuitur. Cuius autem aures clausæ ueritati sunt, ut ab amico uerum audire nequeant: huius salus desperanda est. scitum est enim illud Cato- nis, Multo melius de quibusdam acerbos inimicos me- reri, quàm eos amicos qui dulces uideantur: illos ue- rum sæpe dicere, hos nūquam. Atque illud absurdum est, quod ij qui monentur, eam molestiam quam debent capere non capiunt: eam capiunt, qua debent carere. peccasse enim se non anguntur: obiurgari moleste fe- runt. quod contra oportebat, delicto dolere, obiurga-

tione gaudere. Vt igitur & monere, & moneri proprium est uerae amicitiae: & alterum libere facere, non asperere: alterum patienter accipere, non repugnanter: sic habendum est, nullam in amicitijs pestem esse maiorem, quàm adulationem, blanditias, assentationem. quanuis enim multis nominibus est hoc uitium notandum, leuium hominum atque fallacium, ad uoluntatem loquētium omnia, nihil ad ueritatem. Cum autē omnium rerum simulatio est uitiosa, (tollit enim iudicium ueri, idq; adulterat) tum amicitiae repugnat maxime. delet enim ueritatem, sine qua nomen amicitiae ualere non potest. nam cum amicitiae uis sit in eo, ut unus quasi animus fiat ex pluribus: qui id fieri potest, si ne in uno quidem unus animus erit, idēque semper, sed uarius, commutabilis, multiplex? Quid enim potest esse tam flexibile, tam deuium, quàm animus eius, qui ad alterius non modo sensum ac uoluntatem, sed etiam uultum, atque nutum conuertitur?

„ Negat q̄s, nego: ait, aio. postremo imperaui egomet mihi

„ Omnia assentari:

ut ait idem Terentius: sed ille sub Gnatonis persona: quod amici genus adhibere, omnino leuitatis est. Multi autem Gnatonum similes cum sint, loco, fortuna, fama superiores: horū est assentatio molesta, cum ad uanitatem accessit auctoritas. scerni autem blandus amicus à uero, & internosci tam potest adhibita diligentia, quàm omnia fucata, & simulata à sinceris atque ueris. concio quæ ex imperitissimis constat, tamen iudicare solet, quid intersit inter popularem, id est assentatorem, & leuem ciuem, & inter constantem, seuerum, & grauem. Quibus blanditijs C. Papirius Cos.



enim ipsa non tam multi præditi esse, quàm uideri uolunt. Hos delectat assentatio: his fictus ad eorum uoluntatem sermo cum adhibetur, orationem illam uanam testimonium esse laudum suarum putant. Nulla est igitur hæc amicitia, cum alter uerū audire non uult, alter ad mentiendum paratus est. nec parasitorū in comædijs assentatio nobis facta uideretur, nisi essent milites gloriosi.

- .. Magnas uero agere gratias Thais mihi?

Satis erat respondere, Magnas: ingentes, inquit. Semper auget assentatio id, quod is, cuius ad uoluntatem dicitur, uult esse magnum. Quamobrem, quamuis blanda ista uanitas apud eos ualeat, qui ipsi illam allectant, & inuitant: tamen etiam grauiores, constantioreque admonendi sunt, ut animaduertant, ne callida assentatione capiantur. aperte enim adulantem nemo non uidet, nisi qui admodum est excors: callidus ille, & occultus ne se insinuet, studiose cauendum est. nec enim facillime agnoscitur, quippe qui aduersando sæpe assentetur, & litigare se simulans blanditur, atque ad extremum det manus, uincique se patitur, ut is qui illusus sit, plus uicisse uideatur. Quid autem turpius quàm illudi? quod ne accidat, magis cauendum est: ut in Epicureo,

- .. Hodie me ante omnis comicos stultos senes

- .. Versaris, atque luseris lautissime.

hæc enim in fabulis stultissima persona est improvidorum, & credulorum senum. Sed nescio quo pacto ab amicitijs perfectorum hominum, id est sapientum (de hac dico sapientia, quæ uidetur in hominem cadere posse) ad leues amicitias deflexit oratio. Quamob-

rem ad illam primam redeamus: eamque ipsam concludamus aliquando. Virtus inquam, C. Fanni, & tu Q. Muti, & conciliat amicitias, & conseruat. in ea est enim conuenientia rerum, in ea stabilitas, in ea constantia: quæ cum se extulit, & ostendit lumen suum, & idem aspexit, agnouitque in alio, ad id se admouet, uicissimque accipit illud, quod in altero est. ex quo exardescit amor, siue amicitia. utrunque enim dictum est ab amando. Amare autem nihil aliud est, nisi eum ipsum diligere, quem ames, nulla indigentia, nulla utilitate quæsitâ: quæ tamen ipsa efflorescit ex amicitia, etiam si tu eam minus secutus sis. hæc nos adolescentes beneuolentia senes illos L. Paulum, M. Catonem, C. Gallum, P. Nasicam, Ti. Gracchum Scipionis nostri socerum dileximus. hæc etiam magis elucet inter æquales, ut inter me, & Scipionem, & L. Furium, P. Rutilium, Sp. Mummiū. uicissim autem senes in adolescentium charitate acquiescimus, ut ego in uestra, & Q. Tuberonis: equidem etiam admodum adolescentis P. Rutilij Virginij familiaritate delector. Quoniāque ita ratio comparata est uitæ, naturæque nostræ, ut alia ætas oriatur ex alia: maxime quidem optandum est, ut cum æqualibus possis, quibuscumque tanquam è carceribus emissus sis, iisdem ad calcem (ut dicitur) peruenire. sed quoniā res humanæ fragiles, caducæque sunt, semper aliqui acquirendi sunt, quos diligamus, & à quibus diligamur. charitate enim, beneuolentiæque sublata, omnis est è uita sublata iucunditas. Mibi quidem Scipio, quanquam est subito ereptus, uiuit tamen, semperque uiuet. uirtutem enim amavi illius uiri: quæ extincta non est: nec mihi soli uersatur ante oculos, qui

illam sem  
clara, &  
iora susci  
maginem  
rebus, q  
habeo, q  
in hac  
rum ce  
nunqu  
quiden  
una de  
lum r  
que c  
scend  
moti  
uim  
cum  
que a  
extin  
tion  
gnu  
tiu  
ni  
gn  
au  
eff  
bi

illam semper in manibus habui: sed etiam posteris erit clara, & insignis. nemo unquam animo, aut spe maiora suscipiet, qui sibi non illius memoriam, atque imaginem proponendam putet. Equidem ex omnibus rebus, quas mihi aut fortuna, aut natura tribuit, nihil habeo, quod cum amicitia Scipionis possim cōparare. in hac mihi de Rep. consensus, in hac rerum priuatarum consiliū, in hac requies plena oblectationis fuit. nunquam illum ne minima quidem re offendi, quod quidem senserim: nihil audiui ex eo ipse, quod nollem. una domus erat, idem uictus, isque communis: neque solum militia, sed etiam peregrinationes, rusticationesque communes. Nam quid ego de studijs dicam cognoscendi semper aliquid atque discendi? in quibus remoti ab oculis populi omne otium, tempusque contriuimus? quarum rerum recordatio, & memoria si unā cum illo occidisset, desiderium coniunctissimi uiri, atque amantissimi ferre nullo modo possem: sed nec illa extincta sunt, alunturque potius, & augentur cogitatione, & memoria: & si plane illis orbatus essem, magnum tamen afferret mihi ætas ipsa solatium. diutius enim iam in hoc desiderio esse non possum. omnia autem breuia, tolerabilia esse debent, etiam si magna sunt. Hæc habui de amicitia quæ dicerem. uos autem hortor, ut ita uirtutem locetis, sine qua amicitia esse non potest, ut ea excepta, nihil amicitia præstabilius esse putetis.

## M. TVLLII CICERONIS

## PARADOXA VI, AD

## M. BRVTVM.

A NIMADVERTI Brute sæpe Ca-  
 tonem auunculum tuum, cum in Se-  
 natu sententiam diceret, locos graues  
 ex philosophia tractare, abhorrentes  
 ab hoc usu forensi, & publico: sed di-  
 cendo consequi tamen, ut illa etiam populo probabilia  
 uiderentur. quod eo maius est illi, quàm aut tibi, aut  
 nobis: quia nos ea philosophia plus utimur, quæ pepe-  
 rit dicendi copiam, & in qua dicuntur ea, quæ non  
 multum discrepant ab opinione populari: Cato autem  
 perfectus mea sententia Stoicus, & ea sentit, quæ non  
 sanè probantur in vulgus: & in ea hæresi est, quæ nul-  
 lum sequitur florem orationis, neque dilatat argumen-  
 tum, sed minutis interrogatiunculis, quasi punctis, quod  
 proposuit, efficit. sed nihil est tam incredibile, quod  
 non dicendo fiat probabile: nihil tam horridum, tam  
 incultum, quod non splendescat oratione, & tanquam  
 excolatur. quod cum ita putarem, feci etiam audacius,  
 quàm ille ipse, de quo loquor. Cato enim duntaxat de  
 magnitudine animi, de continentia, de morte, de omni  
 laude uirtutis, de dijs immortalibus, de charitate pa-  
 triæ stoicæ solet, nullis oratorijs ornamentis adhibitis,  
 dicere. Ego uero illa ipsa, quæ uix in gymnasijs, & in  
 otio Stoici probant, ludens conieci in communes locos.  
 quæ quia sunt admirabilia, contrâque opinionem o-  
 mnium, ab ipsis etiam παραδόξα appellantur: tenta-

re uolui, possentne proferri in lucem, id est in forum, et ita dici, ut probarentur: an alia quaedam esset erudita, alia popularis oratio: eoque scripsi libentius, quod mihi ista *παρὰ δόξαν* quæ appellantur, maxime uidentur esse Socratica, longèque uerissima. Accipies igitur hoc paruum opusculum lucubratum his iā contractioribus noctibus, quoniam illud maiorum uigiliarum munus in tuo nomine apparuit: et degustabis genus hoc exercitationum mearum, quibus uti consueui, cum ea quæ dicuntur in scholis *εἰ τινα*, ad nostrum hoc oratorium transfero dicendi genus. hoc tamen opus in apertum ut referas, nihil postulo. non enim est tale, ut in arce poni possit, quasi illa Minerva Phidiae: tale tamen est, ut ex eadem officina exisse uideatur.

ὅτι μόνον ἀγαθόν, τὸ καλόν.

Quod solum bonum, honestum.

Error, ne cui uestrum ex Stoicorum hominum disputationibus, non ex meo sensu deprompta hæc uideatur oratio: dicam tamen quod sentio: et dicam breuius, quàm res tanta dici possit. Nunquam mehercule ego neque pecunias istorum, neque tecta magnifica, neque opes, neque imperia, neque eas, quibus maxime astricti sunt, uoluptates in bonis rebus esse numerandas duxi: quippe cum uidere, homines his rebus circumfluentes, ea tamen desiderare maximè, quibus abudarent. neque enim unquam expletur, nec satiatur cupiditatis sitis: neque ea solū, quæ habent, libidine augendi cruciantur, sed etiam amittendi metu. in quo equidē continentissimorum hominum maiorum nostrorum sæpe requiro prudentiam, qui hæc

imbecilla, & commutabilia pecuniæ membra solo uerbo bona putauerunt appellanda, cum re ac factis longe aliter iudicauissent. potest enim bonum cuiquam malo esse? aut potest quisquam in abundantia bonorum ipse esse non bonus? Atqui ista omnia talia uidemus, ut & improbi habeant, & obsint probis. Quamobrè, licet irrideat, si quis uelit, plus apud me uera ratio ualebit, quàm uulgi opinio: neque ego unquam illum bona perdidisse dicam, si quis pecus, aut supellectilem amiserit: nec non sæpe laudabo sapientem illum Biantem, (ut opinor) qui numeratur inter septem sapientes: cuius cum patriam Prienem cepisset hostis, cæterique ita fugerent, ut multa de suis rebus secum asportarent, cum esset admonitus à quodam, ut idem ipse faceret: Ego uero, inquit, facio: nam omnia mea mecum porto. Ille hæc ludibria fortunæ ne sua quidem putauit, quæ nos appellamus etiã bona. Quid est igitur, quæret aliquis, bonum? siquid recte fit & honeste, & cum uirtute, id beneficii uere dicitur: & quod rectum, & honestum, & cum uirtute est, id solum opinor bonum. Sed hæc uideri possunt obscuriora, cum sine appositione exemplorum lentius disputantur: uita atque factis illis stranda sunt summorum uirorum hæc, quæ uerbis subtilius, quàm satis est, disputari uidentur. Quæro enim à uobis, num ullam cogitationem habuisse uideantur ij, qui hanc Remp. tam præclare fundatam nobis reliquerunt, aut auri atque argenti ad auaritiam, aut amœnitatum ad delectationem, aut supellectilis ad delicias, aut epularum ad uoluptates. Ponite ante oculos unumquenque regum. Vultis incipiam à Romulo? nultis post liberam ciuitatem, ab ijs ipsis qui libera-

uerunt ead  
 dit in celos  
 gestis, atque  
 us? minis ne  
 filis uerbo  
 arbitrari  
 inter se  
 quid ege  
 eiusdè o  
 num qu  
 que pr  
 aliud  
 Porser  
 que  
 copia  
 quæ  
 copi  
 etus  
 li  
 ne  
 pu  
 i  
 b  
 t

nerunt ea? quibus tandem Romulus gradibus ascendit in cælum? y'sne, quæ isti bona appellant: an rebus gestis, atque uirtutibus? Quid autem Numa Pompilius? minisne gratas dijs immortalibus capedines, ac fætiles urnulas fuisse, quàm delicatas aliorum pateras arbitramur? Omitto reliquos. sunt enim omnes pares inter se, præter Superbum. Brutum uero si quis roget, quid egerit in patria liberanda: si quis reliquos item eiusdē consilij socios, quid spectarint, quid secuti sint: num quis existat, cui uoluptas, cui diuitiæ, cui denique præter officium fortis et magni uiri, quicquam aliud propositum fuisse uideatur? Quæ res ad necem Porsenæ Q. Mutium impulit sine ulla spe salutis suæ? quæ uis Horatium Coclitem contra omnes hostium copias tenuit in ponte solum? quæ patrem Decium, quæ filium deuouit, ac immisit in armatas hostium copias? Quid continentia C. Fabritij? quid tenuitas uictus M. Curij sequebatur? quid duo propugnacula belli Punici Cneus, et Publius Scipiones, quæ Carthagenensium aduentum corporibus suis intercludendum putauerunt? quid Africanus maior? quid minor? quid inter horum ætates interiectus Cato? quid innumera biles alij? (nam domesticis exemplis abundamus) an putamus quenquam horum cogitasse, quicquam in uita sibi expetendum, nisi quod laudabile esse, et præclarum uideretur? Veniant igitur irrisores huius orationis ac sententiæ: et iam uel ipsi iudicent, utrum se horum alicuius, qui marmoreis tectis, ebore et auro fulgentibus, qui signis, qui tabulis, qui cælato auro et argento, qui Corinthijs operibus abundant: an C. Fabritij, qui nihil eorum habuit, nihil habere uo-



luit, similes esse malint. Atque hæc quidem, quæ modo huc, modo illuc transferuntur, facile adduci solent, ut in rebus bonis esse negem: illud tamen arcte tenent, accuratèque defendunt, uoluptatem esse summum bonum. quæ quidem mihi uox pecudum uidetur esse, non hominum. tu, cum tibi siue deus, siue mater (ut ita dicam) rerum omnium natura dederit animum, quo nihil est præstantius, neque diuinius: sic te ipse abijcies, atque prosternes, ut nihil inter te, atque inter quæ drupedem aliquid putes interesse? Quicquàmne bonum est, quod non eum qui possidet, meliorem faciat? ut enim quisque est maxime boni particeps, ita & laudabilis maxime: neque est ullum bonum, de quo non is qui id habeat, possit honeste gloriari. quid autem est horum in uoluptate? melioremne efficit, aut laudabiliorem uirum? an quisquam in potiundis uoluptatibus gloria sese, & prædicatione effert? Atqui, si uoluptas quæ plurimorum patrocinijs defenditur, in rebus bonis habenda non est, eaque, quo est maior, eo magis mentem ex sua sede, & statu dimouet: profecto nihil est aliud bene, & beate uiuere, nisi honeste, & recte uiuere.

ὅτι αὐτὰρ πῦρ ἢ ἀρετὴ πρὸς ἀνδραμονίαν.

Quod se ipsa contenta uirtus ad beate uiuendum.

Ec uero ego M. Regulum erumnosum, nec

N infelicem; nec miserum unquam putavi. non

enim magnitudo animi eius cruciabatur à

Pœnis, non grauitas, non fides, nō constantia, non ulla uirtus, non denique animus ipse: qui tot uirtutum præsidio munitus, tantòque comitatu circumseptus, cum corpus eius caperetur, capi certe ipse non potuit. Caium

uero M. d.  
nus ex f.  
mis uir  
test. Nesc  
nomen  
r. 45. nen  
ex sese  
spes on  
huic  
habea  
tu hor  
tis, au  
imgr  
do n  
egr  
si q  
co  
ini  
ni  
p  
r  
l

uero Marium uidimus: qui mihi secundis in rebus u-  
 nus ex fortunatis hominibus, in aduersis unus ex sum-  
 mis uiris uidebatur: quo beatius esse mortali nihil po-  
 test. Nescis insane, nescis, quantas uires uirtus habeas.  
 nomen tantum uirtutis usurpas: quid ipsa ualeat, igno-  
 ras. nemo potest nō beatissimus esse, qui est totus aptus  
 ex sese, quique in se uno sua ponit omnia. cuius autem  
 spes omnis, & ratio, & cogitatio pendet ex fortuna,  
 huic nihil potest esse certi, nihilque, quod exploratum  
 habeat permansurum sibi ne unū quidem diem. Eum  
 tu hominem terreto, siquē eris nactus istiusmodi, mor-  
 tis, aut exilij minis. mihi uero quicquid acciderit in tā  
 ingrata ciuitate, ne recusanti quidem euenerit, non mo-  
 do non repugnantī. quid enim ego laboraui, aut quid  
 egi, aut in quo euigilaui curæ & cogitationes meæ,  
 si quidem nihil peperī tale, nihil consecutus sum, ut in  
 eo statu essem, quem neque fortunæ temeritas, neque  
 inimicorum labefactaret iniuria? Mortēne mihi mi-  
 nitaris, ut omnino ab hominibus: an exiliū, ut ab im-  
 probis demigrandum sit? mors terribilis est ijs, quo-  
 rum cum uita omnia extinguuntur: non ijs quorum  
 laus emori non potest. exilium autem terribile illis,  
 quibus quasi circumscriptus est habitandi locus: non  
 ijs, qui omnem orbem terrarum unam urbem esse du-  
 cunt. Te miseriæ, te erumnæ premunt omnes, qui te  
 beatum, qui te florentē putas: tuæ libidines te torquēt:  
 tu dies, noctēque cruciaris, cui nec satis est, quod est,  
 & id ipsum, quod habes, ne non diuturnum sit futu-  
 rum, times: te conscientie stimulant maleficiorum  
 tuorum: te metus exanimant iudiciorum atque le-  
 gum: quocunque aspexisti, ut furie, sic tuæ tibi occur-

runt iniuriæ, quæ te respirare non sinunt. Quamobrem ut improbo & stulto, & inertî nemini bene esse potest: sic bonus uir, & fortis, & sapiens miser esse nemo potest. Nec uero, cuius uirtus, morèsque laudandi sunt, eius non laudanda uita est: neque porro fugienda uita, quæ laudanda est. esset autem fugienda, si esset misera. Quamobrem quicquid est laudabile, idem & beatum, & florens, & expetendum uideri debet.

ὅτι τὰ αἰμαρτήματα.

Quòd æqualia peccata.

N Ec enim peccata rerum euentu, sed uitis hominum metienda sunt. In quo peccatur, id potest aliud alio maius esse, aut minus: ipsum quidem illud peccare, quoquò te uerteris, unum est. auri nauem euertat gubernator, an paleæ, in re aliquatùm, in gubernatoris inscitia nihil interest. Lapsa est libido in muliere ignota: dolor ad pauciores pertinet; quàm si petulans fuisset in aliqua generosa ac nobili uirgine: peccauit uero nihilo minus: siquidem est peccare, tanquam transire lineas. quod cum feceris, culpa commissa est: quàm longe progrediare, cum semel transieris, ad augendam transeundi culpam nihil pertinet. Peccare certe licet nemini. quod autem non licet, id hoc uno tenetur, si arguitur non licere. id nec maius, nec minus unquam fieri potest: quoniam in eo est peccatum, si non licet. Quod semper unum, & idem est: quæ ex eo peccata nascantur, æqualia sint oportet. quòd si uirtutes pares sunt inter se, paria esse etiam uitia necesse est. atqui pares esse uirtutes, nec bono uiro meliorem, nec temperante temperatorem,

nec forti fortio rem, nec sapiente sapientio rem posse fieri, facile potest perspicui. An uirū bonum dicēs, qui depositum nullo teste, cum lucrari impune posset, auri pondo decem reddiderit: si idem in decem millibus non idem fecerit? aut temperantem eum, qui se in aliqua libidine, continuerit, in aliqua effuderit? Vna \* uirtus est consentiens cum ratione, & perpetua constantia. nihil huic addi potest, quo magis uirtus sit: nihil demū, ut uirtutis nomen relinquatur. etenim si bene facta, recte facta sunt, & nihil recto rectius: certe nec bono quidem melius quicquam inueniri potest. Sequitur igitur, ut etiam uitia sint paria: siquidem prauitates animi recte uitia dicuntur. atqui, quoniam pares uirtutes sunt, recte etiam facta, quando à uirtutibus proficiuntur, paria esse debent: itēque peccata, quoniam ex uitijis manant, sint equalia necesse est. A philosophis, inquis, ista sumis. Metuebam, ne à lenonibus dicerēs. Socrates disputabat isto modo. Bene hercule narras. nam istum doctum, & sapientem uirum fuisse, memoriæ traditum est. Sed tamen quero ex te, (quando uerbis inter nos contendimus, non pugnis) utrum potius de bonis est quærendum, quid baiuli atque operarij, an quid homines doctissimi senserint: præsertim cum hac sententia non modo uerior, sed ne utilior quidem hominum uitæ reperiri ulla possit? quæ uis enim, quæ magis arceat homines ab improbitate omni, quàm si senserint nullū in delictis esse discrimen? & æque peccare se, si priuatis, ac si magistratibus manus inferant? quancunque in domum stuprum intulerint, eandem esse labem libidinis? Nihilne igitur interest, (nam hoc dicet ali-

quis patrem quis necet, an seruum? nuda ista si ponas, iudicari qualia sint, non facile possunt. patrem uita priuare, si per se scelus est: Saguntini, qui parentes suos liberos emori, quam seruos uiuere maluerunt, parricidae fuerunt. ergo et parenti nonnunquam adimi uita sine scelere potest: et seruo saepe sine iniuria non potest. Causa igitur haec, non natura distinguit: quae quando alteri accessit, id fit propensius: si utrique adiuncta sit, paria fiant necesse est. illud tamen interest, quod in seruo necando, si adsit iniuria, semel peccatur: in patris uita uiolanda, multa peccantur: uiolatur is qui procreauit: is qui aluit: is qui erudiuit: is qui in sede ac domo, atque in Repub. collocauit. multitudine peccatorum praestat, eoque poena maiore dignus est. sed nos in uita, non quae cuique peccato poena sit, sed quantum cuique liceat, spectare debemus. Quicquid non oportet, scelus esse: quicquid non licet, nefas putare debemus, etiam in minimis rebus? Etiam: siquidem rerum modum fingere non possumus, animorum tenere possumus. histrio si paulo se mouit extra numerum, aut si uersus pronunciatus est syllaba una breuior, aut longior, exsibilatur, et exploditur: in uita, quae omni gestu moderatior, omni uersu aptior esse debet, ut in syllaba te peccare dicas? poetam non audio in nugis: in uitae societate audiam ciuem digitis peccata dimetientem sua, si uisa sint breuiora, leuiora qui possint uideri? cum quicquid peccatur, perturbatione peccetur rationis atque ordinis: perturbata autem ratione semel, et ordine, nihil possit addi, quo magis peccari posse uideatur.

ὅτι πάντες οἱ μωροὶ μαινόμενται.

Quod omnes stulti insaniunt.

E Go uero te non stultum, ut sæpe: non improbum, ut semper: sed dementem & insanum rebus addicam necessarijs. Sapientis animus magnitudine consilij, tolerantia rerum humanarum, contemptione fortunæ, uirtutibus denique omnibus, ut mœnibus, septus uincetur, & expugnabitur: qui nec ciuitate quidem pelli potest? quæ est enim ciuitas? omnisne conuentus ferorum, & immanium? omnisne etiam fugitiuorum, ac latronum congregata unum in locum multitudo? certe negabis. Num igitur erat illa tum ciuitas, cum leges in ea nihil ualebant: cum iudicia iacebant: cum mos patrius occiderat: cum ferro pulsus magistratibus, Senatus nomen in Repub. non erat? prædonum ille concursus, & te duce latrocinium in foro constitutum, & reliquæ coniurationis à Catilinæ furijs ad tuum scelus, furorémque conuersæ num ciuitas erat? Itaque pulsus ego ciuitate non sum, quæ tum nulla erat: accersitus in ciuitatem sum, cum esset in Repub. Consul, qui tum nullus fuerat: esset Senatus, qui tum occiderat: esset consensus populi liberi: cum esset iuris & æquitatis, quæ uincula sunt ciuitatis, repetita memoria. At uide, quàm ista tui latrocinij tela contempserim. iactam, & immissam à te nefariam in me iniuriam semper duxi, peruenisse tamen ad me nunquam putavi: nisi forte, cum parietes disturbabas, aut cum testis sceleratas faces inferebas, tunc meorum aliquid ruere, aut deflagrare arbitrare. Nihil neque meum est, neque cuiusquam, quod auferri, quod eri-

pi, quod amitti potest. si mihi eripuisses diuinam ani-  
mi mei constantiam, meas curas, uigilias, consilia, qu-  
bus Resp. inuicta stat: si huius æterni beneficij im-  
mortalem memoriam deleuisses: multo etiam magis, si  
illam mentem, unde hæc consilia manarunt, mihi eri-  
puisses: tum ego accepisse me confiterer iniuriam. sed  
si hæc nec fecisti, nec facere potuisti: reditum mihi glo-  
riosum tua dedit iniuria, non exitum calamitosum.  
Ergo ego semper ciuis etiam, et tum maxime, cum  
meam salutem Senatus exteris nationibus, ut ciuis o-  
ptimi, commendabat: tu ne nunc quidem es ciuis: ni-  
si forte idem hostis, et ciuis esse potest. An tu ciuem  
ab hoste natura ac loco, non animo, factisque distin-  
guis? Cædem in foro fecisti: armatis latronibus tem-  
pla tenuisti: priuatorum domos, ædēsque sacras in-  
cendisti. Cur hostis Spartacus, si tu ciuis? potes autem  
esse tu ciuis, propter quem aliquando ciuitas non fu-  
it? et me exulem tuo nomine appellas? Cum omnes  
meo discessu exulasse Rempub. putent: nunquàmne  
homo amentissime te circumspecies? nunquàmne, quid  
facias considerabis, nec quid loquare? nescis exili-  
um scelerum esse pœnam, meum illud iter ob præcla-  
rissimas res à me ante gestas esse susceptum? Omnes  
scelerati, atque impij, quorum tu te ducem esse pro-  
fiteris: quos leges exilio affici uolunt, exules sunt, eti-  
am si solum non mutarunt. an, cum omnes leges te  
exulem esse iubeant, non eris tu exul? Non appella-  
tur inimicus, qui cum telo fuerit ante Senatum? tua  
sica deprehensa est. qui hominem occiderit? tu plu-  
rimos occidisti. qui incendium fecerit? ædes Nym-  
pharum manu tua deflagrarunt. qui templa deorum



occupauerit? in foro etiam castra posuisti. sed quid ego communes leges profero, quibus omnibus es exul? Familiarissimus tuus de te privilegium tulit, ut si in opertum Bonæ deæ accessisses, exulares. at te id fecisse, etiā gloriari soles. quo modo igitur tot legibus eiectus in exilium, nomen exulis non perhorrescis? Romæ sum, inquis, et tu quidem in operto fuisti. Non igitur ubi quisque erit, eius loci ius tenebit, si ibi enim legibus esse non oportebit.

ὅτι οἱ σοφοὶ ἐλεύθεροι, καὶ οἱ μωροὶ δούλοι.

Quod sapientes liberi, et stulti serui.

Audetur uero hic imperator, aut etiam appelletur, aut hoc nomine dignus putetur: quo modo? aut cui tandem hic libero imperabit, qui non potest cupiditatibus suis imperare? refrenet prius libidines, spernat uoluptates, iracundiam teneat, coerceat auaritiam, cæteras animi labeſ repellat: tum incipiat alijs imperare, cum ipse improbiſſimis dominis, dedecori ac turpitudini parere deſierit. dum quidem his obediens, non modo imperator, sed liber habendus omnino non erit. præclare enim est hoc uſurpatum à doctiſſimis, quorū auctoritate non uteretur, si mihi apud aliquos agrestes hæc habēda eſſet oratio. cum uero apud prudentiſſimos loquar, quibus hæc imaudita non sunt: cur ego ſimulem me, siquid in his studijs operæ poſuerim, perdidisse? Dictum est igitur ab erudiſſimis uiris: nisi sapientem liberum eſſe neminem. Quid eſt enim libertas? poteſtas uiuendi, ut uelis. quis igitur uiuit ut uult? nisi proſecto qui recta ſequitur, qui gaudet officio, cui uiuendi uia conſiderata atque prouiſa eſt, qui legibus quidē non propter me-

tum paret, sed eas sequitur, atque colit, quia id salutare maxime esse iudicat: qui nihil dicit, nihil facit, nihil cogitat denique, nisi libenter ac libere: cuius omnia consilia, resque omnes quas gerit, ab ipso proficiuntur, eodemque referuntur: nec est ulla res quæ plus apud eum polleat, quam ipsius uoluntas atque iudicium? cui quidem etiam, quæ uim habere maximam dicitur, fortuna ipsa cedit: quæ, sicut sapiens poeta dixit, suis quisque fingitur moribus. Soli igitur hoc contingit sapienti, ut nihil faciat inuitus, nihil dolens, nihil coactus. quod etsi ita esse pluribus uerbis differendum est: illud tamen breui conficiendum est, nisi qui ita sit affectus, esse liberum neminem. Igitur omnes improbi serui: nec hoc tam re est, quam dictu inopinatum atque mirabile. non enim ita dicunt eos esse seruos, ut mancipia quæ sunt dominorum facta nexu, aut aliquo iure ciuili: sed si seruitus sit, sicut est, obedientia fracti animi et abiecti, et arbitrio carentis suo, quis neget omnes leues, omnes cupidos, omnes denique improbos esse seruos? An ille mihi liber uideatur, cui mulier imperat? cui leges imponit, præscribit, iubet, uetat quod uidetur? qui nihil imperanti negare potest, nihil audet? poscit, dandum est: uocat, ueniendum: eijcit, abeundum: minatur, extimescendum. ego uero istum non modo seruum, sed nequissimum seruum, etiã si in amplissima familia natus sit, appellandum puto. Atque ut in magna familia stultorum, sunt alij lautiores, ut sibi uidetur, serui, sed tamen  
\* serui, atrienses, ac tu pari stultitia. quos signa, quos tabulæ, quos cælatum argentum, quos Corinthia opera, quos ædificia magnifica nimio opere delectat. Ex summis, inquirunt, ciuitatis principes sumus. Vos uero ne

conseruorum quidem uestrorum principes estis. sed ut in familia, qui tractant ista, qui tergunt, qui ungunt, qui uerrūt, qui spargunt, non honestissimum locum seruitutis tenent: sic in ciuitate, qui se istarū rerum cupiditatibus dederunt, ipsius ciuitatis locum penè infimum tenent. Magna, inquis, bella gessi: magnis imperijs, & prouincijs præfui. Gere igitur animū laude dignum. A Æteonis tabula te stupidū detinet, aut signum aliquod Polycleti. omitto, unde sustuleris, & quo modo habeas. intuentem te, admirantem, clamores tollentem cum uideo, seruum te esse ineptiarum omnium iudico. Nōne igitur sunt illa festiua? Sunt. nam nos quoq; oculos eruditos habemus: sed obsecro te, ita uenusta habeantur ista, non ut uincula uirorum sint, sed ut oblectamenta puerorum. quid enim censes? si L. Mummius aliquem istorum uideret matellionem Corinthium cupi diffime tractantem, cum ipse totam Corinthum contempnisset: utrum illum ciuem excellentem, an atriensem seruum diligentem putaret? Reuiuiscat M. Curius, aut eorum aliquis, quorum in uilla, ac domo nihil splendidum, nihil ornatum fuit præter ipsos: & uideat aliquem summis populi beneficijs usum, barbatulos mululos excerptantem de piscina, & pertractantē, & murænarum copiā gloriantem: nōne hunc hominem ita seruum indicet, ut ne in familia quidem dignum maiore aliquo negotio putet? An eorum seruitus dubia est, qui cupiditate peculij nullam conditionem recusant durissimæ seruitutis? hæreditatis spes quid iniquitatis in seruiendo non suscipit? quem nutum locupletis orbi senis non obseruat? loquitur ad uoluntatem: quicquid denunciatum sit, facit, assentatur, assidet, miratur, quid

horum est liberi? quid denique non serui inertis? quid iam illa cupiditas, quæ uidetur esse liberior, honoris, imperij, prouinciarum, quàm dura est domina, quàm imperiosa, quàm uehementis? Cethego homini non probatissimo seruire coegit eos, qui sibi esse amplissimi uidebatur, mittere munera, noctu uenire domum ad eum, precari, denique supplicare. Quæ seruitus est, si hæc libertas existimari potest? quid? cum cupiditatum dominatus excessit, et alius est dominus exortus, ex conscientia peccatorum, timor: quàm est illa misera, quàm dura seruitus? adolescentibus paulo loquacioribus est seruiendum: omnes qui aliquid scire uidentur, tanquam domini timentur. iudex uero quantum habet dominatum? quo timore nocentes afficit? an non est omnis metus seruatus? Quid ualet igitur illa eloquentissimi uiri L. Crassi copiosa magis, quàm sapiens oratio? ERIPITE NOS EX SERVITUTE. quæ est ista seruitus tam claro homini, tamque nobili? omnis enim animi debilitati, et humilis, et fracti timiditas, seruitus est. NOLITE SINERE NOS CUIQUAM SERVIRE. in libertatem uindicari uult? minime. quid enim adiungit? NISI VOBIS VNIVERSIS. dominum mutare, non liber esse uult. QUIBUS ET POSSUMUS, ET DEBEMUS. nos uero, si quidem animo ex alto, et alto, et uirtutibus exaggerato sumus, nec debemus, nec possumus. Tu posse te dicito, quandoquidem potes. debere ne dixeris: quoniam nihil quisquam debet, nisi quod est turpe non reddere. Sed hæc hactenus. ille uideat, quo modo imperator esse possit, cum eum ne libertum quidem esse, ratio et ueritas ipsa conuincat.

ὅτι μόνος ὁ σοφὸς πλεσιος.

Quòd solus sapiens diues.

Vae est ista in commemoranda pecunia tua  
 Q tam insolens ostentatio? solúsne tu diues? prò  
 diu immortales, egòne me audisse aliquid,  
 et didicisse non gaudeam? solúsne tu diues? quid si  
 ne diues quidem? quid si pauper etiam? quem enim  
 intelligimus diuitem? aut hoc uerbum in quo homi-  
 ne ponimus? opinor in eo, cui tanta possessio est, ut ad  
 liberaliter uiuendum facile contētus sit: qui nihil quæ-  
 rat, nihil appetat, nihil optet amplius. animus enim  
 tuus oportet se iudicet diuitem, non hominū sermo, ne-  
 que possessiones tuæ. qui si tibi nihil deesse putas, nihil  
 curas amplius, satiatus es, aut contentus etiā pecunia:  
 concedo, diues es. si autem propter auiditatē pecuniæ  
 nullum quæstum turpem putas, cum isti ordini ne hone-  
 stus quidem esse possit ullus: si quotidie fraudas, deci-  
 pis, poscis, pacisceris, aufers, eripis, si socios spolias, era-  
 rium expilas, si testamenta amicorū expectas, aut ne  
 expectas quidem, atque ipse supponis: hæc utrū abun-  
 dantis, an egentis signa sunt? Animus hominis diues,  
 non arca appellari solet. quanuis illa sit plena, dum te  
 inanem uidebo, diuitē non putabo. etenim ex eo quan-  
 tum cuique sat est, metiantur homines diuitiarum mo-  
 dum. Filiam quis habet, pecunia est opus: duas, maio-  
 re: plures, maiore: et si (ut aiunt) Danai quinquaginta  
 sint filiae, tot dotes magnam quærunt pecuniā. quan-  
 tum enim cuique satis est, ad id accommodatur (ut an-  
 te dixi) diuitiarum modus. qui igitur non filias plures,  
 sed innumerabiles cupiditates habet, quæ breui tempo-  
 re maximas copias exhaurire possint: hunc quomodo

ego appellabo diuitem, cum ipse egere se sentiat? multi ex te audierunt cum diæres, neminem esse diuitem, nisi qui exercitum alere posset suis fructibus: quod populus Ro. ex tantis uectigalibus iam pridem uix potest. ergo hoc proposito nunquã eris diues, antequam tibi ex tuis possessionibus tantum reficiatur, ut ex eo tueri sex legiones & magna equitum ac peditum auxilia possis. Iam fateris igitur non esse te diuitem, cui tantum desit ut expleas id quod exoptas. itaque istam paupertatem uel potius egestatem, ac mendicitatem tuam nunquam obscure tulisti. nam ut ijs, qui honeste rem quærent mercaturis faciendis, operis dandis, publicis sumendis, intel- ligimus opus esse quæsito: sic, qui uidet domi tuæ pariter accusatorum atque iudicum consociatos greges, qui nocentes & pecuniosos reos eodem te auctore corruptelam iudicij molientes, qui tuas mercedum partitiones in patrocinijs, intercisas pecuniarum in coitionibus candidatorum, dimissiones libertorum ad fœnerandas diripiendâsque provincias, qui expulsionem uicinarum, qui latrocinia in agris, qui cum seruis, cum libertis, cum clietibus societates, qui possessiones uacuas, qui proscriptiones locupletum, qui cædes municipiorum, qui illam Syllani temporis messem recordetur, qui testamenta subiecta, qui sublatis tot homines, qui denique omnia uenalia, delectum, decretum, alienam, suam sententiam, forum, domum, uocem, silentium: quis hunc non putet confiteri, sibi quæsito opus esse? Cui autem quæsito opus sit, quis unquam hunc uere dixerit diuitem? est enim diuitiarum fructus in copia: copiam autem declarat satietas rerum, atque abundantia: quam tu quoniam nunquam assequere, nunquam omnino es

futurus diues. meam autem quoniam pecuniam contemnis, & recte. est enim ad vulgi opinionem mediocris, ad tuam nulla, ad meam modica: de me filebo: de te loquar. Si censenda nobis, atque æstimanda res sit, utrum tandem pluris æstimabimus pecuniam Pyrrhi, quam Fabritio dabat: an continentiam Fabritij, qui illam pecuniam repudiabat? utrum aurum Samnitum, an responsum M. Curij? hæreditatem L. Pauli, an liberalitatem Africani, qui eius hæreditatis Q. Maximo fratri partem suam concessit? hæc profecto quæ sunt summarum uirtutum, pluris æstimanda sunt, quàm illa, quæ sunt pecuniæ. Quis igitur (si quidem, ut quisque, quod plurimi sit, possideat, ita ditissimus habendus sit) dubitet, quin in uirtute diuitiæ positæ sint, quoniam nulla possessio, nulla uis auri, & argenti pluris, quàm uirtus æstimanda est? O dii immortales, non intelligunt homines, quàm magni uestigial sit parsimonia. uenio enim ad sumptuosos, relinquo istum quæstuosum. Caput ille ex suis prædijs sexcenta sestertia: ego centena ex meis. illi aurata tecta in uillis, & sola marmorea faciendi: & signa, tabulas, supellectilem, & uestem infinite concupiscenti, non modo ad sumptum ille fructus est, sed etiam ad fœnus, exiguus. ex meo tenui uestigiali detractis sumptibus cupiditatis aliquid etiam redundabit. Vter igitur est ditior, cui deest, an cui superat? qui eget, an qui abundat? cuius possessio quo est maior, eo plus requirit ad se tuendam: an quæ suis se uiribus sustinet? Sed quid ego de me loquor, qui morum ac temporum uitio aliquantum etiam ipse fortasse in huius seculi errore uerser? M. Manilius patrum nostrorum memoria (ne semper Chrios & Luscinios loquamur)



pauper tãdem fuit. habuit enim ædiculas in Carinis, & fundum in Labicano. nos igitur ditiores, qui plura habemus? utinam quidem essemus: sed non æstimatione census, uerũ uictu, atque cultu terminatur pecuniæ modus. Non esse cupidũ, pecunia est: non esse emacẽ, uestigal est. contentũ uero suis rebus esse, maximæ sunt, certissimæque diuitiæ. Etenim, si isti callidi rerum æstimatores prata, & areas quasdam magni æstimant, quod ei generi possessionum minime quasi noceri potest: quanti est æstimãda uirtus, quæ nec eripi, nec surripi potest unquam, neque naufragio, neque incendio amittitur, nec tempestatum, nec temporum permutatione mutatur? qua qui præditi sunt, soli sunt diuites. soli enim possident res & fructuosas & sempiternas: soli que, quod est proprium diuitiarũ, contenti sunt rebus suis: satis esse putant, quod est: nihil appetunt, nulla re egent, nihil sibi deesse sentiunt, nil requirũt. Improbi autem & auari, quoniam incertas atque in casu positas possessiones habent, & plus semper appetunt, nec eorum quisquam adhuc inuẽtus est, cui quod haberet, esset satis: non modo non copiosi ac diuites, sed etiã imopes ac pauperes existimandi sunt.

M. TVLLII CICERONIS, SCI-  
PIONIS SOMNIVM EX LI-  
BRO SEXTO DE REPVBLICA.

PERSONA, SCIPIO.

V M in Africam uenissem, à Manlio  
Consule ductus ad quartam legionem  
C (ut scitis) Tribunus militū: nihil mihi  
potius fuit, quàm ut Masinissam cōue-  
nirem, regem familie nostræ iustis de  
causis amicissimū. Ad quem ut ueni, complexus me se-  
nex collacrymauit, aliquatōq; post suspexit in cælum:  
Et, Grates, inquit, tibi ago summe Sol, uobisq; reliqui  
cælites, quòd antequam ex hac uita migro, conspicio  
in meo regno, Et his testis P. Cornelium Scipionem, cu-  
ius ego nomine ipso recreor: nunquam ex animo meo  
discedit illius optimi atque inuictissimi uiri memoria.  
Deinde ego illum de suo regno, ille me de nostra Rep.  
percunctatus est: multisq; uerbis ultro citroq; habitis,  
ille nobis consumptus est dies. post autem regio appa-  
ratu accepti, sermonem in multā noctem produximus,  
cum senex nihil nisi de Africano loqueretur, omniāq;  
eius non solum facta, sed etiam dicta meminisset. de-  
inde ut cubitum discessimus, me Et fessum de uia, Et  
qui ad multam noctem uigilassem, arctior quàm sole-  
bat somnus complexus est. Hic mihi (credo equidē ex  
hoc quod eramus locuti. fit enim ferē ut cogitationes  
sermonēsq; nostri pariāt aliquid in somno tale, quale  
de Homero scribit Ennius, de quo uidelicet sæpissimus

Q. i.

uigilans, solebat cogitare, & loqui) Africanus se ostendit illa forma, qua mihi ex imagine eius, quàm ex ipso erat notior, quem ut agnoui, equidem cohorrui: sed ille, Ades, inquit, animo, & omitte timorē Scipio, & quæ dicam, trade memoriae. Vidēsne illā urbem quæ parere populo Ro. coacta per me renouat pristina bella, nec potest quiescere? (ostendebat autem Carthaginem de excelsō & pleno stellarū, illustri & claro quodam loco) ad quam tu oppugnandam nunc uenis penē milles? hanc hoc biennio Consul euertes: eritque cognomen id tibi per te partum, quod habes ex nobis adhuc hæreditarium. Cū autem Carthaginem deleueris, triumphum egeris, Censorque fueris, & obieris Legatus Aegyptum, Syriam, Asiam, Græciam, delegere iterū absens Consul, bellūmq; maximum conficies, Numantiam excindens. sed cum eris curru Capitolium inuectus, offendes Remp. perturbatā consilijs nepotis mei. hic tu Africane ostendas oportebit patriæ, lumen animi, ingenij, consilijq; tui. sed eius temporis ancipitem uideo quasi factorū uiam. nam cū ætas tua septenos octies solis anfractus, reditusq; cōuerterit, duōque ij numeri, quorum uterque plenus, alter altera de causa habetur, circuitu naturali summam tibi fatalem confecerint: in te unum, atque tuum nomen se tota cōuertet ciuitas: te Senatus, te omnes boni, te socij, te Latini intuebuntur: tu eris unus in quo nitatur ciuitatis salus. ac ne multa, Dictator Remp. constituas oportet, si impias propinquorum manus effugeris. Hic cum exclamasset Lælius, ingemissēntque cæteri uehementius, leniter arridens Scipio, Quæso, inquit, ne me è somno excitetis, & pax sit rebus. audite cætera. Sed quo sis Africane alacrior ad

tutandam Remp. sic habeto, omnibus qui patriam conseruauerint, adiuerint, auxerint, certum esse in cælo, ac diffinitum locū: ubi beati æuo sempiterno fruuntur. nihil est enim illi principi deo, qui omnem hunc mundum regit, quod quidem in terris fiat, acceptius quàm concilia, coetusque hominum iure sociati, quæ ciuitates appellantur. harū rectores, & conseruatores hinc profecti, huc reuertentur. Hic ego, etsi erā perterritus non tam metu mortis, quàm insidiarum à meis, quæsiui tamen, uiuerētne ipse pater Paulus, & alij, quos nos extinctos arbitremur. Immo uero, inquit, hi uiuunt qui ex corporum uinculis, tanquam è carcere euolauerunt uestra, uero quæ dicitur uita, mors est. quin tu aspicias. ad te uenientem Paulum patrem. Quē ut uidi, equidem uim lacrymarum profudi: ille autem me amplexus, atque osculans, flere prohibebat. Atque ego ut primum fletu represso loqui posse cœpi, Quæso, inquam, pater sanctissime atque optime, quando hæc est uita (ut Africanū audio dicere) quid moror in terris, quin huc ad uos uenire propero? Nō est ita, inquit ille: nisi enim deus is, cuius hoc templum est omne, quod conspicias, istis te corporis custodijs liberauerit, huc tibi aditus patere non potest. homines enim sunt hac lege generati, qui tuerentur illum globum, quem in hoc templo medium uides, quæ dicitur terra: hisque animus datus est ex illis sempiternis ignibus, quæ sidera & stellas uocatis: quæ globosæ & rotundæ diuinis animatæ mentibus circulos suos orbésque conficiunt celeritate mirabili. Quare & tibi Publi, & pijs omnibus retinendus est animus in custodia corporis: nec iniussu eius, à quo ille est nobis datus, ex hominū uita migran-

dum est: ne munus humanum assignatum à deo defuisse uideamini. Sed sic Scipio, ut auus hic tuus, ut ego qui te genui, iustitiam cole & pietatem: quæ cum sit magna in parentibus, & propinquis, tum in patria maxima est. quia ea uita uia est in cælum, & in hunc cœtum eorum qui iam uixerunt, & corpore laxati illum incolunt locum, quem uides. Erat autem is splendidissimo candore inter flammæ circulus elucens, quem uos (ut à Graijs accepistis) orbem lacteum nuncupatis. ex quo omnia mihi contemplanti, præclara cætera, & mirabilia uidebātur. erant autem cæ stellæ, quas nunquam ex hoc loco uidimus: & cæ magnitudines omnium, quas esse nunquam suspicati sumus. ex quibus erat illa minima, quæ ultima cælo, citima terris, luce lubat aliena. stellarum autem globi terrarū magnitudinem facile uincebāt. Iam uero ipsa terra ita mihi parua uisa est, ut me imperij nostri, quo quasi eius punctum attingimus, poeniteret. quam cum magis intuerer, Quæso, inquit Africanus, quousq; humi defixa tua mens erit? nonne aspicias, quæ in templa ueneris? nouem tibi orbibus, uel potius globis connexa sunt omnia: quorum unus est cælestis extimus, qui reliquos omnes complectitur, summus ipse deus, arcens & continens cæteros, in quo infixi sunt illi qui uoluuntur, stellarum cursus sempiterni, cui subiecti sunt septem qui uersantur retro contrario motu, atque cælum. ex quibus unum globum possidet illa, quam in terris Saturniam nominant. deinde est hominum generi prosper & salutaris ille fulgor qui dicitur Iouis. tum rutilus horribilisque terris, quem Martem dicitis. deinde subter mediam ferè regionem Sol obtinet dux, &

princeps, & moderator luminum reliquorum, mens  
 mundi, & temperatio, tanta magnitudine, ut cuncta sua  
 luce lustret, & compleat. hunc ut comites consequun-  
 tur, alter Veneris, alter Mercurij cursus. in infimoque  
 orbe Luna radijs solis accensa conuertitur. infra autem  
 iam nihil est nisi mortale & caducum, præter animos  
 generi hominum munere deorum datos. supra Lunam  
 sunt omnia æterna. nam ea quæ est media, & nona,  
 tellus neque mouetur, & infima est, & in eam ferun-  
 tur omnia suo motu pondera. Quæ cum intuerer stu-  
 pens, ut me recepi, Quis hic, inquæ, quis est, qui complet  
 aures meas tantus & tam dulcis sonus? Hic est, inquit  
 ille, qui interuallis coniunctus imparibus, sed tamen  
 pro rata portione distinctis, impulsu & motu ipsorum  
 orbium efficitur: qui acuta cum grauibus temperans,  
 uarios æquabiliter concentus efficit. nec enim silentio  
 tanti motus incitari possunt: & natura fert, ut extre-  
 ma ex altera parte grauiter, ex altera autem acute  
 sonent. Quam ob causam summus ille cæli stelliferi  
 cursus, cuius conuersio est concitator, acuto & ex cita-  
 to mouetur sono, grauissimo autem hic lunaris atque  
 infimus. nam terra nona immobilis manens, ima sede  
 semper hæret complexa medium mundi locum. illi au-  
 tem octo cursus, in quibus eadem uis est duorum, Mer-  
 curij & Veneris, septem efficiunt distinctos interuallis  
 sonos: qui numerus rerum omnium ferè nodus est.  
 quod docti homines neruis imitati, atque cantibus ape-  
 ruere sibi reditum ad hunc locum: sicut alij, qui præ-  
 stantibus ingenijs in uita humana diuina studia colue-  
 runt. hoc sonitu completæ aures obsurduerunt: nec  
 est ullus hebetior sensus in uobis, sicut in illis, ubi Ni-


lus ad illa quæ Catadupa nominantur, præcipitat ex altissimis montibus: ea gens quæ illum locum accolit, propter magnitudinem sonitus sensu audiendi caret. Hic uero tantus est totius mundi incitatissima conuersione sonitus, ut cum aures hominum capere non possint: sicut intueri solem nequitis aduersum, eiusque radijs acies uestra, sensusque uincitur. Hæc ego admirans, referebam tamen oculos ad terram identidem. tum Africanus, Sentio, inquit, te sedem etiam nunc hominum contemplari, ac domum. quæ si tibi parua, ut est, ita uidetur, hæc cælestia semper spectato, illa humana contemnit. tu enim quam celebritatem sermonis hominum, aut quam expetendam gloriam consequi potes? Vides habitari in terra raris, et angustis in locis, et in ipsis quasi maculis, ubi habitatur, vastas solitudines interiectas: hosque qui incolunt terram, non modo interruptos ita esse, ut nihil inter ipsos ab alijs ad alios manare possit, sed partim obliquos, partim auersos, partim etiam aduersos stare uobis: à quibus spectare gloriam certe nullam potestis. cernis autem terram eandem quasi quibusdam tedinutam et circumdatam cingulis: è quibus duos maxime inter se diuersos, et cæli uerticibus ipsis ex utraq; parte subnixos, obriguisse pruina uides: medium autem illum, et maximum solis ardore torreri. duo sunt habitabiles: quorum Australis ille, in quo qui insistant, aduersa uobis urgent uestigia, nihil ad uestrum genus. hic autem alter subiectus Aquiloni, quem incolitis, ærne quàm uos tenui parte contingat. omnis enim terra, quæ colitur uobis, angusta uerticibus, lateribus latior, parua quædam insula est, circumfusa illo mari, quod Atlanticum,



quod Magnum , quod Oceanum appellatis in terris: qui tamen tanto nomine quàm sit parvus , uides. Ex his ipsis cultis, notisq; terris num aut tuum, aut cuiusquam nostrum nomen uel Caucasum hunc, quem cernis, transcendere potuit, uel illum Gangem transnare? quis in reliquis Oriētis, aut obeuntis solis ultimis, aut Aquilonis , Austrine partibus tuum nomen audiet? quibus amputatis, cernis profecto, quantis in angustijs uestra gloria se dilatari uelit. ipsi autem qui de nobis loquentur, quàm diu loquentur? Quinetiam si cupiat proles illa futurorum hominum demceps laudes unius cuiusq; nostrum à patribus acceptas posteris prodere, tamen propter eluiones, exustionesq; terrarum, quas accidere tempore certo necesse est, non modo non æternam, sed ne diuturnam quidem gloriam assequi possumus. Quid autem interest, ab ijs qui postea nascentur, sermonem fore de te, cum ab ijs nullus fuerit, qui ante nati sint? qui nec pauciores, & certe meliores fuerunt uiri: cum præsertim apud eos ipsos , à quibus nomen nostrum potest audiri, nemo unius anni memoriam consequi possit. homines enim populariter annum tantummodo solis, id est unius astri reditu metiuntur. cum autē ad idem, unde semel profecta sunt, cuncta astra redierint, eandēque totius cæli descriptionem longis interuallis retulerint, tū ille uere uertens annus appellari potest: in quo uix dicere audeo, quàm multa secula hominū teneātur. nanq; ut olim deficere sol hominibus extinguiq; uisus est, cum Romuli animus hæc ipsa in tēpla penetrauit: quandoquē eadē parte sole eodēque tēpore iterū defecerit, tum signis omnibus ad idem principii, stellisq; reuocatis, expletum annum habeto.

Huius quidem anni nondum uigessimam partem scito esse conuersam. Quocirca si reditum in hunc locum desperaueris, in quo omnia sunt magnis, et præstantibus uiris: quanti tandē est ista hominum gloria, quæ pertinere uix ad unius anni partem exiguam potest? Igitur alte spectare si uoles, atque ad hanc sedem, et æternam domū contueri: neque sermonibus uulgi dederis te, nec in præmijs humanis spem posueris rerum tuarum: suis te illecebris oportet ipsa uirtus trahat ad uerū decus. quid de te alij loquantur, ipsi uideant: sed loquentur tamen, sermo autem omnis ille et angustijs cingitur ijs regionum quas uides: nec unquam de ullo perennis fuit: et obruitur hominum interitu: et obliuione posteritatis extinguitur. Quæ cū dixisset, Ego uero, inquam, o Africane, siquidē benemeritis de patria quasi limes ad cæli aditum patet, quanquam a pueritia uestigijs ingressus et patris, et tuis, decori uestro non defui, nunc tamen tanto præmio proposito enitar multo uigilantius. et ille, Tu uero enitere: et sic habeto, te non esse mortalem, sed corpus hoc. nec enim is es, quæ forma ista declarat: sed mens cuiusque is est quisque, non ea figura quæ digito demonstrari potest. deū te igitur scito esse: siquidem deus est, qui uiget, qui sentit, qui meminit, qui præuidet, qui tam regit, et moderatur, et mouet id corpus, cui præpositus est, quàm hūc mundum princeps ille deus: et ut ipsum mundum ex quadam parte mortale ipse deus æternus, sic fragile corpus animus sempiternus mouet. Nam quod semper mouetur, æternum est: quod autem motum affert alicui, quod ipsum agitur aliunde, quando finem habet motus, uiuendi finem habeat necesse est. solum igitur

quod sese mouet, quia nunquā deferitur à se, nunquam  
 ne moueri quidem desinit. quin etiam cæteris quæ mo-  
 uentur, hic fons, hoc principium est mouēdi. Principio  
 autē nulla est origo: nam ex principio oriūtur omnia:  
 ipsum autem nulla ex re fieri potest. nec enim esset  
 hoc principium, quod gigneretur aliunde. quod si nun-  
 quam oritur, nec occidit quidem unquam: nam princi-  
 piū extinctum, nec ipsum ab alio renascetur, nec ex se  
 aliud creabit. si quidem necesse est à principio omnia  
 oriri: ita sit, ut motus principii ex eo sit, quod ipsum à  
 se mouetur. id autē nec nasci potest, nec mori: uel conci-  
 dat omne cælū, omnisq; natura, consistat necesse est, nec  
 uim ullam nanciscatur, qua primo impulsu moueatur.  
 Cū pateat igitur æternum id esse, quod à se ipso mo-  
 ueatur: quis est, qui hanc naturā animus esse tributam  
 neget? inanimatū est enim omne, quod impulsu agita-  
 tur externo. quod autē anima est, id motu cietur inte-  
 riore. nam hæc est natura propria animæ, atque wis.  
 quæ si est una ex omnibus, quæ sese moueat, neq; nata  
 est certe, & æterna est. hæc tu exerce in optimis rebus.  
 Sunt autē optimæ, curæ de salute patriæ: quibus agita-  
 tus, & exercitatus animus, uelociter in hanc sedem &  
 domū suam peruolabit: idq; ocyus faciet, si iā tum, cum  
 erit inclusus in corpore, emunebit foras, & ea quæ ex-  
 tra erūt contēplans, quāmaxime se à corpore abstra-  
 het. Nā corū animi, qui se corporis uoluptatib<sup>9</sup> dedide-  
 runt earūq; se quasi ministros præbuerunt, impul-  
 sūq; libidinū uoluptatibus obedientiū, deorum & homi-  
 num iura uiolauerūt, corporibus elapsi circa terrā ip-  
 sam uolutantur, nec in hūc locū nisi multis exagitati secu-  
 lis reuertitur. Ille discessit: ego sōno statim solutus sum.



Varia lectiones ex antiquis libris.

Vitæ conform.	6.	Ad eius, qui punitur al.	
Verissimum sit, isque	9.	(ex Nonio)	36.
Laudabitur: vt in astro-		Quidē omnino sine ra-	
nomia	10.	tionē	37.
Studiis cognitionis etiā		Nullō neque turpi	37.
10.		Potest, quā oratiōe	38.
Ira, aut alia pert.	12.	Etiā in vitiosis,	39.
Id modo temeritas	13.	Sedandōsque esse, exci-	
Cogitato	13.	tandāque an.	41.
Ad ea quæ posui	14.	Bestiis antecellat.	42.
In qua scribit	17.	Druso adolescētibus	43.
Ab homine, sed	19.	Ideoque nihil	44.
In moribus. De ben.	20.	AEquabilitas tū vn.	44.
Licet, modo	21.	Perpeti ab vllō mal.	45.
Obiurgationes in ami-		Nobis à natura data	46.
citiis	25.	Spatium etiā del.	47.
Vicinum potius a.	25.	Constantior : vt tamen	
Muliebrē, illa virago	25.	fort.	48.
Quasi pleno ore	26.	Eam mutationem	48.
Excellens.	26.	Opera, vt & am.	49.
Dicunt pugnantem	26.	Molle: nequid	51.
Oportere, nulli neq;	27.	Scenam	51.
Vtiles, sed tum veh.	27.	Muliebrem dic.	51.
Magnique duc.	28.	Forma virili rem.	52.
Autē Remp. nihilo	30.	Omnes, vt etiā in	53.
Committere, vt	33.	Res, (neq; e. i. d. r. n. i. o.	
Tempus, necess.	33.	t. n. i. d.) animaduerte	
Discordiæ, in	35.	dū erit, quatenus	54.
Offendat aliquos, mor-		Facere ne vid.	54.
tēque oppetat	35.	Adiuncta, vt & seu.	54.
Facilitas, & μεγαλοψυχία		Scaurus filius dem.	55.
quæ	36.	Ratio non sui	55.

Quarū quidā certus 56.  
 Velimus.vt néve 56.  
 Aguntur,aut dic. 56.  
 Sic videndum 58.  
 Quale quidque 58.  
 Fabricant,& vero 58.  
 Seruare.lam 59.  
 Opifices quoque 59.  
 Nec.n.quicquam 59.  
 Ergo cogn. 61.  
 Vtilioresque rebus & su  
 is,& p. 62.  
 Lysias Pythagor. 62.  
 Quidem propter se 63.  
 Inutile : tum ex duobus  
 vtil.q.v. aut ex pluri-  
 bus quid max. 64.  
 Malis hoc tamen 65.  
 Cateri alia 66.  
 Contra, alia non pr. 67.  
 Deducta est, v.a.h.v.sc-  
 cernens,const. 67.  
 Confusa cognitione 67.  
 Parum persp. 67.  
 Pietas efficit 68.  
 Autem secundum 68.  
 Earūmq; item rerū 68.  
 Noceant,& profint 68.  
 Effecta opera 68.  
 Manu,atque opere 69.  
 Pascere eas,aut 69.  
 Eisdēque & ea 69.  
 Vita hominū onino 69  
 Tantum distitit 69.

Collectis exteris 70.  
 Per eosdēmq; ,siquid 71.  
 Pretio,ac m. 72.  
 Hominum valeat 73.  
 Ita se instituunt 73.  
 Hasta non rec. 75.  
 Viros,æque 76.  
 Hāc enim homines 77.  
 Opinata quādam 78.  
 Quādam vero afficiunt  
 ii, 78.  
 Perspectū sit, hunc igni  
 spectatum 79.  
 Vis est,vt ne 79.  
 Prædæ partitionem 80.  
 Cui quidē etiā exer. 80.  
 Iudicia in cōstituta Re-  
 pub. 80.  
 Gloria & quær. 81.  
 Optime impræm. 83.  
 Nō est id quidē dub.83.  
 Intelligere eum,& s. 83.  
 Aut patrociniū 84.  
 Etiam,quā larg. 85.  
 Nullā omnino s.r.li.86.  
 Quoque,in quo 87.  
 Bene igitur collegit,87.  
 Postularetur,& P. 87.  
 Coniecerat. 89.  
 Spes,quanto in 91.  
 Reddiderit,h.g.a.c.q.r.  
 h.c.q.h.reddidisse 92.  
 Acceperint : atque eti-  
 am 92.

Illud item,	93.	Re & vtilitas, & tur.	113.
Sibi à te par.	93.	Condidit, non item	116.
Pauperi, an m.	93.	Omnibus cubiculis	120.
Oratio, ad	94.	Iuste, an improbe	120.
Sua tuerentur	94.	Cymbarum? at ille	122.
Malo enim alienæ	94.	Ex eo quæreretur,	122.
Fieri & soleat	95.	Vendat, quicquam	123.
Næ illi multa	95.	Emptor apponet	123.
Iudiciis, ærarii expil.	95.	Vere i. q. si quidē, id esse	123.
Quid ni laudet?	95.	Quib <sup>9</sup> adderetur, Ex	126
Africanus nihilo	95.	Omnis e. quod e. sciri	127
Vnde dig.	96.	Furtis, præstatur	127.
Data, etiam	96.	Quibus se pecc.	127.
Secutæ s. vt & tyr.	97.	Carcere fatigandi.	127.
Continere. habitas	98.	Istorum) num erat	128.
Modo, valere vtrum	100	Præmium sibi pr.	133.
Africani o. n. hæc sol.	101	Velit, quia sua sit.	134.
Inopia, non req.	101.	Hic; sint æque sap.	134.
Cogitant: tum	102.	Vitiat non, nisi ea, quæ	ni d.
Cratippi. quò cum	103.		135.
Neminem esse persecu		Mille denarium?	135.
turum.	104.	Impetret, vt iterum	135.
Disputamus, & m. f. a. ea		Faciendū sit? c. f. i. i. q. n.	c. u. n. e. q. f. iniuriæ: 135
comm.	105.	Arbitror fuisset	136.
Officia compareant,	105	Insanus: antequā c.	136.
Honestæ dicuntur	106.	Quo impetrato,	136.
Cōmunia, itaque iis	106	At vtile, aliquis	137.
Tanquam à sapiētibus		Recusauit, quoniā dum	iur. h. t. n. esset Sena-
pet.	106.		tor.
Fuerunt, ne illi	106.		138.
Celsitas animi, &	109.	Neque vero tum ign.	139.
Vacent iniustitia,	110.		
Commodis detra.	111.		
Idem h. nihil hon.	112.		

Turpitudine i. habebat, 139.  
 Fides alta pinnis 140.  
 Corporis habet 141.  
 Cum hoc nec f. 141.  
 Tēpore L. Liuius Q. Me-  
 lius, (ex Linio) 142.  
 Erant captiui, nisi 144.  
 Si hæ non 146.  
 Talibus monitis, 147.  
 Deferunt, ne in 151.  
 Ante Cōsulatum poste-  
 riorē f. 155.  
 Male r. g. patriis 156.  
 Adolefcens vires 158.  
 Virib<sup>9</sup> esse extremo 159.  
 Quæstor eodem 160.  
 Diligētia cōpescēda, vel  
 compensanda 162.  
 Est aliquid, probo. quod  
 162.  
 Quidē exercitationū  
 defatigatione 162.  
 Quid quotidie dixerim,  
 audiuerim, 163.  
 Incitari nisi voluptatis  
 164.  
 Dedidissent. 165.  
 (dininitus enim 165.  
 Crebro funali 166.  
 Naturalis motus 166.  
 Vicissim hieme 167.  
 Cerhego, Tud. Coss. 168.  
 Vap. & compressu 169.

Pubescens induitur 169.  
 Quemuis cum adm. 169  
 Longe à mea) 170.  
 Elogiū, vno ore quāp.  
 173.  
 Notum est carmen 173.  
 Appeti, assurgi, 173.  
 Sperare item 175.  
 Dixi ante 176.  
 Possis, & inde mortē m-  
 que 177.  
 Tandem re fr. 177.  
 Deos i. spirauisse 179.  
 Hæc Plato ait noster 180  
 Nec tanquam pilā re-  
 torserit 181.  
 Habitādi locū dedit 182.  
 Animorū diuinum cōc.  
 182.  
 Nemo vnquam fuit. q.  
 q. m. c. a. f. quisquam,  
 186.  
 Sorores, benignitate 187  
 Catonem anno a. 187.  
 In vita c. l. viderat, 187.  
 Rebus, quæ ex 189.  
 Optatur, spectare d. 190.  
 Putem<sup>9</sup>, q. sequuntur 190  
 Proxime adhæreret. 190.  
 Iungatur. est enim 190.  
 Amicitiam & g. 191.  
 Quidam docti 191.  
 Catones, Gallos, 191.  
 Igni (vt aiunt) pl. 191.



<u>Ipsa &amp; d.</u>	192.	<u>Gerunt otiosi.</u>	215.
<u>Contineat, tamen</u>	192.	<u>Auget assentator</u>	229.
<u>Verum etiam qui</u>	192.	<u>Solet oratoriis</u>	222.
<u>Perscueraret ad st.</u>	192.	<u>Vero tibi illa</u>	222.
<u>Sentirem potuisse dice-</u>		<u>Septem. cuius</u>	224.
<u>re</u>	192.	<u>Efficit. ac l.</u>	226.
<u>S C A E. Tum m.</u>	193	<u>Temperantem, qui</u>	229.
<u>Consuetudo, &amp; q.</u>	195.	<u>Discrimen: æque</u>	229.
<u>Hæc ita multa, q.</u>	197.	<u>Necando, si absit</u>	230.
<u>Quidem. si vol?</u>	198.	<u>Vita tu, quæ</u>	230.
<u>Cato. at minime</u>	199.	<u>Rebus aduincam</u>	231.
<u>Confiliū vèro libere dā-</u>		<u>Populi liber,</u>	231.
<u>re g.</u>	200.	<u>Loco, an animo</u>	232.
<u>Eaque &amp; adhib.</u>	200.	<u>Eris tu exul: num</u>	232.
<u>Causa est. cur am.</u>	201.	<u>Tamen serui: sic ii pari</u>	
<u>Vt &amp; bonis</u>	202.		234.
<u>Contrabat amicitia</u>	202.	<u>Sat est, metiuntur</u>	237.
<u>Amicitiam secuta</u>	203.	<u>Venalia, delicta, &amp; d.</u>	239
<u>Qui habitus sap.</u>	205.	<u>Feruntur o. f. nutu</u>	245.
<u>Minime re. f. n. (f. r.</u>	206.	<u>Vobis, sicut, vbi</u>	245.
<u>Oblatas cr. rep.</u>	280.	<u>Obliquos, p. transuersos</u>	
<u>Famulatu fuerant</u>	209.		246.
<u>Expetenda, næ</u>	212.	<u>Quibus sperare</u>	246.
<u>Fit à natura</u>	213.		

Varia lectiones ex ingenio.

<u>Amici: atque pl.</u>	11.	<u>tarchus)</u>	17.
<u>Afferre mutuat</u>	11.	<u>Lumen de lumine</u>	22.
<u>Depositū etiam, nec</u>	14.	<u>Amabilius, nec copulan</u>	
<u>Indictum. Paulus AEmi</u>		<u>tius</u>	24.
<u>lius (sub hoc. n. mili-</u>		<u>Leuctris, Stratóque</u>	26.
<u>tasse Catonis Censo-</u>		<u>Eosdem &amp; bonos</u>	26.
<u>rii filium, auctor Plu-</u>		<u>Videbatur. parui</u>	31.

Solum, sed	55.	dix.	163.
Hoc sit, esse id quidē & 76.		Putavi. ille	164.
Aliquid, aut palā er.	79.	<u>Igitur iuvenes sibi</u>	164.
<u>Sardis contra T. Albutiū</u>		<u>Solatio, q. e. mœrore</u>	171.
<u>(ex orat. vol. I. 132.)</u>	84	<u>Adolescētiā peruenis-</u>	
<u>Ministrum, &amp; diribito-</u>		<u>sent,</u>	197.
<u>rem</u>	85.	<u>Quām in improbis pec-</u>	
Deterrendo à lib.	89.	197.	
<u>Tertium: b. vitire</u>	100.	Lenate	198.
<u>Nemini: certe istum</u>	124	<u>Consentiunt. nanque à</u>	
<u>Inficiatus e. dupli poenā</u>		m.	214.
124.		Rutilii Virginiani	220.
Potius d. n. e. æ. q. n. e. v.		Autem illis	227.
R. quām, cum vtilem		Infanum rationibus cō	
non esse diceret, esse		uincam.	31.
æquam fateretur	134.	Suis cuique (ex Attici vi	
O' fides alma, à qua pē-		ta)	234.
det iussu.	140.	<u>Familia sunt alii</u>	234.
Congregātur: queis	150.	Delectant. at inquit	
Mortem Q. filii (ex Li-		234.	
uio, & Gellio)	152.	Dignum. Echionis	235.
Hic quintus, & tr.	155.	Patrociniis, intercessio-	
<u>Comicos (ex 229.)</u>	162.	nes pec.	238.
<u>Gratia, quid quoque die</u>		Duorum, septem	245.

EXCVDEBAT ROB. STEPHA-

NVS TYPOGRAPHVS RE-

GIVS, PARISIIS, AN.

M. D. XLIII. XV.

EAL. OCTOB.





